





元 脱 脱 等撰

華 書

中

局

卷九七至卷一一四(傳)第 七 册

金史卷九十七

列傳第三十五

裴滿亨 斡勒忠 張大節 子巖叟 張亨 韓錫 鄧儼

巨構 賀揚庭 閻公貞 焦旭 劉仲洙 李完

馬百祿 楊伯元 劉璣 兄珫 康元弼 移刺益

裴滿亭字仲通,本名河西,臨潢府人。 其先世居遼海、祖諱虎山者,天輔間,移屯東受

降城以禦夏人,後徙居臨潢。

年、擢第、世宗嘉之、升爲奉御。 亨性敦敏習儒,大定間,收充奉職,世宗謂曰:「聞爾業進士舉,其勿忘爲學也。」二十八 日問以上古爲治之道,亨奏:「陛下欲興唐、虞之治,要在

列傳第三十五 裴滿亨

進賢,退不肖,信賞罰,薄徵斂而

朕盡言。」俄擢監察御史。內侍梁道兒恃恩驕横,朝士側目,亨劾奏其姦。 之,贈嘉議大夫,賻物甚厚。 己俸爲之賙贍,及勸率僚屬大姓同出物以濟。 家豪奪民田,亨檢其實,悉還正之。 境帖然。 爲定國軍節度副使,三遷同知大名府事。先是,豪猾從衡,前政莫制,亨下車宣明約束,闔 章宗卽位,諭之曰:「朕左右侍臣多以門第顯,惟爾繇科甲進,且先朝信臣,國家利害爲 承安四年,改河南路按察副使,就遷本路副統軍,中都、西京等路按察使。 泰和五年,改安武軍節度使。 轉河東南北路按察使,卒於官。 歲大雪,民多凍殍,亨輸 遷鎬王府尉,出 上聞而惜 時世襲

州郡、皆有政績可紀云。 序性尤謹密,出入宮禁數年,讜議忠言多所裨益,有藁則焚之,雖家人輩莫知也。 所歷

寺知法,遷右三部司正。練達邊事,嘗奉命使北,歸致馬四千餘匹,詔褒諭之。 年爲監察御史,轉尙書省都事。 副使徒單移刺古舉以自代,改滕州刺史。 斡勒忠本名|宋浦, 蓋州人也。 章宗立,遷尚書兵部員外郎,出爲滄州刺 習女直、契丹字,歷兵部、樞密院、尚書省令史,再轉大理 嘗調發黃河船,數以稽期聽贖。 史。 授北京副留守, 大定二十六 河東路提刑

入爲同簽樞密院事,兼沂王傅。

自守,不交權貴,故時譽歸之。 承安二年,拜武寧軍節度使, 致仕。 泰和三年卒,年七十一。 忠性敦整,通法律,以直

宗謂 大節 務,甚愛重之。 同 知洛 宰臣 曰:「自有定分,何遽爾。」隨例補尚書省令史,擢祕 張 州 大節字信之,代州五臺人。 防禦使事 曰:「朕 海陵修汴京,以大節領其役。 得其人矣,」遂授大節。 擢天德三年進士第,調崞縣丞。 俄以杖殺豪民爲有司所劾,削 世宗改元於遼東, 書郎、大理司直。 或勸赴之,富貴 改東京市令。 階解 會左警巡使闕 職。 可 世宗判留 未幾,授 朝 世 逐,

侍郎,改戶 戶部郎中,定襄退 惡,或欲徵民先所給直,大節曰:「此有司受納之過,民何與焉。」以其事聞,卒得免徵。 戶籍,人服其平。 入爲太府丞、工部員外郎。 部。 世宗 進工 吏誣縣民匿 東巡、徙太府監、諭之曰:「侍郎與太府監品同、以從行支應籍卿辦耳。 部郎中。 銅者十八村,大節廉得其實,抵 時阜通監鑄錢法弊, 盧溝水囓安次,承詔護視堤城。 與吏部員外郎麻 東罪,民斵石 擢修內司使,推排 珪 涖 頌之。 其事 , 積 召授工部 東京路 銅 就 皆 窳 改

列傳

第三

+

Ŧi.

斡勒忠

張

大節

膀其公堂曰「惟中」。郡境有巨盜久不獲,大節以方略擒之。 尋爲宋生日使,還授橫海軍節度使,過闕謁謝東宮,顯宗撫慰良久,曰:「萬事惟中 後河決於衞,橫流而東,滄境 可也。」因

有九河故道,大節即相宜繕堤,水不爲害。

庫,大節還其廟以給營繕。選授河東路提刑使,未赴,留知大興府事,治有能名。 聞其妻哭聲不哀,召而審之,果爲姦夫所殺,人以爲神。 之,遂命減焉。乞致仕,不許,徙知太原府,以丼、代鄉郡,故優寵之。近郭有男子被殺者, 章宗卽位,擢中都路都轉運使,因言河東賦重宜減,議者或不同,大節以他路田賦質 西山有晉叔虞祠,舊以施錢輸公使

致仕,許之,仍擢其子尚書刑部員外郎巖叟爲忻州刺史,以便祿養。承安五年卒,年八十。 刑能禁其竊取乎。宜明諭民,授地輸課,則其游手者有所資,於官亦便。」上從其議。復乞 東、西京提刑司與州同議、皆以官權爲便、大節曰:「山澤之利當與民共,且貧而無業者雖嚴 閱歲,移知廣寧府,復請老,授震武軍節度使。 部有銀冶,有司以爲爭盜由此生,付河

凡事不肯盡心,一老姦耳。 推爲第一,嘗被召與禮部尚書張景仁弈。 世宗嘗謂宰臣曰:「人多稱王翛能官,以殷觀之, 張大節賦性剛直,果於從政,遠在王脩之上,惜乎用之太晚。」又

大節素廉勤好學,能勵勉後進,自以得學于任倜,待倜子如親而加厚。又善弈碁,當世

屢語近臣曰:「某某非不幹,然不及張大節忠實也。」其見知如此。

書省令史,除大理 員外郎、忻州刺 巖叟字孟弼,大節子也。 史,以父憂去官。 評事,再遷監察御史、同知河東北路轉運使事、中都路都轉運副使、 大定十九年進士,調度州司候判官,再除雄州觀察判官,補尚 起復大理 一少卿、河北東西大名等路按察轉運副使,累遷刑 刑部

部侍郎,兼夔王傅,太常卿兼國子祭酒。

是任 城而不任 大安三年,朝廷欲塞諸城門以爲兵備,集三品官議於尚書省,巖叟曰:「塞門所以受兵, 人。 莫若遣兵擇將,背城疾戰。」時議多之。 逾年,按察司言其年老不任邊要,乃致仕,退寓洛陽,卒。 除鎭西 軍節度使,移定國軍。 貞

官、歷鉅鹿、宜川令。 郎,移吏部。 張亨字彥通,大興漷陰人。 擢中都路都轉運使,坐草場使鄧汝霖盜草失舉劾,解職 大定二年,補尚書省令史,除大理司直,累遷尚書左司郎中 登皇統六年進士第,調樊山丞,以廉 削 、幹聞。 官。 授弘 ·, 授 州 戶部侍 軍 事

曰:「惠迪爲人雖正,於事不敏,亨夷才極高。」上曰:「如汝父浩,於事明敏 起授戶部尚書。 世宗問宰臣曰:「御史中丞馬惠迪 與 、張亨 人才孰優了平章政事 少有及者,但臨事 張汝霖

列

奏事 多徇 爲衆議所歸,以股觀之,無甚過人。 出爲絳陽軍節度使。 國用,無乃重勞民力乎。 不給,欲輦運以支調度,享謂:「上京距都四千里,若輓錢而 多有脫略,是亦謬庸人也。」 無 此 過 則誠難得之賢相也。」時車駕東巡,費用百出,自遼以東泉貨甚少,計司患其 已而,復謂宰臣曰:「漢人三品以上官常少得人, 不若行會便法, 使行旅便於囊橐, 小官中豈無才能之士,第未知耳。」又曰:「序嘗爲左司, 行,是率三而致一也,不獨枉費 國家無轉輸之勞而用自足矣。」 如張亨近令補外,頗

事劾之,降授蔡州防禦使。 七十八。厚才識强敏,明達東事,終始有可稱云。 訪其利病,條爲十三事以聞,上嘉納之。 章宗卽位,初置九路提刑司, 明年,遷南京路轉運使,轉知歸德府事,致仕。 時方重其選,上以亨爲河東南北路提刑使, 亨在職每事存大體、略苛 細,御史以寬緩不事 泰和二年卒,年 兼勸農採訪

韓錫字難老,其先自析津徙薊之漁陽。 祖貽愿,遼宣徽北院使。 父秉休,歸朝,領忠正

軍節度使。

錫以廕補閤門祗侯。 天會中,南伐,錫從軍掌禮儀,俄以母老迺就監差。 **外之,授神銳**

軍都指揮使,入爲宮苑使。 天德元年,擢尚書工部員外郎,領燕都營繕。 特賜胡礪榜進

及第、日四遷尚書戶部侍郎、日以母喪解。

責之,衆稍亡,緣召諸豪諭之曰:「今連保法嚴,逃將安往,縱一身偶脫,其如妻子何。」衆悟, 錫部船三百會廣陵。 旋起復 舊職、付金牌一、銀牌十,籍水手於山東。 適保衡敗還,喪船過半,令錫補足之。時水淺,船不得進,海陵遣使急 時蘇保衡爲水軍都統制、趨杭州、

禦使,累拜絳陽軍節度使,改知濟南府事,告老,許之。 曰:「聞皇族居彼者縱甚,卿當以法繩之。」錫下車宣布詔言,後無有撓政害民者。 大定改元於遼東、錫奔赴行在、韶復前職。 明年,授同知河間府事,引見於香閣,誠之 明昌五年卒,年八十三。 遷孟州防

者稍止。

郎王翛、 辛苦不同、其 中 尋轉左司,掌機務者數 鄧儼 、工部侍郎張大節、左司郎 字子威,懿州宜民人也。 命儼往。」嘗謂宰臣曰:「人言鄧儼用心不正, 朕視儼奏事 年。 有司 中鄧儼對、世宗 天德三年,擢進士第。 奏使宋者,世宗 曰:「王翛、張大節苦無資歷,與 命選漢官一人,參知政 大定中,為左司員外郎、右司郎 其 心識 事梁肅 甚 明,在太府 左 以 戶部 右 官 侍

銓選,當得通練人,可置儼於吏部。」因改命焉。 監心亦向公。」宰臣因奏儼明事機、有心力,於是擢戶部侍郎。 累遷中都路都轉運使。 翌日,復謂宰臣

之風 喪葬過度之禮,罷去鄕社追逐無名之費,用度有節則蓄積 日廣矣。」尋知歸德府事,致仕, 俗競爲侈靡,莫若定立制度,使貴賤、上下、衣冠、車馬、室宇、器用各有等差,裁抑婚姻 明昌初,爲戶部尚書。 上命尚書省集百官議,如何使民棄末務本以廣儲蓄。 嚴言:「今

矣。」上然之,遂不復用云。 務自便耳。儼前乞致仕,陛下以其頗黠故許之,甚合衆議。今使復列于朝,恐風化從此壞 第以謀身爲心。」上曰:「朕亦知之。 初, **儼致仕復夤緣求進,上問左右「鄧儼可復用乎」。 平章政事完顏守貞曰:「儼有才** 然儼可以誰比。」守貞曰:「臨事則不後於人,但多

院,兼都水少監。 書省令史,授振武 巨構字子成,薊州平谷人。 軍節度副使。 時右司郎中段珪卒,世宗曰:「是人甚明正可用,如巨構每事但委順 幼篤學,年二十登進士第。 改同提舉解鹽司事,以課增入爲少府監丞。 由信都丞,察廉爲石城令,補尚 再遷知登聞 而 檢

任貴能與長官辨正,恐此人不能爾。若任以長官,必有可稱。」章宗卽位,擢橫海軍節度使。 已。」二十五年,除南京副留守,上謂宰臣曰:「巨構外淳質而內明悟,第乏剛鯁耳。 佐貮之

承安五年致仕,卒。

公行將大任矣。」構辭之。 大定中, 詔與近臣同經營香山行宮及佛舍, 其近臣私謂構曰:「公今之德人, 我欲舉奏, 構性寬厚寡言,所治以鎭靜稱,性尤恬退,故人旣貴不復往來,先遺以書則裁答寒溫 以廉慎守法在考功籍,始終無過云。 而

事 俄以廉能遷戶部郞中,進官二階。頃之,授左司郞中,改刑部侍郎、山東東路轉運使。 部員外郎、侍御史、右司員外郎。 大定十三年,由安肅令補尚書省令史,授沁南軍節度副使,入爲監察御史,歷右司都事、戶 多避難。 賀揚庭字公叟,曹州濟陰人也。登天德三年經義進士第,調范縣主簿兼尉,籍有治聲。 異時南人不習詞賦,故中第者少,近年河南、山東人中第者多,殆勝漢人爲官。」 世宗喜其剛果,謂揚庭曰:「南人礦直敢爲,漢人性姦,臨

明昌改元,詔諸路提刑使入見,親問所察事條,至揚庭則斥之曰:「爾何治之煩也。」明 章宗卽位,初置九路提刑司,驛召赴闕,授山東東西路提刑使。 揚庭性疾惡,纖介不少

疾,遂許之。

卒年六十七。

年,下除洛州防禦使,時歲歉民飢,揚庭諭蓄積之家令出所餘以糶之, 立石頌德。 改陝西西路轉運使,表乞致仕,上曰:「揚庭能幹者也, 當何如了」右丞劉瑋言其 飢者獲濟, 洛人為之

| 儼專務謀身,上下稱黠,致仕又求進用,弗可改也夫。 屢評南北 布告戒而 赴。 韓錫出守河間,面諭皇族之居彼者恣睢不道,俾繩以法,佞者必希旨以市權,錫下車宣 斡勒忠以吏道致身,始終不交權貴。世宗自立於遼東,歸者如市,張大節 曰:裴滿亨以進士選奉御,能陳唐、虞致治之道於宮庭燕私之地,又能斥中貴梁道兒 士習之優劣,亶其然乎。張亨始以繆庸見薄,晚以論列稱賞,亦砥礪之功歟。 是皆有識之士,不爲富貴所移者也。 巨構骫骳,賀揚庭骨鯁,大定於二人而 獨守正不 鄧

史,察康,升同知亳州防禦事,改中都左警巡使。 閻 公貞字正之,大興宛平人。大定七年擢進士第,調朝邑主簿。 以政績聞,遷同知武定軍節度使。 由普潤令補尚書省令 明昌

初,召爲大理正,累進大理卿。 承安元年,遷翰林侍讀學士,仍無前職,命與登聞檢院賈益

同看讀陳言文字。

公貞居法寺幾十年,詳愼周密,未嘗有過舉。 被命校定律令,多所是正,金人以爲法家

之祖云。

得賢才。 令收贖。」改良鄉令。 百人長,有司議其罪當杖決,世宗曰:「旭親民吏也,若因杖有官人復行杖之,何以行事? 焦旭字明銳,沃州栢鄉人。 畿甸尙如此,天下可知矣。」 平章政事 石琚薦 旭幹能可甄用,上然之,召爲 右警 世宗幸春水,見石城、玉田令皆年老不治,謂宰臣曰:「縣令最親民,當 第進士,調安喜主簿。 再轉大興令,攝左警巡事,以杖親軍 其

難居是職。」上命別舉,中丞李晏薦旭剛正可任,遂授之,而改天和獲鹿令。 事、語涉訛亂,卽收付旭,旭釋之不問,爲御史所劾,削官兩階,杖百八十,出爲大名府推官。 尋授右三部檢法司正,代韓天和爲監察御史,時御史臺言:「監察糾彈之司,天和諸科出身, 旭爲人剛果自任,不避權勢。 初,旭部民訴良,旭以無文據鬥本主,道逢監察御史訴其

巡使。

旭

年,登聞鼓院初設官,宰執奏司諫郭安民、補闕許安仁及旭皆堪擢用。 水監,以治河防勞進官一階,授西京路轉運使,卒。旭性警敏,練達時政,與王脩、劉仲洙輩 章宗初即位,太傅克寧、右丞相裏請上出獵,旭劾奏其非,上慰諭之,爲罷 改侍御史, 獵。 四遷都 明昌元

世稱能吏云。

判官,入爲刑部主事, 六遷右司員外郞, 俄轉吏部。世宗謂宰臣曰:「人有言語敏辯而庸常 率縣卒生執其一,餘衆遂潰,旦日掩捕皆獲。 尋以廉能進官一階,陞河北西路轉運司支度 澤令。縣近滹沱河,時秋成,水忽暴溢,仲洙極力護塞,竟無害。有盜夜發,居民震驚,仲洙 右丞張汝霖曰:「人之若是者多矣、願陛下深察之。」二十九年,出爲祁州刺史,以六善爲教, 不正者,有語言拙訥而才智通達、存心向正者,如劉仲洙頗以才行見稱,然而口語甚訥也。」 民化之。 劉仲洙字師魯,大興宛平人。大定三年,登進士第。歷龍門主簿、香河酒稅使,再調深

其冤,上書力辨,帝從之,迺復戲官爵而黨禁遂解。 章宗卽位、除中都、西京等路提刑副使。 先是,田穀等以黨罪廢錮者三十餘家,仲洙知 明昌二年,授幷王傅、兼同知大同府事,

洙 歲 尋 上 饑 改 書請 平陽 仲 以萊易石 表請 移德州防禦使。 開 倉、未報、先爲 朝 廷義 而 轉 不許。 運 賑 郭 貸、有司 邦傑、節度李晏皆舉仲洙 **外之**, 劾之,罪 以年老乞致仕, 以 贖 論 累表方聽 以自代。 時 仲 洙 兑 仲淵 陞 泰 爲 和 定海 以 罪 八年卒,年 軍 責 節 石 州 度使。 仲

仲 洙 性 剛直,果於從政,尤長於治民,所在皆有功迹,蓋一時之能

完言:「 乞以 皆 書 度 其 祠 誣 使 褒 服 也。 李完 諭 事 用 提 尙 廉 品官子 河 書省 字全 遷 明 遷 間 刑 昌 定 同 府 司 孫 襄 道 知廣寧府。 令史,正 初 治中。 疑 為爲 朔 及終 令, 其 寃 州 監察御 召補 場舉人,委臺官辟用。」 提 隆 馬邑人。 以 刑 間 尙 獄 初, 史。 司 用 .書省令史。 畀 遼濱 言「完習法律,有治 雜 完。 經童出· 故 流,大定初 民 事 完 崔 臺 廉得其賊乃舟師 身,復 元 一令史 時 入 以 以 城飲 上納 登詞 太師 以 縣 六 令 不 其言。 劇 部 賦 張 闕 歸 材 浩 進 令史久 人 也, 求得 士第。 軍 奏請,始純 廉 擢 民 問 尙 遂発同飲 次者補, 世宗選 P 無 書省都 於 調澄 間 水 語 取 中 城 <u>ــ</u> 能 事 進 吏皆 人。 ·, 有 主 陞 当出 士 吏八 一簿,有 沁 一、天下 一 同 改北 爲 小 人按 執 類 同 刺 同 遺愛、民 京臨潢路提 知 以 史, 飲 行 莫肯舉 爲當。 横 者 天下 仍 海 訊 爲 以 軍 劾。 ·, 院 今 立 壐 節

列

傳

第

Ξ

+

五

劉

仲

洙

李

完

二一五六

刑副便。

承安二 年, 遷陝西西路轉運使,尋授南京路按察使,卒。 完長於東治,所至姦惡屛迹,

民皆便之。

宰縣 主簿。 **迨世宗朝解黨禁,復召用焉。** 史,吏民畏愛。 爲尙書戶部員 復舉廉,升孟州防禦使,再遷南京路提刑使。 日清白有治迹,特遷官一階,升同知北京路轉運事。 馬 由龍 百祿字天錫,通州三河人。父柔德,天會初第進士,累遷翰林修撰,坐田瑴黨発官, 山令召補尚書省令史,不就,改権貨副使、平陽府判官,入爲國子博士。 外郎,與同知河北東路轉運事李京爲中都等路推 提刑司以狀聞、授韓王傅、同 百祿幼志學,事繼 知安武軍節度事。 母以孝聞、登大定三年詞賦進士第、調武清 御史臺以剛直能幹聞,轉知河中府。 委錄南北路刑 俄改兼同 排 使。 獄,所至無冤。 明昌初, 知興平軍,以提刑 遷耀 朝廷以 州 刺 召

四年致仕,卒。

諡曰貞忠。

司

免,起為遼州刺史。 評事,累除定海軍節度副使,用廉超授同知河東北路轉運事,入爲尚書刑部員外郞, 楊伯元字長卿,開封尉氏人。登大定三年進士第,調郾城主簿。 明昌元年,移涿州。 久之,**擢工部侍郎**,四遷安武軍節度使。 升楡次令,召爲 泰和三年 大理 以憂

決,明辯多中理。 伯元以才幹多被委注,凡兩爲推排定課使,累爲審錄官,人稱其平。 賜諡曰達。 每有疑獄,必專遣

致仕、卒。

官物,宜約量裁損。 長史,而令文學奏事何也?後勿復爾。」累除同知漕運司事,嘗奏言:「漕戶顧直太高, 事,盡心公家,不厚賞無以勸來者。」乃賜錢三千貫。 郞,條上便宜數事,世宗謂宰臣曰:「璣言河堤種柳可省每歲隄防之費,及言官錢利害,甚可 府文學。 劉璣字仲璋,益都人也。 前後戶部官往往偸延歲月,如濺者不可多得,卿等議其可者行之。 璣奏王府事,世宗責之曰:「汝職掌敎道,何預奏事」」因命近侍諭旨永中曰:「卿有 若減三之一,歲可省官錢一十五萬餘貫。」世宗是其言。 登天德三年進士第。 大定初、爲太常博士、改左拾遺、兼許王 擢潍州刺史,徙知濟州。 璣向言漕運省費 授戶部員外 虚費

民。」上曰:「朕聞璣在北京,凡奴隸訴良,不問契券眞僞輒放爲良,意欲徼福於冥冥,則在己 璣 爲人何如『參知政 未幾,遷同 知北京留守事,坐曲法放冤奴婢訴良者,左降管州刺史。世宗謂宰臣曰: 事程輝曰:「機執强跋扈,嘗追濟南府官錢,以至委曲生意而害及平

史臺所糾罷。 明昌二年,入爲國子司業,乞致仕不許,轉國子祭酒,尋擢太常卿,以昏耄不任職爲御 承安二年卒,年八十二。兄珫。

之奴何爲不放。」又曰:「璣放朕之家奴,意欲以此邀福,存心若是,不宜再用。」

珫字伯玉,幼名太平。 以功臣子補閤門祗候,遭父喪求終制,會海陵篡立,不許,改充

護衞。海陵忌宗室,珫坐與往來,斥居鄉里。

帶,皇太子以馬與幣爲贐。召爲同知宣徽院事,遷太子詹事、右宣徽使,與張僅言典領昭德 淮右,餘皆北來,韶從之。丁母憂,起復,三遷武庫署令。 矣。」改御院通進。 志寧,皆相繼來附。 再轉近侍局使,遷太子少詹事,兼引進使,賜襲衣。 世宗卽位,珫晝夜無馳上謁,世宗大悅,以爲護衞十人長。 與鳥居仁等往南京發遣六宮百司,珫建議留尚書右丞紇石烈良弼經略 還報,上喜其有功,呼其小字而謂之曰:「太平所至,庶幾能贊朕致太平 未幾,爲陝西統軍都監,賜廐馬、金 車駕幸西京,留玩爲中都總管判 往招宗敍、白彥敬、紇石烈

佳,卿 監瑋爲同 皇后園陵,襄事,太子贈以廐馬。 到必 知宣徽院 得調養。 珫柩過京畿, 勅有司致祭, 賻銀三百兩、重綵三十端。 事。[11] 疣朝辭,上曰:「卿舊臣,今補外,寧不惻然。 朕用卿弟在近密,如見卿也。」仍賜廐馬、金帶、綵十端、絹百匹。 卒官, 轉左宣徽使,以疾求補外,除定海軍節度使,以其弟太府 東萊瀕海, 風物亦

康元弼字輔之,大同雲中人。幼敏學,善屬文,登正隆二年進士第。 調汝陽簿,改崇義

軍節度判官。 由垣曲縣令補尚書省令史,累遷同知河北西路轉運使事,召爲大理丞。

卿。 按視,還言治故城便,遂復其舊。 中,水易爲害,請命於朝以徙之,卒改築於北原,曹人賴焉。 先是,衞州爲河所壞,增築蘇門以寓州治。 大定二十七年,河決曹、濮間、瀕水者多墊溺,朝廷遣元弼往視,相其地如盎,而城在盎 轉秘書少監,兼著作郎,改通州刺史,兼領漕事 水旣退,民不樂遷,欲復歸衞,於是遣元弼 出爲弘州刺史,閱歲授大理少

尚書刑部侍郎、兼鄆王傅、遷南京路轉運使。 章宗立,尊孝懿皇后爲皇太后,以元邴舊臣詔充副 承安三年致仕,卒。 衞 尉。 再轉大理卿,以喪去,起復爲

二 六〇

徐州 銳意 錄事,召爲樞密院知法,三遷翰林修撰。時北邊有警,詔百官集尚書省議之,太尉克寧 用兵、益言天時未利、宜俟後圖。御史臺舉益剛正可任、遂兼監察御史。未幾、改戶部 移剌益字子遷,本名特末阿不,中都路胡魯土猛安人也。以廕補國史院書寫,積勞調

郎

意,上曰:「特末阿不安在?此人可也。」卽授防禦使。 提刑副使。 法,多所全活。 爾其知之。」旣至,首出俸粟以食饑者,于是倅以下及郡人遞出粟以佐之,且命屬縣視以爲 惟在守令,比歲民饑,故遣卿等往撫育之。其資序有過者有弗及者,朕不計此,但以材選, 明昌三年,畿內饑,擢授霸州刺史,同授刺史者十一人,旣入謝,詔諭之曰:「親民之職 五年,宋主新立,詔以泗州當使客所經,守臣宜擇人,宰臣進擬數人,皆不合上 郡東南有堤久頹圮,水屢爲害,益增修之,民以爲便,爲益立祠。 升遼東路

鷹于山東,益奏:「乞止令調於近甸,何必驚遠方耳目。」 書聞, 上命有司治使者罪。 輕出,少有不利,非惟損大國之威,恐啓敵人侵玩之心」。 年,邊鄙弗寧,上御便殿,召朝官四品以上入議,益謂「守爲便。 天子之兵當取萬全,若王師 召爲尚書戶部侍郎,尋轉兵部。 屬羣牧人叛,命益同殿前都點檢克往招降之。承安二 出爲山東西路轉運使。 有勅使按 遷河東

列傳第三十五 移刺益 校勘記

益 又言:「隨路點軍官與富人飲會,公通獻遺,宜依准監臨官於所部內犯罪究治。」上皆納焉。 南北路按察使。 上言以爲「傷禮讓之風,亦恐同官因之不睦,別生姦弊。 舊制, 在位官有不任職,委所屬上司體訪。 乞止令按察司糾劾,似爲得體」。 州府長貳幕職,許互相舉申。

泰和二年,卒于官。

豈不信哉。 刺益 及也。 著治跡。 完、康元 不受御史風指,遂罹深憲。 剛 贊 劉珑 日:閻公貞定金律令,楊伯元定金推排,人皆以平稱之,難矣。 而敢言。 爾無他足稱,完論臺令史一事,元弼論曹、衞兩城,各當其可。 劉璣初以理財得幸,晚以曲法得罪,人有前後遭遇不同,而百祿求福不回,非璣所 以大定之立馳赴行在,雖終身榮寵,蓋一趨時之士耳。 大臣請人主遊獵,劾奏其非,爲之罷獵,誠有古人之風焉。 語曰「剛毅木訥近仁」, 劉仲洙 馬百祿初坐黨廢、晚 焦旭畿內小官、聽斷 剛而訥於言,移

校勘記

特賜胡礪榜進士及第 按本書卷一二五胡礪傳,天會「十年,舉進士第一」,則此「特賜胡礪榜進

士及第」九字不當在天德元年之後,疑是行文。

四遷尚書戶部侍郎 按本書卷五海陵紀,正隆二年正月「庚寅、 以工部侍郎韓錫同知宣徽院

事」。「戶部」作「工部」。

以其弟太府監瑋爲同知宣徽院事 按本書卷九五劉瑋傳,「遷戶部員外郎,就陞郎中, 改同知

宣徽院事」,未言官太府監。

金史卷九十八

列傳第三十六

完顏匡 完顏綱 完顏定奴

習國朝語。」因賜酒及綵幣。 禮。 謂臣出入宮禁,故增其歲言之耳。」顯宗顧謂近臣曰:「篤實人也。」命擇日,使皇孫行師 都,歲在壬申。」顯宗曰:「二十八歲爾,詹事乃云三十歲何也。」匡曰:「臣年止如此,詹事 (生府教讀完顏撒速、徐王府教讀僕散訛可二人,可使教皇孫兄弟。」顯宗曰:「典教幼子,須 用淳謹者。」已而,召見于承華殿西便殿,顯宗問其年,對曰:「臣生之歲,海陵自上京遷中 歲,顯宗命詹事烏林荅愿擇德行淳謹、才學該通者,使敎章宗兄弟。 閱月,愿啓顯宗曰:「豳 七月丁亥,宣宗、章宗皆就學,顯宗曰:「每日先教漢字,至申時漢字課畢,教女直小字, 完顏匡本名撒速,始祖九世孫。事豳王允成,爲其府教讀。 頃之,世宗韶匡、訛可俱充太子侍讀。 大定十九年,章宗年十餘

列

傳第三十六

完 顔

匡

史, 之學、不學,豈不相遠哉 臣之分,爲天 志 上相 日... 曰 一不不 亦 論語『 何以知此。 語 去 汝 寢 逐後。 其 然 輩 殿 學古, 小底 國。 ,古之賢者行其義也,行其道也。 知之爲知之,不知爲不知,是知也』。 下後世慮至遠也,非仁人而能若是乎。」是時,世宗如春水,顯宗從,二人者馬 武王伐尉,夷、齊叩馬而諫。 顯宗遲九住至,問曰:「何以後也。」九住以對,顯宗嘆曰:「不以女直文字譯 主上立女直科舉,教以經史,乃能得其淵奧如此哉。」稱善者良久,謂九住 惟前言是信。 夷、齊輕 去其親,不食周粟餓死首陽山,仁者固如 |斜死, 伯夷思成其父之志以去其國, 汝不知不達,務辯口以難人。 殿爲周, 庚、齊不食周粟遂餓 叔齊不苟從父之 由是觀之,人 而 死。 是乎?」 正 君 匡

知 之乎。」對日 |顯宗嘗謂 …「不知也。」顯宗曰:「撒速,始祖九世孫。 中侍局 都監蕭察查剌曰:「入殿小底完顏訛出、侍讀完顏撒速,與我同族, 訛出,保活里之世也。 始祖兄弟皆 汝

非常

人,汝何

由

[知此。]

當 春 立。 公 暘。 顯宗 滿 神 命匡 朝疑懼,獨先啓策。 化周浹,春生冬藏。」蓋取宗翰與睿宗定策立熙宗,及平陝西大破張浚于富平 作睿宗功德歌,教章宗歌之,其詞曰:「我祖睿宗,厚有 徂 征三秦,震驚來附。 富平百萬 望風 陰德。 奔仆。 靈恩 國祚有傳,儲 光被,時 嗣 酮

盛 顧 也。[1]二十三年三月萬春節,顯宗命章宗歌此詞侑觴,世宗愕然曰:「汝輩何因知此。」顯宗 事 ,
朕之樂豈有量哉。 :「臣伏讀睿宗皇帝實錄,欲使兒子知創業之艱難,命侍讀撒速作歌教之。」世宗大喜, 諸王侍臣 日「股念睿宗皇帝功德,恐子孫無由 卿等亦當誦習,以不忘祖宗之功。」命章宗歌數四,酒行 知, 皇太子能追念作歌 以敎其子,嘉哉 極歡,乙夜

教、措 鑑進 其志,今乃下第,使人意不樂。」是歲初取 謂侍臣 振紀 人,後除書畫直長。 H 曰:「是亦 癸卯、讀卷官吏部侍郎李晏、棣州 一謂侍 綱 禀,策題問「契敷五 二十五年,匡中禮部策論進士。 刑 日 ",施之萬世,何 兩 正 當 事, 石敦寺家奴 我只 中。 不詳『振紀綱』一 、欲問 匡曰:「編修衡 匡 教化、刑罰 術可致。」匡已試,明日 與訛可俱爲侍讀,匡被眷遇特異,顯宗謂匡曰:「汝無以訛可登第快 、唐括曷答曰:「侍讀二十一 教, 皐陶明五刑, 是以刑措 、助教 句,秪作兩事對, 兩事 防禦使把內刺、國史院編修官夾谷衡、國子 是歲,世宗在上京,顯宗監國。 丁,乃添 鑑長於選校,必不能中。」已 止四十五 振 入見,顯宗問對策云何, 紀綱 策必不能中。」顯宗 人,顯宗命添五人,僕散訛 年府試 不用、比屋可封。 句,命删 不中,我本不欲侍 去,李晏固執 而,匡果下第。 三月甲辰,御試, 匡日 命匡誦 今欲興敎化, 一一臣 不可 所對策, 可 讀 中在 熟觀策問 助教尼厖古 河武, ,今果誤 顯宗惜之, 措刑 四 終篇, 恐傷 前 敷

列

傳

第

 \equiv

+

六

完

顔匡

中都路

教授,侍讀如故。

快,但善教金源郡王,何官不可至哉。」是歲,顯宗薨,章宗判大興尹,封原王, 爲皇太孫。 匡仍爲太孫侍讀。 二十八年,匡試詩賦,漏寫詩題下注字,不取,特賜及第,除 拜右丞相, 立

(錄) 權 以 簽書樞密院事 中飽餉 邊事 更名啊,以避宋祖諱,事載本紀。 章宗卽位,除近侍局直長,歷本局副使、局使,提點太醫院,遷翰林直學士。 ,遂寢其奏。 ,屈意事匡,以馬幣爲獻,及私以官錢佐匡宴會費,監察御史姬端脩劾之,上方委匡 兼職 三年,入奏邊事,居五日,還軍。 如故。 承安元年,行院于撫州。 遷祕書監,仍兼太醫院、近侍局事,再兼大理少卿。 尋入守尙書左丞,兼修國史,進世宗實 河北西路轉運使溫昉行六部事,主軍 使宋,上令

能之任。 是非混淆,徒煩聖聽。 聖朝舊無提刑司,皇統、大定間每數歲一遣使廉察,郡縣稱治。 歲遣監察體究,仍不時選使廉訪。」上從其議,於是監察體訪之使出矣。 立提刑司、專糾察黜陟、當時號爲外臺、匡與司空襄、參政揆奏:「息民不如省官, 自古無提點刑獄專薦舉之權者,若陛下不欲遽更, 自立 此官,冀達下情, 不宜使兼採訪廉 今乃

院爲之備,迎擊障萬,敗其兵。 初 ,匡行院于撫州,障葛將攻邊境,會西南路通事黃摑按出 按出與八品職,遷四官。匡遷三官。匡奏乞以所遷三官讓 使鳥都椀部知其謀,奔告行

其 兄奉 御賽一,上嘉其義,許之。 改樞密副使,授世襲謀克。

康宮, 兵。」宋人辭曰:「盜 宣撫使,籍諸道兵,括戰馬,臨洮、德順 仗,修戰艦,期 人王俊,唐州獲宋諜者李忤,俊襄陽軍卒,忤建康人。 確山界奪民馬。 咎,繕器械,增屯戍,初未敢公言征伐,乃使邊將小小寇鈔以嘗試朝 勸宋主都建康節制諸 相 韓 以五 侂 三月,焚平氏鎭,剽民 冑。 賊也。 月入寇。 侂胄 嘗再爲 邊臣不謹,今黜之矣。」 件言侂胄謂大國 道。 國使,頗 河南 統軍 財物,掠鄧 、秦、鞏各置弓手四千人。 知朝廷虛實。及爲相,與蘇師旦倡議 司 西北 奏請益 州白亭巡檢家貲,持其印去。 用 兵為 兵連年,公私困竭,可 |俊言||宋 心之備。 人於江州、鄂、岳 韶平章: 韶揆遺書|宋人曰:「奈何興 廷。 政事僕散揆 泰和五年正 以得 屯 復讎,身執 遂平縣獲 志, 大兵,貯甲 命修 爲 月, 河 宋 其 建

問匡 畏 暇,恐不敢敗盟。」匡曰:「彼置忠義保捷軍,取先世 子仁守疆圉,不妄 也 、畏也合,上以爲然。 曰:「宋兵攻圍城邑,動輒數千,不得爲 曰:「於卿 宋人將啓邊釁,太常卿趙之傑、知大興府承暉、中丞孟鑄皆曰:「江南敗衂之餘,自救 何 如 生 『」||匡日:「子仁言是。」上愕 事,職也。 及河南統軍使統石烈子仁使宋還,奏宋 書曰『有備無患』,在陛下宸斷耳。」於是,罷 小寇。」上問 然 日:「 開寶、天禧紀元 卿前 參政思忠,思忠極言宋 議 云何,今乃中 永主修敬· ,豈忘中國者哉。」大理 變邪。 有 加, 河南宣撫司 三匡 人敗盟有 無他志。 一徐對 狀 上 卿 不

列

第

+

六

完

顏

匡

散揆還朝。〔三〕

揆大軍 行省事 天佑順 遣前 烏古孫兀屯 軍。 殄寇撫降, 縣,副統蒲察攻宜城縣取之。 戒諸軍毋虜掠、焚壞城邑。 斷襄、漢路。 鋒 頃之,以匡爲右副元帥。 六年二月、宋人陷散關,取泗州、四、虹縣、靈壁。 ,右副 渡淮,宋人聚兵襄、沔以窺唐、鄧,汴京留兵頗少,有掣肘之患,請出唐、鄧。」從之。 都統烏古論慶壽以騎八千攻棗陽,遣左翼提控完顏江山以騎五千取光化,右翼都統 亦卿籌畫之效也。 日闢土宇。 取神馬坡、皆克之。 宋隨州將雷太尉遁去,遂克隨州。 元帥 如故。 彼恃漢、江以爲險阻、箠馬而渡,如涉坦途、荆、楚削平,不爲難事、雖 匡進兵圍德安,分遣諸將徇下安陸、應城、 益宏遠圖,以副朕意。」匡進所獲女口百人。 揆請匡先取光州,還軍懸瓠,與大軍合勢南下。 匡奏:「僕散 十二月敗|宋兵二萬人于|信陽之東, 詔曰:「卿總師出 匡軍次白虎粒,都統完顏按帶取隨州,烏古論慶壽扼赤岸, 於是,宋鄧城、樊城戍兵皆潰。 四月,復詔僕散揆行省事于汴, 雲夢、漢川、荆山等 韶匡權尚書右丞, 賜詔獎諭, 疆屢捷, 制諸

圍襄陽,士卒疲疫,會宗浩至汴,匡乃放軍朝京師,轉左副元帥,賜宴于天香殿,還軍許州。 取穀城縣。 吳曦以 屬、漢內附、詔匡先取襄陽以屛蔽屬、漢。 僕散揆得疾,遂班師,至察,疾革,詔右丞相宗浩代之。 完顏福海破宋援襄陽兵於白石硲,遂 七年二月, 揆薨。 匡久

九月,宗浩薨,匡爲平章政事,兼左副元帥,封定國公,代宗浩總諸軍,行省于汴京。

宋督視江、淮兵馬事丘密奏之宋主。是時,宋主、侂胄見兵屢敗以爲憂,欲乞盟無以爲請, 妄,乃具奏。章宗詔匡移書宋人,當函侂胄首贖淮南地,改犒軍錢爲銀三百萬兩。於是,宋 牌至汴,以侂胄書上元帥府,匡復詰之,牌懇請曰:「此事實出朝旨,非行人所專。」 | 匡察其不 事,世爲伯姪國,增歲幣爲三十萬兩、匹,犒軍錢三百萬貫,蘇師旦等俟和議定當函首以獻。 壁已爲參政,不可遣。朱致知、吳琯已死,李大性知福州,道遠不能遽至。乃遣左司郎中王 作 青得報大喜過望, 乃召張巖于建康, 罷爲福建觀察使, 歸罪蘇師旦, 貶之嶺南。 是時, 李 至,宗浩以方信孺輕佻不可信,移書宋人,果欲請和當遣朱致知、「吾吳琯、李大性、李璧來。 割地,獻首禍之臣,然後可。」宋主因密諭丘密,使歸罪邊將以請焉。及宗浩代揆,方信孺 得密奏,即命遣人護元靚北歸,因請議和。 吏部侍郎史彌遠定計殺韓侂胄,彌遠知國政,和好自此成矣。 初,僕散揆初至汴,旣定河南諸盜,乃購得韓侂冑族人元靚,使行間於宋。元靚渡淮, 密使其屬劉祐送元靚申和議于揆, 揆曰:「稱臣

於是,廷議諸軍已取關隘不可與。王柟以宋參政錢象祖書來,略曰:

竊惟昔者修好之初,蒙大金先皇帝許以畫潍爲界。 今大國遵先皇帝聖意,自盱眙

萬,通謝爲三百萬貫,以連歲師旅之餘,重以喪禍,豈易辦集。 資財,竭民膏血,恐非大金皇帝棄過圖新、兼愛南北之意也。 悔艾之實,不得不黽勉遵承。又蒙聖畫改輸銀三百萬兩,在本朝宜不敢固違,然傾國 今川、陝關隘大國若有之,則是撤燭之門戶,不能保燭,何以固吳? 已增歲幣至三十 但邊隙旣開和議,區區

斯。 陜關隘,所畫銀兩悉力祗備,師旦首函亦當傳送,以謝大國。 貶, 侂胄尙力庇之, 囑方信孺妄言已死, 近推究其事, 師旦已行斬首。 已死也。「ki 侂胄實本庸愚,怙權輕信,有誤國事,而致侂胄誤國者蘇師旦也。 是以奮發英斷,大正國典,朋附之輩誅斥靡貸。今大國欲使斬送侂胄,是未知其 主上仁慈寬厚,謹守信誓,豈有意於用兵。止緣院胄啓釁生事,迷國罔上,以至於 儻大國終惠川、 師旦旣

傷骨肉之恩乎?惟吳、蜀相爲首尾,關隘繫蜀安危,望敢備奏,始終主盟,使南北遂息 肩之期,四方無兵革之患,不勝通國至願。 旦猶子翻然改悟,斥逐奴隸,引咎謝過,則前日之嫌便可銷釋,奚必較錙銖豪末,反 本朝與大國通好以來,譬如一家叔姪,本自協和,不幸奴婢交鬭其間,遂成嫌間。

是時,陝西宣撫司請增新得關隘戍兵萬人。王柟狀禀,如蒙歸川、陝關隘,韓侂胄首必

隘可以還賜』。 具奏。 安也。 後祗備,是皆有咈聖訓。 地。 勞, 斬送侂胄首者,本欲易淮南地,〔4〕陝西關隘不預焉。 訓諭,許以更成,所以覆護鎭撫之恩至深至厚。 矣。」匡乃遣王柟還,復書曰:「宋國負渝盟之罪,自陳悔艾,主上德度如天,不忍終絕, 較之陝右 地,以鐵騎蹂之,無一得脫。 當 函送,遵上國之命。 費用 來書言韓侂胄已死,將以蘇師旦首易之,飾辭相給如此。 必謂 奉旨『朕以生靈爲念,已貰宋罪, 必廣。 輕 兵力得之不可還賜,則漢上諸郡皆膏腴耕桑之地,棗陽、光化歸順之民數萬戶, 重 。今恩訓如此,其體大國寬仁矜恤曲從之意,追修誓書,[5] 齎 遣 可 祖宗所以不取者,以關隘僅能自保耳,非有益於戰也。 知,獨在陛下決之耳。」詔報曰:「侂胄渠魁,旣請函首,宋之悔服可謂誠 匡奏曰:「關隘之事,臣初亦惑之,今當增戍萬人,壁壘之役,飽 及王柟狀禀,如蒙歸還川、陝關隘,其韓侂胄首必當 彼哀祈不已者,以前 關隘 區 昨奉聖訓, 區豈足深較,旣能函送韓侂胄首,陝西 日負固尚且摧覆, 王柟所陳亦非元畫事理,不敢專決, 如能斬送韓侂胄, 至于犒軍銀兩欲 今遂失之,是無一日之 設能入寇, 縱之平 函送。 俟歸 徐議還 通 謝人使 關 聖訓令 優示 輝之 淮 隘 關

及文義有不 王柟之歸也,匡 如體製者,諭令改之。 要以先送叛亡驅掠,然後割賜淮南、川、陝,及彼誓書草 | 宋人以叛亡驅掠散在州縣,| 旦拘刷, 未易聚集。 本 有 犯廟諱字 今已

列

傅

匹

冑首 帝 先次錄本齎呈,幷將侂胄首函送,及管押納合、道僧、李全家口一併發還。 賜。 犒 軍 畫定聖旨 以此 物 ,沿淮之地並依皇統、大定已畫爲定。 多 仰 一,非旬月可辨。 ,先賜行下沿邊及陝西所屬,候侂胄首到界上,即便抽回軍馬, 見聖慈寬大,初無必待發遣驅掠官兵,然後退兵交界之語。 錢象祖復以書來,略曰:「竊見大金皇帝前 又睹今來聖旨,旣能送侂胄首 日聖旨, 誓書草本添改處, **陝西關隘** 欲望上體大金皇 歸還淮南及川、 如 能 斬送 可併還 韓侂

順、

揚間,

伺候嘉報,

迤邐前去界首,以俟取接。」

陜

關隘

地界。

所有驅掠官兵留之何益,見已從實刷

勘發還。

其使人禮物歲幣等已起發至

徹還, 晶 品 小 匡得錢象祖 川 節 何足深較。 |陜關隘俟歲幣犒軍銀綱至下||蒸,畫日割賜。」||匡得詔書,卽以諭宋人,使 書, 即具奏, 其侂胄、 韶報曰:「朕以生靈之故已從所請,〔己稱臣割 師旦首函及諸叛亡至濠州, 卽聽 通謝 人使入界, 地 尙且 軍 馬 如詔 闊 卽 當 書

石烈 天地,武衞軍都指揮使徒單鏞奏告太廟,御史中丞孟鑄告社稷。 貞 泰 以 和 侂胄、師旦首函露布以聞。 八年閏四月乙未、[10]宋獻韓侂胄、蘇師旦首函 五. 月丁未, 遣戶部尚書高汝礪、 至元 帥府,匡 是日,上御應天門,立黃摩 禮部: 遣平南撫軍 尚書張行簡 上將 奏告 軍総

從

階,賜玉帶、金一百兩、銀一千五 仗,受宋馘。 師旦首幷二 人畫像于通衢, 尚書省奏露布,親王百官起居上表稱賀。 百姓縱觀,然後漆其首藏之軍器庫。 百兩、重幣三十端。 **罷元帥府仍爲樞密院。** 獻馘廟社,以露布頒中外。 丙辰, 匡朝京師, 進官兩 六月癸酉,宋

通

謝

使許弈、吳衡等入見。

癸未,以宋

人請和詔天下。

男當 有損 位於 月 遺 元妃李氏 鍾厚慶於元妃,人望所歸,歷數斯在。 認立 ′`,薨。 立 柩 十 衛王 大安 爲儲 前 令賈氏詐 月丙辰,章宗崩,匡受遺 一度 一貳,如皆是男子,擇可立者立之。」丁已,衛紹王卽位。 載惟禮經有嫡立嫡、無嫡立庶,今殷之內人見有娠者兩位,已詔皇帝,如 元 年四月, 欲 稱 專定策 有身。」詔元妃李氏、承御賈氏皆賜死。 平章政事僕散端、左丞 功,遂構殺李氏。 詔 立衛紹王。 今股 上體太祖皇帝傳授至公之意,付畀寶祚,卽皇帝 孫即康奏:「承 數日 其遺詔略曰:「皇叔衞王,承世宗之遺體, 1,匡 拜尙書令,封申王。 御賈氏產期已出三月,有 初, 章宗 戊午,章宗內人范氏 大漸 匡 大安元 與元 妃俱 其 中有 人 胎 受 告

承安 上 聞其事,不 中 匡 ,撥賜家 事 顯宗,深被思遇。 以 爲罪,惟 口 地 土、匡 用 安州邊吳泊舊放圍場地、奉聖州在官閑田易之,以向 乃自占濟南、眞定、代州 自章宗幼年,侍講讀最 上腴田 親幸,致位將相,怙 百姓舊業輒 寵 奪 之, 自用,官 及限 自占者悉還 外自 以賄 取。 成。

列

傅

百姓。 宣宗嘗謂侍臣曰:「撒速往年嘗受人玉吐鶻,然後與之官,此豈宰相所爲哉。」

完顏綱本名元奴,字正甫。 明昌中,爲奉御,累官左拾遺。詔三叉口置捺鉢,綱上疏

員無 宗命齎三詔,左司員外郎孫椿年奏詔爲一道,5113尋自陳首,上責宰臣曰:「椿年忽略,卿等 奈何不奏也。」轉工部郎中,上言:「太府監官兼尙食局官,乞於少府監依此例, 留守司移推西北路招討司,最近亦須數月。 諫,疏中有云「賊出沒其間」,詔尙書省詰問,所言不實,章宗以綱諫官,不之罪。 類陳言文字,綱等奏,「凡關涉宮庭及大臣者摘進,其餘以省臺六部各爲一類」,凡二十卷。 審訖,卽當移推別路。 **令就問,曾經所屬按察司審讞者移推別路,官亦依上就問。 凡告移推之人皆已經本路按察** 儀 故事,使夏國者夏人饋贈禮物,視書幾道以爲多寡。 遷刑部員外郎,綱言:「諸犯死罪除名移推相去二百里,幷犯徒罪連逮二十人以上者並 .鸞局官,儀鸞局官一員兼少府監官,相須檢治。」從之。 按察司部分廣闊,如上京路移推臨潢路,最近亦往復二三千里,北京 乞依舊制,令移推官司追取其人歸問。」從之。 泰和元年,綱爲賜夏主生日使,章 四年,詔綱與喬字、宋元吉編 注能幹官一

遷同簽宣徽院事。

邊陲。 西路都統副使斡勒牙剌、京兆府推官蒲察秉彝戍號華、扼潼關蒲津 翔 府 裊 知 懶 諸隘 一多決 臨洮府事术虎高琪、彰化 六年,與宋連兵,陝西諸將頗相異同,以綱爲蜀漢路安撫使、都大提舉兵馬事, 同知京兆府事烏古論兗州 「緋翮 西事 ,通遠軍節度使承裕、秦州防禦使完顏璘屯成紀界,知臨洮府事 ,調羌兵之未附者。 翅」,軍名也。 軍節度副使把回海備鞏州諸鎮,乾州刺史完顏 元帥右監軍充右都監蕭察貞分總其 守京兆要害,以鳳翔、臨洮路蕃漢弓箭手及緋翮 於是,知鳳翔府 事完顏昱、同知平涼府 陝西 石抹仲溫 事蒲察 都統完顏忠本 思忠扼六盤 秉鉉 駐 翅軍 臨 與元 分駐 洮, 散據 陜 帥 同 鳳

敗,追奔四十里。 斬首二百級。 宋吳曦以兵六千攻鹽川 七月,吳曦兵五 曦別兵萬人入來遠鎮, 术虎高琪破之。 , 萬由保坌、姑蘇等路寇秦州, 鞏州成將完顏王善、CIED隊校僕散六斤、猛安龍 承裕、隣以騎千餘擊之,曦兵大 延常擊走之,

竹 京,據古疊州,有四十三族、十四城、三十餘萬戶,東鄰宕昌,北接臨洮、積石,南行十 佛留 宋 不能 大山 青宜 爲 洮 ,蓋蠻境也。 制,縻以官爵。 可者, 州 刺 史。 吐蕃之種也。 佛留材武有智策,能結諸羌。 西行四十日至河外,俗不論道里而以日計之云。 傳六世至青宜可 宋取河湟, 夏取河西 九勁勇 得衆,以宋政令不常,有改 **青宜可畏慕佛留,以父呼之,請舉國內附,** 四 那, 部落散處西鄙,其魯黎族 冷京卒,子耳骨延 事 中國之意。 日 帥 至第 日冷

列

傅

朝廷以宋有盟不許,厚賜金帛以撫之。

留毎謂綱 明昌 曹佛留遷同 間 言靑宜可願內屬,出其至情,綱輒奏之,上終不納 ,屬羌已彪殺郡佐反,是時綱爲奉御,奉詔與曹佛留計事,因召靑宜可會兵擊破 知臨洮尹,兼洮州刺史。 子普賢爲洮州管內巡檢使。 綱屢以事至洮,佛

牌二,到可祗 牌,朝廷之馭諸蕃固無此例,欲使卿有以鎭撫部族、增重觀望,是以特加改命,賜 屬。 爲雄長,嚮風慕義,背僞歸朝,願效純誠,恒輸忠力,緬懷嘉矚,式厚褒旌。 汝勿以青宜可兵勢重大,卑屈失體,亦勿以蕃部而 召普賢攝 三階,安撫、都大提舉如故。 「完顏綱,初行時汝未知朝廷有靑宜可之事,獨言可以招撫,必獲其用,旣而果來效順。 綱 及綱 奏其事 同 部署陝西,上密勅經略西事。 知洮州 承,服我新恩,永爲藩衞。」曹普賢真授同知洮州事, ,上以青宜可爲疊州副都總管,加廣威將軍。 事。 普賢傳箭入羌中,青宜可大喜,率諸部長,籍其境土人民,詣綱請 以商州刺史烏古論兗州領、曹普賢押領、青宜可 於是,曹佛留已死,普賢爲懷羌巡檢使。 藐視之。」 詔青宜可曰:「卿統有部 網遷拱衞直都指揮使,遷 覽卿進上所受偽 勾當。 金牌一、銀 綱至洮,馳 人,世 詔 內

境, 若能自歸者,官吏依舊勾當,百姓各令復業,元抛地土依數給付。 九月,詔安慰陝西,略曰:「京兆、鳳翔、臨洮三路,應被宋兵逼脅,背國 及受宋人旗膀結構 從偽, 或沒落外

等,或值驚擾因而避役逃亡,未發覺者,許令所在官司陳首,並行釋免,更不追究,軍前可用 之人隨宜任 使。 限外不首,復罪如初。」

遂盡復故地。 爲神、皆散走、破其衆二千,生獲數十人。南家斬木開道以登西山、再與宋兵遇,皆敗之、二三 爲疑兵,潛遣猛安胡信率甲士五十人繞出其後,反擊之,宋兵大亂,遂斬廷于陣。 押軍猛安粘割撒改率兵千人出大寧谷取西山寨,貞自以兵七百由中路取龍門等關。 乃 虎 副 大霧四塞,旣又暴雨, 里關,復敗。 已焚閣道,貞且修道、且進兵,至小關,松將楊廷據險注射,貞不得前,令行軍 合沓 統 分遣术虎合沓、部將完顏出軍奴率兵千人出黃兒谷取和尚原, 裴滿 宋程松遣別將曲 別將壯士五百,取間道潛登,出宋兵上,自高而下,宋兵大駭,伏兵合擊,遂破之 阳 里、 宋將彭統領宋兵走龍門,追擊大破之。 同 知隴州事完顏孛論以兵千人伏方山原下,萬戶奧屯撒合門、三京縣令术 昌世襲方山原,自率兵數萬分道襲和尚原、西山寨、龍門等關。 和尙原、西山寨、龍門關戍兵不知宋兵來,松遂據之。 合沓乘夜潛登和尚原絕頂,宋人驚以 同 知會州事女奚列南家、 蒲察貞 副統裴滿 宋兵走二 遺 是日, 程松 行 阿 軍

使蒲察秉鉉逆擊,破之。 宋吳曦將馮興、楊雄、李珪以步騎八千人入赤谷,將寇秦州。 宋步兵趨西山,騎兵走赤谷。承裕分兵躡床步兵,宋步兵據 承裕、完顏璘、 河州 防 禦

列傳

第

Ξ

+

六

完

顏綱

<u>岐、隴兵一萬出成紀,石抹仲溫以隴右步騎五千出鹽川,完顏璘以本部兵五千出來遠</u> 李珪皆爲金軍所殺。十月,綱以蕃、漢步騎一萬出臨潭,充以關中兵一萬出陳倉,蒲察貞以 百人,追者至皂郊城,斬首二千級。猛安把添奴追宋騎兵,殺千餘人,馮興僅以身免,楊雄、 戰,部將唐括按答海率二百騎馳擊之,甲士蒙葛挺身先入其陣,衆乘之,宋步兵大潰,殺數

間,與 宋,封曦蜀國王,鑄印賜詔,詔綱經略之。其賜曦詔曰: 軍節度使、成都潼川府變利等州路宣撫副使,泰和六年出兵興元,有窺關、隴之志,誘募 爲盜,遣諜以利餌鳳翔卒溫昌,結三虞候軍爲內應。 初,吳玠、吳璘俱爲宋大將,兄弟父子相繼守西土,得梁、益間士衆心。 隣孫曦太尉、昭 **《綱等諸軍相拒。上聞韓侂胄忌曦威名,可以間誘致之,梁、益居宋上游,可以得志于** 昌詣府上變。曦遣諸將出秦、隴

聽,每一思之未嘗不當饋歎息,而卿猶偃然自安。 之汰,猶當十世宥之。然威略震主者身危,功蓋天下者不賞,自古如此,非止于今。 泊 義 武 順 卿 宋自信、恒失守,構竄江表,僭稱位號,偸生吳會,時則乃祖武安公玠捍禦兩川。 路 家 ||璘嗣有大勳,固宜世胙大帥,遂荒西土,長爲藩輔,誓以河山,後裔縱有|欒|||| 專制蜀漢,積有歲年,猜嫌旣萌,進退維谷,代之而不受,召之而 人,譬之破 桐之葉不可以復合,騎虎之勢不可以中下矣。 且卿自視翼贊之功孰與岳飛。飛之 此事 流傳, 稔於股 不赴,君臣之

威名戰功暴于南北,一旦見忌,遂被叁夷之誅,可不畏哉。 故智者順時而動,明者因機 而 發, 與其負高世之勳見疑于人,惴惴然常懼不得保其首領,曷若順時因機,轉禍爲

福 ,建萬世不朽之業哉。

得乎?朕已分命虎臣,臨江問罪,長驅並騖,飛渡有期,此正豪傑分功之秋也。 陲,攻剽我城邑。是以忠臣扼腕,義士痛心,家與爲讎,人百其勇,失道至此,雖欲不亡 故,未欲遽行討伐,姑遣有司移文,復因來使宣諭,而乃不顧道理,愈肆憑陵,虔劉我邊 今趙擴昏孱,受制强臣,比年以來頓違誓約,增屯軍馬,招納叛亡。 **股以生靈之**

更能 我 師 順 ·併力巢穴而無西顧之 虞,則全蜀之地卿所素有,當加封册,一依皇統册構故事 卿 流 以英偉之姿,處危疑之地,必能深識天命,洞見事機,若按兵閉境不爲異同,使 東下,助爲掎角,則旌麾所指盡以相付。 天日在上,朕不食言。今送金寶

鈕: 一,至可 領也

字姚 詔 意 圓 動 綱 與端奉表送款。 ,程松尙在興元,未敢發,詐稱杖殺端,以蔽匿 次臨江被詔,進至水洛,訪得曦族人端,署爲水洛城巡檢使,遣持詔間行諭曦。 綱遣前 京兆府錄事張仔會吳曦于興州之置口,曦言歸心朝廷無他, 其事。 松兵旣敗,曦乃遣掌管機宜文 曦得

張仔請以告身 爲報,曦

盡出以付之,仍獻階州

列

傅

第

Ξ

+ 六

顏 網

略曰:「陝西一面雖下四州,吳曦之降朕所經略。 奉表及獨地圖志、吳氏譜牒來上。 世子孫亦保富貴。」匡得詔,乃移兵趨襄陽。十二月,曦遣果州團練使郭澄、仙人關使任辛 人無所愧謝。今南伐之事責成卿等,區區俘獲不足羨慕,果能爲國建功,豈止一身榮寵,後 朝 廷以曦初附,恃中國爲援,欲先取襄陽以爲蜀漢屛蔽,乃詔右副元帥匡先攻襄陽,詔 自大軍出境,惟卿所部力戰爲多,方之前

表、賀全蜀歸附三表,親王百官稱賀,朝廷以詔答之,幷賜誓詔。 效順,以全圖歸附,朕甚嘉之。然立國日淺,恐宋兵侵軼,人心不安,凡有當行事務已委宣 邊面宣力,加之讀書,蜀人識卿威名,勿以財賄動心,失大國體。 諭汝主。」詔以同知臨洮府事术虎高琪爲封册使,翰林直學士喬宇副之。 嘉汝主之義,懷想不忘,欲得其繪像,如見其面。今已遣使封册,俟回日附進。 撫完顏綱移文計議。或有緊急,卽差人就去講究。大定間,汝主嘗以事入觀,今亦多歲,殷 七年正月,召綱赴京師,以爲陝西宣撫副使,進三階。 還軍,吳曦遣郭澄進謝恩表、誓 檢制隨去奉職,勿有違枉 郭澄朝辭,諭澄曰:「汝主 詔高琪曰:「**卿以** 可以此意歸

命,且爲曦重。 頃之,宋安丙殺吳曦。 上聞曦死,遣使責綱,詔曰:「曦之降,自當進據仙 旣不據關,復撤兵,自即使丙無所憚,是宜有今日也。」於是,詔贈曦太師,命 人關, 以制蜀

德順州刺史完顏思忠招魂葬于水洛縣。以曦族兄端之子爲曦後。 屯駐日久,負勞苦,恩賞未行,有司申奏不明,以致如此。 朕已令增給賞物,以酬爾勞。 「汝等爰自去冬,出疆用命,擐披甲胄,冒涉艱險,直取山外數州,比之他軍實有勤效。 詔諭陝西軍士, 略曰: 界外

奮敵愾之勇,協心畢力,建立功勳,高爵厚祿,朕所不吝。」

是餘賊未殄,猶須經略。眷我師徒,久役未解,深懷憫念,寤寐弗忘。汝等益思體國之忠,

古懷忠按治綱以下將吏。懷忠未至陝西,綱、貞遣兵潛自昆谷西山養馬澗入,四面攻之,復 關,鞏州鈴轄兀顏阿失死之。詔奪綱官一階,降兵部侍郎,權宣撫副使。遣戶部侍郎尼厖 集之。以近侍局直長爲四川安慰使。日司蕭察貞撤黃牛戍,宋安丙乘之,連兵來襲,遂陷散 取散關,斬宋將張統領、于團練。綱遣使奏捷,詔書獎論,貞等釋不問。 宋人復陷階州、西和州,綱至鳳翔,詔徹五州之兵退保要害,五州之民願徙內地者厚撫

|鎰復使人止之曰:「高琪措畫已定,彼之功卽行省之功。」|網不從。 衛紹王即位,除陝西路按察使,累官尚書左丞。

至寧元年,綱行省事于縉山,徒單鎰使人謂 綱曰:「高琪駐兵縉山甚得人心,士皆思奮,與其行省親往,不若益兵爲便。」綱不聽。 八年,宋獻韓侂胄、蘇師旦首,詔以陝西關隘還之,宋罷兵。 |綱還京師。是歲,章宗崩, 綱至縉山遂大敗。

胡沙 虎斬關入中都,遷衞紹王于衞邸,命綱子安和作家書,使親信人召綱。日之綱至,囚

之憫忠寺,明日,押至市中,使張霖卿數以失四川、敗縉山之事,殺之。

「謹按元年詔書云、胡沙虎屢害良將、正謂綱輩也」。乃追復尚書左丞。弟定奴。 可等十八部族,取宋五州,吳曦以全燭歸朝。 貞祐四年,綱子權復州刺史安和上書訟父冤,略曰:「先臣綱在章宗時,招懷西羌青宜 胡沙虎無故見殺,奪其官爵。」詔下尚書省議,

貞祐 以上 實奏,降河州防禦使。遷鎭西軍節度使、河東北路按察轉運使。 二年,遷元帥右都監,救西京,改震武軍節度使。元帥奧屯襄敗績,定奴坐失期及不以軍敗 宋,加平南虎威將軍。兵罷,遷河南東路副統軍,三遷武勝軍節度使,入爲右副點檢。 密院 舉能幹之士充河北州縣官。改簽樞密院事、殿前都點檢、兼侍衞親軍都指揮使。 定奴與兄綱俱知名,充護衞,除平涼府判官,累官同知眞定府。從平章政事僕散揆伐 二年,改知河南府,兼河南副統軍。 事、行院事兼知歸德府事,改兼武寧軍節度使,行院于徐州。 尋遷河南統軍使,兼昌武軍節度使。 請內外五品 宣宗即位,改知歸德府。 召爲刑部尚書、參知 大安 復爲

興定三年,薨。

冑 心强智疏,蘇師旦謀淺任大,函首燕、薊,南北皆曰賊臣,何哉? 贊曰:章宗伐宋之役,三易主帥,兵家所忌也,宋不知乘此以爲功,猶曰有人焉。 韓侂 完顏匡、完顏綱皆泰和終

功之臣,然匡隳忠于大安,綱罔難于至寧,富貴之惑人乃如此邪?

校勘記

- 及平陝西大破張浚于富平也「及平」原作「及乎」,據永樂大典卷六七六四引文改。
- 進世宗實錄 「實」原作「寶」,據永樂大典卷六七六四引文改
- 於是罷河南宣撫司僕散揆還朝 奏請了詔罷宣撫司」。九月戊子了以河南路統軍使紇石烈子仁等爲賀宋生日使」。又卷六二交 按本書卷一二章宗紀,泰和五年八月辛卯,因宣撫使僕散揆之

聘表 同。 是罷宣撫司在前,子仁使宋在後。此處敍事顚倒。

- **Z**4 取 泗州 「州」原作「川」、據永樂大典卷六七六四引文改。
- Ħ. 果欲請和當遺朱致知 復 張巖書,宋史卷三七寧宗紀慶元五年條,皆作「朱致知」,今據改。下同。 「知」原作「和」。 按本書卷六二交聘表承安五年條,卷九三宗浩傳宗浩
- 八六山 是未 知其已死也 「已」原作「亡」,據殿本改。
- -本欲 易淮 Ξ 南地 + 六 原脫「淮」字,據上下文補 完 顏 定 奴 校 勘 記

列

傳

第

- [八] 追修誓書 「追修」原作「修追」,據殿本乙正。
- [f] 臊以生靈之故已從所請 原脫「所」字,據文義補。
- 泰和八年閏四月乙未 原脫「閏」字,按本書卷一二章宗紀,泰和八年「閏月乙未,宋獻韓侂胄
- 等首于元帥府」。 據長術此年閏四月,今補「閏」字。
- 左司員外郎孫椿年奏詔爲一道 「奏韶」原作「詔奏」,據文義乙正。
- 宋吳曦以兵六千攻鹽川鞏州戍將完顏王善 敗之」。 州定西縣「鎭一,鹽川」。 今據改爲「鹽川」。至于「王善」「王喜」之異,因無它證,今仍兩存。 又卷一二章宗紀,「泰和六年六月乙亥,宋吳曦攻鹽川,戍將完顏王喜 「川」原作「州」。按本書卷二六地理志,臨洮路鞏
- 二三 再與宋兵遇皆敗之 原脫「之」字,據殿本補。
- [1四] 復撤兵 「撤」原作「撒」,據殿本改。
- 〇三 以近侍局直長為四川安慰使 按此處脫人名。
- 尚 命綱子安和作家書使親信人召綱 使作書急召其父左丞元奴議事,元奴以軍來,幷其子皆殺之」。元奴卽綱,子名「和尙」,且與 按本書卷一三衞紹王紀,至寧元年八月,胡沙虎「誘奉御和

綱同被殺,與此略異。

金史卷九十九

列傳第三十七

徒單鎰 賈鉉 孫鐸 孫即康 李革

從之。十三年八月,日詔策女直進士,問以求賢爲治之道。侍御史完顏蕭湼、太常博士李 學,並以新進士充敎授,士民子弟願學者聽。歲久,學者當自衆,卽同漢人進士三年一試。」 經史。久之,樞密使完顏思敬請敎女直人舉進士,下尙書省議。奏曰:「初立女直進士科, 且免鄉、府兩試,其禮部試、廷試,止對策一道,限字五百以上成。在都設國子學,諸路設府 修官溫迪罕締達教以古書,習作詩、策。鎰在選中,最精詣,遂通契丹大小字及漢字,該習 歲,習女直字。大定四年,詔以女直字譯書籍。 徒單鎰本名按出,上京路速速保子猛安人。父鳥輦,北京副留守。 五年,翰林侍講學士徒單子溫進所譯貞觀 **鎰穎悟絕倫,甫七**

列傳第三十七

徒單盤

晏、應奉翰林文字阿不罕德甫、移剌傑、中都路都轉運副使奚赠考試鎰等二十七人及第。

<u>鎰授兩官,餘授一官,上三人爲中都路教授,四名以下除各路教授。</u>

子助教。 克忠譯解、自一翰林修撰移刺傑、應奉翰林文字移刺履講究其義。 十 五年,詔譯諸經,著作佐郎溫迪罕締達、編修官宗璧、尚書省譯史阿魯、東部令史楊 左丞相紇石烈良弼嘗到學中與鎰談論,深加禮敬。 丁母憂,起復國史院編修官。 鎰自中都路教 授 選 爲國

「然,當以劇任處之。」又曰:「鎰容止溫雅,其心平易。」久之,兼修起居注,累遷翰林待制,兼 世宗嘗問太尉完顏守道曰:「徒單鎰 何如人也。」守道對曰:「有材力,可任政事。」上曰:

員外郎。 獻漢光武中興賦,世宗大悅曰:「不設此科,安得此人。」

兼修 國史。 章宗卽位,遷左諫議大夫,兼吏部侍郎。 |鎰言:「人生有欲,不限以制則侈心無極。 明昌元年,爲御史中丞。 今承平日久,當慎行此道,以爲經久 無何,拜參知政事,

之治。」

旣能 『懋哉』,曰『吁』,曰『都』。 之基,誠宜稽古崇德,留意於此,無因物以好惡喜怒,無以好惡喜怒輕忽小善,不卹人言 聽之,又能行之, 章宗銳意于治平,鎰上書,其略曰:「臣竊觀唐、虞之書,其臣之進言於君曰『戒哉』, 叉從 而興起之。 旣陳其戒,復導其美。 君之爲治也,必曰『稽于衆,舍己從 君臣上下之間 相與如 此。 陛下繼興隆之運,撫太平

能慎其六,爲臣子者敢不愼其三哉。上下之情旣通,則大綱舉而羣目張矣。」進尚書右丞, 夫上下之情有通塞,天地之運有否泰,唐陸贄嘗陳隔塞之九弊,上有其六,下有其三。陛下

萬公對曰:「皆才能之士,鎰似優者,鎰有執守,宗浩多數耳。」上曰:「何謂多數。」萬公曰: 改西京留守。承安三年,改上京留守。五年,上問宰臣:「徒單鎰與宗浩孰優。」平章政事張 鎬王永中判平陽府,相繼得罪,連引者衆,上疑其有黨,或命節度定武,四繼又知平陽焉。 「宗浩微似趨合。」上曰:「卿言是也。」頃之,鎰拜平章政事,封濟國公。 三年,罷爲橫海軍節度使,改定武軍節度使,知平陽府事。先是,鄭王永蹈判定武軍,

次,才下行美者次之,雖有才能,行義無取者,抑而下之,則臣下之趨向正矣。其二曰,導學 明禮義,趨利者衆,何以責小民之從化哉。其用人也,德器爲上,才美爲下,兼之者待以不 然後和氣普洽,福祿薦臻矣。」因論「爲政之術,其急有二。一日,正臣下之心。竊見羣下不 碊、動傷和氣,此非一朝一夕之故也。 今宜正薄俗,順人心,父父子子夫夫婦婦,各得其道, 立,五德不興,縉紳學古之士棄禮義,忘廉恥,細民違道畔義,迷不知返,背毁天常,骨肉相 上疏略曰:「仁、義、禮、智、信謂之五常,父義、母慈、兄友、弟敬、子孝謂之五德。 今五常不 淑妃李氏擅寵,兄弟恣橫,朝臣往往出入其門。是時烈風昏曀連日,詔問變異之由。鎰

者之志。 裁斷有定,而疑可辨矣。」鎰言皆切時弊,上雖納其說,而不能行。 之制也。』「亞記曰:『義爲斷之節。』伏望陛下臨制萬機,事有異議,少凝聖慮,尋繹其端,則 事,叢來者非一端,形似者非一體,法制不能盡,隱於近似,乃生異論。孔子曰:『義者天下 利,乞令取士兼問經史故實,使學者皆守經學,不惑於近習之靡,則善矣。」又曰:「凡天下之 教化之行,興于學校。今學者失其本眞,經史雅奧,委而不習,藻飾虛詞,釣取祿

以元妃李氏隆寵過盛,故微諫云。 位三十年,無沈湎冒色之事。 上問 漢高帝、光武優劣。 高祖惑戚姬,卒至于亂。由是言之,光武優。」上默然。鎰蓋 平章政事張萬公對曰:「高祖優甚。」鎰曰:「光武再造漢業,在 泰和四年,罷知咸平府。五年,改南京留守。六年,徙知

河中府,兼陝西安撫使。

陣,而 始 使一 自眞定至彰德置者,達于南京。自南京分至歸德置者,達于泗州、壽州,分至許州置者,達 厲 [兵撫民,稱朕意焉。] [鎰言:「初置急遞鋪本爲轉送文牒,今一切乘驛,非便。] 上深然之。 置提控急遞鋪官。 品,鎰改知京兆府事,充宣撫使,陝西元帥府並受節制。 僕散揆行省河南、陝西,元帥府雖受揆節制,實顯方面,上思用謀臣制之,由是升宣撫 宋人狡獪,亦資算勝。 自中都至真定、平陽置者,達于京兆。 卿之智略,朕所深悉,且股肱舊臣,故有此寄。宜以長策御敵, 京兆至鳳翔置者,達于 韶曰:「將帥雖武悍,久歷行 "臨洮。

于鄧州。 自中都至滄州置者,達于益都府。 自此郵達無復滯焉。

兵勢。 朱砂谷襲鴨嶺關 牌以書乞和,詔鎰召葉祿瓦軍退守鶻嶺關。 祿瓦拔鶻嶺關 改知真定府 ,追至上津縣,斬首八百餘級,遂取 七 年,吳曦死,宋安丙分兵出秦、隴間。 益遣行軍都統斡勒葉祿瓦、副統把回海、完顏摑刺以步騎五千出商州。 事 回海、 摑刺別將攻破燕子關 摑刺擊走之, 斬景統領于陣。 上津縣。 新道口,回海 十月,韶鎰出兵金、房以分掣宋人梁、益、漢、沔 八年正月,宋安丙遣景統領由梅子溪、新道口、 葉祿瓦破朱兵二千于平溪,將趨金州。 取小湖關敖倉,至營口鎮,破宋兵千餘 是歲,罷兵。 鎰遷特進,賜賚有差。 十一月,葉

國史。 矣。」乃選兵二萬, 安撫副使。 德,欲用卿爲 大安初,加儀同三司,封濮國公。 三年,改上京留守。 相。 太尉匡,卿之門人,朕不 遣同知鳥古孫兀屯將之,入衞中都。 平章政事獨吉思忠敗績于會河堡, 中都戒嚴, 鎰曰:「事急 改東京留守,過闕入見。 可屈卿下之。」遷開府儀同三司,佩金符,充遼東 朝 (廷嘉之,徵拜尙書右丞相, 監修 衛紹王謂鎰曰:「卿兩朝舊

備禦。 昌、桓、撫三州 言:「自用 兵以來,彼聚而行,我散 素 號富實,「公 人皆勇健,可以內徙,益我兵勢,人畜貨財,不至亡失。」 而守,以聚攻散,其敗必然。 不若入保大城,併力

平章政事移刺、[f] 參知政事梁瞠曰:「如此是自蹙境土也。」衞紹王以責鎰。 鎰復奏曰:「遼

鎮之。」衞紹王不悅曰:「無故置行省,徒搖人心耳。」其後失昌、桓、撫三州,衞紹王乃大悔 東國家根本,距中都數千里,萬一受兵,州府顧望,必須報可,誤事多矣。可遣大臣行省以

曰:「從丞相之言,當不至此」」頃之,東京不守,衞紹王自訟曰:「我見丞相恥哉」

术虎高琪駐兵縉山、甚得人心、士樂爲用。至寧元年、尚書左丞完顏綱將行省于縉山、

|鎰謂綱曰:「行省不必自往,不若益兵爲便。」|綱不聽,且行,|鎰遣人止之曰:「高琪之功卽行

省之功也。」亦不聽。綱至縉山,遂敗績焉。

守之,不可入矣。」少頃,兵士索人于閭巷,縊乃還第。 立之,萬世之功也。」胡沙虎默然而去,乃迎宣宗于彰德。胡沙虎旣殺徒單南平,欲執其弟 乃詣鎰問疾,從人望也。 鎰從容謂之曰:「翼王,章宗之兄,顯宗長子,衆望所屬,元帥決策 廷危矣。不如與之金牌,奉迎車駕,銘必感元帥之恩。」胡沙虎從之。 知真定府事銘,鑑說之曰:「車駕道出眞定,鎬王家在威州,河北人心易搖,徒單銘有變,朝 頃之,鎰墜馬傷足在告,聞胡沙虎難作,命駕將入省。 或告之曰:「省府相幕皆以軍士 胡沙虎意不可測,方猶豫,不能自定, 至寧、貞祐之際,轉敗

爲功,惟鎰是賴焉 宣宗卽位,進拜左丞相,封廣平郡王,授中都路迭魯都世襲猛安庸魯吉必剌謀克。 鎰

講和 正須按察司撫集,不可罷。」遂止。 尚有足疾,詔侍朝無拜。明年,鎰建議和親。 ,聚兵積粟,固守京師,策之上也。南京四面受兵。遼東根本之地,依山負海,其險足 宣宗將幸南京,鎰曰:「鑾輅一動,北路皆不守矣。今已 言事者請罷按察司。 鎰曰:「今郡縣多殘毀,

恃,備禦一面,以爲後圖,策之次也。」不從。 要以仁義道德爲本,乃著學之急、道之要二篇。太學諸生刻之于石。有弘道集六卷。 鎰 明敏方正,學問該貫,一時名士皆出其門,多至卿相。 是歲,薨。 嘗嘆文士委頓,雖巧拙不同,

詔賻贈從優厚。

州司 遷監察御史。 ·侯、補尙書省令史。章宗爲右丞相、深器重之、除陝西東路轉運副使。入爲刑部主事, 賈鉉字鼎臣,博州博平人。性純厚,好學問。中大定十三年進士,調滕州軍事判官、單 遷侍御史,改右司諫。 上疏論邊戍利害,上嘉納之,遷左諫議大夫兼工部侍

郎,與党懷英同刊修遼史。

事,其大概以爲「茶樹隨山皆有,一切護邏,已奪民利,因而以揀茶樹執誣小民,嚇取貨賂, 按察官其檢察不如法者,具以名聞。 鉉上書曰:「親民之官,任情立威,所用決杖,分徑長短不如法式,甚者以鐵刃置於杖 致死。 間者陰陽愆戾,和氣不通,未必不由此也。 內庭勅斷,亦依已定程式。」制可。 願下州郡申明舊章, 檢量封記, 復上書論 山東採茶

列

宜嚴禁止。仍令按察司約束。」上從之。

言:「若如此、恐官吏迫於限期,姑務苟簡,反害事體。 如 取會案牘卒難補勘者,先具次第奏知,更限一月結絕,違者准稽緩制書罪之。 事有應密,三月未絕者,令具次第以聞。」下尙書省議。 承安四年,遷禮部尚書,諫議如故。 張萬公曰:「卽康及第在鉉前。」上曰:「用相安問榜 是時有詔,凡奉勅商量照勘公事皆期日聞奏。 况簿書自有常程, 御史臺治其稽緩, 如省部可卽定奪者,須三月擬奏,

次?股意以爲賈鉉才可用也。」然竟用卽康焉。 上議置相,欲用鉉,宰臣薦孫卽康。

造御寶、非本法意。」上悟,遂以赦原。明日,上謂大臣曰:「已行之事、賈鉉猶執奏、甚可嘉 司捕治款伏。值赦,大理寺議宜准偽造御寶、〔5〕雖遇赦不應原。 大書「勅賜神針先生」等十二字,及於紙尾年月間摹作寶樣朱篆靑龍二字,以誑惑市人。 此禮、古無是也。」遂已。改刑部尚書。秦和三年、拜參知政事。 有八寶,其文各異,若偽造,不限用泥及黃蠟。 泰和二年,興陵崇妃薨,上欲成服苑中,行登門送喪之禮,以問域,鉉對曰:「故宋嘗行 今用筆描成青龍二字, 旣非八寶文, 論以僞 亳州醫者孫士明輒用黃紙 已奏可 矣。 鉉奏:「天子 有

也、羣臣亦當如此矣。」 泰和六年,御試,鼓爲監試官。上曰:「丞相宗浩嘗言試題頗易,由是進士例不讀書。

窘舉人,固不可,欲使自今積致學業而已。」遂用之。 久之,鼓與審官院掌書大中漏言除授 胖今以日合天統爲賦題。」鉉曰:「題則佳矣,恐非所以牢籠天下士也。」上曰:「帝王以難題 上謂鉉曰:「卿罪自知之矣。然卿久參機務,補益弘多,不深罪也。」乃出爲安武軍節度

使,改知濟南府。致仕。 貞祐元年,薨。

宸衷斷之。」上以爲然。 韶登聞檢院,凡上訴者,每朝日奏十事。 登聞檢院事。 輔。 曰:「治官事如孫鐸,必無錯失。」初卽位,問鐸安在。有司奏爲右都管,使宋。及還,除同知 登大定十三年進士第,調海州軍事判官,衞縣丞,補尚書省令史。章宗爲右丞相,語人 孫鐸字振之,其先滕州人,徙恩州歷亭縣。 |鐸言::「凡上訴者皆因尙書省斷不得直,若上訴者復送省,則必不行矣,乞自 鐸性敏好學,遼陽王遵古一見器之,期以公 韶刊定舊律, 譯先奏名例

旣改而復行,更張太煩,百姓不信。乞自今凡將下令,再三講究,如有益于治則必行,無恤 官十人,釁爲選首。承安四年,遷戶部尚書。鐸因轉對奏曰:「比年號令,或已行而中輟,或 小民之言。」國子司業紇石烈善才亦言「頒行法令,絲綸旣出,尤當固守」。,上然之。 承安元年,遷左諫議大夫,改河東南路轉運使,召爲中都路都轉運使。 初置講議錢穀

篇

列

鐸請廢不用,詰難久之,復亨議詘。 上顧謂侍臣曰:「孫鐸剛正人也,雖古魏徵何 和二年閏十二月,至上召繹、戶部侍郎張復亨議交鈔。 復享曰:「三合同鈔可行。」 加焉

府事。 賀客誦古人詩曰:「唯有庭前老柏樹,春風來似不曾來。」御史大夫下劾鐸怨望,降同知河南 三年,御史中丞孫卽康、刑部尚書賈鉉皆除參知政事,鐸再任戶部尚書。 改彰化軍節度使,復爲中都轉運使。泰和七年,拜參知政事。 鐸 心少之,對

太倉 敢議朝政,但如鄭人游鄉校耳。」上悟,乃薄其罪。 員 (外郞李著、監察御史劉國樞、尚書省都事曹溫、雄州都軍馬師周, 吏部員外郞徒單永康、 使馬良顯、順州刺史唐括直思白坐私議朝政,下獄,尚書省奏其罪。 蒲陰縣令大中與左司郎中劉昂、通州刺史史肅、前監察御史王宇、吏部主事曹元、戶部 鐸進日:「昂等非

諸處 令折鈔,不拘貫例,農民知之,迤漸重鈔。比來州縣抑配行市買鈔,無益,徒擾之耳。 2鈔局 |鐸上言::「民間鈔多,宜收斂。 院務課程及諸窠名錢須要全收交鈔。 秋夏稅本色外,盡 ,惟省庫仍舊,小鈔無限路分,可令通行。」上覽奏,卽詔有司曰:「可速行之。」 乞罷

旨,循以論李新喜降濬州防禦使。 言之何耶。]旣而復曰:「後當盡言,勿以此介意。」頃之,遷尙書左丞,兼修國史。 議鈔法忤 大安初,議誅黃門李新喜。 鐸曰:「此先朝用之太過耳。」衞紹王不察,卽曰:「卿今日始 改安國軍節度使,從絳陽軍。

宣宗卽位,召赴闕,以兵道阻。宣宗遷汴,鐸上謁于宜村,除太子太師。有疾,累遣使

候問。貞祐三年,致仕。是歲,薨。

析津,實大興,仕至涿州刺史。延應玄孫克構,遼檢校太傅、啓聖軍節度使。 孫卽康字安信,其先滄州人。石晉之末,遼徙河北實燕、薊,八代祖延應在徙中,

識其人。章宗卽位,累遷戶部員外郎,講究鹽法利害,語在食貨志。除耀州刺史,入爲吏部 左司郎中。 即康,克構曾孫,中大定十年進士第。章宗爲右丞相,是時,即康爲尚書省令史, 由是

公。」平章政事守貞對曰:「卽康才過之。」上曰:「視萬公爲通耳。」由是遷御史中丞。 康年已高,幸及早用之。」上問:「年幾何矣。」對曰:「五十六歲。」上復問:「其才何如張萬 上謂宰臣曰:「孫卽康向爲省掾、言語拙訥、今才力大進、非向時比也。」宰臣因曰:「卽

奏永中第四子阿离合懣語涉不軌,詔同簽大睦親府事孽與卽康鞫之。第二子神土門嘗撰 詞曲,頗輕肆,遂以語涉不遜就逮。 家奴德哥首永中嘗與侍妾瑞雲言:「我得天下,以爾爲 妃,子爲大王。」 稾、即康還奏,詔禮部尚書張暐覆訊。 泳中父子皆死,時論寃之。 頃之,遷 初,張汝弼妻高陀斡不道,伏誅。汝弼,鎬王永中舅也,上由是頗疑永中。永中府傅尉

泰寧軍節度使,改知延安府事。

右丞。 可 再用爲中丞觀之。」上乃復召卽康爲御史中丞。泰和三年,除參知政事。明年,進尚書 承安五年,上問宰相:「今漢官誰可用者。」司空襄舉即康。上曰:「不輕薄否。」襄曰: 六年,宋渝盟有端,大臣猶以爲小盜竊發不足恤。即康與左丞僕散端、參政獨吉思

請和、進官一階。 諱上字從『未』,下字從『在』。[三世宗廟諱從『系』。 顯宗廟諱如正犯字形,止書斜畫,『沇』 點畫。 忠以爲必當用兵,上以爲然。 字『鈗』字各從『口』、『兄』『悅』之類各從本傳。」『』一從之、自此不勝曲避矣。進左丞。宋人 民,偏傍犯如『葉』字作『業』字,『泯』字作『泜』字。」乃擬「熙宗廟諱從『面』從『且』。 睿宗廟 顯宗廟諱『允』、『充』字合缺點畫,江江如『統』傍之『充』,似不合缺。」即康奏曰:「唐太宗諱世 上問 睿宗廟諱改作『崇』字,其下却有本字全體,不若將『示』字依購亭帖寫作『未』字。[10] 即康、參知政事賈鉉曰:「太宗廟諱同音字,有讀作『成』字者,旣非同音,便不當缺

勿問。章宗崩,衞紹王卽位,卽康進拜平章政事,封崇國公。大安三年,致仕。 理 司直。韶知除郭邦傑、李蹊杖七十勒停,左司員外郎高庭玉決四十解職,即康待罪,有韶 舊制,尚書省令史考滿優調,次任回降,崔建昌已優調興平軍節度副使,未回降卽除大 是歲,薨。

忘。 遷大興縣令、中都左警巡使、南京提刑判官、監察御史、同知昭義軍節度事。 配屬 **縣,革獨不** 大定二十五 李革字君美,河津人。父餘慶,三至廷試,不遂,因棄去。 聽,提刑司以爲能。遷河北東路轉運都勾判官、太原推官。 年進士。 調眞定主簿。察廉,遷韓城令。同知州事納富商賂,以歲課軍須 **革穎悟**。讀書一再誦,輒記不 丁母憂,起復, 丁父憂,起復,

勢傾 簽南京按察事 外郎,調觀州 及司 部 否,籍存留正官,行省、行部、元帥府差占員數及事故闕員,老不任職,赴闕奏事。 事,遷知開封府 、縣各存留强幹正官一員。」革與簽陝西高霖、簽山東孟子元俱被詔、體訪三路官員能 中外,遣所親以進取誘革,革拒之。貞祐二年,遷戶部侍郎。 泰和六年,伐宋,尚書省奏:「軍興,隨路官,差占者別注,闕者選補,老不任職者替罷, 刺史兼提舉漕運,陝西西路按察副使,大興府治中。 事,河南勸農使,戶部、東部尙書,陝西行省參議官。 宣宗遷汴,行河北西路六 知府 徒單南平貴幸用事, 改刑部 員

勅 條特旨奏斷 匹 年,拜參知政 不 爲水格者,不許引用,皆以律爲正。」詔從之。是歲, 事。 革奏:「有司各以情見引用 斷例, 牽合附會,實啓倖門。 大元兵破潼關。革自 乞凡斷例

列傳第

西,革以知平陽府事,權參知政事,代鼎爲河東行省。 以執政失備禦之策,上表請罪。不許,罷爲絳陽軍節度使。 興定元年,胥鼎自平陽移鎭陝

革上馬突圍出。革歎曰:「吾不能保此城,何面目見天子!汝輩可去矣。」乃自殺。 間傷者過半。徵兵吉、隰、霍三州,不時至。裨將李懷德縋城出降,兵自城東南入。 可待。如令耕毁,民將不堪。」詔從革奏。十月,平陽被圍,城中兵不滿六千,屢出戰,旬日 不忍小忿以勤遠略,恐或乘之,不能支也。」不納。太原兵後闕食,革移粟七萬石以濟之。 二年,宣差粘割梭失至河東,於是晚禾未熟,牒行省耕毀淸野。革奏:「今歲雨澤及時,秋成 是時興兵伐宋,革上書曰:「今之計當休兵息民,養銳待敵。 宋雖造釁,止可自備。 左右請 贈尚書

革,可謂君子,其進退之際,有古人爲相之風焉。 宰相。古所謂斗筲之人,卽康之謂矣。鐸論李新喜,其言似漢耿育,有旨哉。貞祐執政李 孫鐸皆舊臣,鉉久致仕,鐸忤旨衞王,皆不復見用。徒單鎰亦外官,惟孫卽康詭隨,乃驟至 贊曰:傳曰:「君子之言,其利博哉。」 [12]徒單鎰拱挹一語而宣宗立,厥功懋矣。 賈鉉、

[一] 選諸路學生三十餘人 世宗命頒行女直大小字所譯經書,九年選異等者得百人薦於京師,廩給之,命溫迪罕締達敎以 按此上當脫「九年」二字。本書卷五一選舉志、策論進士「始大定四年,

古書、作詩、策、後復試、得徒單鎰以下三十餘人」。又「女直學」條同、是其證。

十三年八月 「十三年」原作「九年」。按本書卷五一選舉志策論進士條,大定「十一年始議行 策選之制,至十三年始定每場策一道,……乃就憫忠寺試徒單鎰等,……中選者得徒單鎰以下

二十七人」。又卷一〇五溫迪罕締達傳,大定「十三年設」女直進士科,是歲徒單鎰等二十七人登

第」。今據改。

吏部令史楊克忠譯解 按本書卷一〇五溫迪罕締達傳記此事作「吏部令史張克忠」。

[四] 或命節度定武 「或」據文義疑當作「故」。

つまし 孔子曰義者天下之制也「制」原作「斷」,據禮記表記改正。鎰蓋習女直文禮記,故用字不同, 下文「義爲斷之節」似出禮記喪服四制,文亦不同。

六〕素號富實 「實」原作「貴」,據文義改。

[4] 平章政事移刺 按姓氏下脱其名。

[六] 大理寺議宜准偽造御寶 「造」原作「學」、據殿本改。

列傳第三十七 校勘記

- 八九山 泰和二年閏十二月 原脫「閏」字。按本書卷四八食貨志,泰和二年「閏十二月,上以交鈔事召
- 戶部尚書孫鐸、侍郞張復亨議於內殿」。今據補。
- 不若將示字依蘭亭帖寫作未字 原脫「不」字,據文義補。
- 顯宗廟諱允充字合缺點畫 原脫「顯宗廟諱允」五字,據文義補。
- 下字從卉 「班」原作「世」,據宗堯名「堯」字上半字形改。
- [1] 沈字鈗字各從口兌悅之類各從本傳 按此有誤字,疑「沈」當作「兖」,「鈗」當作「銃」,「傳」當作

傳曰君子之言其利博哉 按左傳昭公三年,「君子曰:仁人之言,其利博哉」。 引文不確。

金史卷一百

列傳第三十八

孟鑄 宗端脩 完顏閭山 路鐸 完顏伯嘉

术虎筠壽 張煒 高竑 李復亨

諫,掃合磁州刺史,繹祕書丞,庸中都右警巡使,袞彰國軍節度副使,振壽治書侍御史,蛻同 使、南京副留守、河平軍節度使。 文字移剌益、中都鹽鐵判官趙暠、尚書省令史劉昂及鑄十一人皆剛一可用。 太府丞徒單釋、宮籍監丞張庸、右警巡使袞、禮部主事蒲察振壽、戶部主事郭蛻、應奉翰林 知定武軍節度使事。益翰林修撰,暠都水丞,昂戶部主事、鑄刑部主事。 累遷中都路按察副 孟鑄,大定末,補尙書省令史。明昌元年,御史臺奏薦戶部員外郎李獻可、完顏掃合、 韶除獻可右司

列傳

第三

孟鑄

可依 責任 命。」是歲,自春至夏,諸郡少雨。鑄奏:「今歲愆陽,已近五月,比至得雨,恐失播種之期, 種麻菜法,擇地形稍下處撥畦種穀,穿土作井,隨宜灌漑。」上從其言,區種法自此始。 甚重,往者臺官乃推求細故,彈劾小官,至於巨室重事,則畏徇不言。其勤乃職, 泰 和 四年,入爲御史中丞,召見於香閣。上謂鑄曰:「朕自知卿,非因人薦舉也。 御史

曰:「執· 晋同 奪人馬,平州冒支已俸,無故破魏廷碩家,發其冢墓。 拜表以調鷹不赴,祈雨聚妓戲嬉,毆 執 中貪殘專恣,不奉法令,自奉聖州罪解以後,怙罪不悛,蒙朝廷恩貸,轉生跋扈。 ·僚,擅令住職,失師帥之體。 乞行黜退,以厭人望。」 上以執中東宮舊人,頗右之,謂鑄 泰 無何,奏彈知大興府事紇石烈執中過惡,其文略曰:「京師百郡之首,四方取則。 上使鑄 和 中粗人,似有跋扈者。」鑄曰:「明天子在上,豈容有跋扈之臣。」上悟,韶尚書省問之。 五年,唐、鄧、河南屢有警,議者謂宋且敗盟。六年正月,宋賀正旦使陳克俊等朝 就館諭克俊以國家涵容之意,果不詳此旨,恐兵未可息也。使以上言達宋 雄州詐 知府

察時,即別遣官偕往,更不覆察,諸疑獄並令按察司從正與決,庶幾可慰 鑄 論 提刑司改按察司,差官覆察,權削望輕。下尙書省議。參知政事賈鉉奏:「乞差監 人望。」從之。

永豐庫官不守宿,因而被盜;上召登聞鼓院官欲有所問,皆不在。

上諭鑄曰:「此輩慢

章宗本無意

用兵

,故再三渝之。

也。 法 如 臺官 此,御史臺所職何事也」復諭御史大夫宗肅及鑄曰:「殷聞唐宰相宿省中,卿等所知 、六部官、其餘司 局亦嘗宿直。 今尚書省左右司官宿直,餘亦當準此。」八年,除降

鑄等各以正言答之。 紇 石 烈 執 中作亂,召鑄及右諫議大夫張行信俱至大興府,問曰:「汝輩向來彈我者耶。」 執中乃遣還家,曰:「且須後命。」旣而執中死,鑄亦尋卒。

陽

軍

節度

使。

至寧元年,復爲御史中丞。

元年,監察御史孫椿年、武簡職 氏爲「姬」氏。 宗端脩字平叔,汝州人。 端脩 好學,喜名節,中大定二十二年進士第。 章宗避睿宗諱上一字,凡太祖諸子皆加「山」爲「崇」,改「宗」 事不修舉,詔以端脩及范鐸代之。 明昌 間,補尙書省令史。

誰 帖,准上書不以實,削一官,期年後敍。 之。 了其以姓名對。」端脩對曰:「小人者,李仁惠兄弟。」仁惠,喜兒賜名也。 上雖責喜兒兄弟, 是時元妃李氏兄弟干預 而不能去也。 朝 政, 端脩 四年,復上書言事,宰相惡之,坐以不經臺官直 章宗 上書乞遠小人。上遺李喜兒傳詔問端脩:「小 小知端脩 不爲衆 所容,釋之,改大理 喜兒 司 不敢隱,具 直。 人為 進

細碎,不究其實 和 四 年,遷大理丞, ,嘗令問汝, 召見于香閣。 亦不汝罪。 及爲大理司直,乃能稱職,用是擢汝爲 上謂端脩曰:「汝前 爲 御史,以幹能見用。 盡乃心 汝言 3

列

外之,

為節度副使,

三卒官。

惟法是守,勿問上位宰執所見何如,汝其志之」知大興府紀石烈執中陳言,下大理寺 端脩謂執中言事涉私治罪。 **韶以端脩別出情見不當,與司直溫敦按帶各削一官解職。**

則不私,氣平則不暴。爲政之術,盡於此矣。」 候游彥哲將之官,問爲政。端脩曰:「爲政不難,治氣養心而已。」彥哲不達,端脩曰:「心正 端脩終以直道不振於時,自守愈篤。妻死不復更娶,獨居二十年,士論高之。 汝州司

遷沁南軍節度使,入爲工部尚書。貞祐三年,知京兆府事,充行省參議官。四年,知鳳翔 都轉運都勾判官,改河東南路轉運都勾判官、南京警巡使。一母憂,起復南京按察判官,累 完顏閭山,蓋州猛安人。明昌二年進士,累調觀察判官,補尙書省令史,知管差除。授

|府事。

俗,閬山率騎兵掩擊敗之,追襲十五里,殺三百餘,獲牛羊以千計。改知平涼府,敗宋人于 步落堝。遷官一階。三年,召爲吏部尚書。廷議選戶部官,往往舉聚斂苛刻以應詔。閭山 曰:「民勞至矣,復用此輩,將何以堪。」識者稱之。三年,朝廷以晉安行元帥府陀满胡土門 興定元年冬,詔陝西行省伐宋,閭山權元帥右都監,參議諸軍事。宋兵千餘人伏吳寨

明年 鐸與左補闕許安仁繼之,賜對御閤。詔尙書省曰:「朕不禁暑熱,欲往山後。今臺諫言民間 尚書胥持國與鐸同檢視。章宗將幸景明宮,是歲民饑,不可行。御史中丞董師中上書諫, 多闕食,朕初不盡知,既已知之,其忍自奉以重困民哉。」乃罷行。 ,盧溝河決,鐸請自玄同口以下、丁村以上無修舊堤,縱使分流,以殺滅水勢。 路鐸字宣叔,伯達子也。明昌三年,爲左三部司正。上書言事,召見便殿,遷右拾遺。

鐸上書論守貞賢,可復用,其言太切,召對于崇政殿。旣而章宗以鐸書語大臣,於是尙書左 幸者詣尙書省,詔曰:「卿等諫北幸甚善,但其間頗失君臣之體耳。」 謙、翰林修撰完顏撒刺諫幸景明宮,語多激切,章宗不能堪,遣近侍局直長李仁愿召凡諫北 頃之,守貞入爲平章政事。 五年,復與禮部尚書張暐、御史中丞董師中、右諫議大夫賈守 相,夾谷清臣也。上曰:周昌以桀、紂比漢高祖、高祖不以爲忤。路鐸以梁冀比丞相耳。」 丞烏林荅愿、參知政事夾谷衡、胥持國奏路鐸以梁冀比右丞相,所言狂妄,不稱諫職。 尚書左丞完顏守貞每論政事,守正不移,與同列不合。罷知東平府事,臺諫因而擠之。

是歲,郝忠愈獄起,事密,諫官不能察其詳,議者頗謂事涉鎬王永中,思有以寬解上意。

鐸

補闕。 矣。」上曰:「宰相安能虀粉人。」至是,章宗並以此言告宰相,雖留再任,宰相愈銜之。改右 門者不無橫議,是何言也。但朕不罪諫官耳。」頃之,尚書省奏擬鐸同知河北西路轉運使 事,詔再任右拾遺,謂宰相曰:「鐸敢言,但識短耳。 朕嘗請責而氣不沮。」鐸因召對,論宰相 右諫議大夫賈守謙上封事、鐸繼之,尤切直。上優容之,謂鐸曰:「汝言諸王皆有覬心,游其 |太重。上曰:「凡事由朕,宰相安得權重。」旣而復奏曰:「乞陛下勿泄此言,泄則臣 虀粉

貞論 須問 鐸右者。」參知 決,

舞等亦上言切諫,

並指以爲黨。

上乃出守貞知濟南府。

凡晉萬守貞者皆黜降,謂宰臣 守貞公正可用一今坐所舉失實耳。」 之。」上復曰:「路鐸敢言,甚有時名,一旦外補,人將謂朕不能容直臣。可選敢言及才識處 留守判官。 曰:「董師中謂臺省無守貞不可治,路鐸、李敬義皆稱舉之者。然三人者後俱可用,今姑出 有出股意表者,乃有裨益耳。」於是,東部尚書董師中出爲陝西西路轉運使,鐸爲南京 一辨而不相附。鐸論邊防,守貞以爲掇拾唐人餘論,皆不行。及守貞持鎬王永中事久不 自完顏守貞再入相,以政事爲己任。胥持國方幸,尤忌守貞,幷忌鐸輩。。鐸輩雖嘗爲守 戶部郎中李敬義方使高麗還,即出爲安化軍節度副使。 政事馬璵奏曰:「鐸雖知無不言,然亦多不當理。」上曰:「諫官非但取敢言,亦 詔曰:「卿等昨來交薦

張嘉 問 趙晏所言十事 貞 承安二年,召爲翰林修撰,同看讀陳言文字。 〈皆出 持國 門下 , ,嘉貞 因問董師中 復趨走襄之門。 、張萬公優劣。 持國 鐸奏:「 不可復用, 上召禮部尚書張暐、大理卿麻安上及鐸, 師中附胥持國 若再 相,必亂綱紀。」上 以進,趙樞 、張復亨、 日:一 股

豊 復 相 此 人,但遷官二階使致仕,何爲不可。」持國黨聞之,怒愈甚。 改監察御史。

障 脩款伏乃云:「祗會與侍 大 除授皆宰執公議,奏禀,不見伯通私任形迹。」於是,詔責鐸言事輕率,慰 用 問。 |郁 卽除東平府 鄕 夫張暐及鐸。 承望風旨, 鐸坐奏事不實,暐追一官,鐸兩官,皆 張暐、伯通 頃之,遷侍御史,主奏事。 人李浩。 事者,議及朕 知 政 治 事楊伯通 不詳檢起復條例。」涉妄冒,大夫張暐抑之不行。 中。 暐以爲彈絀 待罪于家。 暐與鐸奏事殿 躬亦 未幾,景州闕刺史,尚書省已奏郭岐爲之,詔特改譯爲景州刺史,仍勿送 引用鄉 御私 無妨,語涉宰相 賈鉉奏:「近詔書詰問 大臣,須 議,大夫 人李浩,鐸劾奏:「伯通以公器結私恩, 上, 監察御史姬端脩以言事下吏,使御史臺令史郭 有阿 上 不 問:「姬端脩彈事嘗申臺官否。」對曰:「嘗來 間 曲實迹,恐所劾不當,臺 解 知 有 職。 也。」旣而 憎嫌,何以 御史大夫張 頃之,起爲泰定軍 端脩杖七十收 (得進?」 障。 詔 綱愈 **暐言路鐸嘗禀會楊** 上 節 左 命同 度 左司 司 贖 壞,今再體 副 計鐸資考至正五 諭 知大興府事 郎中 公仲杖七十替罷 使。 伯通 ·賈益、 上謂宰 公仲 治事 察。 面 議 賈益 賈 知除武 伯 達 如 臣 端端 意于 故 通 私

列

傅

路按察副使。坐以糾彈之官與京兆府治中蒲察張鐵、總管判官辛孝儉、推官愛刺宴飲,奪 審官院。 一官解職。 鐸述十二訓以敎民。詔曰:「路鐸十二訓皆勸人爲善,遍 諭州郡使知之。」遷陝西 泰和六年,召爲翰林待制兼知登聞鼓院,累除孟州防禦使。 真祐初,城破,投沁

|鐸剛正,歷官臺諫,有直臣之風。 爲文尙奇、詩篇溫潤精緻、號虛舟居士集云。

官兵捕他盜不獲,誣以準罪耳。」詰之,果然。詔與按察官俱推排物力,召見于香閣。 中。累官莒州刺史。讞屬縣盜,伯嘉曰:「飢寒爲盜,得錢二千,經月不使一錢云何?此必 御史。劾奏平章政事僕散揆。或曰:「與宰相有隙,奈何。」伯嘉曰:「職分如此。」遷下涼治 懿皇后妹晉國夫人家奴買漆不 酬 直,伯嘉鈞致晉國用事奴數人繫獄。晉國白章宗,章宗 曰:「姨酬其價,則奴釋矣。」由是豪右屛迹。 改寶坻丞。補尙書省令史,除太學助敎、監察 完顏伯嘉字輔之,北京路訛魯古必刺猛安人。明昌二年進士,調中都左警巡判官。孝

改、韶伯嘉治之。貞祐四年三月,伯嘉奏:「西京副統程琢智勇過人,持心忠孝,以私財募集

哭,起復震武軍節度使兼宣撫副使,提控太和嶺諸隘。副統李鵬飛誣殺彰國軍節度使牙

大安中,三遷同知西京留守,權本路安撫使。貞祐初,遷順義軍節度使。居父母喪,卒

壯 略者充州縣。」制可,仍賜琢姓夾谷氏。逐請曰:「前代皆賜國姓,不繫他族,如蒙更賜,榮莫 機會,輒擬琢昭勇大將軍,同知西京留守事,兼領一路義軍,給以空名刺二十道,許擇有謀 以三千人歸 士二萬,復取渾源、白登,有恢復山西之志,已命駐于弘州矣。近者靖大中、完顏毛吉打 國,各遷節度副使。今山西已不守,琢收合餘衆,盡忠於國,百戰不挫。 臣恐失

大焉。」詔更賜完顏氏。

無罪,合打合坐欺罔,乞審正是非,明示黜陟。」宣宗曰:「今正防秋,且已。」 嘉 也。」七月,伯嘉改知歸德府事,合打改武寧軍節度使。 原 他 臣,榜掠幾死。臣立功累年,頗有寸効,伯嘉挾私陵轢,無復宣撫同僚之禮。臣欲不言,恐 善,徙居代州,肆爲侵掠。遙授太原治中、權堅州刺史完顏斜烈私離邊面,臣白伯嘉,伯嘉 不悅,遣臣護送糧運于代州。臣請益兵,乃以嬴卒數百見付,半無鎧仗。臣復爲言,伯嘉怒 彰 以私忿加箠楚,令本臺廉問,旣得其事,遂不復窮治。若合打奏實,伯嘉安得無罪,伯嘉 長衝,若以私忿廢國事,國家何賴焉!卿等同心戮力,以分北顧之憂,無執前非,誤大計 日反爲所誣,無以自明。」上問宰臣,奏曰:「太原重鎭,防秋在邇,請勅諭和解。」詔曰:「太 國軍節度使、宣撫副使。六月,斡勒合打奏:「同知西京留守完顏琢恃與宣撫使伯嘉雅 是月,伯嘉遷元帥左監軍,知太原府事,河東北路宣撫使。 御史臺奏三宣撫副使合打訴元帥伯 以同知太原府斡勒合打為

從之。 掘民 掠耳。 西, 此,臣已令帥府禁止之矣。」宰臣奏:「所遣官自忻、代來,云不見劫掠之迹,惟 德升奏:「琢兵數萬分屯代州諸險,拒戰甚力,其衆烏合,非琢不可制。」胥鼎 臣奏:「已遣官體究琢軍,且令太原元帥府烏古論德升召琢使之矣。 控古里甲石 朝廷遷官賜姓, 栗 初 ,戕殺無辜,雖曰不煩官廩,博易爲名,實則攘劫,欺國害民無如啄者。 ,河東行省胥鼎奏:「完顏伯嘉屢言同知西京留守兼臺州刺史完顏琢,可倚之以復山 如尚以伯嘉之言爲可信,乞遣琢出太原,或徙之內地,分處其衆,以備不測之變。」宰 倫言,琢方招降人,謀復山西,盤桓于忻、代、定、襄間,恣爲侵擾,無復行意。 令屯代北, 提太和嶺。 今聞諸隘悉無啄兵,蓋啄挈太原之衆,保五臺剽 當以此意報鼎。」無何, 如德升言便。」 復奏:「宣差提 石倫 之言如 發

乏兵食、 時之權,不可爲常法。」遂寢。 爲 東部 伯嘉 一,伯嘉 尚書。 至 一歸德, 令輸棗栗菜根足之,皆以爲便。 二年,改御史中 上言,乞雜 丞。 俄改簽樞密院事。 犯死罪以下納粟贖免。 興定元年,知河中府, 未閱月,改知河南府事。 宰臣奏:「伯嘉前在代州嘗行之,蓋一 充宣差都提控, 是時,甫經兵後, 未幾召

陝州。 初, 次澠池土濠村, (E) 兵不戰而潰。 貞祐 四年十月, 韶以 公兵部 一尚書、簽樞密院事蒲察阿里不孫爲右副元帥,備禦潼關、 阿里不孫逸去,亡所佩虎符,變易姓名,匿柘城縣,

奔走闕庭,皇恐待命。安坐要君,略無忌憚,迹其情罪,實不容誅。此而不懲,朝綱廢矣。 不能負斧鑕而請罪,逃命竄伏,猥居里巷,挾匿婦人,爲此醜行。 受命之日忘其家,臨陣之日忘其身,服喪衣、鑿凶門而出,以示必死。 進不求名,退不避罪, 之,詔曰:「阿里不孫若能自出,當冤極罪。」阿里不孫乃使其子上書,請圖後効。尚書省奏: 烈及僕婢,當得所在。其妻子見在京師,亦無容不知,請窮治。」有司方繫其家人,特命釋 與其妻妹前韓州刺史合喜男婦紇石烈氏及僕婢三人僦民舍居止。合喜母徒單氏聞之,捕 乞尸諸市 惟民是保。 執統石烈,斷其髮,拘之佛寺中。阿里不孫復亡去。監察御史完顏藥師劾奏:「乞就詰紇石 「阿里不孫幸特赦死,當詣闕自陳,乃令其子上書,猶懷顧望。」伯嘉劾之曰:「古之爲將者, 以戒爲臣之不忠者」宣宗曰:「中丞言是,業已赦之矣。」阿里不孫乃除名。 阿里不孫膺國重寄,握兵數萬,未陣而潰,委棄虎符,旣不得援枹鼓以死敵,又 聖恩寬大,曲赦其死,自當

有司。 之精,旱熯乃人君自用亢極之象,宰執以爲寃獄所致。夫爕和陰陽,宰相之職,而猥歸咎於 禮 五 高琪武 部郎 邪。 月,充宣差河南提控捕蝗,許決四品以下。宣宗憂旱。伯嘉奏曰:「日者君之象,陽 中 臣謂今日之旱、聖主自用、宰相諂諛、百司失職、實此之由。」高琪、汝礪深怨之。 弁出身,固不足論,汝礪輩不知所職,其罪大矣。漢制,災異策免三公,顧歸 抹燃胡 魯刺 以言事忤旨,集五品以上官顯責之。明日,伯嘉諫曰:「自古帝王

言事者語涉謗訕,有司當以重典,陛下釋之。 與其釋之以爲恩,曷若置之而不問。」 胡魯刺所言是,無益於身,所言不是,無損於國。陛下廷辱如此,獨不欲爲堯、舜乎。 莫不欲法!堯、舜而耻爲傑、紂,蓋堯、舜納諫,傑、紂拒諫也。 故曰『納諫者昌,拒諫者亡』。

者不爲國謀。臣竊論之,有國可以有君,有君未必有國也。」高琪、汝礪聞之,怒愈甚。 乎?假令入山寨可以得生,能復爲國乎。人臣有忠國者,有媚君者,忠國者或拂君意,媚君 宰相請修山寨以避兵,伯嘉諫曰:「建議者必曰據險可以安君父,獨不見陳後主之入井

古人云『不得河東不雄』,萬一失之,恐未易取也。」大忤宰執意。 北路便宜從事。興定三年,伯嘉至河中,奏曰:「本路衝要,不可闕官,凡召辟者每以艱險爲 乞凡檄召無故不至者宜令降罰,悉心幹當者視所歷升遷。」詔召不至者決杖一百,餘如 十二月,以御史中丞、權參知政事、元帥左監軍,行尙書省、元帥府于河中,控制河東南 廷議欲棄河東,徙其民以實陝西。伯嘉上書諫曰:「中原之有河東,如人之有肩背。

以激勸 非所以勸功也。 宣宗深然之。 頃之,召還,罷爲中丞。 伯嘉入見,奏曰:「如臣駑鈍,固宜召還,更須速遣大臣鎭撫。」 人心。 伯嘉上疏曰:「國家兵不强,力不足以有爲,財不富,賞不足以周衆,獨恃官爵 近日以功遷官赴都求調者,有司往往駁之,冒濫者固十之三,旣與而復奪之, 乞應軍功遷官,宣勅無僞者卽準用之。」又曰:「自兵興以來,河北桀黠往往

河,保障關、陝,此必爭之地。今雖殘破,形勢猶存,若使他人據之,因鹽池之饒,聚兵積糧, 聚衆自保、未有定屬。乞賜招撫、署以職名、無爲他人所先。」又曰:「河東、河北有能招集餘 民完守城寨者,乞無問其門地,皆超踰等級,授以本處見任之職。」又曰:「河中、晉安被山帶

則

河津以南,太行以西,皆不足恃矣。」

伯嘉,伯嘉諷御史辟之。」詔有司鞫問,會赦免。 縣主簿蒙古訛里刺不法,沈丘令夾谷陶也受賄,匿而不發。前穀城縣令獨吉鼎术可嘗受業 有紅襖賊,不敢至泗州。 司 止奏除十萬石,民將重困,惟陛下憐之」詔治三司奏災不以實罪。怕嘉行至蘄縣,聞前 四年秋,河南大水,充宣慰副使,按行京康。奏曰:「亳州災最甚,合発三十餘萬石。三 監察御史烏古孫奴申劾伯嘉違詔,不遍按視。又曰:「伯嘉知永城

子,當益國澤民,其他不可學也。」高汝礪方希寵固位,伯嘉論事輒與之忤,由是毀之者衆。 事,行尙書省于河中,率陝西精銳與平陽公史詠共復河東。頃之,伯嘉有疾。六月,薨。 元光元年,坐言事過切,降遙授同知歸德府事。二年三月,遙授集慶軍節度使,權參知政 五年,起爲彰化軍節度使,改翰林侍講學士。伯嘉純直,不能與時低昂,嘗曰:「生爲男

用桀驁,蓄姦謀,鐸不能制,委曲容庇之。興定元年,德用率所部掩襲,日司殺隊及官屬程珪

伯嘉去太原後,完顏琢寓軍平定石仁寨,權平定州刺史范鐸以閻德用充本州提控。

等百餘人,遂據石仁寨。 鐸懼,挈家奔太原。 德用遂據平定州。 二年十月,詔誅范鐸。「出

仗籠中。 日,奈何以毬鞠細物動搖民間,使屠宰耕牛以供不急之用,非所以示百姓也。」宣宗不懌,擲 御 用鞠仗。 术虎筠壽,貞祐間爲器物局直長,遷副使。貞祐三年七月,工部下開封市白牯取皮治 明日,出筠壽爲橋西提控。 筠壽以其家所有鞠仗以進,因奏曰:「中都食盡,遠棄廟社,陛下當坐薪懸膽之

皆敢言者,亦挫于高琪、汝礪之手。 亦不能一朝而安,言之難也如是哉。 言,弗究厥罰。 贊曰: 孟鑄、宗端脩、路鐸盡言於章宗,皆擯斥不遂。鑄劾胡沙虎,可謂先知,雖行其 厥後胡沙虎逆謀,胥持國終至于誤國,而不悟也。 **蕢土不能塞河決,有以也夫。** 术虎筠壽,所謂執藝事以諫者邪。 完顏伯嘉以著功參大政, 宣宗時,完顏素蘭、許古

判官 ,再遷中都左警巡使。 張煒字子明,洛州永年人,本名憬,避章宗嫌名改焉。 **煒喜言功利,寡廉節,交通部民閻元暈,縉紳薄之。** 大定二十五年進士,調葭州軍事 累官戶部員

外郎。

役事。 隣保姓名,煒信之,多與之錢。已而亡去,卽逮繫隣保,使之代償,一路爲之疲弊。 言斂不及民,可以足用。大抵募商賈縱其販易,不問所從來。姦人往往投牒,妄指產業,疏 除,煒出爲同知鎭西軍節度使事,轉同知西京轉運使事。 監丞張嘉貞雖有幹才,無德而稱,好奔走以取勢利。大抵論人當先德後才。」詔三人皆與外 內,小人宜在外。」章宗問:「孰爲小人。」萬公對曰:「戶部員外郎張煒、文繡署丞田櫟、都水 氊罽繒絮皮革折給軍士,皆棄於道而去。歲餘,改戶部郞中,遷翰林直學士,俱兼規措 韶尚書省曰:「張煒通曉人也,朕不敢縷詰,卿等詳問之,毋爲虛文。」 充宣差西北路軍儲,自 令從長恢辦,乞不隸省部,委臣專一提控,有應奏者,許煒專達,歲差幹事官計本息具 左丞相宗浩奏:「張煒長於恢辦, 比戶部給錢三十萬, 已增息十四萬矣。 承安五年,天色久陰晦,平章政事張萬公奏:「此由君子小人邪正不分所致,君子宜在 丁母憂,起復恒州刺史,奏請以鹽易米事,且所言利害甚多,恐涉細碎,不敢盡上。 。是時,大築界牆,被行戶工部牒主 請給錢通百 以故舊 職

上問:「誰可代卿規措者。」」煒舉中都轉運戶籍判官王謙。 人之短汝,朕皆知之,惟能興利,斯惟汝功。」自西北路召還,勾計諸道倉庫,除簽三司 泰 和六年,四伐宋,煒進銀五千兩。詔曰:「汝幹集資儲,固其職也,毋令軍士有議國 謙至西北路,盡發煒前後散

奏。」上從其請。

列傳

宣差刻我,欲倒戈殺之。累遷戶部侍郎。貞祐初,遷河北西路按察轉運使。 失錢物以鉅萬計、對獄者積年。 大安三年,起爲同簽三司事。 會河堡兵敗,亞軍士猶云張

致仕。 右丞胥鼎前路排頓,及修南京宮闕。 平章政事高琪舉煒代源行六部事。以勞進官一階,改河北東路轉運使。 貞祐二年春,中都乏糧,詔同知都轉運使事。 宣宗初以煒有才,旣察其無實,遂不復用。貞祐四年,卒。 無何,坐事降孟州防禦使。 邊源以兵萬人護運通州積栗,軍敗死焉, 三年,遷安國軍節度使。 宣宗遷汴,佐尚書

喜,遣人諭之曰:「所執甚善。 今姑與之,後不得爲例。」轉儀鸞局、少府少監,改戶部員外 郎、安州刺史。 高竑,渤海人。 以蔭補官,累調貴德縣尉。 提刑司舉任繁劇,遷奉聖州錄事。 察廉,遷

|名府、兼本路安撫使。|貞祐二年、遷河北西路按察轉運使、錄大名功、遷三官、致仕。 大安中、越王永功判中山、城以王傅同知府事。 改同知河南府,充安撫使。 徙同知大

四年,卒。

和令。 送官 邑人槖 馬 李 盜割 中 入 復 盛 府 亨字仲修 民 佩 宿 家 刀,謂 逆 牛耳。 旋 築州 之日:「 有 復亨盡 盜 河 殺 津人。[10]年十八, 刀衊馬血 馬 復享日:「不 召 里中 人至, 火 煆 之則刃靑。」其 利 使 登進士第。 而 牛家牽 殺 心之,必 牛徧 有 人 復 過之, 仇 、款服 中 者 書 判 至一 果 盡 優等, 有 索 人前 仇 逆 旅 調 臨 以 商 牛 晉主 提 人 忽驚 刑 過 薦 躍 遷 南 護 同

興定 罷 同 之。 遣 知 震 歸 泰 年 武 和 本業。」從 ,上言:「近 節 中 度, 伐 宋 加 之。 充宣 遙授忻州 日 復亨舉 興師 撫 司 伐 刺 陳留 經 宋、恐宋 史。 歷 官。 縣 貞 令程震等二十 祐 遷 人 間, 解 乘 鹽 虚 歷左 副 掩 使,歷保大、震武 襲 司 南 九 員 鄙 外郎 人 農 故 郎 桑 籍 邊 有 中 郡 同 ٠, 効, 知 民 遷 節 爲 翰 徵 軍 林 度 科 直 事 均 學 今 大 士 1 , 朝 軍 行 母 憂, 已還, 廷 司 皆 起 事 乞 遷 復

之,

引

察

廉

遷臨

洮

府

判官

改陝

西

東路

戶

籍判官

轉河東

北路支度判

官。二二

擢

軍 山山 實 部 用,乞禁 寶 泂 侍 南 郞 是 豐 府 歲 張 鄧 師 七 止滄 州 魯 月 南 司 攝 置 濱 使 陽 東路,治 京東 侯 皆 圝 摯 產 勿 穴京 一總之。 令 鐵 歸德 過 、公司募工 西 河 戶部 京南 復亨 河 南 三路行 一置冶, 侍 奏:「民 食陽武、解鹽,河北食滄、濱鹽, 郎完 可 三司 間 顏 以獲 銷 麻 掌勸: 毁農 斤 利, 出 農 且. 具 攝 不 以 南 催 厲 供 路 租 民 軍 軍 治許 器, 須科 叉奏:「 州 臣 差及 竊 南 復 北 陽 以 亨 鹽 俱濟。」 缸 爲 攝 鐵 設 未 西 酒 賣 便。 路 榷 韶 鹽 等事 尙 治 官 汝 書省 孙 中 以 , 戶 佐 魯

列

僔

第

 \equiv

+

八

高

竑

李

復

亨

拜參知政事,兼修國史。 九月,以勸農有勞,遷兵部尙書。再閱月,轉吏部尙書,權參知政事。 四年三月,眞

規措。 提控軍興糧草。 緣詔書不急科役卽令冤罷,臣不敢輒行,如以臣言爲然,乞付有司計之。」制可。 乃更滋茂。田凡五百餘頃,畝可收五石,都得二十五萬餘石。可增直糴稻給唐、鄧軍食。 以救塗炭之民,資蓄積之用。」詔有司議行焉。還奏:「南陽禾麥雖傷,土性宜稻,今因久雨, 民。」又奏:「河南閑田多,可招河東、河北移民耕種。被災及沿邊郡縣租稅全免,內地半之, 之家,人多逃竄,職此之由。可依舊設回馬官,使者食料皆官給之,歲終會計,日息均賦於 又奏曰:「詔書令臣,民間差發可免者免之。民養驛馬,此役最甚,使者求索百端,皆出養馬 不治者,得廢罷推治。復享奏乞禁宣慰司官吏不得與州府司縣行總管府及管軍官會飲。 七月,河南雨水害稼,復亨爲宣慰使,御史中丞完顏伯嘉副之,循行郡縣,凡官吏貪汙 復亨奏:「河渡不通,陝西鹽價踊貴,乞以栗互易足兵食。」 詔戶部從長 無何,被詔

翰林待制崔禧、歸德治中時戬、應奉翰林文字程嘉善當奪三官降職,復亨當奪兩官。趙秉 五年三月,廷試進士,復亨監試。進士盧元謬誤,濫放及第。讀卷官禮部尚書趙秉文、 復亨有會計才,號能更,當時推服,故驟至通顯。旣執政,頗矜持,以私自營,譽望頓

文嘗請致仕,宣宗憐其老,降兩階,以禮部尚書致仕。 復享罷爲定國軍節度使。四元光元

年十一月,城破自殺,年四十六。 贈資德大夫、知河中府事

戈殺煒。 贊曰:大凡兵興則財用不足,是故張偉、李復亨乘時射利,聚斂爲功。 復亨宣慰南陽 ,還奏稻熟可糴。 所謂聚斂之臣者,二子之謂矣。 大安, 高竑之守藏, 軍士欲倒

校勘記

子頗

有取焉。

宋賀 正旦使陳克俊等朝辭 按陳克俊本名景俊, 爲避章宗諱改。 參見本書卷一 二章宗紀校

記へより。

久之爲節 又中州集卷八宗端脩小傳云:「以全州 度副 使 「爲」下脫地名。 按本書卷一二三姬汝作傳、「全州節度副使端脩之姪孫也」。 節度副使卒官」。 蓋脫地名爲「全州」。

門知晉安府在興定二年十月。 三年朝廷以晉安行元帥府陀滿胡 又卷一〇八胥鼎傳,興定三年八月上言晉安帥府完顏閭 土門暴 刻 以閭 山代之 按本書卷一二三院滿胡出門傳, Щ 奉旨 |胡|

淸 野 事, 則 閭 山代胡土門當在三年八月前。 又本卷上文已有「三年」二字、疑此「三年」或「三

列傳第三十八 校勘記

月」之誤。

問趙晏所言十事 按本書卷九六李晏傳、載李晏所言十事。疑此處「趙」當作「李」。

八五山 次澠池土濠村 「澠」原作「沔」,今改。參見本書卷二五地理志校記こむ。

興定元年德用率所部掩襲 「元」原作「二」。按本書卷一五宣宗紀,興定元年四月戊午,「平定

州賊閻德用之黨閻顯殺德用,以其衆降」。知事在元年。今據改。

[4] 二年十月詔誅范鐸 刺史范鐸以棄城伏誅」。今據補。 原脫「二年」二字。按本書卷一五宣宗紀,興定二年十月「甲寅,權平定州

泰和六年 地 太廟社稷。辛卯,以征南詔中外」。今據改。 「六」原作「八」。按本書卷一二章宗紀,泰和六年五月「丙戌,以宋畔盟出師告于天

會河堡兵敗 河堡」。卷九三獨吉思忠傳、「旣而敗績于會河堡」。又同卷承裕傳、「會河堡之役,獨吉思忠、承 「堡」原作「東」。按本書卷一三衞紹王紀,大安三年「九月,千家奴、胡沙敗績于會

裕沮喪不可復振」。今據改。

榮州河津人 「榮」原作「滎」,今改。參見本書卷二六班理志校記[II]。

轉河東北路支度判官 原脫「路」字,今補。「支度」原作「度支」。按本書卷五七百官志,「都轉運 司、支度判官二員、從六品、掌勾判、分判支度案事」。今據乙正。

[三] 歲終會計 「終」原作「給」,據殿本改。

[18] 復亨罷爲定國軍節度使 「定」原作「安」。按本書卷一六宣宗紀,元光元年「十一月丁未,大元

「同州,宋馮翊郡定國軍節度」。卷二七河渠志漕渠條有「定國軍節度使李復亨言」句,知「定國

兵徇同州,定國軍節度使李復亨、同知定國軍節度使訛可皆自盡」。又卷二六地理志,京兆府路

軍」是。今據改。

列

傳第三十

八

椌

勘記

金史卷一百

列傳第三十九

承暉 本名福興 抹燃盡忠 僕散端 本名七斤 耿端義

孛术魯德裕 烏古論慶壽

召之。 侍正。 郎兼右補闕。 五. 年,選充符寶祗候,遷筆硯直長,轉近侍局直長,調中都右警巡使。 承暉字維明,本名福興。 承暉不奉詔,明日奏曰:「吾也藍得罪先帝,不可召。」章宗曰:「善。」未幾,遷兵部侍 章宗卽位,遷近侍局使。 好學,淹貫經史。襲父益都尹鄭家塔割刺訛沒謀克。 孝懿皇后妹夫吾也藍,世宗時以罪斥去,乙夜,詔開宮城門 章宗爲皇太孫,選充 大定十

初置 列 傳 |九路提刑司,承暉東京咸平等路提刑副使,改同知上京留守事。 第 \equiv + 九 承 暉 御史臺奏:「承暉

潢府,爲北京留守。 別無才能,前爲大陽渡譏察,纔八月擢惠民司都監,已爲太優,依格兩除之後,當再入監差, 前爲提刑、豪猾屛息。」遷臨海軍節度使。 今乃超授隨朝八品職任。況痕都乃平章鎰之甥,不能不涉物議。」上從承暉議,召徒單鎰深 部尚書,兼知審官院。 副留守李東陽素貴、承暉自非公事,不與交一言。改知大名府,召爲刑 惠民司都監余里痕都遷織染署直長,承暉駮奏曰:「痕都以蔭得官, 歷利涉、遼海軍、遷北京路提刑使。 歷知咸平、臨

承暉卽杖豪民而遣之,謂其人曰:「可以此報宣徽也。」復改知大名府事。 而嘉之。豪民與人爭種稻水利不直,厚賂元妃兄左宣徽使李仁惠。 改知大興府事。宦者李新喜有寵用事,借大興府妓樂。承暉拒不與,新喜慚。 仁惠使人屬承暉右之。 雨潦害稼,承暉決 章宗聞

引潦水納之濠隍。

林木,則盜賊無所隱矣。承暉奏曰:「泰山五岳之宗,故曰岱宗。王者受命,封禪告代,國家 權行的決」。尚書省議:「猛安依舊收贖,謀克奏報,其餘鈴轄都軍巡尉先決奏聞,俟事定復 舊。」從之。及罷兵,盜賊渠魁稍就招降,猶往往潛匿。泰山巖穴間。 按察司請發數萬人刊除 雖不行此事,而山亦不可赭也。齊人易動,驅之入山,必有凍餓失所之患,此誨盜非止盜 及伐宋,遷山東路統軍使。山東盜賊起,承暉言「捕盜不卽獲,比奏報或遷官去官,請

也。天下之山亦多矣,豈可盡赭哉。」議遂寢。

滄州破,妻子皆死。 総石烈執中伏誅。[1] 進拜平章政事,兼都元帥,封鄒國公。 承暉面質其非。 紹王卽位,召爲御史大夫,拜參知政事。 至寧元年,起爲橫海軍節度使。貞祐初,召拜尚書右丞。承暉即日入朝,妻子留滄州。 是時,行限錢法。 進拜尚書左丞,行省于宣德。參知政事承裕敗績于會河堡,承暉亦坐除 承暉上疏, 略曰:「貨聚於上, 怨結於下。」不報。 駙馬都尉徒單沒烈與其父南平干政事,大爲姦利, 改知興中府事。

路兵 皆非我有,諸軍倍道來援,猶冀有濟。」詔曰:「中都重地,廟社在焉,朕豈一日忘也。已趣諸 定兵,「三元帥左都監烏古論慶壽將大名軍萬八千人、西南路步騎萬一千、河北兵一萬,御 危急。 寫奏曰:「七斤旣降,城中無有固志,臣雖以死守之,豈能持久。伏念一失中都,遼東、河朔 史中丞李英運糧,參知政事、大名行省孛术魯德裕調遣繼發,〔三数中都。承暉間遣人以礬 己乃總持大綱,期於保完都城。頃之,莊獻太子去之,右副元帥蒲察七斤以其軍出降,中都 留守中都。 、與糧俱往,卿會知之。」及詔中都官吏軍民曰:「朕欲紓民力,遂幸陪都,天未悔禍,時尙 中都被圍,承暉出議和事。宣宗遷汴,進拜右丞相,兼都元帥,徙封定國公,與皇太子 詔以抹燃盡忠爲平章政事, 兼左副元帥。三年二月, 韶元帥左監軍永錫將中山、眞 承暉以尚書左丞抹燃盡忠久在軍旅,知兵事,遂以赤心委盡忠,悉以兵事付之,

列

北。三月乙亥,李英被酒,軍無紀律,大元兵攻之,英軍大敗。 多虞,道路久梗,音問難通。 息,當不愆於旌賞。今已會合諸路兵馬救援,故茲獎諭,想宜知悉。」永錫、慶壽等軍至霸州 汝等朝暮矢石,暴露風霜,思惟報國,靡有貳心,俟兵事之稍

郎侯摯行尚書六部,往來應給,終無一兵至中都者。慶壽軍聞之亦潰。 軍,行元帥府于淸州,同知眞定府事女奚烈胡論出爲右都監,行元帥府于保州,四戶部侍 是時,高琪居中用事,忌承暉成功,諸將皆顧望。旣而,以刑部侍郎阿典宋阿爲左監

行。」曰:「汝行李辦未?」曰:「辦矣。」承暉變色曰:「社稷若何?」師姑不能對。叱下斬之。 心以權畀平章,嘗許與我俱死,今忽異議,行期且在何日,汝必知之。」師姑曰:「今日向暮且 第,亦無如盡忠何。召盡忠腹心元帥府經歷官完顏師姑至,謂曰:「始我謂平章知兵,故推 承暉與抹撚盡忠會議于尚書省。承暉約盡忠同死社稷。 盡忠謀南奔,承暉怒,卽起還

引咎以不能終保都城爲謝。復謂妻子死于滄州,爲書以從兄子永懷爲後。從容若平日,盡 邪正者數人,曰:「平章政事高琪,賦性陰險,報復私憾,竊弄威柄,包藏禍心,終害國家。」因 出 國家。」作遺表付尚書省令史師安石,其表皆論國家大計,辨君子小人治亂之本,歷指當時 .財物,召家人隨年勞多寡而分之,皆與從良書。 舉家號泣,承暉神色泰然,方與安石舉白 承暉起,辭謁家廟,召左右司郎中趙思文與之飲酒,謂之曰:「事勢至此,惟有一死以報

哭聲,復還問之,則已仰藥薨矣。 年五月二日也。師安石奉遺表奔赴行在奏之。 最後倒寫二字,投筆歎曰:「遽爾謬誤,得非神志亂邪。」謂安石曰:「子行矣。」安石出門,聞 引滿,謂之曰:「承暉於五經皆經師授,謹守而力行之,不爲虛文。」旣被酒,取筆與安石訣, 同三司、太尉、尚書令、廣平郡王,諡忠肅。 承暉生而貴富,居家類寒素,常置司馬光、蘇軾像於書室,曰:「吾師司馬而友蘇公。」平 家人匆匆瘞庭中。 韶以永懷爲器物局直長。 宣宗設奠於相國寺, 是日暮、盡忠出奔、中都不守。 哭之盡哀。 永懷子撒速 贈開府儀 爲 貞祐 奉御。

章政事完顏守貞素敬之,與爲忘年交。

Щ 防盜賊私市。」尚書省議,「止聽係籍人匠貨賣,有知情售不應存留者同私造法」。從之。 德昌軍節度事,簽北京按察司、滑州刺史,改恩州。 上言:「凡買賣軍器,乞令告給憑驗,以 京、臨潢提刑司知事。 東按察副使,坐虛奏田稼豐收請糴常平粟,詐稱宣差和糴,降號州刺史,改乾州 抹燃盡忠本名彖多,上京路猛安人。中大定二十八年進士第,調高陽、朝城主簿,北 御史臺舉廉能,遷順義軍節度副使。以憂去官,起復翰林修撰,同知

泰和六年,伐宋,爲元帥右監軍完顏充經歷官,坐奏報稽滯,杖五十。八年,入爲吏部

列傳第三十九 抹燃盡忠

字。 陰伺執中過失,申奏。 賜金百兩、銀千兩、重綵百段、絹二百疋。未幾,拜尙書右丞,行省西京。 郎中、累遷中都、西京按察使。 及執中自紫荆關走還中都,詔盡忠爲左副元帥兼西京留守。 執中雖跋扈,善撫御其部曲,密於居庸、 是時,統石烈執中爲西京留守,與盡忠爭,私意 北口置腹心刺取按察司文 以保全西京功進官三階, 不協。 盡忠

重幣。 念爾 貞祐 重臣,益勉乃力,以副朕懷。」二年五月,自西京入朝,加崇進,封申國公,賜玉帶、金鼎、 二年,進拜都元帥,左丞如故。 初,進拜左丞。 韶曰:「卿總領行省,鎭撫陪京,守禦有功,人民攸賴。 **股新嗣祚**,

都受圍,承暉以盡忠久在軍旅,付以兵事,嘗約同死社稷。及烏古論慶壽等兵潰,外援不 章政事,監修國史,左副元帥如故。宣宗詔盡忠善撫乣軍,盡忠不察,殺乣軍數人。 夜出奔,乃先殺師姑,然後仰藥而死。是日,凡在中都妃嬪,聞盡忠出奔,皆束裝至通玄門。 至,中都危急,密與腹心元帥府經歷官完顏師姑謀棄中都南奔,已戒行李,期以五月二 復顧矣。 盡忠謂之曰:「我當先出,與諸妃啓途。」諸妃以爲信然。 暮出城。 宣宗遷汴,與右丞相承暉守中都。 是日,承暉、盡忠會議于尚書省,承暉無奈盡忠何,徑歸家,召師姑問之,知將以其 中都遂不守。盡忠行至中山,謂所親曰:「若與諸妃偕來,我輩豈能至此」」 承暉爲都元帥,盡忠復爲左副元帥。 盡忠乃與愛妾及所親者先出城,不 十月, 已而 進拜平 一日向 中

注本局 宗曰:「近侍局例注本局人及宮中出身,雜以他色,恐或不和。」盡忠曰:「若給使左右,可止 乎! 刺史立功,驟升顯貴,輒懷異志。蕭鮮萬奴委以遼東,乃復肆亂。知人之難如此,朕敢 爲預政矣。」宣宗曰:「自世宗、章宗朝許察外事,非自朕始也。 汝等不諫,今乃面訐,此豈爲臣之義哉」德升亦謝罪。 等共舉之,朕豈不盡心哉」德升曰:「比來訪察,開決河隄,水損田禾等,覆之皆不實。」上 「朕於庶官曷嘗不愼,有外似可用而實無才力者,視之若忠孝而包藏悖逆者。 曰:「朕自今不敢問若輩,外間事皆不知,朕幹何事,但終日默坐聽汝等所爲矣。 方朕有過, 回避,可令左右司官兼之。」宣宗以爲然。 盡忠至南京,宣宗釋不問棄中都事,仍以爲平章政事。 非近侍體察,何由知之。]盡忠乃謝罪。 參政德升繼之曰:「固當愼選其人。」宣宗曰: 以蒲察五斤爲公幹,乃除副使。衆以斜烈爲淳直,乃用爲提點。若鳥古論石虎乃汝 旣令預政,固宜愼選。」宣宗曰:「何謂預政。」盡忠曰:「中外之事得議論訪察,卽 盡忠奏應奉翰林文字完顏素蘭可爲近侍局。 盡忠言:「記注之官,奏事不當 如請謁營私,擬除不當,臺諫 蒲察七斤以 輕

盡忠、德升面責,愈無所忌。 紇 石烈執中之誅,近侍局嘗先事啓之,遂以爲功,陰秉朝政。 未幾,德升罷相,盡忠下獄,自是以後,中外蔽隔,以至于亡。 高琪託此輩以自固。及

盡忠與高琪素不 相能,疑宣宗頗疏已,高琪問之。 其兄吾里也爲許州監酒,秩滿,求調

列

單吾典告盡忠謀逆。」上無然曰:「朕何負彖多,彼棄中都,凡祖宗御容及道陵諸妃皆不顧, 獨與其妾偕來,此固有罪。」乃命有司鞫治,問得與兄吾里也相語事,遂幷吾里也誅之。 此,胡沙虎之事孰爲爲之!」至吾里也曰:「然。」九月,尚書省奏:「遙授武寧軍節度副使徒 盡忠與吾里也語及中都事,曰:「邇來上頗疏我,此高琪所爲也。 若再主兵,必不置

點檢。 十。丁憂,起復東北路招討副使,改左副點檢,轉都點檢,歷河南、陝西統軍使,復召爲都 衞花狗邀駕陳言:「熾叔父胡覩預弑海陵,端不宜在侍衞。」詔杖花狗六十,代撰章奏人杖五 長史、宿直將軍、邳州刺史、尙廐局副使、右衞將軍。 僕散端本名七斤,中都路火魯虎必剌猛安人。 章宗卽位,轉左衞。章宗朝隆慶宮,護 事親孝,選充護衞,除太子僕正、滕王府

壽春邪?此宋人欲多方誤我,不早爲之所,一旦大舉入寇,將墮其計中。」上深然之。未幾, 亦曰:「狗盜鼠竊,非舉兵也。」端曰:「小寇當畫伏夜出,豈敢白日列陳,犯靈璧、入渦口、攻 明年,拜尚書左丞。泰和六年,詔大臣議伐宋,皆曰無足盧者。 承安四年,上如薊州秋山獵,端射鹿誤入圍,杖之,解職。 左丞相宗浩、參知政事賈鉉 泰和三年,起爲御史大夫。

丁母憂,起復尙書左丞。

甫拱 奉書乞和,於端奏其書。 平章政事僕散揆伐宋,發兵南京,詔端行省,主留務。 朝議諸道兵既進,疑宋以計緩師,詔端遣拱還宋。 僕散揆已渡淮,次廬州。 七年,僕 宋使皇

散揆以暑雨班師,端還朝。

位人,皇子未立,端請納之。章宗從之。旣而京師久不雨,阿魯不復言:「夢見白頭老父使 章政事,封申國公。八年,宋人請盟,端遷一官。 循省于往咎,思善補于將來。 己祈雨,三日必大澍足。」過三日雨不降,章宗疑其誕妄,下有司鞫問,阿魯不引伏。 曰:「昔者所奏,今其若何?後人謂朕信其妖妄,實由卿啓其端,倪鬱于予懷,念之難置。 乃自言夢中屢見白頭老父指其二女曰:「皆有福人也。若侍掖廷,必得皇嗣。」是時,章宗在 初,婦人阿魯不嫁爲武衞軍士妻,生二女而寡,常託夢中言以惑衆,頗有驗,或以爲神。 恪整乃心,式副朕意」端上表待罪,詔釋不問。頃之,進拜平 詔讓端 其

得范氏胎 視章宗內人有娠者。 章宗遺詔:「內人有娠者兩位,生子立爲儲嗣。」衞紹王卽位,命端與尚書左丞孫卽康護 氣 有損。」 明年四月,有人告元妃李氏教承御賈氏詐稱有身。元妃、承御皆誅死。 泰和 八年十一月二十日,章宗崩。二十二日,太醫副使儀師顏狀:「診

端進拜右丞相,授世襲謀克。

列

傳

宣宗意乃決。 貞祐二年五月,判南京留守,與河南統軍使長壽、按察轉運使王質表請南遷,凡三奏, 百官士庶皆言其不可,太學生趙昉等四百人上書極論利害,宣宗慰遣之,乃

下韶遷都。明年,中都失守。

軍節度使完顏狗兒卽日來歸,〔<ご奏遷知平涼府事,諸將聞之,莫不感激。遣納蘭伴僧招諭 密副使,未幾,進兼樞密使。數月,以左丞相兼都元帥行省陝西,給親軍三十人、騎兵三百 為衞,次子宿直將軍納坦出侍行。[t]賜契紙勘同曰:「緩急有事,以此召卿。」端招遙領通遠 宣宗至南京,以端知開封府事。 頃之,爲御史大夫,無何,拜尚書左丞相。 三年,兼樞

郎等,皆相繼內附。汪三郎賜姓完顏,後爲西方名將。

地,請此軍隸行省,緩急可使。」朝廷從之。及大元兵入潼關,永錫坐誅,召而罪不及端。 同、華舊屯陝西軍及河南步騎九千餘人,皆隸陝州宣撫副使永錫,端奏:「潼關之西,皆陝西 故讒構不果行。宣宗聞之, 詔自今專使酒三行別于儀門, 他事經過者一見而止。初, 四年,以疾請致仕,不許,遣近侍與太醫診視。隘雖癃老,凡朝廷使至必遠迓,宴勞不

十州,介宋、夏之間,與諸番雜處,先於鞏州置元帥府以鎭之。今承裔以隴外萬兵移居鳳 興定元年,[10]朝廷以知臨洮府事承裔爲元帥左都監,行元帥府於鳳翔。端奏:「隴外

宣宗震悼,輟朝。 兵已多,但令總管攝行帥事,與京兆、鞏相爲首尾,足以備緩急矣。」從之。是歲,薨。 臣恐一旦有警,援應不及。乞令承裔行元帥府於鞏州。 贈延安郡王、諡忠正。 正大三年,配享宣宗廟廷。 若以鳳翔密邇宋界,則 本路屯

革喻以風旨,從革言之。楠方食,擲匕筯於案,大言曰:「寧使趙楠除名,亦不能屈斷無辜 姜,忙押門不自安,遂叛,求脫命而已。」委曲推問,無知情之狀。省中微聞之,召小吏郭從 合,必欲以知情處之,至於忙押門妻皆被訊掠。其母完顏氏曰:「忙押門通其父妾,父殺此 顏盞宗阿同飲,忙押門詐以事出投北兵,省以刑部郎中趙楠推其家屬及同飲人。 時上下迎 知情也。 人。」遂以不知情奏,且以妾事上聞。上曰:「丞相功臣,納坦出父子俱受國恩,吾已保其不 子 納坦出為定國軍節度使。天興元年十一月,納坦出之子忙押門與兄石里門及護衛 立命赦出之。」楠字才美,進士,高平人。

化、順義軍節 耿 端義字忠嗣,博州博平人。 大定二十八年進士。調滑州軍事判官, 歷上洛縣令, 安 度判官 補 尚書省令史、除汾陽軍節度副使、改都轉運司戶籍判官、轉太常博

列傳

河北東路按察副使,同知東平府事,充山東安撫使。宣宗判汾陽軍,是時端義爲副使。 士,遷太常丞兼秘書郎,再除左司員外郎,歷太常少卿兼吏部員外郎,同修國史,戶部郎中, 宣

宗卽位,召見,訪問時事,遷翰林侍講學士兼戶部侍郎,未幾,拜參知政事。 貞祐二年,中都被圍,將帥皆不肯戰。端義奏曰:「今日之患,衛王啓之。 士卒縱不可

使,城中軍官自都統至謀克不啻萬餘,遣此輩一出,或可以得志。」議竟不行。 義請遷南京。 旣而僕散端三表皆言遷都事,宣宗意遂決。是歲,薨。宣宗輟朝,賻贈甚厚, 中都解圍,端

遣使祭葬。

封 丘令。丁父憂,服除,調通遠令。蕃部取民物不與直,攝之不時至,即掩捕之,論如法。 李英字子賢,其先遼陽人,徙益都。中明昌五年進士第,調淳化主簿、登州軍事判官、

補尙書省令史。

納蘭 修完樓櫓,事勢可知。 仏頭 大安三年,集三品以上官議兵事,英上疏曰:「軍旅必練習者,术虎高琪、鳥古孫兀屯、 、抹燃盡忠先朝嘗任使,可與商略。餘者紛紛,恐誤大計。」又曰:「比來增築城郭, 山東、河北不大其聲援,則京師爲孤城矣。」不報。除吏部主事。

門,而 「中都之有居庸、猶秦之崤、函、蜀之劍門也。 當遣官節制,失此不圖,忠義之士,將轉爲他矣。」又曰:「可鎭撫宣德、德興餘民,使之從戎。 所在自有宿 不 (祐初,攝左司都事,遷監察御史。 能 衞護,英實恥之。」高琪奏其書,卽除尚書工部員外郎,充宣差都提控,居庸等關 藏,足以取給,是國家不費斗糧尺帛,坐收所失之關隘也。 右副元帥术虎高琪辟爲經歷官, 邇者撤居庸兵,我勢遂去。 今土豪守之,朝廷 居庸咫尺, 都之北 乃上書高琪曰:

關隘 召還 令李 郡縣,併州 雄等下山招募軍民,旬日得萬餘人。 **,集人力以** 年正 遷翰林待制,因獻十策,其大概謂:「居中土以鎭四方,委親賢以守中都,立藩 縣以 月,乘夜與壯士李雄、郭仲元、郭興祖等四百九十人出城,緣西山進至佛巖寺。 省民 防不虞,養馬力以 力。」頗施行之。 助軍 威、愛禾稼以結民心,明賞罰以勸百官,選守令以復 擇衆所推服者領之,詭稱土豪,時時出戰。 被創 屏以固

隘

悉

隸

利 御 一十七最之法 史 害 中丞。 宣宗 可可 因 南遷,與左 近侍局 英言:「兵興以來,百務皆弛,其要在于激濁 徒 爲虛文。 以聞。」宣宗 諫 議 大夫把胡魯俱爲御前經歷官。 大定間, 次眞定,以英爲國子祭酒 數遣使者分道考察廉能,當時號爲得 ,充宣差提控隴 揚淸,獎進 韶曰:「扈從軍馬,朕自總之,事有 人材耳。 右邊事。 人。 近 年改定四善、 願 無 改前日徒 何、召爲

列

傅

第

設之文,遵大定已試之效,庶幾人人自勵,爲國家用矣。」宣宗嘉納之。

|英奏示宰臣。宰臣奏::「狗兒奮發如此,賞以異恩,殆不爲過。」上然其言。 見,狗兒立殺之。 韶除通遠軍節度使,加榮祿大夫,賜姓完顏氏。 英言:「名器不可以假人, 其著者。狗兒藐然賤卒,一朝處衆人之右,爲統領之官,恐衆望不厭,難得其死力。」宣宗以 取蘭州,又將何以待之。一陝西名將項背相望,曹記僧、包長壽、東永昌、徒單醜兒、郭祿大皆 伏見蘭州西關堡守將王狗兒向以微勞,旣蒙甄錄,頃者堅守關城,誘殺賊使,論其忠節,誠 有可嘉。若官之五品,命以一州,亦無負矣。急於勸獎,遂擢節鉞,加階二品,賜以國姓,若 上恩以難得爲貴。比來醲於用賞,實駭聞聽。帑藏不足,惟恃爵命,今又輕之,何以使人, 自兵興以來,亟用官爵爲賞,程陳僧敗官軍于龕谷,遣爲統制董九招西關堡都統王狗

將兵,英收河間清、滄義軍自淸州督糧運救中都。英至大名,得兵數萬,馭衆素無紀律。貞 慶壽、永錫軍聞之,皆潰歸。五月,中都不守,宣宗猶加恩,贈通奉大夫,諡剛貞,官護葬事, |祐三年三月十六日,|英被酒,與|大元兵遇于|霸||小北,大敗,盡失所運糧。|英死,士卒殲焉。 中都久圍,丞相承暉遣人以礬寫奏告急。詔元帥左監軍永錫、江江左都監烏古論慶壽

錄用其子云。

官兵救護家屬,德裕蔽之,御史劾奏逮獄。遇赦,謫寧海州刺史,稍遷泗州防禦使、武勝軍 子詹事、元帥左都監,遷左監軍兼臨潢府路兵馬都總管。 寧治中,歷順州、濱州刺史。 遷少府監丞。 | 字术魯德裕本名|| 蒲剌都,隆安路猛安人。 補樞密院尚書省令史,右三部檢法、 明昌末,修北邊壕塹,立堡塞,以勞進官三階,授大理正。 坐前在順州市物虧直,遇赦,改刺瀋州,累官北京路按察使、太 坐士馬物故多,及都統按帶私率 丁母憂,起復廣 監察御

州兵敗,糧盡亡失,坐弛慢兵期,責授沂州防禦使,尋知益都府事。 名、河間 事 ,行省大名。 貞祐二年,改知臨洮府事,兼陝西路副統軍。 、清、滄、觀、霸、河南等兵,德裕將之,幷護淸、滄糧運。 韶發河北兵救中都。 凡真定、中山、保、涿等兵,元帥左監軍永錫將之,大 召爲御史中丞,拜參知政事兼簽樞密院 德裕不時發。 興定元年二月,卒。 及李英至霸

節度使。

有勞,進一 鳥古論慶壽,河北西路猛安人,由知把書畫充奉御,除近侍局直長,再轉本局使。 階,賜 金帶 泰 和四年, 遷本局提點。 是時,議開通州漕 河,詔慶壽按視。 漕河

列

傳

第三

+

九

学 术

魯德裕

烏古論慶

成、賜銀一百五十兩、重幣十端。

潰,遂與大軍渡漢江,圍襄陽。元帥匡表薦慶壽謀略出衆。上嘉之,進一官,遷拱衞直都指 行興宋兵遇,斬首五百級,宋隨州將雷太尉遁去,遂克隨州。於是宋鄧城、樊城戍兵皆 泰 和六年,伐宋,從右副元帥完顏匡出唐鄧,爲先鋒都統,賜御弓二。以騎兵八千攻下 頃之,完顏匡軍次白虎粒,遣都統完顏按帶取隨州,遣慶壽以兵五千扼赤岸,斷襄漢

揮使,提點如

故

紹 舊 起爲保安州 南 王卽 汝 有鴉路舊屯四千,其三千在襄城,今割襄隸許州,道里近便,仍食用解鹽,其屯軍三千,依 州 初 位,改左副點檢、近侍局如故。 總押。」從之。八年,罷兵,遷兩階,賜銀二百五十兩、重幣十端。 ,慶壽上書云:「汝州襄城縣去汝州遠於許州兩舍,請割隸許州便。」尚書省議:「汝州 刺史、歷同知延安府、西北、西南招討副使、棣州防禦使、興平軍節度使。 未幾,坐與黃門李新喜題品諸王,免死除名。久之, 有疾,賜御藥。

步騎萬一千、河北兵一萬救中都。 遷 副 汴 都 指 貞 改右副點檢兼侍衞親軍副都指揮使。 揮。 祐 二年,遷元帥右都監,以保全平州功進官五階,賜金 數月, 知彰德府事。 三年,中都危急,改元帥左都監,將大名兵萬八千、西南路 次霸州北,兵潰。 閱月,知大興府事。 頃之,中都不守,改大名府權宣撫使。 一吐鶻、重幣十端。 未行,改左副點檢兼 頃之,宣宗 親軍

未幾,知河中府,權河東南路宣撫副使。 敗夏人于安塞堡。 戰于鄜州之倉曲谷,有功。 四年,遷元帥左監軍兼陝西統軍使。日日駐兵延安,

實,詔有司鞫問,已而釋之。 馬四百匹、牛三百頭,器械稱是。 興定元年,與簽樞密院事完顏賽不經略伐宗,敗宋兵于泥河灣石壕村,斬首三千級,獲 歷鎭南集慶軍節度使,卒。 復破宋兵七千於樊城縣。 旣而,以軍士多被傷,奏不以

議焉。 能贖也。 不能守、中都不守、則土崩之勢決矣。僕散端、耿端義似忠而實愚,抹燃盡忠委中都,庸何 贊曰:承暉守中都期年,相爲存亡,臨終就義,古人所難也。 高琪忌承暉成功,孛术魯德裕緩師期,姦人之黨,於是何誅。 鳥古論慶壽無罰,貞祐之刑政,從可知矣。 大抵宣宗旣遷,則中都必 李英被酒敗軍,雖死不

校勘記

紇石烈執中伏誅 午,「承暉爲尙書右丞」。 按本書卷一四宣宗紀,貞祐元年十月辛亥,「殺胡沙虎于其第」。十一月庚 此記執中伏誅于承暉召拜右丞之後,時序旣誤,且與上下文全無關係,

列

傳

第三

十九

校

勘

記

此七字當是衍文。

詔元帥左監軍永錫將中山真定兵 按本書卷一四宣宗紀,貞祐二年十二月「戊戌,遺真定行元

帥府事永錫等援中都」。此記于三年二月之下,誤。

△□□大名行省孛术魯德裕調遣繼發 原脱「裕」字。按本卷字术魯德裕傳,貞祐二年「行省大名,詔

發河北兵救中都」。有「裕」字,今據補

行元帥府于保州「于」原作「爲」,據殿本改。

八五

胡沙虎之事孰爲爲之

八<u>六</u> **一** 宋使皇甫拱奉書乞和 按本書卷六二交聘表,泰和六年十一月,宋「遣忠訓郎林拱持書乞和於

「事」原訛作「子」,據文義改正。

僕散揆」。與此不同。

フセン 次子宿直將軍納坦出侍行 「坦」原作「丹」。按下文三見皆作「納坦出」,今據改。

端招遥領通遠軍節度使完顔狗兒即日來歸 「遠」原作「安」。按金無「通安軍」。本卷李英傳、「程

陳僧敗官軍于龕谷,遣僞統制董九招西關堡都統王狗兒,狗兒立殺之,韶除通遠軍節度使,賜姓

又本書卷二六、地理志,臨洮路「鞏州,皇統二年升軍事爲通遠軍節度使」。今據改。

完顔氏」。

ヘルリ 永錫 坐誅 按本書卷一一四完顏合周傳記此事作「遂再奪爵,免死除名」。

興定元年 「元」原作「四」。按本書卷一一三白撒傳,白撒「名承裔,興定元年爲元帥左都監,行 列傳

金史卷一百二

列傳第四十

僕散安貞 田琢 完顏弼 蒙古綱 必蘭阿魯帶

邳、淄、涿州刺史、拱衞直都指揮使。 誅,安貞罷歸,召爲符寶祗候。 廷遣安貞與兵部尚書裴滿子仁、刑部尚書武都分道宣撫。 左都監。二年,中都解嚴,河北州郡未破者惟眞定、大名、東平、淸、沃、徐、邳、海州而已。朝 歷尙衣直長、御院通進、尙藥副使。丁母憂,起復,轉符寶郎,除同知定海軍節度使事。 僕散安貞本名阿海,以大臣子充奉御。父揆,尚韓國公主,鄭王永蹈同母妹也。 復爲奉御,尚邢國長公主,加駙馬都尉,襲胡土愛割蠻猛安。 貞祐初,改右副點檢兼侍衞親軍副都指揮使,遷元帥 於是除安貞山東路統軍安撫 永蹈 歷

初,益都縣人楊安國自少無賴,以鬻鞍材爲業,市人呼爲「楊鞍兒」,遂自名楊安兒。 列 第 四 + 僕 散 安 貞

泰

衞紹 和 安三年,招鐵瓦敢戰軍得千餘人,以唐括合打爲都統,安兒爲副統, 道透漏 伐宋, 王 者耳。」 驛召問狀。 Щ 無賴往往相聚剽掠,韶州郡招捕之。 朝廷信其言。 安兒乃曰:「平章參政軍數十萬在前,無可慮者。 安兒乃亡歸山東,與張汝楫聚黨攻劫州縣,殺略官吏, 安兒降,隸諸軍, 戍邊。 累官刺史、防禦使。 屯駐 雞鳴山所以備間 至雞鳴山不進。 山東

使完 海。 改元天順 刺 史 耿格 顏 李全 安貞 訛 論 略 至益都,敗安兒于城東。 開門納 凡符印 臨朐, 爲 右 翼。 **偽鄒都統,以州印** 韶表儀式皆格草定,遂陷寧海,攻濰州。 扼穆陵關, 欲取 益都。 付之, 安兒奔萊陽。 郊迎安兒, 安貞以沂州防禦使僕散留家爲左翼,安化軍節度 萊州徐汝賢以城降安兒,賊勢復振。 發帑藏以勞賊。 偽元帥方郭三據密州,[I] 略沂、 安兒遂僭號,置官屬, 登州

濟 殺 縫 賊 、數萬, 七 以大 月 庚辰, 兵,殺獲甚衆 獲器械不 安貞 軍昌邑東,徐汝賢等以三州之衆十萬來拒戰。 可勝 計。 壬午, 賊棘七率衆四萬陣于辛河。 安貞 自午抵暮、轉戰三十里, 令留家由上流膠西

諸將繼之,賊大敗,殺獲且半,以重賞招之,不應。 甲 申 安貞 軍 至萊州 ز 僞 寧海 州刺史史潑立以二十萬陣于城 安貞遣萊州黥卒曹全、張德、 東。 留家先以 輕兵 田貴、宋福 〈薄戝〉

將 德玩襲殺方郭三,復密州。 **詐降于徐汝賢以爲內應。** 告留家 以徇。 留家 安兒脫身走、訛論以兵追之。耿格、自史潑立皆降。 募勇敢士三十人從全入城,姚雲納之,大軍畢登,遂復萊州,斬徐汝賢 全與賊西南隅戍卒姚雲相結,約納官軍。 餘賊在諸州者皆潰去。 安兒嘗遺梁居實、黃縣甘泉鎭監酒石抹 留家略定膠西諸縣,宣差伯 丁亥夜,全縋城出,潛 及諸賊

浮海赴遼東構留哥,已具舟,皆捕斬之。

府事, 使、知東平府事烏林荅與卽引軍還。 李思溫及應脅誘從賊,幷在本路自爲寇盜,罪無輕重,並與赦免。 ,賞錢十萬貫。十二月辛亥,耿格伏誅,至妻子皆遠徙。 十一月戊辰,曲赦 權宣撫副使。 其後楊安兒與汲政等乘舟入海,欲走岠嵎山。 山東,除楊安兒、耿格及諸故官家作過驅奴不赦外,劉二祖、張汝揖 賊衆乘之,復出爲患。 諸軍 韶以陝西統軍使完顏弼知東平 方攻大沫堌,赦至,宣撫副 獲楊安兒者,官職俱授三 舟人曲成等擊之,墜

州提控夾谷石里哥同攻大沫堌,賊千餘逆戰。石里哥以騎兵擊之,盡殪。 人,降餘黨八千,擒偽宣差程寬、招軍大使程福,招降脅從百姓三萬餘人。 以入,別軍取賊水寨,諸軍繼進,殺賊五千餘人。劉二祖被創,獲之,及僞參謀官崔天祜 三年二月,安貞遣提控紇石烈牙吾塔破巨蒙等四堌,及破馬耳山, 殺劉二祖賊四千餘 提控沒烈奪其北 安貞遺兵會宿

列傳

沒烈等有差。詔尚書省曰:「山東東、西路賊黨猶嘯聚作過者,詔書到日,並與発罪,各令復 楊安兒爲太師李思溫。餘衆保大小峻角子山,前後追擊,殺獲以萬計,斬劉二祖。 在處官司盡心招撫,優加存卹,無令失所。」十月,安貞遷樞密副使,行院于徐州 詔遷賞

國用安、時靑之徒焉。 結,所在寇掠,皆衣紅納襖以相識別,號「紅襖賊」。官軍雖討之,不能除也。大槪皆李全、 歸且萬人,皆安慰復業。自楊安兒、劉二祖敗後,河北殘破,干戈相尋。其黨往往復相團 **遣兵討郝定,連戰皆克,殺九萬人,降者三萬餘,郝定僅以身兎。** 四年二月,楊安兒餘黨復擾山東。 韶安貞與蒙古綱、完顏弼以近詔招之。五月,安貞 獲偽金銀牌、器械甚衆,來

安貞至安豐,宋兵七千拒戰,權都事完顏胡魯剌衝擊敗之,追至淝水,死者二千餘人。安貞 尚書省元帥府,及唐、息、壽、泗行元帥府分道各將兵三萬,安貞總之,畫定期日,下詔伐宋。 月,四開封治中呂子羽等以國書議和于宋,宋人不受。以安貞爲左副元帥權參知政事行 興定元年十月,詔安貞曰:「防河卒多老幼疲軟不勝執役之人,其令速易之。」二年十二

水之捷,胡魯剌功第一,至臣之兵事皆咨此人,功厚賞薄,乞加賞以勸來者。」尚書省奏: 三年閏月,安貞至自軍中,入見于仁安殿。 胡魯剌進一階。 久之,安貞燕見,奏曰:「淝 至大江,乃班師。

「凡行省行院帥府參議左右司經歷官都事以下皆遷一官,所以絕求請之路,塞姦倖之門也。

安貞之請不可從。」遂止。

山寺。 兵五 萬,因用其策,輒有功。 境,此輩旣不可盡殺,安所置之。、殷欲驅之境上,遣之歸如何。」宰臣不對。 殺略不可勝計。 攻,宋兵潰,遂奪黃土關。 千直逼 一千保黃土關,關絕險,素有備,堅壁不出。 五. 關門。 縱 年,復伐宋。二月,安貞出息州,軍于七里鎮,宋兵據淨居山,遣兵擊敗之。 火焚寺,乘勝追至洪門山。宋兵方浚濠立栅,安貞軍亟戰,奪其栅。 翼日,左右軍會于山顚,俯瞰關內。 獲宋宗室男女七十餘口,獻之,師還。安貞每獲宋壯士,輒釋不殺,無慮 宣宗謂宰臣曰:「阿海將略固善矣,此輩得無思歸乎? 遂入梅林關,找<u>麻城縣,抵大江,至黃州</u>,克之。 進克蘄州, 安貞遣輕兵分爲左右軍潛登,日別以 宋人守關者望之,駭腭不能立。 宋黃統 南京密邇宋 宋兵保 中軍 兵三 制 數 急 專

事,益厚朝廷之恩,爰自帥藩,擢居樞府。 青榮祿大夫、左副元帥兼樞密副使、駙馬都尉僕散阿海,早藉世姻,寖馳仕軌,屬當 實,其令覆案之。」戊寅,幷其二子殺之,日以祖忠義、父揆有大功,殆兄弟緣坐。 六月甲寅朔,尚書省奏安貞謀叛。 二城雖得,多罪稔彰,念勝負之靡常,肯刑章之輕用。 宣宗謂平章政事英王守純曰:「朕觀此奏、皆飾詞不 頃者南伐,時乃奏言,是俾行鱗 始自畫因糧之計,乃更嚴橫 介之誅,而 詔 軍旅 盡露 日 銀 梟 之

列

傳

之俘,隨時誅戮,獨於宋族,曲活全門,示其悖德于敵讎,豫冀全身而納用。」 迨致款詞,乃詳實狀。 近侍,悉露姦謀,蓋虞前後罪之上聞,廼以金玉帶而夜獻。 歛之期,督促計司,彫弊民力,信其私意,或失防秋。顧利害之實深,尙優容而弗問。 如釁端之少露,得先事而易圖。因其方握兵權,得以謀危廟祏,事或不濟,計卽外奔。 自以積愆之著,必非公憲所容,欲結近臣之歡心,俾伺內庭之指意, 審事情之詭秘,命信臣而 :鞫推, 前日 頃因

使紀石烈蒲剌都、大名路總管判官銀术可因而欺隱。 百除名。 初,安貞破蘄州,所得金帛,分給將士。 初, 安貞典兵征伐,嘗曰:「三世爲將,道家所忌。」自忠義、揆至安貞,凡三世大將焉。 安貞破蘄州、獲宋宗室不殺而獻之、遂以爲罪。 韶薄其罪,特立奪三官、降三等,蒲剌都、銀术可奪兩官、降二等云。 南京都轉運使行六部事李特立、金安軍節度副 事覺、特立當死、蒲剌都、銀术可當杖 安貞憂讒,以賄近侍局,乃以質成

商 稅 副使。 田 琢字器之,蔚州定安人。 丁父憂,起復懷安令,補尚書省令史。 中明昌五年進士、調寧邊、在平主簿、路州觀察判官、中都

度使事,經略山西。 貞祐 年,中都被圍,琢請由間道往 琢與弘州刺史魏用有隙,琢自飛狐還蔚州,用伏甲於路,將邀而殺之。 山西招集義勇,以爲宣差兵馬提控、同知忠順軍節

劫府庫倉廪,以兵攻逐於定安。 琢知其謀,自別道入定安。用入蔚州,殺觀察判官李宜、錄事判官馬士成、永興縣令張福, **|琢與戰,敗之。||用脫身走,易州刺史||浦察縛送||中都元帥府**

殺之。

害,魏用將士本無勞效,以用弄兵死禍,遽爾任用,恐開倖門。」詔從之。 可爲管押者,卽以|魏用金牌佩之,以安其衆。 是時,勸農副使侯摯提控紫荆等關隘,朝廷聞蔚州亂,欲以擊就代琢守蔚州,令軍中推 丞相承暉奏、「田琢實得軍民心、語練山西利

控弘、蔚州軍馬,宮楫副之。 亡,得三萬餘,入中山界屯駐,而遺沈思忠招集西京蕩析百姓,得萬餘人,皆願徙河南。 也。」從之。 上書:「此輩與河南鎭防,往往鄉舊,若令南渡,擇壯健爲兵,自然和協,且可以招集其餘 人,可充軍者萬五千人,分屯蔚州諸隘,皆願得沈思忠爲將。詔加思忠順天軍節度副使,提 |琢至||蔚州,誅與||用同惡數人。 募兵旬日,得二萬人。 十月,||琢兵敗,僅以身免。 加沈思忠同知深州軍州事。琢復遣沈思忠、宮楫招弘州、蔚州百姓,得五萬餘 招集散

輝、大名就食。」制可。 人,官廪不足,發民窖粟猶不能贍。其中多女直人,均爲一軍,不可復有厚薄,可令於衞、 頃之,西山諸隘皆不能守。 加琢河北西路宣撫副使,遙授濬州防禦使,屯濬州。琢欲陂西山諸 琢移軍沃州。 沃州刺史完顏僧家奴奏:「田琢軍二千五百

水以衞濬州。

春乃行。」數日,琢復奏:「濬不可守,惟當遷之。」宰臣劾琢前後奏陳不一,請逮鞫問。 |州防河。」詔盡徙屯陝。|琢復奏:「臣幸徙安地,然||洛乃||河北要郡,今見糧可支數月,乞俟來 琢奏:「此輩嶺外失業,父子兄弟合爲一軍,若離而分之,定生他變,乞以全軍南渡,或徙衞 貞祐三年十一月,河北行省侯擊入見,奏:「河北兵食少,請令琢汰遣老弱,就食歸德。」 宣宗

發,一人耕之,百人食之,其能贍乎。春種不廣,收成失望,軍民俱困,實繫安危。臣聞古之 足,富國强兵之道也。」宣宗深然之。 勢家兼幷,亦籍其數而授之農民,寬其負算,省其徭役,使盡力南畝,則蓄積歲增,家給人 墾。富者備牛出種,貧者傭力服勤。若又不足,則敎之區種,期于盡闢而後已。 是也。方今曠土多,游民衆,乞明勅有司,無蹈虛文,嚴升降之法,選能吏勸課,公私皆得耕 名將,雖在征行,必須屯田,趙充國、諸葛亮是也。古之良吏,必課農桑以足民,黃霸、虞詡 琢至陝,上書曰:「河北失業之民僑居河南、陝西,蓋不可以數計。百司用度,三軍調 官司圉牧,

年,改山東東路轉運使,權知益都府事,行六部尚書宣差便宜招撫使。李旺據膠西,琢遣益 陝西元帥府請益兵、詔以琢衆與之。興定元年,朝廷易置諸將、遷山東西路轉運使。二

其 都 前 治 鋒 中張林討之,生擒李旺。八月, 于水等三十人,追擊爲陳萬戶,斬首八百級。 萊州經略使术虎山壽襲破李旺黨偽鄒元帥于小堌,獲 明日,復破之于朱寒寨。 膠西、高密官

軍

亦

屢破之于諸村及海島間。

|仙 石 等十三人。餘衆奔潰,追及于別寨,攻拔之,聚僅 烈 醜漢 是 月 會兵討之。 ,棣州裨將張聚殺防禦使斜卯重興,遂據棣州,襲濱州,其衆數千人。 聚棄濱專保棣州。 諸軍趣棣,聚出戰,敗之,斬首百級,生擒僞都統王 以身発。 遂復二州。 琢遣提控約

安丘 職 爲 福 此 Щ 等,詔許之。 縣 舉 ,敗焉,提控王顯死之。 李全據安丘,琢造總領提控王政、王庭玉討之。 ,

乞治其罪。」

詔遣官鞫玩,

會赦而 令烏林荅石家奴、壽光縣巡檢紇石烈醜漢破李全于日照縣,琢承制各遷官一階,進 琢奏:「伯德玩本相視 此 旣 而 Щ 昌樂縣令术虎桓都、臨朐縣 東山堌水寨,未嘗福行, 宣差提控、太府少監伯德玩率政兵攻 令兀 獨留密州,輒 顔吾丁

提控 姓歸 大去 歲 燕寧復 心 三年,沂州注子堌王公喜構宋兵據沂州,防禦使徒單福定徒跣脫走,百姓潰散。 顧 王二嘗據沂州、邳州總領提控納合六哥前 可 用六哥取沂州 沂 州,王公喜復保注子堌。 ,今方在行省侯摯麾下,乞發還, |琢奏:「沂州須知兵者守之。 爲 同 知 沂 取 州 便道 防 禦 進討。 事 徒單 招招 制制 集餘衆 福定已衰老,納合 可 攻取之,百 旣而 琢奏 莒 州

列

李全。」 六哥善治兵,識沂形勢。」詔福定專治州事,以六哥爲沂州總領。 主簿張亞夫嘗權行部官,主餉密州,委曲購得糧二萬斛,兵儲乃足,行至高密,徵他州兵拒 官梁昱嘗攝淄州刺史,率軍民力田,徵科有度,饋餉不乏,保全淄州,土賊不敢發。 世顯能招集猛安餘衆及義軍,却李全,保濰州。 梁昱遷一官,同知淄州事。張亞夫遷兩官,密州觀察判官。 韶世顯升職從四品,遙授同知海州事。 六哥遷一官,升一等,充沂州宣差都提控。 六哥破灰山堌,沂境以安。守亳州觀察判 琢奏:「濰州刺史致仕獨吉 前猗氏

行。 馴致之,乃遣人召琢還。行至壽張,疽發背卒。 |林旣得兵,同琢出,卽率衆譟入府中。 |琢倉猝入營,領兵與||林戰,不勝,欲就外縣兵,且戰且 徵求過當,頗失衆心,林欲因衆以去琢,未有間也。會于海、牢佐據萊州,琢遣林分兵討之。 至章丘,兵變,求救於鄰道,不時至。東平行省蒙古綱以狀聞。宣宗度不能制林,而欲 初,張林本|益都府卒,有復立府事之功,遂爲治中,而兇險不逞,恥出琢下。 琢在山東

破雷太尉兵,積功加平南盪江將軍。丁母憂,起復。八年,除南京副留守、壽州防禦使。 州防禦使事、武衞軍鈐轄,轉宿直將軍、深州刺史。 完顏啊本名達吉不,蓋州猛安人。 充護衞,轉十人長。從丞相裏戍邊,功最,除同知德 泰和六年,從左副元帥完顏匡攻襄陽, 大

矢,押軍千戶夾谷王家奴以馬授廟,遂得免。 安二年,入爲武衞軍副都指揮使。 三年,以本官領兵駐宣德。 遷右副都點檢。 會河之敗,弼被創,馬中流

紹王怒甚,顧謂沒烈曰:「何不叱去。」沒烈乃引起,付有司,論以奏對無人臣禮,韶冤死,杖 卿言京師有急何邪?就如卿言,我自有策。以卿皇后連姻,故相委寄,乃不體朕意也。」剛 曰:「陛下勿謂皇后親姻俱可恃也。」時提點近侍局駙馬都尉徒單沒烈侍側,剛意竊譏之。衞 有急,亦可以回戈自救。 至寧元年,東京不守,關爲元帥左監軍,扞禦遼東。 今驅市人以應大敵,往則敗矣」。 衞紹王怒曰:「我以東北路 請「自募二萬人爲一軍,萬一京師 爲憂,

一百,責爲雲內州防禦使。

路,將從淸、滄赴闕。 凡有告急徵兵,即須赴救,違者坐之。」又曰:「河北軍器,乞權宜弛禁,仍令團結堡寨以備外 勸善懲惡,有功必賞,有罪必罰,而后人可使、兵可强。 今外兵日增,軍無鬭志。 兵。」又曰:「今雖議 心力勇敢可使者,乞招用之。」又曰:「河朔郡縣,皆以拘文不相應救,由此殘破。 乞勅州府, 而 以戰潰自陳者,有司從而存恤之,見聞習熟,相傚成風。」又曰:「村寨城邑,兵退之後,有 貞祐初,宣宗驛召弼赴中都,是時雲內已受兵,弼善馬矟,與數騎突出,由太原出澤、 和,萬一輕騎復來,則吾民重困矣。 會有詔除定武軍節度使,尋爲元帥左都監,駐眞定。 願速講防禦之策。」及勸遷都南京, **啊奏:「賞罰所以** 亦有逃歸

列傳第四

阻長滩、拒大河、振潼關以自固。

軍少則難守,軍多則難養。」又奏:「將帥以閩外爲威,今生殺之權皆從中覆。」又奏:「瑞州軍 宣宗將遷汴,所兼河北西路兵馬都總管。 宣宗次眞定,願言:「皇太子不可留中都,蓋

頗狡,左丞盡忠多疑,乞付他將。」宣宗頗采用其言。

秦州 副 水軍移文來請,如俟報可,實慮後時。」,酮奏其事,宰臣以兗州雖擅舉而無違失,苟利於民, 專之亦可。 [使鳥古論兗州置秦州権場,弼以擅置,移文問之。 兗州曰:「近日入見,許山外從宜行事。 自宋兵焚蕩榷場,幾一年矣,今旣安帖,復宜開設,彼此獲利,歲收以十萬計。 大名軍變,殺蒲察阿里,詔弼鎮撫之。未幾,改陝西路統軍使、京兆兵馬都總管。 宣宗曰:「朕固嘗許其從宜也。」 對境天 宣撫

子堌 汝楫改過用命,招降甚衆,稍收其兵仗,放歸田里。 佐、汝楫皆降。 賊果定,亦一事畢也。 至今日,實畏死耳。 所遺 三年,改知東平府事、山東西路宣撫副使。是時,劉二祖餘黨孫邦佐、張汝楫保濟南勤 人招之,得邦佐書云:「我輩自軍興屢立戰功,主將見忌,陰圖陷害,竄伏山林,以 邦佐遙授濰州刺史,汝楫遙授淄州刺史,皆加明威將軍。 如蒙湔洗,便當釋險面縛,餘賊未降者保盡招之。」剛奏:「方今多故,此 乞明以官賞示之。」詔曰:「孫邦佐果受招,各遷五官職。」〔5〕於是邦 詔邦佐遙授同知益都府事,汝楫遙授同 頃之,鹇薦邦佐、

知 楫 撫 使。 弁 東平府事、皆加懷遠大將軍。 其 了 九 し 黨 已而,汝楫 與。 手 詔褒 復謀作亂, 諭 ,封密國公。 邦佐 梁聚寬遙授泰定軍節度副使, 密告酮,關饗汝楫,伏甲廡下, 其後邦佐屢立功。 元光末,累官知東平府事、 加宣武將軍。 酒數行, 鍾 鳴 四年,所遷宣 伏 發, Щ 東西 殺汝

路

兵馬

都

總管,充宣差招

!撫使。

者,許 路 實 叉 命 率 一豪民 へ, 其 一日:日 以 皆 游 取 뗾 諸 精 行 老病之官,例許致仕,居河北者嫌于 勝 惰市人,不閑訓 -力可 人捕 販 矣。 書 क्त 曰:「山東、河北、河 用者 告,以軍 易,侵土人之利, 武衞軍家屬嘗苦于兵,人人懷憤,若擇驍悍千餘,加 仍舊,年高 興法治之。」詔 練。 若選簽驅丁監戶數千,別爲一軍,立 香聵 未 東數鎭僅能自守、恐長河之險有不足恃者。 有定籍, 不 事 下 尙 事者 !書省 避難,居河南者苟于尸祿,職事 罷之。」 一無庸調,乞權宜均定。 議,惟老病官從 又曰:「賦役頻煩,河南 所言,餘皆 一功者全戶爲良,必將爭先效 以 如 **爵賞,亦可得其死力。**」 知 不 百姓新 而 曠廢。 允。 輒 河南嘗招戰士, 避、事過復來 强舊乏,諸 乞編諭 覈

月 須疽 大元 一發于 兵圍 腦。 東平, 詔太醫 鹏 診 百 計 視 應戰, 賜 御 藥。 **人之乃解** 俄 卒。 圍 去。 宣宗賜詔,獎諭 將士,賞賚有差。 是歲五

門、紇石烈 爾 平生 牙 無 吾塔,(10)皆立方 所好, 惟 喜 讀 書, 面 閑 功。 暇 延 治東平,愛民省費,井邑之間 引 儒 士 歌 詠投壺以爲常。 軍民 所辟 無 如 相 承裔、陀滿 訟,有 古良將之 胡 土

貞祐 平宣撫使完顏弼行事多不盡。」乃以綱權山東宣撫副使。 使。 權 東路宣撫使,屯冀州。 完 招捕 帥 初,自請招集西山兵民,進官一階,賜錢二百萬,遷都水監丞,尋加遙授永定軍節度副 蒙古綱本名胡里綱,咸平府猛安人。承安五年進士,累調補尚書省令史,除國子助教。 右都監,宣撫如故。 有功、遷太子左諭德、除順州刺史、遷同知大興府事。 軍食不足,徙濟南。 綱欲徙河南,行至徐州,未渡河,尚書省奏:「東 改山東路統軍使,兼知益都府事, 三年,知河間府事,權河北

家 ,奴,不在赦原,據險作亂,至今未息,民多歸之,乞普賜恩宥。」<u>宣宗</u>卽命赦之,仍贖爲良。 四 年十月, 行元帥府事。 綱奏:「山東兵後,楊安兒黨內有故淄王習顯、故留守术羅等

久之, 拜右副元帥權參知政事, 行尚書省。

先是, 捷報,沒烈 興定元年,徙知東平府事,遷元帥右監軍。 東平治中沒烈 乃復 前 職。日日興定二年,詔曰:「卿以忠貞,爲國捍難,保完城邑,朕甚嘉之。可 坐事削降殿年、韶仍從軍,有功復用。 綱遣沒烈討花帽賊于曹、濟間,

進官二階, 賜金帶 重、幣十端。

興定三年,奏曰:「濟南介山東兩路之間,最爲衝要,被兵日久,雖與東平隣接,不相統

謀克 河縣 統 是安坐以待困也。 民其 屬,緩急不相應,乞權隸本路,且差近於益都。」詔從之。 授 爲 中,多募義軍以實之。」綱以山東恃東平爲重鎭,兵卒少,守城且不足,況欲分部出戰, 澗口河濼,其深一丈,廣數十里,險固可恃。 IE 七品 一千戶,四千戶爲一萬戶,四萬戶爲一副統,兩副統爲一都統,設一總領提控。今乞 職,副統正八品,萬戶正九品,千戶正班任使,謀克雜班,仍三十人爲一謀克,五 乃上奏曰:「伏見貞祐三年古里甲石倫招義軍,設置長校,各立等差,都 因其地形,少加浚治,足以保禦。 綱奏:「恩州武城縣艾家凹水濼、清 請遷州

單州 甚張 經略 ,乞遣河南馬軍千人,單州經略司以衆接應。」左司郎中李蹊請令綱約燕寧同力殄滅, 是歲,益都桃林寨總領張林號「張大刀」,據險爲亂,自稱安化軍節度使。 使完顏仲元分兵三千人同往。 宰相以糧運不給,益都以東,嘯聚不止一張林,宜 綱奏:「林勢

依

:此格募選,以益兵威。」制可。

令綱設備禦,俟來春議之。

樞密院令史劉顒涖 生 餘 擒 入 張林 、據嶺 四 年,張林侵掠 ·,獲雜畜兵仗萬計。 爲陣,庭玉督兵 殺 東平,綱遣元帥右監軍行樞密院事王庭玉討之。 張林于東平。 踰嶺搏戰。 招降虎窟諸寨,悉令歸業。 林衆少却,且欲 張林乞貰死自効,請曰:「臣兄演在|宋爲統制,有衆三 東走。 詔賜空名宣勅,聽綱第功遷賞。遣 庭玉踵擊,大破之,殺數千人, 至舊縣,遇張林衆萬

列

林,不從則合擊之,山東不足平也。」所謂益都張林,即據府事逐田琢者也,事見琢傳。 林策請于朝,樞密院請覊縻使之。制可,以爲萊州兵馬鈴轄。久之,山東不能守,林乃降于 千,駐卽墨、萊陽之境,請以書招之,使轉致諸賊之款密者,相爲表裏,然後以檄招益都張 |綱以

宋云。

試期日,特免省試。 遛,甚未可也。」 詔卽賞之。 綱奏:「遼東渡海,必由恩、博二州之間,乞置經略司鎭撫。」從 虚 究其實。」綱奏:「臣自按問俱獲宋將統制十餘人,皆以資爲將無異辭。此輩力屈就擒,豈肯 王庭玉、東莒公燕寧保全東平,各遷一階。 |稱僞將以重獲者之功。今多故之際,賞功後時,將士且解體。 凡行賞必求形迹,過爲逗 興定五年二月,東平解圍,宣宗曲赦境內。凡東平府試諸科中選人,嘗被任使,已逾省 初,東平提控鄭倜生擒宋將李資,綱奏賞倜。宰臣謂:「李資自稱宋將,無所憑據,請詳 惟經童律科卽爲及第,似涉太優,別日試之。皆從綱所請也。詔以綱、

顧 控 用 孫 事勢危迫,故輒授之。」燕寧死而綱勢孤矣。 爲牙校,委以腹心,羣盜皆有歸志。及寧死,復懷顧望,胡七、胡八亦反側不安。臣以提 邦佐世居泰安、衆心所屬、遂署招撫使。 是歲,燕寧戰死。 綱奏:「寧所居天勝寨,乃益都險要之地。寧嘗招降羣盜胡七、胡八, 以提控黃摑兀也充總領,副之。此當先奏可,

元帥府事。於是,綱改兼靜難軍節度使,行省邳州。 自此山東事勢去矣。 樓櫓廨舍而徙之。宣宗曰:「此事朕不能決擇,衆議可者行之。」樞密院頗采阿虎德議,許綱 不足恃矣。兵以將爲主,將以心爲主,蒙古綱旣欲棄之,決不可使之守矣。宜就選將士之 待制抹燃阿虎德奏曰:「車駕南遷,恃大河以爲險。 大河以東平爲藩籬,今乃棄之, 內徙,率所部女直、契丹、漢軍五千人,行省邳州。元帥左監軍王庭玉將餘軍屯黃陵岡,行 願守者擢用之,別遣官爲行省,付以兵馬鎧仗,從宜規畫軍食。」樞密院請用胡失門議,焚其 東平孤城、四無應援、萬一失之、則官吏兵民俱盡。 綱奏請移軍於河南,詔百官議,御史大夫紇石烈胡失門以下皆曰:「金城湯池,非粟不 ' 宜徙之河南,口三以助防秋。」翰林 則大河

饉 以邳州經略司隸綱,令募勇敢收復山東。 乞一切所負並令停止,俟夏秋收成徵還,軍人量增廪給,可也。」詔議行之。 元光二年三月, 加之重飲,百姓離散。鎭防軍遽徵逋課,窘迫陵辱有甚于官,衆不勝其酷,皆懷報復之 近日,高羊哥等苦其佃戶,佃戶憤怒,執羊哥等投之井中。 是歲六月,以歸德、邳、宿、徐、泗乏軍食,詔綱率所部就食睢州。綱奏:「宿州連年饑 武夫不識緩急,乃至于此。

紅 襖賊爲援。 初,碭山首領數人,以減罷懷忿怨,誘脅餘衆作亂,引水環城以自固,構浮橋於河上,結 同簽樞密院事徒單牙剌哥會諸道兵討之。綱云:「碭山北近大河,南近汴堤,

黨,與臣已遣三人入賊中。復分兵屯要害,別以三百人巡邏。乞賜空名告身,從便遷賞。」 軍埽兵,以舟二百艘,由便道斷浮梁,絕紅襖之援。 乃合擊之。 樞密院奏:「已委監軍王庭玉駐歸德、寧陵備之矣。仍令牙剌哥水陸並進,先行招誘,不從, 東西二百里,大河分派其間,乾灘泥淖,步騎俱不可行,惟宜輕舟往來。 其空名告身,宜從所請,以責成功。」 募膽勇有口辯者,持牒密諭之以離間其 可選銳卒數千與水

遣還。 國公, 頃。 其 所 俘掠 無何? 受命往招者先授正七品官職、賜銀二十五兩,事成遷五品。 仍世襲。 綱 而還。 奏:「全有歸國意,嚴實、張林亦可招之。」此謂益都張林也。 碭山賊夜襲永城縣,行軍副總領高琬、萬戶麻吉擊走之,殺傷及溺死者甚衆,奪 全階正三品、職正二品。 詔綱併力討之。 綱遣降人陳松持牒招李全,全縛松將斬之,已而但黥其面 林山東西路宣撫使兼知益都府事,與全皆賜田百 會綱遇害而止。 詔擬實一品官職,封

空 金 六哥泗州防禦使,權元帥左監軍,副使烏古論老漢加邳州刺史,權右監軍。 韶 一名宣 罪 山 顏 綱,以撫諭六哥。 綱御下嚴,信賞必罰,邳州軍不樂屬綱。八月辛未朔,邳州從宜經略使納合六哥、都統 俊二三率沂州軍 刺,設重賞招 誘。 六哥遣人送綱尸及虎符牌印,終不肯出。 士百餘人晨入行省,殺綱及僚屬于省署,遂據州反。 丞相高 汝礪 曰:「懸重賞募死士,必有能 取之者。」宣宗不得已,下 乃升經略 司 頃之,邳州卒逃 樞密院奏請出 為元帥府,加

哥、函 心者, 寨,留兵戍守。 歸,詣總帥牙吾塔言,六哥已結李全爲助。遣總領孛术魯留住等毁其橋梁,攻破承安、靑陽 首以獻。 六哥能誘而殺之, 殆詐耳。」十月壬辰, <u>牙吾塔圍邳州, 急攻之。</u> 六哥惶懼,乃言待李全兵入邳州,誘而殺之,以圖報效。 詔 加顯三品官職,授世襲謀克,侯進四品,陳榮、邢進、邊全、魏興、孫仲皆五 紅襖賊高顯等殺六 宣宗曰:「李全豈無

딞

,賞銀有差。

監行元帥府事,節度、宣撫如 三年,保全贊皇,加遙授安武軍節度使,改昭義軍節度使,充宣撫副使。閱月,權元帥左都 必蘭阿魯帶,貞祐初,累官寧化州刺史。二年,同知眞定府事,權河北、大名宣撫副使。 故。

下,將 歲計失矣。 國 父子兄弟自相救援,各顧其家,心一力齊,勢不可離。 帥 家 府,已按閱本軍,去其冗食。 糧儲常患不繼,豈容僥冒其間。但本府之兵不至是耳。 遣 氣 都統奧屯喜哥復取 挫 心 乞本府所定,無輕變易。」詔許之。 懈而 不可 用。 威州及獲鹿縣。 且 義軍率皆農民,已散歸田畝,趨時 部分旣定,上下旣親,故能所向成功,此皆血戰屢試 旣而詔擇義軍爲三等,阿魯帶奏:「自去歲初置 阿魯帶繕完州縣之可守者,其不可 今必析之,將互易其處,不相諳委矣。 事 力作,徵 勢方殷,分別 集旬 Ħ, 如 此,彼居中 農事廢而 守者遷徙 而可者。

其民,依險為栅以備緩急。

臣能保守之。 少,所遺者多,徒棄名城以失太行之險,則沁南、昭義不通問矣。」詔澤州復隸昭義軍 澤州 舊隸昭義軍 今聞議遷于青蓮寺山寨,距州旣遠,地形狹隘,所容無幾。 ,近年改隸孟州,阿魯帶奏:「澤州城郭堅完、器械具備,若屯兵數干, 旦有急,所保者

逃匿 立。 府 衆纔數千,平陽行省兵亦不多,河東、河北之勢全恃潞州,潞州兵强則國家基本漸可復 不知所在。 臣已將兵離境,乞復置潞州帥府。」阿魯帶行次澠池,口巴右副元帥蕭察阿里不孫敗績, 是歲、潼關失守,阿魯帶趨備藍田、商州、乃陳河北利害、略曰:「今忻、代撤戍、太原帥 阿魯帶亦被創,收集潰卒,臥澠池。 韶還潞州

權 旣 而 參 知政 去潞州、張開代領其衆、與郭文振不相得、文振漸不能守矣。 興定元年,改簽樞密院事。 事,行尚書省于益都。 數月,以元帥左監軍兼山東路統軍使,知益都府事。 阿魯帶復立潞州,最有功,識遼州刺史郭文振,舉以爲將。 未幾,

措注施 高琪忌功,汝礪固位,西啓夏釁,南挑宋兵。 設 ··貞祐之時,僕散安貞定山東,僕散端鎭陝西,胥鼎控制河東,侯擊經營趙、魏,其 有可觀者。 故 田 琢撫靑、齊,完顏弼保凍平, 宣宗道謀是用,煦煦以爲慈,皦皦以爲明,孑孑 必蘭阿魯帶守上黨,皆嚮用有功焉。

御寨以前逃死。然後田琢走盆都而青、齊裂,蒙古綱去東平而克、魯蹙,僕散安貞死而南伐 以爲强。 旣而潼關破毀、崤、澠喪敗,汴州城門不啓連月,高琪方且增陴浚隍爲自守計,繕

校勘記

無功。

雖曰天道,亦由人事。

自是以往,無足言者矣。

偽元帥方郭三據密州 一二二時茂先傳,「紅襖賊方郭三據密州……方郭三聞而執之」。 「方郭三」原作「郭方三」。按下文「宣差伯德玩襲殺方郭三,復密州」。又

皆作「方郭三」。今

據改。

本書卷

耿格 「格」原作「略」,據殿本改。

十二月辛亥耿格伏誅 按本書卷一四宣宗紀,貞祐二年十二月「乙卯、登州刺史耿格伏誅,流其

妻孥」。 記日 與此異。

맫 治中呂子羽等使宋講和」。 治中呂子羽、南京路轉運副使馮璧爲詳問宋國使」。 二年十二月 「十二月」原作「十月」。 卷六二交聘表了興定二年十二月甲寅,朝議乘勝與宋議和,以開封 按本書卷一五宣宗紀,興定二年十二月「甲寅,以開封府 今據補「二」字。

列

五

胡魯剌

功第

原脫「刺」字、據殿本補

傳 四 + 校 勘 記

- 安貞遣輕兵分爲左右軍潛登 「潛」原作「澄」、據殿本改。
-
 弁其二子殺之 按本書卷一六宣宗紀,興定五年六月「戊寅、僕散安貞坐謀反,幷其三子皆伏

誅」。「二子」作「三子」。

- 孫邦佐果受招各遷五官職 據文義「邦佐」下當有「等」字。
- 四年碿遷宣撫使 按本書卷一四宣宗紀,貞祐三年八月「丙午,山東西路宣撫使完顏弼表,遙

授同知東平府事張汝楫將謀復叛」。事在三年。此「年」疑當作「月」。

- 統石烈牙吾塔 「吾」原作「古」。按上下文三見此名皆作「吾」,又本書卷一一一有統石烈牙吾
- 塔傳,亦作「吾」,殿本同。今據改。
- 二〕沒烈乃復前職 「乃」原在「沒烈」上,據文義乙正。
- [三] 宜徙之河南 原脱「宜」字、據殿本補。
- 都統金山顏俊 使納合六哥等率都統金山顏俊以沂州百餘人晨入省署,殺行尚書省蒙古綱,據州反」。今據改。 「統」原作「俊」。按本書卷一六宣宗紀,元光二年「八月辛未朔,邳州從宜經略
- 阿魯帶行次澠池 「澠」原作「沔」,今改。下文同。參見本書卷二五地理志校記口心。

金史卷一百三

列傳第四十一

完顏仲元 完顏阿隣 完顏霆 烏古論長壽 完顏佐

石抹仲溫 烏古論禮 蒲察阿里 奧屯襄 完顏蒲剌都

夾谷石里哥 术甲臣嘉 紀石烈桓端 完顏阿里不孫

完顏鐵哥 納蘭胡魯剌

陆 號「花帽軍」,人呼爲「郭大相公」,以與阿隣相別。 三年,與阿隣俱累功至節度。 完顏仲元本姓郭氏,中都人。大安中,李雄募兵,仲元與完顏阿隣俱應募,數有功。貞 仲元爲永定軍節度使,賜姓完顏氏。 頃之,兼本路宣撫使。八月,遙授知河間 仲元在當時兵最强,

列

傳第四十

完顏

仲元

府事。數月,改知濟南府事,權山東東路宣撫副使。

河朔 改河 政侯擊 爲聲援,俟兵勢稍緩,即徙軍附河屯駐,此時卿來,蓋未晚也。 尚思戮力,朕不汝忘。」未幾, 之策 北宣 貞 與 祐 、卿素厚,命於彼 當詣 撫 四 副使。 年, Щ 闕 東 面 陳。 乏糧,仲元軍三萬欲於黃河之側或陝右分屯,上書乞補京官,且言恢復 中行省,應悉股心。 詔曰:「卿兄弟鳩集義旅,所在立功,忠義之誠,皎然可見。 卿求入見,其意固嘉,東平方危,正賴卿等相 股 以 參

等備 仲元 階,升職 破之,斬首數百,敗祝春, 屢有 征 仲元 伐, 一 等。 功,以本職 部將李霆等積功至刺史、提控,仲元奏賜金牌,霆等皆爲名將,功名與仲元相埓。 中下給戍守,懦弱者皆罷去。 未幾,仲元遙授知 爲從宜招撫使,計約 擒郭偉, 歸德府 餘衆奔潰, 從坦 事。 紅襖賊千餘人據漣水縣,仲元遣提控婁室率兵擊 等軍圖恢 遂復連水縣。 復。 韶以仲元軍猥多,差爲三等,上 仲元兼單州經略使,婁室遷兩

年六 卿 坐甲待敵, 思 是歲 月,臣嘗請於朝廷,乞選名將督諸軍,臣得推鋒,身先 爲萬全之計。」未幾,潼關失守,仲元 十月 則師老財殫, ,徙軍盧氏,改商州 日就困弊。」其大概欲伐西夏以張兵勢。 經略 使,權元帥 軍趨商、號,復至嵩、汝,皆弗 右都監。 士卒,糧 韶曰:「商、號、 儲 又曰:「陝西一路最為重 不繼 及。 潼關, 竟不 仲元 果行。 上書曰:「去 實相 連屬, 今將

腹背受兵,卒不 地 ,潼關、禁坑及商州諸隘俱當預備。 能守。 近日由禁坑出,遂失潼關。 向者中都、居庸最爲要害、乃由小嶺、紫荆遶出、我軍 可選精兵分地戍之。」其後乃置秦、

禦,及用兵西夏矣。

農使。 滿百 訓練,足以守禦,乞以所部渡河。」詔 里港 分兵擊之,俘生口二千。 夾擊之。 · 獲老幼萬餘人,皆縱遣之。 日 興定元年,復爲單州經略使,敗宋人二千于龜山,復敗步騎千餘于盱眙,敗紅襖于白 五年,爲 , 韶曰: 「 宋兵解去。 鎭 卿處置 南節 賜 口機務, 度 三年,仲元奏:「州城旣固,積糧二十萬石,集鄕義軍萬餘人,並閑 金帶,優韶獎諭 使。 撫存將士,出兵使李辛可也。」四年,兼保靜軍節度使,尋爲勸 宋人圍 屯宿州,與右都監紇石烈德同行帥府事。 [海州,仲元軍高橋,令提控完顏阿隣領騎繞出其後 紅襖賊陷曹馬城,剽掠徐、單之間。 仲元有足疾, 提控高琬等

喜 擅 制 除 超 曰:「公素得衆 ·擢。」及危急乃輒注四品以下。 元 拜之罪。 光 元 年, 宣宗嘉其功,皆許之。 知 心,不必以官位見讓。」仲元請身先士卒,諭諸將士曰:「凡有奇功者,即 鳳 翔 府 事。 鳳翔被圍,左監軍石蓋合喜來濟軍。 顏盞蝦嚇力戰功最, 輒授通遠軍節度使。 仲元讓合喜總兵事。 **圍解**,奏請

遷元 帥 右 監軍 授河 北 東路洮委必剌猛安,賜金五十兩、重幣十五端、通犀帶,優詔褒 二二六七

列

傳

第

四

+

完

顏

仲

元

正大間,爲兵部尚書,皇太后衞尉,卒。 仲元爲將,沈毅有謀,南渡後最稱名將云

西路宣撫使。是時,仲元亦積功勞,知濟南府,賜姓完顏,與阿隣俱加從宜招撫使,詔書獎 將所部兵駐淸、滄,控扼山東。遷橫海軍節度使,賜以國姓。阿隣與山東路宣撫副使顏盞 募,數有功。宣宗卽位,遷通州防禦使。〔三宣宗遷汴,阿隣改同知河間府事兼淸州防禦使, 郝定于泗水縣柘溝村,生擒郝定,送京師斬之。 鰲不法,掠平民,劫商旅,道路不通,有司乞徙于滕州。 諭,且令計約涿州刺史從坦等軍恢復中都。於是,仲元、阿隣部兵猥多,詔以三等差第之, 天澤不相能,詔阿隣當與天澤共濟國事,無執偏見,妄分彼此。尋改泰定軍節度使、 上等備征伐,中下戍守,懦弱者罷去,量給地以贍其家。 完顏阿隣本姓郭氏,以功俱賜姓完顏。〔〕大安中,李雄募兵,阿隣與完顏仲元等俱應 韶阿隣就處置之。 頃之,破紅襖賊 阿隣所部「黃鶴袖軍」駐魚臺者,桀 山東

臣殺身所能仰報。族兄徐州譏察副使僧喜、同前汾州酒同監三喜、前解州鹽管勾添章、守 上,敗千人以上者賜止其家。阿隣旣賜姓,以兄守楫及從父兄弟爲請。宰臣奏阿隣功止賜 家,宣宗特詔許之。 近制,賜本朝姓者,凡以千人敗敵三千者賜及緦麻以上,敗二千人以上者賜及大功以 至是仲元上奏曰:「臣頃在軍旅、纔立微功、遽蒙天恩、賜之國姓、非

興平縣監酒添福猶姓郭氏。念臣與僧喜等昔同一家,今為兩族,完顏阿隣與臣同功,皇恩

所加併及本族,僧喜等四人乞依此例。」不許。改輝州經略 使。

以觀事變,併以號州兵五千付之,使乘隙而進,卿以此意諭之也。」 則京兆之圍不足解矣。」宣宗謂皇太子曰:「阿隣赴難不回,固善矣。 參,乃可以得志。 今乃各有所屬,臨難不救,互分彼此。 今臣所統皆步卒, 願賜馬軍千人, 號,拒東向之路。 懷、衞、輝州之間,捍蔽大河,惟受阿隣節制。」阿隣亦不欲分之,因以爲請。 聽之,非唯東平失備,他將倣效,皆不可使矣。」宣宗以爲然。 田宅,離親戚,轉戰至此,誓同立功,偕還鄕里。今將分配他軍,心實艱苦。 阿隣將兵八千,西赴至潼關,聞京兆已被圍,游騎至華州,陝西行院欲令阿隣駐軍商、 阿隣有衆萬五千,詔分五千隸東平行省,其衆泣訴云:「我曹以國家多難,奮義相從,捐 阿隣上奏:「臣本援陝西,遇難而止,豈人臣之節。夫自古用兵,步騎相 。加遙授知河南府事,應援陝 而軍勢單弱,且駐內地 宰臣奏:「若遂 乞以全軍分駐

于裴家莊六谷中,斬五 遣步卒襲其後, 宋兵敗, 生獲吳筠及將校二百人, 馬數百匹, 糧萬石及兵甲衣襖。 山之巔。至 阿隣分兵絕其汲路,克其外城,再克其次城。 宋兵縱火而出,阿隣以騎兵邀之, 興定元年,遷元帥右都監。出秦州伐宋,四宋統制吳筠守皂角角及作郊堡,城三重,據 百級,墜澗死者甚衆。又敗之于寒山嶺、龍門關、大石渡,得粟二千 復敗宋兵

列傳

餘石。 宋兵大至,金兵敗,阿隣戰沒。 復敗之于稍子嶺,斬首二千餘級,生擒百人。是時三月,宿麥方滋,阿隣留兵守之。 贈金紫光祿大夫、西京留守。

經略司。 弟雲率衆數千巡邏固安、永淸間,遙授寶坻縣丞,充義軍都統。 人 共 推霆爲四鄉部頭。 完顏霆本姓李氏,中都寶坻人。 遷三階,攝寶坻令,升都提控,遙授同知通州軍州 霆招集離散,糾合義兵,衆賴以安。 粗知書,善騎射,輕財好施,得鄉曲之譽。貞祐初,縣 事。 招撫司奏其事,遷兩官。 劉璋說霆使出降,霆縛送 霆與

與之。 疑孫江 略司事,充宣差總領都提控。 幾,遙授同知益都府事, 以滄州降于王檝,而江將兵圍觀州。 佩金牌,仲元奏:「臣軍三萬,管軍官三人,皆至五品,乞各賜金牌。」廷議霆輩忠勇絕人, 宣 無使完顏仲元保淸、滄。遙授通州刺史、河北東路行軍提控,佩金牌。 中都食盡,霆遣軍分護淸、滄河路,召募賈船通餉道。 與霆有謀,召江還,殺之。 改大名路提控,復取玉田、三河、香河三縣。 加宣差都提控,遷棣州防禦使,賜姓完顏氏,屯海州。 霆乃定觀州 霆乃詐作書與孫江,約同取滄州者。 而還。 徙屯濱、棣、淄、留副將孫江守滄州。 進官三階,充濱、棣行軍都提控。 遙授同知清州防禦事,從河北路 舊制,宣撫副使乃 王檝得其書, 俄權單州經 遂

興定元年,泰安、滕、克土寇鑑起,東平行省侯摯遣霆率兵討之,降石花五、夏全餘黨二

萬戶胡仲珪、副統劉贇率死士由暗橋登山、霆率兵四千人趨山下、約以昏時舉火爲期、上下 萬人,老幼五萬口,充權海州經略副使。紅襖賊于忙兒寇海州,霆擊走之。 只魯身先士卒,殺二百餘人,城賴以完。詔五兒等各遷兩階。 度使,經略副使如故。以其子爲符寶典書。逾月,宋兵復至,霆逆戰,駐兵城外。 夾擊,宋兵大敗,墜澗溺水死者,不可勝計,斬高太尉、彭元帥于陣,餘衆潰去。 兵三萬駐朐山。霆軍乏糧,采野菜麥苗雜食之。宋兵栅朐山,下隔湖港,霆作港中暗橋,遣 人乘虛踰城而入。經略使阿不罕奴失剌率兵振戰,都統溫迪罕五兒、副統蒲察永成、蒲察 '二年,宋高太尉 遷安化軍節 夜半,宋

德府惟宏、大司農丞郭皓爲副使,分護百姓之遷南山者。 元光二年,卒。 **擢其子爲護衞。元光元年,陝西行省白撒奏:「京兆南山密邇宋境,官民遷避其間者,** 百萬人。可遣官鎭撫,庶幾不生他變。」宣宗以爲然。十月,霆以本官爲安撫使,守同知歸 四年,改集慶軍節度使,兼同知歸德府事。五年,改定國軍節度使,兼同知京兆府事,

緋翮翅軍千戶,取床川寨及祐州、岩昌、辛城子,以功進官二階。貞祐初,夏人攻會州,統軍 鳥古論長壽,臨洮府第五將突門族人也。本姓包氏,襲父永本族都管。秦和伐宋,充

列傳

措官。頃之,遙授同知鳳翔府事,兼同知通遠軍節度事,提控如故。 升提控。興定元年,夏人大入隴西,長壽拒戰,遷平涼府治中,兼節度副使,充宣差鞏州規 通。 都巡檢。三年,賜今姓。攻蘭州程陳僧,爲先鋒都統。夏人圍臨洮,扼渭源堡,〔六〕內外不 統、兼充安定、定西、保川、西寧軍馬都彈壓。 遷宣武將軍,遙授通遠軍節度副使。招降諸蕃族及熟羊寨秦州逋亡者。 使署征行萬戶 統軍司募人偵候臨洮消息,長壽應募,馘二人,擒一人,問得臨洮及夏兵事勢。 , , 升副統,與夏人戰於窄土峽,先登陷陣, 賞銀五十兩。 詔錄前後功,遙授同知隴州防禦事,世襲本族 戰東關堡, 以功署都 復遷懷遠大將軍, 以勞

翔、秦、鞏伐宋將士,長壽遙授隴安軍節度使,同知通遠軍、提控如故。 千與宋兵合,依川爲陣,長壽奮擊,宋兵入保城,堅壁不復出,長壽乃還。 即趨宕昌縣,破宋兵二千于八斜谷,拔宕昌縣,進攻西和州,先敗其州兵。 兵,宋人守戍者走保馬頭山,合諸部族兵來拒。 提控,改通遠軍節度使。 二百餘、牛羊三萬,器械軍實甚多。 納蘭記僧出洮州鐵城堡,屢敗宋人,完軍而還。 興定二年,遷同知臨洮府事。與提控洮州刺史納蘭記僧分兵伐宋。長壽由鹽川鎭進 長壽擊敗之,復破其援兵四千於荔川寨。 頃之,長壽升總領都 凡斬馘八千,獲馬 明日,木波兵三 詔賞鳳

夏人攻定西,是時弟世顯已降夏人,夏人執世顯至定西城下,謂長壽曰:「若不速降,卽

騎復至,攻城甚急,長壽乘城拒戰,矢石如雨,夏兵死者數千,被創者衆,乃解去。 騎,殺千餘人,獲馬數百。夏人已破西寧,乃犯定西,長壽擊却之,斬首三百級。 帥 戎行,盡忠國事。 公政、重壽當緣坐。 殺汝弟。」長壽不顧,奮戰,夏兵退,加榮祿大夫,賜金二十五兩、重幣三端。 府事石盞合喜發兵救未至,夏人移兵臨洮,長壽伏精兵五千于定西險要問,敗夏兵三萬 世顯之降,必不得已,汝永念國恩,益思自效。」未幾,夏人復攻會州,行元 宣宗嘉長壽守定西功,釋公政兄弟,有司廩給之。詔長壽曰:「汝久在 世顯旣降,二子 是歲,卒。 旣而三萬

氏。 功,遷佐奉國上將軍,遙授德州防禦使,齩住鎭國上將軍,遙授同知河間府事,皆賜姓完顏 昌率衆二十人持文書來,署其年曰天賜,佐擲之,麈衆執永昌,及暉等倂斬之。 爲都統,齩住副之,戍直沽寨。貞祐二年,乣軍遣張暉等三人來招佐,佐執之。 韶曰:「自今有忠義如是者,並一體遷授。」 完顏佐本姓梁氏,初爲武淸縣巡檢。 完顏較住本姓李氏,爲柳口鎭巡檢。 **外之,以佐** 翌日,劉永 宣宗嘉其

功皆賜國姓。 贊曰:古者天子胙土命氏,漢以來乃有賜姓。 宣宗假以賞一時之功,郭仲元、郭阿鄰以 女奚烈資祿、烏古論長壽皆封疆之臣而賜以他姓。貞祐以後、賜姓有格。

列傅第四十一 完顏佐

以名使人,用之貴則貴,用之賤則賤,使人計功而得國姓,則以其貴者反賤矣。 完顏霆、完

顏佐皆賜國姓者,併附于此。

度使 事、 石抹仲溫本名老斡、懿州胡土虎猛安人。 宿直將軍、器物 局使。 坐前在武寧造馬鞍虧直,章宗原之,改左衞將軍,遷左副點 充護衞十人長、太子僕正,除同知武寧軍節

檢。 坐征 契丹逗遛,降蔡州防禦使。 復召爲左副點檢,遷知臨洮府事。

州,仲溫率兵敗之。 步騎五千出鹽川。 乃汝管內,與有勞焉。 泰和伐宋,青宜可 八年,罷兵,改知河中府。 尋充本路安撫使,改鎭南軍節度使。致仕。興定三年,卒。 比與青宜可相合,其間諸事量宜而行。」頃之,諸道進兵,仲溫以隴右 內附,進爵二級,賜銀二百五十兩、重幣十端。 崇慶初,遷陝西統軍使。貞祐二年,宋人攻溱 韶曰:「青宜可之來,

改武 軍。 坐受沁 庫署令、宿直將軍,復爲左衞副將軍、順州刺史,累遷武 鳥 古論禮本名六斤,益都猛安人。 南軍節度使克王永成名馬 玉帶、日之杖一百,削官解職。 充習騎,累擢近侍局直長,轉本局副使、左衞副將 寧軍節 度。 起為蒲速碗羣牧副使,

泰和伐宋,爲山東路兵馬都統副使兼副統軍、安化軍節度。 八年,宋人請盟,罷兵馬都

年,太原被圍,未幾圍解,進官二階。 知 統官,仍以節度無副統軍。 太原府 貞祐二年、兼 大安三年,改知歸德府兼河南副統軍,歷知河南府。 河 東北路安撫使。 興定三年,卒。 三年,充本路宣 撫使,頃之,兼左副元帥。 至寧初 改改 几

軍。 都監完顏弼 南鎭防軍 事 帥 韋 匡 ,道路梗塞,阿里由太原至真定,率師赴援,抵中山,不**克**進。 `,徙壽州 一爲副統 朱兵犯 蒲察 圖 阿里,興州路人。 防禦使,遷興平軍節 安集其軍,赦首惡以下,河南統軍司更加撫 ,攻宜城縣,取之。 分道鋪,馳驛赴邊,伺其入,以伏兵掩之。 再舉,衆旣憚于行,而阿里遇之有厚薄,軍 以廕補官,充護衞十人長、武器署令,轉宿直將軍,遷右 八年,以功遷武衞軍副都指揮使。 度使。 崇慶初,遷元帥右 改提 變,遇害, 諭 都 監 點器物局。 明 貞祐 衆因逃散。 年, 大安元年 二年,移駐大名。 轉左 泰 和 都 ·, 同 伐宋,從 宣宗韶元帥 監。 知 南京 時都 右 衞 留 副 副 徵 城 被 河 將 元

副 禦使,遷 使 ,改烏古里乣詳穩,召爲都水少監、石州 奧屯襄本名添壽,上京路人。 河 南路 副統 軍 兼同 知歸德府事、昌武 大定十年, 襲猛安。 刺史。 軍節度使,仍無副統 未幾, 丞相襄舉通練 為平南盪江 軍。 將軍 邊 崇慶改元,爲元帥左 事 T,授崇 以 功 陞 義 軍 州 防

列 傳 第 四 + 石 抹 仲 溫 鳥 古 論 醴 蒲 察 呵 里 奥 屯 襄 二二七五

位,擢遼東路宣撫副使。未幾,改速頻路節度使,無同知上京留守事。二年二月,爲元帥右 都監,救西京,至墨谷口,一軍盡殪,襄僅以身免,坐是除名。明年,授上京兵馬使。 都監,行元帥府事于北京。五月,改留守,兼前職,俄遷宣撫使兼留守。 宣宗即

功。」三年正月,襄爲北京宣差提控完顏習烈所害。未幾,習烈復爲其下所殺,詔曲赦北京。 卿等累效忠勤,故委腹心,意其協力盡公,以徇國家之急。及詳來奏,乃大不然,朕將何賴。 自今每事同心,併力備禦,機會一失,悔之何及!且師克在和,善鈞從衆,尙懲前過,以圖後 十一月、詔諭襄及遼東路宣撫使蒲鮮萬奴、宣差蒲察五斤曰:「上京、遼東國家重地,以

起復唐古部族節度副使,徙安國軍、移址詳穩,只累官原州刺史。坐買部內馬虧直,奪官 一階、降北京兵馬都指揮使、寧遠軍刺史、歷同知臨洮府、西京留守事。 崇慶元年,遷震武 完顏蒲刺都,西南路按出灰必剌罕猛安人。充護衞,除泰定軍節度副使。 以憂去官,

軍節度,備禦有功,遷一官。

要。行元帥府輒分臣兵萬二千戍眞定,餘衆不足守禦,近日復簡精銳二千七百人以往。 見兵不滿萬,老羸者十七八。臣死固不足惜,顧國家之事不可不慮,新設經略移文西京、太 貞祐初,置東西面經略司, [4] 就充西面經略使,上言:「管內大和嶺諸隘屯兵,控制邊

州 原、河東取軍馬,大數並稱非臣所統。」詔眞定元帥府還其精銳二千七百人。 年,遷兵部尙書。 有警急,約爲應援。 興定元年,致仕。 州郡皆不欲屬經略司,遂罷經略官, 四年、卒。 入爲簽樞密院事, 改左副點檢。 西京、太原、嵐

平行軍提控。 決杖八十。徙洺州防禦使、山東路副統軍。 自 婆速路都總管判官,累除刑部主事,改薊州副提控,駐軍大名。 北門、遂擒劉二祖。 與山東宣撫完顏酮攻大沫堌,賊衆千餘逆戰,石里哥以騎兵擊之,盡殪。 夾谷石里哥,上京路猛安人。 興定元年,破宋兵于宿州,以功遙授安化軍節度使,移定海軍,卒。 以功遷武衞軍副都指揮使。 明昌五年進士、泰州防禦判官,補尚書省令史、歷臨潢、 坐不時進兵,往宿遷取妻子,[10]解職。 坐前在宿州掠良人爲生口, 俄遷翰林待制,爲宿州提 提控沒烈入 當死,特詔 起為凍

南治中,遙領綏州刺史兼延安治中,就遷同知府事,改同知河間府事 知軍州事。 术甲臣嘉,北京路猛安人,襲父謀克。泰和伐宋,隸陝西完顏綱麾下。 貞祐二年,除武器署丞。救集寧有功,遷河南統軍判官、拱衛直副都指揮使、河 歷通州、海州

興定元年,行樞密院于壽州,由壽、泗渡潍伐宋。二年二月,破宋兵三千於漸湖灘,八八 第 四 + 完 顔 蒲 刺 都 夾 谷 石 里 哥 术 甲 臣 嘉

不從。 光元年,卒。 而還。 諜者張 斬三百級。 西行省參議官。 生擒其將阮世安等五人,獲器仗甚衆。 先令水軍徑渡攻之。軍士牛青操戈刺門卒,皆披靡散去,遂登陴,大軍繼之,夷其寨 聰,知宋兵二千屯高柳橋,老幼甚衆,其寨兩城,環之以水。 遇宋兵數千於梅景村。臣嘉伏兵林間,以步卒誘致之,伏發,宋兵潰,追奔十餘里, 有詔蹂踐宋境上,毋深入。臣嘉駐霍丘楂岡村,縱輕騎鈔掠,焚毀積聚。 四年,兼金安軍節度使。 七月,賞征南功,日三升職一等,遷元帥右都監,充陝 五年,改知延安府事,轉左都監,駐兵京兆。 臣嘉遣張聰持牒招之, 獲宋

||高萬五千衆于||御河寨,奪車數千兩,降萬餘人。 加驃騎衞上將軍,遙授同知順天軍 州防禦事,改興平軍節度副使,遙授顯德軍節度副使,徙遼東路宣撫司都統。口己敗移刺留 還,除同知懷遠軍節度事,權木典乣詳穩。 兵二千於蔡州,加宣武將軍。 統石烈桓端,西南路忽論宋割猛安人,襲兄銀术可謀克。 泰和伐宋,充行軍萬戶,破宋 二年,爲宣差副提控,同知婆速路兵馬都總管,行府事。 自壽州渡淮,敗宋步騎一萬五千于鷂子嶺,遂克安豐軍。軍 大安三年,西京行省選充合扎萬戶,遙授同 貞祐三年,蒲鮮萬奴 節度事。 知清 取咸

平、東京瀋、澄諸州,及猛安謀克人亦多從之者。 三月,萬奴步騎九千侵婆速近境,桓端遣

是歲,改邳州刺史,充徐州界都提控。 滿按帶遷兩階,升二等。 猛安、權同知府事溫迪罕哥不靄遷顯德軍節度使,兼婆速府治中。 烈隣十一猛安復來附,擇其丁男補軍,攻城邑之未下者。貞祐四年,桓端遣王汝弼由海道 罕福壽攻萬奴之衆于大寧鎮,拔其壘,其衆殲焉。 都統溫迪罕怕哥輦擊却之。四月,復掠上京城,日四遣都統兀顏鉢轄拒戰。 奏事,宣宗嘉其功,桓端遷遼海軍節度使、同知行府事,宣差提控如故。婆速路溫 率兵與戰,其衆潰去,因招唵吉、斡、都麻渾、賓哥、出臺、荅愛、顏哥、不灰、活拙、按出、孛德、 人攻望雲驛,都統奧屯馬和尙擊之。 王汝酮遷四階,升四等。餘將士有功者,詔遼東宣撫承制遷賞。 都統夾谷合打破其衆數千于三叉里。 九月,萬奴衆九千人出宜風及湯池,垣端 權判官、前修起居注裹 五月,都統 萬奴別遣五千 甲海 世 溫 襲 迪

沂水死者甚衆。賊數萬圍沂州,同知防禦事僕散撒合突圍出求救,桓端率兵赴之。 天資忠實,深有計畫,曉習軍事,撒合勇而有謀,皆得軍民心,乞加擢用。」桓端進金紫光祿 入沂州,與桓端內外夾擊之,殺萬餘人,賊乃去。樞密副使僕散安貞上其功,因奏曰:「桓端 大夫,無同知武寧軍節度事,提控如故。召爲勸農副使,充都提控,屯陳州 紅襖賊數萬攻邳州,桓端破之于黃山。 賊復來,桓端薄其營,走保北山,追擊敗之,溺 撒合還

興定元年,自新息渡淮伐宋,破中渡店,至定城,以少擊衆,戰不留行。 未幾,充宣差參

傅

四

寒水 議官,復渡淮,連破宋兵,獲其將沈俊,遷武衞軍副都指揮使。 堡, 殺獲甚衆。 興定二年,遷鎮南 軍節度使,權元帥右都監。數月,改武衞軍都指揮 宋人城守不出,分兵攻其山

使,仍權右都監,行元帥府于息州

防其患,及防河數策。 疾,賜太醫御藥。 上言:「竊聞宋人與李全將併力來攻,當 徐州 行 樞密院石盞女魯歡剛愎自用,詔桓端以本官權簽樞密院事,往代之。 五年正月,召至京師,疾病不能入見,力疾草奏,大略以南北皆用兵,當豫 無何,卒,年四十五。 預 爲之防。」樞密院奏可,召桓端與朝臣面議。 勅有司給喪事。 四年冬, 尋有

紇 石 烈 執 中 經 酒,歷越王、濮王傅,改同知平陽府事,兼本路宣撫副使。 郎、鈞州刺史。 改陝西路宣撫副使,遷元 遼東宣撫副使。 官、安豐縣 完顏阿里不孫字彥成,曷懶路泰申必刺猛安人。 歷官。 補尙書省令史,除興平軍節度副使,應奉翰林文字,轉修撰,充元帥 執中行樞密院於西京,復以爲 再閱月,權右副元帥、參知政事、遼東路行尚書省事,賜御衣、廐馬、安川 執中圍楚州, 縱兵大掠, 坐不 7帥左 都 監。 改河平軍節度使、 經歷官。 - 諫正, 明昌五年進士,調易州、忻州軍事判 改威州刺史。 河北西路宣撫副 召爲兵部侍 決杖五十。 郎,遷翰林侍講學士。 貞祐初, 大安初, 使。 改御史中丞、 累遷 改戶部員外 左 國子祭 ニ監軍

甲。 上京行省蒲察五斤奏其功,賜金百兩、絹百匹。

察移刺都改陝西行省參議官,而伯德胡土遂有異志。 省蒲察五斤入朝,遼東兵勢愈弱,五斤留江山守肇州,江山亦頗懷去就。 <u>۲</u> 里不孫械繫之。頃之,阿里不孫輒矯制大赦諸道,衆乃稍安,而請罪于朝 興定元年,眞拜參知政事,權右副元帥,行尙書省、元帥府于婆速路,承制除拜刺史以 不協。自己是時,蒲鮮萬奴據遼東,侵掠婆速之境,高麗畏其强, 宣撫使海奴不迎制使, 助糧 及上京宣撫使浦 八萬石。 坐而受詔, 上京 311 行

未幾,聞阿里不孫死于亂,詔贈平章政事、芮國公。納合裕眞授左都監,江乃哥不靄進一階, 發,會上京留守蒲察五斤遣副留守夾谷愛荅、左右司員外郎抹燃獨魯詣裕計事。 狗不受詔, 青狗兵隸阿里不孫,內猜忌不協,蕭察移剌都嘗奏青狗無隸阿里不孫。 二人,二人許諾,遂召胡土至帳中殺之。阿里不孫已死,朝廷始得矯赦奏疏, 初,留哥據廣寧,知廣寧府事溫迪罕青狗居蓋州,妻子留廣寧,與伯德胡土約爲兄弟。 權左都監納坦裕與監軍溫迪罕哥不靄、遙授東平判官参議軍事郭澍謀誅胡土,未敢 阿里不孫殺之。 湖土乃怨阿里不孫。旣而胡土率衆伐高麗,乃以兵戕殺阿里 宣宗乃召青狗 詔 有司 裕以謀告 獎諭。

愛荅、獨魯、郭澍遷官升職有差。

加 里不孫寬厚愛人,敏於東事,能治劇要,識者以爲用之未盡云。 孫

完顏鐵哥性淳直,體貌雄偉,粗通書。年二十四,襲父速頻路曷懶合打猛安。 御下惠愛。察廉、除臨海軍節度副使、改底刺乣詳穩。 授廣威

安南 兩階 充 哥充都統,入衛中都。 却之,拔鹿角,奪門以入,遂克之。 右副元帥完顏匡副統,號平南盪江將軍。攻光化軍,王統制以步騎出東門逆戰,鐵哥擊 鳳凰臺,並城作甬道,立鵝車,對樓攻之,擊走張統制兵。時暑,還屯鄧州。兵罷,進官 大軍至,鐵哥導之濟,屢戰皆捷,以勞進官兩階。匡圍德安,鐵哥總領攻城,築壘于德 ,遷同知臨潢府事,改西南路副招討、宿州防禦使。貞祐二年,樞密使徒單度移剌以鐵 丞 相襄行省于北京,鐵哥爲先鋒萬戶,有功。丁母憂,服除,遷同知武勝軍節度使事 遷東北路招討使,兼德昌軍節度使。 進攻襄陽,爲前驅,獲生口,知江渡可涉處,陰植標以識

宣撫使,摭前不發軍罪,下獄被害。 鐵哥察其有異志,不遣。 蒲鮮 萬 奴在咸平, 忌鐵哥兵强,牒取所部騎兵二千,又召泰州軍三千及戶口遷 宣撫使承充召鐵哥赴上京,命伐蒲與路。 。諡勇毅。 既還,適萬奴代承充為 咸平。

納蘭胡魯刺,大名路怕魯歡猛安人。 性淳直、寡言笑、好讀書、博通今古。承安二年、

列 傅 第 四 + 完 顏 鐡 哥 納 蘭 胡 魯

剌

焉。

高

南路宣 |陶| 喪盡 不以 改南京路按察副使。 度使事,從伐宋。 土 逃兵盜劫,皆籍爲囊橐,累政莫敢問。 禮 實聞,卽械繫正 第 撫 御 一,除 副 史舉其淸節。 使。 應奉翰林文字。 以勞加朝請大夫,改禮部 其罪而盡括之。 貞祐二年,改泗州防禦使。 服除, 被詔括牛于臨潰、上京等路。 轉修撰。 於是豪民皆懼,無敢匿者。 平章政事僕散端舉廉能有文采, 員外郎、曹州刺史。 胡魯剌捕治之,窮竟其黨,闔郡 召爲吏部侍郎,遷絳陽軍節度使,權河東 丞相襄有田在肇州, 豪民僕散掃合立私渡於定 使還,襄稱其能。 遷同 肅然。 知順天 家奴匿 「三居父 改沃州。 軍 牛 節

進

之策。 略使,被召,以疾不能行,卒于絳州。 是時兵興,胡魯刺完城郭,繕器械,料丁壯爲鄉兵。 鹽米儲件,勸富民 出 栗,郡賴以完。 賜詔褒諭,加資善大夫,官其次子吾申。 口心延問者老,招致儒士,咨以 改權 備

禦

汝 礪任 贊 日 泰和、貞祐 一職,舊臣皆守藩矣。 ,其間相去五年耳,故將遺老往往在焉。日也高琪得君,宿將 假以重任,其實疏之。 故石抹仲溫以下, 以 見當 時 皆 斥外矣。 之將校

校勘記

- [1] 以功俱賜姓完顏 按殿本無「俱」字。
- 宣宗卽位遷通州防禦使 按本書卷二四地理志,中都路「通州、下、刺使。……興定二年五月陞

爲防禦使」。事在南遷之前,此「防禦使」似當作「刺史」。

族兄徐州譏察副使僧喜 「譏」原作「機」。按本書卷五七百官志、「提舉譏察使、正五品。 副使,

從五品」。今據改。

出秦州伐宋 按本書卷一五宣宗紀,興定二年二月「癸丑、完顏阿隣報皂郊堡之捷」。似「出」字

上當有「二年」二字。

[五]據山之巔「巔」原作「鎭」,據文義改。

へなし 扼渭源堡 原脫「源」字。按本書卷一三四西夏傳,貞祐三年十月有「救臨洮,大敗于渭源堡」之

文。又卷二六地理志,臨洮路臨洮府康樂縣有渭源堡。 今據補「源」字。

坐受沁南軍節度使克王永成名馬玉帶 「受」原作「授」,據殿本改。

移乣詳穩 按移下當有闕文,本書卷二四地理志,西京路後有「移典癿詳穩」,卷五七百官志

「諸礼詳移」下有「移刺礼」、卷八一阿勒根沒都魯傳有「移剌都礼詳穩」、不知此處所闕 何

一元 いた 貞祐初置東西面經略司 原脫「貞祐」二字。按本書卷二四地理志,中都路,平州「貞祐二年四

月置 東 面經略司,八月罷」。卷二六地理志,河東北路,「代州,天會六年置震武軍節度使,貞祐

- 二年 四 月 僑置 西 面經略司,八月罷」。今據補。
- 按上文言夾谷石里哥曾爲宿州提控,疑「遷」或當作「州」。

往宿遷

取

妻子

- 二年二月破宋兵三千於漸湖灘 已,壽州行樞密院破宋人高柳橋水砦,夷其砦而還」。 原脫「二年」二字。 今據補。 按本書卷一五宣宗紀,興定二年二月「丁
- 七月賞征南功 興定二年「七月辛未、詔賞南伐將士有差」。今據改爲「七月」。 「七月」原作「二年」。按上文已補「二年」二字,此處重複。 本書卷一五宣宗紀,
- 四宣宗紀,貞祐三年十月「戊戌,遼東宣撫司報敗留哥之捷」。 徙遼東路宣撫司都統 原脫「遼」字。按下文「宣宗嘉其功、詔遼東宣撫承制遷賞」。又本書卷一 今據補
- 統石烈德傳、「庸鮮萬奴逼上京」。今據改。 復掠上京城 「京」原作「古」。按本書卷一二二溫迪罕老兒傳、「蒲鮮萬奴攻上京」。又卷一二八
- 三吾 不協 疑上 有脫文。
- 納合裕眞授左都監 「納坦」。 今不能定何者 按上文作「納坦裕」。 爲是。 本書卷五五百官志,吏部,「白號之姓」,有「納合」及
- 列 襄稱其能 傳 第 四 + 原脱 「其」字,據文義補。 校 勘 記

[12] 故將遺老往往在焉 [14] 料丁壯爲鄉兵 「丁」原作「才」,據文義改。

「焉」原作「爲」,據殿本改。

金史卷一百四

列傳第四十二

納 坦謀嘉 鄒谷 高霖 孟奎 烏林荅與 郭 俁

溫迪罕達 王擴 移剌福僧 奥屯忠孝 蒲察思忠

統石 烈 胡 失 門 完顏寓 斡勒合打 蒲察移剌都

貞祐初、遷吏部員外郎、翰林待制、侍御史。 調東京教授、湯池主簿、太學助教。 掠韓州、信州,提刑司問諸書史「誰入奏者」。皆難之,謀嘉請行。 、瀛王褒讀書。 納坦謀嘉,上京路牙塔懶猛安人。 以終場舉人試補上京提刑司書史,以廉能著稱。 丁母憂,服闋,累除翰林修撰,兼修起居注、監察御史。 初習策論進士,大定二十六年,選入東宮, 五年,特賜同進士出身, 承安元年, 契丹陀鎖冠 教耶

列

傳

第四十

納坦謀

嘉

密院事,行院許州,汰去冗食軍士二千餘人。上書諫伐宋,不聽。 奏「京師官民能贍足貧民者,計所贍遷官,皆先給據」,謀嘉不受據而去。 中丞、未幾、攝太子詹事。 頃之,除唐州刺史。入爲太常少卿兼左拾遺,遷鄭州防禦使。改左諭德,轉少詹事,攝御史 狹土薄,他日宋、夏交侵,河北非我有矣。當選諸王分鎭遼東、河南,中都不可去也。」不聽。 曰:「帥臣統數萬衆不能出城一戰,何如自縛請降邪。」宣宗議遷都,謀嘉曰:「不可。 完顏萬舉謀嘉才行,志在匡國,可預軍政。充元帥府經歷官。 興定元年,潼關失守,自選河南統軍使兼昌武軍節度使,攝簽樞 中都被圍,食且盡 中都危急,謀嘉 河南 地

年,卒。 上功,不及告者,謀嘉請而賞之。 三年,降潁州防禦使。 有告宗人將襲潁州者,已而宋兵果至,謀嘉有備,乃引去。 四年,召爲翰林侍講學士兼兵部侍郎,同修國史。 有司 五

及定課皆稱職。」上以谷爲同知曹州軍州事。 司 直 **一,上曰:「司直** 鄒谷字應仲,密州諸城人。 「爭論情法、折正疑難、浴非所長也。」宰臣曰:「谷有吏才、陝西、河南訪察 中大定十三年進士第,累官瀋王府文學。尚書省奏擬大理 召爲刑部主事,轉北京、臨潢提刑判官,入爲

大理寺丞。

「吾口舉兩人卽是,安用許爲。」命左右攬昂衣欲杖之,會左司官召昂去乃已,詈諸令史爲奴 明日語權令史李秉鈞曰:「吾豈惟箠駡,汝進退去留,亦皆在我」、羣吏將陳訴,會官劾 尚書省點差接送伴宋國使官,令史周昂具數員呈請,左司都事李炳乘醉見之,怒曰:

「李炳疾惡,衆人不能容耳。」上曰:「炳誠過矣,告者未必是也。」乃從谷議。 時之言,當杖贖。 攬昂衣欲加杖,當決三十。」上曰:「李炳讀書人,何乃至是。」 宰臣對曰:

奏,事下大理寺議,差接送伴官事當奏聞,炳謂口舉兩人,當科「違制」。 浴曰:「口舉兩人,

|泰和六年,致仕。||貞祐初,卒。 歷濟南、彰德府治中,吏部郎中,河東按察副使,沂州防禦使。歷定海、泰寧軍節度使。

節度判官。 遷應奉翰林文字兼前職,改監察御史。丁母憂,起復太常博士。改都水監丞,簽陝西路按 經當疏其阸塞,行所無事。今若開雞爪河以殺其勢,可免數埽之勞。凡捲埽工物,皆取於 國史院編修官。建言::「黃河所以爲民害者,皆以河流有曲折,適逢隘狹,故致湍決。按冰 民,大爲時病。 高霖字子約,東平人。大定二十五年進士,調符離主簿。察廉,遷泗水令,再調安國軍 以父憂還鄉里,教授生徒,恒數百人。服除,爲絳陽軍節度判官。用薦舉,召爲 乞並河隄廣樹楡柳,數年之後,隄岸旣固,埽材亦便,民力漸省。」朝廷從之。

察司 事 ,體訪官 員能否,仍赴闕待對。 時南征調發繁急,民稍稽滯,有司皆坐失誤軍期罪。

霖言其枉,悉出之。授都水少監。

北門,上從之。 賜錢千貫,遷官三階。 初,改工部侍郎兼直學士。 改 中都留守、兼本路兵馬都總管。 大安初, 為耀州 入爲兵部尚書,知大興府事,俄權參知政事,與右丞相承暉行省于中都。 刺史。 貞祐 至寧元年八月、霖奉儲徘迎宣宗至新城、刺霖南迎諸妃。 二年,四除河平軍節度使兼都 三年,遷河北東路按察副使,改韓王傅,兼翰林直學士。 水監。 霖請城宜村為衛州以護 旣至,

其子孫錄用,諡文簡。 生,吾死於此矣。」霖死 平章政事抹燃盡忠棄中都南奔,霖與子義傑率其徒夜出,不能進,謂義傑曰:「汝可求 ,義傑伏羣屍中以免。 贈翰林學士承旨,令立碑鄉里,歲時致祭,訪

判官 支度判官、[E]上京等路提刑判官。 警巡使。 ,遷汲縣令。 孟 奎字元秀,遼陽 平章政事完顏守貞 察廉,改定興令。 人也。 禮 大定二十一年進士、調黎陽主簿。 接士 一大夫在其門者,號「冷巖十俊」,座其一也。 補尚書省令史、從參知政事 馬琪塞澶淵決 丁母憂,服闋,調淄 河、改 改都轉運司 中 州 都 軍 左

充宣差規措所官給軍用。 囚速頻路讞 初 ,遼東契丹判余里也嘗殺驛使大理司直, [B] 有契丹人同名者, 而 出之,旣 而 果獲其殺司直者。 改簽河東南北路按察司事、武州刺史。 遷同 知西京路 轉運 使事。 上言三事 有司 置行 輒繫之獄, ず,其 樞密院于 日::日 鎭寧 親民 奎按

訛 東東西路安撫副使, 出 虚造 大安初,除博州 功狀、訛出 防禦使,凡屬縣事應赴州者,不得泊於逆旅,以防吏姦,人 坐発官。 遷北京、 臨潢等路按察轉運使,以本官爲行六部侍郎。 韶以奎爲宣差都提控。 貞祐初,以疾卒、諡莊肅。 劾 便之。 奏監軍完顏 改山

未幾,改曹州刺史,再調同

知中都路都轉運使事。

旱, 詔審錄

中都路冤獄

,多平反

之寄,至今吏部之選頗輕,使武夫計資而得,

權

歸胥

吏。

每縣宜參用士人,

使紀綱

其

事。

穀,糾 使。」又曰:「東平屯兵萬餘,可 監察御史,累官武勝軍節 伍,類庸懦 知東平 烏林苔與本名合住,大名路納鄰必刺猛安人。 彈 府事, 非違,此平時之治法。 不可用。 權宣 撫 乞選材武者代之。」又曰:「院、曹、濮、濬諸郡皆可屯重兵, 勅州 副使。 度使、北京按察轉運使、 改西安軍節度使, 運濱 今四方兵動,民心未定,軍士動 鹽易糧芻給之。」又曰:「潼關及黃河津要, 入爲兵部尚書。 、太子 充奉職、奉御、尚食局直長, 詹事、武衞 見刻 上言:「按 軍都指 削,乞權罷 揮 察 使。 轉 將校 按察 運司 兼頓含。 貞祐 皆 及 縣官勸 拘 榷 出 勸 除 錢 卒

峇

與奏:「有司必督責趣辦,民將不堪,可量罰月俸。」從之。 民力穡,至於防秋,則淸野保城。」下尚書省,竟不施行。 尋召爲拱衞直都指揮使,復爲兵部尙書。 興定三年,卒。 新制科買軍器材物稽緩者並的決入 坐前在陝州市物虧直,降鄭州防

尚書省令史,知管差除。除大理司直。丁母憂,起復太常博士、左司都事。 **| 俁平陽府治中、張檝國子博士、王質昭義軍節度副使、抹撚居中大理司直、完顏合住侍儀司** 掃合、東部架閣管勾烏古論和尙、尙書省令史溫迪罕思敬皆才幹可用。詔各升一等,遷除 前應奉翰林文字張檝、吏部主事王質、刑部主事抹撚居中、通事舍人完顏合住、弘文校理把 遷遼東按察轉運使,改中都路都轉運使、泰定軍節度使、陝西東路按察轉運使。 遷國子祭酒。泰和六年,伐宋,充宣差山東安撫副使。七年,遷山東宣撫副使。 令、把掃合同知弘文院事、烏古論和尙利涉軍節度副使、溫迪罕思敬同知定武軍節度事。 能按察司,仍充本路轉運使,行六部尚書。改河北西路轉運使,致仕。元光二年,卒。 每季合注巡尉官,吏、刑兩部斟酌盜賊多寡處選注。」詔議行之。改中都、西京按察副使, 久之, 俁召爲同知登聞鼓院兼秘書丞, 遷禮部郎中、滕州刺史、同知眞定府事。上言: 郭俁字伯有,澤州人。大定二十二年進士,調長子主簿、萊州觀察判官、萊陽縣令,補 御史臺舉假及 貞祐三年, 大安元年,

河抵 五年, 遷德興府判官,再遷監察御史。 史,補尙書省令史,除南京警巡使。居父喪,是時伐宋兵興,起復,給事行尙書省。 閱官易達藐 通州、事集、遷一官、轉戶部員外郎、左司郎中。 溫 中第,調固安主簿。 一迪罕達字子達,本名謀古魯,蓋州按春猛安人。 小,謂之曰:「汝欲求作官邪。」]達曰:「取人以才學,不以年貌。」衆咸異之。 以憂去官,服除,調信州判官。 宣宗遷汴,以本職護送衞士妻子。 遇繼母憂,起復太常少卿,充陝西元帥 性敦厚,寡言笑。 丞相襄辟行省幕府。 復被詔運大名粟, 初舉進士,廷試搜 改順州刺 大安初, 由 明 御

府經歷官。

西統軍 |州,駐兵合思罕,以繫一方之心。 未盡耳。」宣宗曰:「人才難 相,邇來每令權攝,甚無謂也。 非計也。」宣宗曰:「一子非所愛,但幼不更事,詎能辦此。」逾月,復上言:「天下輕重,係于宰 可者。」又曰:「遼東興王之地,移剌都不能守,走還南京。 度今之勢,可令濮王守純行省蓋 興定元年,召還,攝侍御史,上疏論伐宋,略曰:「天時向暑,士馬不利,宜俟秋涼,無不 使把胡魯忠直幹略,知延安府古里甲石倫深沉有謀,能得士心,雖有微過,不足以累 知,故先試其稱否,卿何患焉。 今之將帥,謀者不能戰,戰者不能謀。今豈無其人,但用之 **昔祖宗封建諸王,錯峙相維,以定大業。今乃委諸疏外,** 所謂用之未盡者爲誰。」對 7日:「陜

列傅

部,兼左司諫,同知集賢院。改大理卿,兼越王傅。 大。」宰相高琪、高汝勵惡其言。俄充陝州行樞密院參議官。二年,召爲戶部 尋遷河南統軍使、昌武軍節度使,行六 侍郎。 改刑

部,攝同簽樞密院,行院許州。改集慶軍節度使。

于舊,乞量爲減免。」是歲大水,碭山下邑野無居民,轉運司方憂兵食,達謾聞二縣無主稻田 坐累抵罪。達自念失奏,因感愧發病,尋卒。 且萬頃,收可數萬斛,即具奏。朝廷大駭,詔戶部尚書高變佩虎符專治其事,所獲無幾,變 是時,東方荐饑,達上疏曰:「亳州戶舊六萬,今存者無十一,何以爲州?且今調發數倍

州防禦使事。被詔賑貸山東西路饑民、棣州尤甚、擴輒限數外給之。 猾吏張執中誣敗二令,擴到官,執中挈家避去。改徐州觀察判官,補尙書省令史,除同知德 王擴字充之,中山永平人。明昌五年進士,調鄧州錄事,潤色律令文字。〔云遷懷安令。

何」是時,置三司治財,擴上書曰:「大定間,曹望之爲戶部,財用殷阜,亦存乎人而已。今 決者,章宗輒減死,由是中外斷獄,皆以出罪爲賢。 擴謂同輩曰:「生者旣讞,地下之寃云 不常,捕訊,果壓城大盜也。衆以爲有神。再遷監察御史,被詔詳讞寃獄。是時,凡鬭殺奏 秦和伐宋,山東盜賊起,被安撫使張萬公牒提控督捕。擴行章丘道中,遇一男子舉止

乎?!旣 言司 謙 自代 ·職掌,皆戶部舊式,其官乃戶部之舊官,其吏亦戶部之舊吏,何愚於戶部而智於三司 而 三司 、王謙發其姦蠹,擴按之無所假借。 亦竟罷。 張煒職辦西北路糧草 ·者數年,失亡多,尚書省奏擴考按,會煒 燒舊與擴厚,使人諉擴曰:「君不念同舍邪?」 亦 舉

|擴日:「旣奉詔,安得顧故人哉**」**|

革,按察之職舉矣。」又曰:「數觅租稅,科糴益繁,民不 足以 謂:「分軍守隘,兵散而不成軍。聚之隘內,軍合則勢重。饋餉一塗,以逸待勞,以主待客,此 上策也。」又曰:「軍校猥衆,分例過優,萬戶一員,其費可給兵士三十人。 本路三從宜,萬 用。」書奏,不見省 邇來軍 二百餘員,十羊九牧,類例可知。 |教閱約束矣,豈不簡易而省費哉。」又曰:「按察兼轉運,本欲假糾劾之權,以 興,糧道軍府得 (中)同 知橫海軍節度事,簽河東北路按察事。貞祐二年,上書陳河東守禦策,大概 而 制之。 今太原、代、嵐三軍皆其州府長官, 乞以千人爲一軍,擇望重者一人萬戶,[t] 兩猛 ·爲恩,徒增廪給,敎練無法,軍不足 如令通掌資儲, 檢括錢穀 安、四謀克 則弊立 戶

宗首肯之。 擴奏曰:「官無羊 遷汴後,召爲戶部侍郎,遷南京路轉運使。 平章 政事 一、皆取於民,今民心未安,宜崇節儉。 高琪閱尙食物,謂擴曰:「聖主焦勞萬機, 太府監奏羊瘦不可供御。 廷議 肥瘠紛紛,非所 賴膳羞 以安養,臣子宜 以示 宣宗召擴詰問。 聖德也。」宣

列

傳

第

諡 剛毅。 六部侍郎、規辦秦、鞏軍食。逾月,權陝西東路轉運使,行六部尚書。致仕。興定三年,卒, 更論死。宣宗薄其責,削兩階,杖七十,張好禮削三階,杖六十。降爲遙授隴州防禦使,行 事,規辦潼關芻糧。偕戶部員外郎張好禮往商、號,只過中牟不可進。高琪奏擴畏避,下 京師大擾。擴白宰相,請三日造之。高琪怒不從。潼關已破,大元兵至近郊,遣擴行六部 心。」擴曰:「此自食監事,何勞宰相」」高琪默然,銜之。 **擴博學多才,梗直不容物,以是不振於時云。** 有司奪市人衣,以給往戍潼關軍士,

勒禁治」。詔尚書省行之。 史。上言「沿邊軍官私役軍人,邊防不治,及擾動等事,按察司專一體究,各路宣差提控嚴 聞之,無敢發其罪者。福僧請于節度使,願自效,旣跡得其所在,率衆入索之,得婦女四十 甄官署直長、豳王府司馬、順義軍節度副使。 部內世襲猛安木吞掠民婦女,藏之窟室,人頗 三人,木吞抵罪。徙横海軍,轉同知開遠軍節度事,簽北京、臨潢按察事,興中治中,莫州刺 移刺福僧,東北路烏連苦河猛安人。以蔭補吏部令史,轉樞密院,調滕州軍事判官,歷

之,兵果至,攻其北城。福僧戰其北,使備其西,薄暮果攻其西,以有備乃解去。尋改廣寧。 大安初,改沃州,同知興中府事。福僧督民繕治城郭,浚濠爲禦守備,百姓頗怨。頃

海倉粟,先賑其民,而後奏之,優詔獎諭。 僧還,悉放奴爲良,終不言子之功,識者多之。 福 僧 稱疾不 崇慶元年秋,福僧被牒如鄰郡,大兵薄城,其子鲖和尙率家奴拒戰,廣寧賴之以完。 岜 宣宗封胡沙虎澤王,百官皆賀, 至寧元年,除鞏王傅兼吏部 未幾, 福僧不往,胡沙虎欲摭而罪 充遼東宣撫副 使。 : 郞中。 歲大 之。 饑 胡 沙虎作難, 韶除福僧 福僧出沿 福

致仕。

州

防禦使。

貞祐三年,遷山東西路按察轉運使。

是歲按察司

罷,仍充轉運

使。

乣人。 **資以糧餉,假以官爵,爲患愈大。當選才幹官充宣差招捕,以恩賞諭使復業。** 定河朔,養兵蓄銳,策之上也。」又曰:「山東殘破,羣盜滿野,官軍旣 顏 運使趙 貢 兵,亦致勝之一也。」又曰:「自承安用兵,軍中設監戰官,論議之間,動相矛盾,不懲其失,反 多虞,而南鄙不敢撤戍,芻糧調度,仰給 奴婢、原州刺史紀石烈孛吉賜食、訪問時政得失。 、刑部尚書僕散偉、工部尚書奧屯扎 興定二年十一月庚辰,宣宗御登賢門, 重福 選擇虬人舊有宿望雄辨者,諭以恩信,彼若內附,然後 、沁南軍節度使猪奮、鎭南軍節度使石抹仲溫、泰定軍節度使李元輔 里吉、翰林學士完顏字迭、轉運使福僧、 河南,賦役頻繁,民力疲弊。 召致仕官,兵部尚書完顏蒲剌都、戶部尚書蕭 福僧乃上書曰:「爲今之計, 中都 可復、遼東可通。 少, 宜開宋人講和 且無騎兵。 河東北路 募其壯悍 、中衞尉完 惟 之端, 若宋 今西北 先招 徠 撫 轉

列

朝廷略施用焉。

元光元年,卒。

以爲法。 若輩平居,皆選材勇自衞,一 旦有急,驅疲懦出戰,寧不敗事?罷之爲便。」書奏,

其人哉。是故直言蔽於所惑,羣才詘於見忌耳。 贊曰:宣宗急於求賢,而使小人間之,悅於直言,而使邪說亂之。貞祐、興定之間,豈無 自納坦謀嘉以下,可考見焉。

權戶部侍郎,佐參知政事胥持國治決河,以勞進一階。除河平軍節度使,兼都水監,遂疏七 農軍借民錢不令償,至由是貧富不相假貸,軍民不相安,降寧海州刺史。 祖佛河及王村、周平、道口、雞爪、孫家港,復開東明、南陽岡、馬蹄、孫村諸河。 南京留守,遷定國軍節度使,復爲沁南軍。入爲太子少傳兼禮部尙書。 「河之爲患,不免勞民。復壘石爲岸十餘里,民不勝其病矣。」改沁南軍,坐前在衞州勾集妨 士科,調<u>滿州</u>司候。察廉,遷一官,除校書郎兼太子司經。三遷禮部員外郞。 奧屯忠孝字全道,本名牙哥,懿州胡土虎猛安人。 幼孤,事母孝。 中大定二十二年進 改滑州,歷同知 遷翰林待制, 忠孝常曰:

中都圍急,糧運道絕,詔忠孝搜括民間積粟,存兩月食用,悉令輸官,酬以銀鈔或僧道戒牒。 貞祐初,議降衞紹王,忠孝與蒲察思忠附胡沙虎議,語在思忠傳。頃之,拜參知政事。

咎有司,而 是時,知大興府事胥鼎計畫軍食,奏許入納粟買官,鼎已籍者忠孝再括之,[10]令百姓兩輸, 欲爲己功。 亦怨朝廷之不察也。」宣宗善行信言,命近臣與忠孝同審取焉。 左諫議大夫張行信上疏論之曰:「民食止存兩月,而又奪之,使當絕食,不獨 謂忠孝曰:「國家

本欲得糧,今旣得矣,姑從民便可也。」

故,乃使此人與政,如社稷何!」宣宗曰:「朕初卽位,當以禮進退大臣, 卿語其親知, 諷之求 太子太保,出知濟南府事,改知中山府。尋薨,年七十,諡惠敏。 子孫,及論特末也則云不當籍沒,其偏黨不公如此。 朝皆曰不可,忠孝獨力薦。及胡沙虎作難,忠孝自謂有功。 物,忍而不恤。勾當河防,河朔居民不勝其病。軍負民錢,抑不令償。 去可也。」行信以語右司郎中把胡魯,把胡魯以宣宗意白忠孝,忠孝靦然不聽。頃之,罷爲 頃之,行信復奏曰:「參政奧屯忠孝平生矯偽不近人情,急於功名,詭異要譽,慘刻害 無事之時,猶不容一相非才,況今多 詔議東海爵號,忠孝請籍沒其 東海欲用胡沙虎、舉

侍 簿,國子助教,應奉翰林文字,太學博士,累遷涿州刺史、吏部郎中,遷潞王傅。 讀學士張行簡討論武成王廟配等列,思忠奏曰:「伏見武成王廟配享諸將,不以世代爲 **蒲察思忠本名畏也,隆安路合懶合兀主猛安人。** 大定二十五年進士,調文德、 漷陰主 被詔與翰林

列傳

矯飾,不盡錄,錄其頗有理者云。 遷大理卿,兼左司諫,同修國史。 宋,成此帝業,秦王宗翰、宋王宗望、婁室、谷神與前代之將,各以功德間列可也。」思忠論多 後按唐祀典、李靖、李勣居吳起、樂毅上。 聖朝太祖以二千之衆,破百萬之師, 太宗克

故。 時制變,無不可者。」上以爲然。 尚多異議,思忠曰:「宋人攻圍城邑,動至數千,不得爲小寇。 丁母 憂,起復侍講學士,兼諫議、修史、知審官院,轉侍讀,兼兵部 再閱月,兼知審官院正職, 泰和六年,平章政事僕散揆宣撫河南,詔以備禦攻守之法,集百官議于尚書省。 外兼四職自思忠始。 頃之,遷翰林侍講學士兼左諫議大夫,大理卿、同修國史如 宋人請和。 但當選擇賢將,宜攻宜守,臨 侍郎 賜銀 五. 十兩、重綵十端。 廷臣

廟,思忠攝太尉,醉敺禮直官,御史臺劾奏,降秘書監兼同修國史。 之盜,況偸天位以私己乎」宣宗不從。 貞祐初,胡沙虎請廢衞紹王爲庶人,思忠與奧屯忠孝阿附胡沙虎,曰:「竊人之財,猶謂 頃之,遷太子太保兼恃讀、修國史。 頃之,遷翰林學士同修 二年春,享于太

國史、卒。

官、行司調河北東路都勾判官、累官翰林直學士、大理卿、右諫議大夫。 紇 石 烈胡失門,上京路猛安人。 明昌 五年進士,累官補尚書省令史,除中都路支度判 興定二年,伐宋,充

約,胡失門不矯正,特詔原之。改同知彰德府事。五遷吏部尚書。五年,拜御史大夫。 忨 堅壁不出,野無所掠,軍士疲乏,餓死相望,直前至江而復。安貞劾奏之,牙吾塔坐不奉詔 元帥左都監紇石烈牙吾塔參議官。牙吾塔至楚州,不待行省僕散安貞節制,輒進兵。宋人

光元年,兼大司農。二年,薨,宣宗輟朝,百官致奠。

府監丞,改吏部員外郎。大安初,除知登聞檢院,累遷右司郎中、翰林待制,兼侍御史。貞 滿初,議衞紹王事,語在衞紹王紀。 同知遼州軍州事,召爲國史院編修官,遷應奉翰林文字、南京路轉運副使。丁父憂,起復太 完顏萬本名訛出,西南路猛安人。大定二十八年進士,累調河東北路提刑司知事,改

黃布袍、緇巾、鑞牌各三十六事,牛頭響環六十四枚,欲以怖敵而走之,大率皆誕妄。因與 統,募市井無賴爲兵,敎閱進退跳擲,大概似童戲。其陣法大書「古今相對」四字於旗上,作 車千兩。是時材木甚艱,所費浩大,觀者皆竊笑之。草澤李棟在衞紹王時嘗事司天監李天 其衆出城、殺百姓之樵採者以爲功。一匱耐見者,本歧路小說人,俚語該嘲以取衣食,製運糧 往衒鬻求售。王守信者,本一村夫,敢爲大言,以諸葛亮爲不知兵,寓薦于朝。韶署行軍都 中都圍急,詔於康華門置招賢所,內外士庶皆得言事,或不次除官,由是閭閻細民,往

完顏萬

列

貫徹,得不成禍。 惠,依附天文,假託占卜,趨走貴臣,俱爲司天官。棟嘗密奏白氣貫紫微,主京師兵亂,幸不 既而高琪殺胡沙虎,宜宗愈益信之。

守信不可用,上乃以行信之言爲然。 則各以狀聞,不宜偏聽也。」上召行信與寓面計守信事,自己復與近侍就決于高琪。 天象,據經陳奏,使人主飭已修政,轉禍爲福。 左諫議大夫張行信奏曰:「狂子庸流,猥蒙拔擢,參預機務,甚無謂也。司天之官,占見 如有天象,乞令諸監官公同陳奏,所見或異,

使。 語在道潤傳。 興定元年四月、詔寓以本官權元帥左都監、行元帥府事、和輯苗道潤、移刺鐵哥軍事、 頃之,寓遷禮部侍郎,改東京副留守、隴州防禦使,遷安化軍節度使,兼山東路統軍副 十二月、密州破、寓爲亂軍所殺。

使,權 恐伯嘉奏聞,乃先奏伯嘉辱己。 廢、詔徙其民于太和嶺南。 豪官兵身先行陣。 斡勒合打,蓋州本得山猛安人。以蔭補官,充親軍,調山陰尉。[15]縣當兵衝,合打率土 河東北路宣撫副使,督糧餉往代州。 貞祐初,以功遷本縣令。 合打遙授同 御史臺廉得其事、未及奏、伯嘉、合打皆改遷。 知太原府事 縣升爲忠州,合打充刺 合打不欲行,因與宣撫使完顏伯嘉 ,仍領其衆。 俄以本官遙授彰國軍節度 史。 州被兵久,耕桑俱 合打改武寧 争辨。 合打

府,權元帥右都監,行元帥府事,駐兵縻、息間。 軍節度使。 合打屢守邊要,無他將略,雖未嘗敗北,亦無大功。 數月,召爲勸農使。久之,爲金安軍節度使。 權同簽樞 元光元年,卒。 密院 興定元年,復爲勸農使,歷 事,守河清, 改知歸德府事 知河間

蒲與路節度使無同知上京留守事,進三階,改知隆安府事。 年,與降兵萬餘人俱脫歸。遷隆安府治中,賜銀百兩、重幣六端,遙授信州刺史。 調 兼左副元帥。 同知秦州防禦使事、武衞軍鈴轄,以憂去官。起復武器署令。 |蒲察移剌都,東京猛安人。 父吾迭,太子太傅致仕。 再閱月,就拜尙書右丞。 移刺都勇健多力,充護衛十人長, 逾年,充遼東、上京等路宣撫使 從軍,兵潰被執。 有功,遷 貞祐一

守門,護衞押宿,擬前後衞仗,婢妾效內人粧飾等數事。 院於鄧州。御史臺奏移刺都在軍中,買沙覆道,盜用官銀,矯制收禁書,指斥鑾輿,使親軍 行省參議官。 召,棄隆安赴南京,宣宗皆釋不問。除知河南府事,俄改元帥左監軍,權左副元帥,充陝西 移刺都與上京行省滯察五斤爭權,及賣隆安戰馬,擅造銀牌,睚眦殺人,已而矯稱宣 無何,兼陝西路統軍使。興定二年四月,改簽樞密院事,權右副元帥,行 韶吏部尚書阿不罕斜不失鞫之,坐 樞密

列

宰執、豈無其道也哉!語其親知、諷之求去、豈禮邪。是故奧屯忠孝、蕭察思忠之黨比、統 石烈胡失門之疲衆,完顏萬之輕信誤國,斡勒合打之詆訟上官,於是會不之罪,失政刑矣, 贊曰:讀金史,至張行信論奧屯忠孝事,曰:嗟乎,宣宗之不足與有爲也如此!夫進退

校勘記

豈小懲大誠之道哉

- 興定元年潼關失守 按本書卷九九李革傳,貞祐四年拜參知政事,「是歲大元兵破潼關 叉卷
- 守」。皆記潼關失守在貞祐四年,與此不同 一〇一僕散端傳, 貞祐四年、「大元兵入潼關」。 卷一〇三完顏仲元傳,貞祐四年十月「潼關失
- 貞祐二年 破了知大興府事高霖皆及於難」。 原脫「貞祐」二字。 按至寧無二年。 知此當是貞祐二年。今據補。 本書卷一四宣宗紀,貞祐三年五月庚申,
- 從六品,掌勾判、分判支度案事」。今據乙正。 改都轉運司支度判官 「支度」原作「度支」。按本書卷五七五官志、「都轉運司、支度判官二員、
- 遼東契丹判余里也嘗殺驛使大理司直 按「判」下疑脫「官」字。

- ፺. 其一日親民之寄 按此句文義不完,疑「曰」下當有「縣令佐」等字。
- 敍 調 此 鄧 州錄 事云,「明昌五年甲科,釋褐鄧州錄事, 事潤 色律令文字 按元遺山集卷一八嘉議大夫陝西東路轉運使剛敏王公神道碑銘 朝廷更定律令,留公不遣」。 是擴因潤色律令,留朝

未赴鄧州任。此處有脫文,致文義不明。

- [4] 擇望重者一人萬戶 按疑「人」下脫「爲」字。
- [六] 偕戶部員外郎張好禮往商號 原脫「偕」字、據文義補。
- . Уч ЦД 病。 坐前 使, 在 軍 兼都水監」, 一負民! 衛州 錢,抑不令償」。 勾集妨農軍借民錢不令償 遂疏通黃河諸道。 考本書卷二七河渠志, 下文亦云,「參政奧屯忠孝……勾當河防,河朔 按「妨農軍」之名僅此一見。 河防有「河防軍」、卷八世宗紀亦 上文云,「除河平軍節度 居民不 有「韶增河 ·勝其

防 重 數」語。 疑「妨農軍」或爲「河防軍」之誤,或當作「勾集河防軍妨農事」。

- 鼎已籍者忠 孝再括之 「孝」原作「存」,據永樂大典卷三五八七引文改。
- 除中 都 路支度判官 「支度」 原作「度支」,今改。 參見本卷校記「三」。
- 上召 調 Щ 陰 行 尉 信 與 寓 Щ 面 陰 計守信事 原 作「陰 Щ 「計」原作「訂」,據文義改。 按本書卷二四 [地理志, 西京路應州有山陰縣。

列傳第四十二 校勘記

月

陸

爲

忠州

__

今據

乙

正

「貞祐二年五

金史卷一百五

列傳第四十三

程寀 任熊祥 孔璠 子拯 范拱 張用直 劉 樞 王翛

楊伯雄兄伯淵 蕭貢 溫迪罕締達 張翰 任天寵

程寀字公弼,燕之析津人。 祖冀,仕遼廣德軍節度使。 冀凡六男, 父子皆擢科第,

士

族號其家爲「程一舉」。 冀次子四穆,遼崇義軍節度使。

太祖 入燕、授尚書都官員外郎、錦州安昌令、累加起居郎、為史館修撰、以從軍有勞、加少府 宋,四穆之季子也。 自幼如成人。及冠,篤學,中進士甲科,累遷殿中丞。 天輔七年,

少監。

列

傳第四十

Ξ

程

寀

熙宗時,歷翰林待制,兼右諫議大夫。 宋上疏言事,其略曰:·「殿前點檢司,古殿巖環衞

道而 常。 行 是 獵,凡羽衞從臣無貴賤皆得執弓矢馳逐,而聖駕崎嶇沙礫之地,加之林木叢欝,易以迷失。 之任,所以肅禁籞、尊天子、備不虞也。臣幸得近清光,從天子觀時畋之禮。 俟其麋鹿既來,然後馳射。 禁籞之意也。 在 日自卯及申,百官始出沙漠,獨不知車駕何在。 陛下膺祖宗付託之重,奈何獨與數騎出入林麓沙漠之中,前無斥候,後無羽衞,甚非肅 竊惟古天子出入警蹕,清道而行。至於楚畋雲夢,漢獵長楊,皆大陳兵衞,以備非 擇衝要稍平之地,為駐蹕之所,簡忠義爪牙之士,統以親信腹心之臣,警衞左右。 臣願陛下熟計之。後若復獵,當預戒有司,圖上獵地,具其可否,然後下令清 仍先遣搜閱林藪,明立幖幟,爲出入之馳道。不然,後恐貽宗廟 瞻望久之,始有騎來報,皇帝從數騎已至 比見陛下校

前,止諡『武元』二字,理或未安,何以示將來?臣願詔有司定議諡號,庶幾上慰祖宗在天之 字,亡遼因之,近陛下亦受『崇天體道欽明文武聖德』十字。臣竊謂人臣以歸美報上爲忠, 天子以追崇祖考爲孝。 又曰:「臣伏讀唐史,追尊高祖以下,諡號或加至十八字。前宋大中祥符間亦加至十六 太祖武元皇帝受命開基,八年之間,奄有天下,功德茂盛,振古無

社

稷之憂。」

靈,使耿光丕烈,傳于無窮 又曰:「古者天子皆有巡狩,無非事者。或省察風俗,或審理冤獄,或問民疾苦,以布宣

德澤,皆巡狩之名也。 長貳、釐正 明之獄 ,

僭濫之刑,或力役無時,四民失業。

今鑾輅省方,將憲古行事,

臣願天心洞照,委之 風俗,或置匭匣,以申寃枉,或遣使郡國,問民無告,皆古巡狩之事。 國家肇興,誠恐郡國新民,逐末棄本,習舊染之汙,奢侈詐偽,或有不 昔漢昭帝問

矣。 危,察其紀綱理否而已。 疾苦、光武求民瘼、如此則和氣通、天下丕平可坐而待也。」 替,未始不由此者。」 如 而 吏部天官以進賢、退不肖爲任,誠使升黜有科,任得其人,則綱紀理而民受其賜,前代與 肥者危矣。 尚書省,天子喉舌之官, 又曰:「臣聞,善醫者不視他人之肥瘠,察其脈之病否而已。 是故,四肢雖無故, 天下者人也,安危者肥瘠也,紀綱者脈也,脈不病雖瘠不害,脈病 綱紀在焉。 不足恃也、脈而已矣。天下雖無事、不足矜也、綱紀 臣 願詔尚書省,戒勵百官,各揚其職,以立綱紀。 善計天下者不視天下之安 而已

有數。 又曰:「虞舜不告而娶二妃。〔〕帝嚳娶四妃,法天之四星。周文王一后、三夫人,嬪 選求淑媛以充後宮,帝王之制也。 然女無美惡,入宮見妬,陛下欲廣嗣續,不可不知 御

輩,皆得出入,莫有呵止,至淆混而無別。 叉曰:「臣伏見本朝富有四 海、禮樂制度,莫不一新。 雖有闌入之法,久尙未行,甚非嚴禁衞、明法令之 宮禁之制,尙未嚴密,胥 吏健卒之

而

告戒之。」

列傅

意,陛下不可不知而必行。」

進,有古君子之風云。

士爲橫海軍 疏 奏, 上嘉納之,於是始命有司議增上太祖尊諡。〔三皇統八年十二月,由翰林侍講學 節度使,移彰德軍節度使。卒官,年六十二。|宋剛直耿介,不諂奉權貴以希苟

附官 熊祥被詔爲會試主文,以「事不避難臣之職」爲賦題。 運使,改鎭西軍節度使。 者,熊祥未嘗阿意事之。 天慶八年進士第,爲樞密院令史。太祖平燕,以其地畀宋,熊祥至汴,授武當丞。宋法,新 四時」爲賦題,海陵大喜,以爲翰林侍讀學士 不釐務,熊祥言於郡守楊晳曰:「旣不與事,請止給半俸以養親。」晳雖不許,而喜其廉。 歷深、磁州刺史、開封少尹,行臺工部郎中,同知汴京留守事。天德初、為 金 任熊祥字子仁。八代祖圜,爲後唐宰相。圜孫睿,隨石晉北遷,遂爲燕人。熊祥登遼 人取均、房州、熊祥歸朝、復爲樞密院令史。時西京留守高慶裔攝院事、無敢忤其意 其後杜充、劉筈同知燕京行省,法制未一,日有異論,熊祥 是時,詔徐文、張弘信討東海縣,弘信逗遛,稱疾不進, 及御試、三熊祥復以「賞罰之令信如 · 決杖二百。 山東東路轉 爲折衷

七年,復致仕。 之。」上問:「孰可使者?」對曰:「臣雖老,憑國威靈,尙堪一行。」上曰:「卿老矣,無煩爲此。」 所以招伐之宜。 大定初,起爲太子少師。 熊祥事母以孝聞,母沒時,熊祥年已七十,不食三日,人皆稱之。卒于家。 衆皆異議,熊祥徐進曰:「陛下以勞民爲憂,用兵爲重,莫若以恩信招懷 時契丹賊窩斡竊號,北鄙用兵未息,上以爲憂,詔公卿百官議

廟於上京。 不可不勉, 廟,[2] 北面再拜,顧謂侍臣曰:「朕幼年游佚,不知志學,歲月逾邁,深以爲悔。 語、尚書、春秋左氏傳及諸史、通曆、唐律, 補迪功郎、襲封衍聖公、主管祀事。 孔璠字文老,至聖文宣王四十九代孫,故宋朝奉郎襲封端友弟端操之子。 孔子雖無位,其道可尊,萬世高仰如此。」 天眷三年, 韶求孔子後, 加蹯承奉郎, 襲封衍聖公, 奉祀事。 天會十五年,齊國廢。 乙夜乃罷。 皇統三年,蹯卒。至子拯襲封,加文 皇統元年三月戊午,上謁奠孔子 熙宗卽位,興制度禮樂,立孔子 是時,熙宗頗讀論 齊阜昌三年 大凡為善,

拯字元濟。 列 傳 第 四 + 天德二年,定襲封衍聖公俸格,有加于常品。 $\stackrel{\cdot}{=}$ 任 熊 祥 孔 璠 是歲立國子監,久之,加拯承 林郎。

直郎。大定元年、卒。弟總襲封、加文林郎。

使,守奉有闕。」上曰:「然。」乃授曲阜縣令。明昌元年,卒。子元措襲封,加文林郎。 總字元會。 大定二十年,召總至京師,欲與之官。尚書省奏:「總主先聖祀事,若加任

正月、詔元措兼曲阜縣令、仍世襲。元措歷事宣宗、哀宗、後歸大元終焉。 著于令。」四年八月丁未,章宗行釋奠禮,北面再拜,親王、百官、六學生員陪位。承安二年 元措字夢得。 三年四月詔曰:「衍聖公視四品,階止八品,不稱。 可超遷中議大夫,永

師,特賜王澤榜及第,除將仕郎、小學教授,以主簿半俸致仕。〔六〕 四十八代端甫者,明昌初,學士党懷英薦其年德俱高,讀書樂道,該通古學。召至京

辟爲書記,攝學事。 范拱字清叔,濟南人。九歲能屬文,深於易學。宋末,登進士第,調廣濟軍曹,權邦彥 劉豫鎭東平,[刊]拱撰謁廟文,豫奇之,深加賞識。 拱獻六箴。

五曰遠圖,六曰治亂,七曰舉賢,八曰守令,九曰延問,十曰畏愼,十一曰節祥瑞,十二曰戒 建,累擢中書舍人。上初政錄十五篇:一曰得民,二曰命將,三曰簡禮,四曰納諫,

雷 同, 十三日用人,十四日御將, 十五日御軍。 豫納其說而不能盡用也。 **外之,權尚書右**

丞,進左丞,兼門下侍郞。

巽坐貶官,自是無復敢言者。 驅民犯禁,非長久計也」。豫雖未即從,而亦不加譴。 陷罪者衆,境內苦之。右丞相張孝純及拱兄侍郎巽,極言其弊,請仍因履畝之法,豫不從。 百姓言之。」乃上疏,其大略以爲「國家懲亡宋重歛弊,什一稅民,本務優恤,官吏奉行太急, 人,豫見其多,乃更爲五等稅法,民猶以爲重也。 豫以什一稅民,名爲古法,其實裒歛,而刑法嚴急,吏夤緣爲暴。 |拱曰::「吾言之則爲黨兄,不言則百姓困弊。 拱令刑部條上諸路以稅抵罪者凡千餘 民久罹兵革,益窮困, 吾執政也, 寧爲

言自汝州姚城酒監擢省郎,人不知其所以進,拱亦不自言也。 之,減舊三分之一,民始蘇息。拱愼許可,而推轂士,公李南、張輔、劉長言皆拱薦也。 皇統四年,以疾求退,以通議大夫致仕。 齊廢,梁王宗弼領行臺省事,拱爲官屬。宗弼訪求百姓利病,拱以減稅爲請, 齋居讀書, 罕對妻子。 以久病乞近郡,除淄州刺史。 宗弼從 長

都酆鎬,以吳嶽爲西岳」。 拱以爲非是,議略曰:「軒轅居上谷,在恒山之西,舜居蒲坂,在華 前 代都長安及汴、洛,以太、華等山列爲五岳,今旣都瀌,當別議五岳名。 世宗在濟南聞其名。大定初,拱上封事。七年,召赴闕,除太常卿。 寺僚取崧高疏「周 議郊 祀。 或有言

列

十四。

山之北。 法,若漢張釋之可謂能守法矣。」故其議論 以此言之、未嘗據所都而改岳祀也。」後遂不改。 確然不可移奪。 拱嘗言:「禮官當守禮,法官當**守** 九年,復致仕,卒于家,年七

途費。 受卿學,亦儒者之榮也。」爲賀宋國正旦使,卒于汴。 使,改寧州刺史。海陵卽位,召爲簽書徽政院事、〔む太常卿、太子詹事。 天眷二年,以教宗子賜進士及第,除禮部郎中。 「朕雖不能博通經史,亦粗有所聞,皆卿平昔輔導之力。 太子方就學,宜善導之。 朕父子並 張用直, 臨潢人。 少以學行稱。 喪至、親臨奠、賜錢千萬。其養子始七歲、特受武義將軍。 遼王宗幹聞之,延置門下,海陵與其兄充皆從之學。 皇統四年,爲宣徽判官,歷橫海軍節度副 海陵深悼惜之,遣使迎護其喪,官給道 海陵嘗謂用直曰:

登天眷二年進士,調唐山主簿。 劉 樞字居中,通州三河人。少以良家子從軍,屯河間。 改飛狐令,蔚州刺史恃功貪汙無所顧忌,屬邑皆厭苦之,樞 同輩皆騎射,獨樞刻意經史。

守倅 郎。 遷 一向 無所應,乃摭以他事繫獄,將致之死。 正隆 而 書刑部員外郎,鞫治 下皆抵 末,從軍還自江上。 罪廢。 獨 樞 太原 治狀 大定初、與左司郎中王蔚、右司員外郎王全俱出 尹徒單阿里出虎反狀,[10]旬日 入優等,躐遷奉直大夫。 郡人有憐樞者,導樞脫走,訴於朝。 張浩營建燕京宮室,選樞 獄具。 轉工部郞 補外,樞爲南 中,進本部侍 會廉察使至 分治工役。

以樞 根彦忠爲 大定 等頗幹濟,猶用之,戒之曰:「能悛心改過,必加升擢。 四年,卒于官。 初,世宗欲復用樞等,御史臺奏:「樞等在正隆時皆以 南京 都轉運使, 不開 吏事, 故用樞以佐之。 遷山東路轉運 巧進,敗法蠹政,人多怨嫉之。」上 不然, 則斥汝等矣。」是時,阿勒 使, 改中都路轉 運使。

京路

轉運使

事

員 倖偸安,若果 世宗謂 外 郎,坐請屬故 王翛 字臣 字翛然,涿州 日二工修前為 剛 直,則 人姦罪, 當忘身以爲國 人也。 外官,聞 杖 四十,降授泰定軍節 登皇統二年進士第,由尚書省令史除 有 履 剛 直 正 名。 以無偏,何必賣法以徼福耶。」尋命賑 今聞專務出罪爲陰德,事 度 副使。 四 遷大興府 同 知 治 霸 多 非 中,授戶 州 理 從 濟密雲等三 輕。 累遷刑部 部 侍郎 叉巧

 \pm

翛

列

傳

歲餘,改顯德軍節度使。 十六縣猛安人戶,冒請粟三萬餘石,爲尙書省奏奪官一階,出爲同知北京留守事。 人多言王翛能官,以股觀之, 以前任轉運使拽辱倉使王祺致死,追兩官解職,勅杖七十,降授鄭 凡事不肯盡力,直一老姦耳。」二十四年,遷遼東路轉運使。 上曰:

州防

禦使。

採,股尚從之,況卿等乎?自今議事,毋但附合尚書省。」 議大夫兼禮部侍郎張暐詣殿門,諭之曰:「朝廷之事,汝諫官、禮官卽當辯析。 大臣|李靖等皆用班劍、羽葆、怒曰:「典故所無,固可從,然用之亦不過禮。」一 班劍,其王公以下鹵簿並無班劍,兼羽葆非臣下所宜用,國朝葬大臣亦無之。」上先知唐葬 禮官議。 帝欲用前代故事,班劍、鼓吹、羽葆等儀衞。 禮部尙書,兼大理卿。 章宗卽位、擢同知大興府事。 |脩言:「|晉葬丞相||王導,給前後羽葆、鼓吹、武賁、班劍百人。 |唐以來,大駕鹵簿有 使宋還,會改葬太師廣平郡王徒單貞。貞,章宗母孝懿皇后父也。 審錄官奏,條前任顯德潔廉剛直,軍吏歛迹,無訟獄。 宰臣以貞與弑熙宗誅死, 意難之。 日,詔翛 於是,詔下 且小民言可 及諫 遷

僧犯禁,皇姑大長公主爲請,脩曰:「奉主命,卽令出之。」立召僧,杖一百死,京師肅 坐故出人罪,復削官解職。明年,特授定海軍節度使。 明昌二年,改知大興府事。 諭旨曰:「卿賦性太剛,率意行事,乃 後

時僧徒多游貴戚門,翛惡之,乃禁僧午後不

得出寺。

嘗一

民飢,盜賊多,須用舊人鎭撫,庶得安治。勉盡乃心,以圖後效。」未幾,表乞致仕。 自陷於刑。 若殿年降敍,念卿入仕久,頗有執持,故特起於罪謫之中,授以見職。 上曰:「偷 且彼歲歉

能幹者,得力爲多。」不許。 復申請,從之。 泰和七年,卒,年七十五

曰:「可選極有風力如王翛輩者用之。」其爲上所知如此。 **м性剛嚴,臨事果決,東民憚其威,雖豪右不敢犯。** 承安間,知大興府事闕,詔諭宰臣

楊伯雄字希雲,真定藁城人。八世祖彦稠,後唐淸泰中爲定州兵馬使。 後隨晉主北

遷、行三遂居臨潢。父丘行、太子左衞率府率。

久之,調韓州軍事判官。 有二盜詐稱賈販,逆旅主人見欺,至州署陳訴,實欲刼取怕雄,伯 伯雄登皇統二年進士,海陵留守中京,丘行在幕府,伯雄來省視,海陵見之,深加器重。

於人當以禮進,附麗奔走,非素志也。」由是愈厚待之。 自以舊知伯雄,屬之使時時至其第,伯雄諾之而不往也。 雄心覺其詐,執而詰之,幷獲其黨十餘人,一郡駭服。 遷應奉翰林文字。是時,海陵執政, 日,海陵怪問之,對曰:「君子受知

海陵篡立,數月,遷右補闕,改修起居注。 海陵銳於求治,講論每至夜分,嘗問曰:「人

耳。」乙夜,復問鬼神事。 居注。遷直學士,再遷右諫議大夫,兼著作郎,修起居注如故。 「伯雄出語不忘規戒、爲人臣當如是矣。」再遷兵部員外郎。丁父憂、起復翰林待制、兼修起 凉,命伯雄賦詩,其卒章云:「六月不知蒸欝到,清凉會與萬方同。」海陵忻然,以示左右曰: 夜倦思。」伯雄不得已,乃曰:「臣家有一卷書,記人死復生,或問冥官何以免罪,答曰,汝置 頗譏之。陛下不以臣愚陋,幸及天下大計,鬼神之事未之學也。|海陵曰:「但言之,以釋永 夕之對豈指是爲非靜邪。」對曰:「徙兵分屯,使南北相維,長策也。所謂靜者,乃不 擾之 君治天下其道何貴?」對曰:「貴靜。」海陵默然。明日,復謂曰:「我遷諸部猛安分屯邊戍,前 一曆,白日所爲,暮夜書之,不可書者是不可爲也。」海陵爲之改容。夏日,海陵登瑞雲樓納 伯雄進曰:「漢文帝召見賈生,夜半前席,不問百姓而問鬼神,後世

奏:「晉武平吳皆命將帥,何勞親總戎律。」不聽。 乃落起居注,不復召見。 皇子愼思阿不薨,伯雄坐與同直者竊議被責,語在海陵諸子傳。 海陵議征江南,伯雄

羽獵、保成等箴,皆見嘉納。 復為左諫議大夫、翰林直學士。 會太子詹事闕,宰相復舉伯 兄子幡爲左贊善,言聽諫從,時論榮之。 集古太子賢不肖爲書,號瑤山往鑒,進之。及進 上曰:「伯雄不可去朕左右,而東宮亦須輔導。」遂以太子詹事兼諫議。 大定初,除大興少尹,丁母憂。顯宗爲皇太子,選東宮官屬,張浩薦伯雄,起復少詹事

尚書 相 以忠諫而 不已,同列皆引退,久之乃起。 曰:[1][書曰『汝無面從,退有後言』。 ,謂近臣曰:「羣臣有幹局者衆矣,如伯雄忠實,皆莫及也。」上謂伯雄曰:「龍逢、比干皆 六年,上幸西京,欲因往凉脛避暑,怕雄率衆諫官入諫。 死,使遇明君,豈有是哉!」伯雄對曰:「魏徵願爲良臣,正謂遇明君耳。」因 是年,至涼陘,徼巡果有疏虞。 **朕與卿等共治天下,事有可否,口己即當** 上曰:「朕徐思之。」伯雄言之 上思伯雄之言,及還,遷 囬 顧謂 陳。 禮 卿 部 宰

伯维 伯仁,族兄伯淵 隨者,人必 爲尹 十二年,改沁南軍節度使,召爲 ٠, 稱楊詹事以愧之。 白 姓稱之, 曰:「前有脹,後有楊。」徙河中尹。 除定武軍節度使,改平陽 人。 翰林學士承旨。 復權詹事,伯雄 丞相石琚致仕, 尹 知無不言,匡救弘 0 卒,年六十五。 先是,張浩治平陽, 上問:「誰可代卿者?」 諡莊獻。 多。 後宮僚有 有 惠政, 弟伯傑、 及 詭

等致位卿相,正行道揚名之時,偸安自便,徼倖一時,如後世何?」羣臣皆稱

萬歲

滿、除 會初 ,以名 伯淵 同知永 字宗之。 家 定 子補 軍 節度使事。 尚書省令史。 父丘文,遼中 召爲司計郞中。 書舍人。 十四年, 伯淵早孤,事母以孝聞,疏財好施 賜進 士 知平定軍, 第, 歷吏 用廉, 遷平州路轉運使。 、禮二部主事 、御前 ,喜收古書。 承應文字, 知泰安 秩

列

傳

軍,有惠政,百姓刻石紀其事。 獨濟南賴伯淵保全。大定三年,致仕,卒于家。 四遷山東東路轉運使。 正隆末,羣盜蠭起,州郡往往罹害,

官。 提刑司奏涇州有美政,遷北京轉運副使。親老,歸養。 補尙書省令史。舊例,試補兩月,乃補用。」貢至數日,執政以爲能,卽用之。擢監察御 蕭貢字眞卿,京兆咸陽人。大定二十二年進士,調鎭戎州判官,涇陽令,涇州觀察判

第一,賜重幣四端。」貢論時政五弊,言路四難,詞意切至,改治書侍御史。丁父憂,起復,改 倖。守令不務才實,民罹其害。伏望擢眞才以振澆俗,核功能以理職業,愼名器以抑僥倖, 操履,巧于案牘,不涉吏議者爲工。用人不務因才授官,惟泥資敍。名器不務愼與,人多僥 右司員外郎,尋轉郎中,遷國子祭酒,兼太常少卿,與陳大任刊修遼史。改刑部侍郎,歷同 重守令以厚邦本。然後政化可行,百事可舉矣」。詔詞臣作唐用董重質誅郭誼得失論,貢爲 知大興府事、德州防禦使、三遷河東北路按察轉運使。 左丞董師中、右丞楊伯通薦其文學,除翰林修撰。上書論「比年之弊,人才不以器識、

大安末,改彰德軍節度使。坐兵興不能守城,亡失百姓,降同知通遠軍節度事。 未幾,

詔 改靜難軍節度使,歷河東北路、南京路轉運使、御史中丞、戶部尚書。 釋 不問。 興定元年,致仕。元光二年,卒,諡文簡。 **貢好學,讀書至老不倦,有注史記** 南京戒嚴,坐乏軍儲,

百卷。

宰相。 著 自 設學校,使

北离刺等教之。 作佐 願從學者聽。 十 溫迪罕締達,該習經史,以女直字出身,累官國史院編修官。 締達 郎,與編修官宗璧、尚書省譯史阿魯、東部令史張克忠譯解經書。日恩累遷秘書丞。 九年,改左贊善,以母老求養。 最號精深。 十三年,設女直進士科。 大定十二年,詔締達所教生員習作詩、策,若有文采,量才任使,其 其後學者漸盛,轉習經史,故納合椿年、紇石烈良弼皆由此致位 顯宗使內直丞六斤謂締達曰:「贊善,初未除此官,天 是歲,徒單鎰等二十七人登第。 初,丞相希尹制女直字, 十五年,締達遷

子謂 德義,不 孤 日:5 勝其喜。 般 得 一出倫之才,學問該貫,當令輔汝德義。』旣數日,贊善除此官。 未可去也,勿難于懷。」久之,轉翰林待制,卒。 明昌五年,贈翰林學士承 自謂親炙

旨,諡文成

府。 遣史官一員,廣爲采訪,以議褒嘉。」興定元年, 其弊,宜勅有 奴,降爲鄭州防禦使。 未撤,征調不休,州縣長吏不知愛養其民,督責徵科,鞭笞逼迫,急於星火,文移重複,不勝 子二十,章宗卽位,以爲符寶典書,累官左諫議大夫。 坐縱軍人家屬出 司務從簡易。 城,當杖,詔解職。 未幾,復爲知開封府事。 兵興以來,忠臣烈士,孝子順孫,義夫節婦,湮沒無聞者甚衆,乞 四年, 遷武勝軍節度使,三三改吏部尚書, 復知開封府,復坐以事囑警巡使完顏金僧 貞祐四年,上疏,略曰:「今邊備 知開封

職 間,平章政事獨吉思忠、參知政事承裕行省戍邊,日心翰充左右司 者,翰微行 監察御史。 乖方,翰屢爭之不見省。 遷 張翰字林卿 侍御史。 廉得其狀,白于州釋之。 丁母憂,服闋,調山東路鹽使。 貞祐初,爲翰林直學士,充元帥府經歷官。 ,忻州秀容人。 承裕就逮,衞紹王知翰嘗有言,召見撫慰之。 大定二十八年進士,調隰州軍事判官。 歷東勝、義豐、會川 丁父憂,起復尚書省都事、戶部員 令,補尚書省令史,除戶部主事, 中都戒嚴,調度方殷,改戶部 郎中, 改知 論 有誣昆弟三人爲叔 議 登聞鼓院,兼前 不 相 外郎。 協。 處置

侍郎。

統攝,以安反側。 實南京。二日足用,謂當按察、汴舊渠以通漕運。三日防亂,謂當就集義軍假之官印,使相 宣宗遷汴,翰規措扈從糧草至眞定,上書言五事:「一曰强本,謂當裒兵徒、徙豪民,以 四曰省事,謂縣邑不能自立者宜稍倂之,旣以省官,且易於備盜。 五曰推

時,初至南京,庶事草略,翰經度區處皆有條理。是歲卒,諡達義。 翰雅有治劇才,所至輒辦。遷河平軍節度使、都水監、提控軍馬使,俄改戶部尚書。 是

恩,謂當推恩以示天子所在稱幸之意。」上略施行之。

寨,無文廟學舍,天寵以廢署建。有兄弟訟田者,天寵諭以理義,委曲周至,皆感泣而去。 遷監察御史。改右司都事,遷員外郎。改左司諫,轉左司郎中,遷國子祭酒。 調泰定軍節度判官。丁父憂,服闋,調崇義軍節度判官。補尚書省令史、右三部檢法司正, 任天寵字清叔,曹州定陶人也。明昌二年進士,調考城主簿,再遷威戎縣令。縣故堡

營辦、曲盡勞瘁、出家貲以濟飢者、全活甚衆。監察御史高變、劉元規舉天寵二十人公勤明 敏,有材幹,可安集百姓。遷戶部尚書。三年,中都不守,天龍繼走南京,中道遇兵,死之。 貞祐初、轉秘書監兼吏部侍郎、改中都路都轉運使。時京師戒嚴、糧運艱阻、天寵悉力

列傳

諡 純肅。

諫、工辭藻,蕭貢、溫迪罕締達之文藝適時,之數人者迭用於正隆、大定、明昌之間。 斯可概見矣。 任天寵之經理調度,宣宗南遷,猶賴其用焉。 日以盛矣。張用直,海陵父子並列舊學。CICI劉樞之練達,王脩之强敏於事,楊伯雄之善諷 贊曰:程寀、任熊祥,遼之進士,孔璠、范拱事宋、事齊,太祖皆見禮遇,Clも而金之文治 金源氏百餘年所以培植人才而獲其效者,於 張翰、

校勘記

- (1) 叉曰虞舜不告而娶二妃 原脫「又曰」二字,今依上下文例補。
- ヘミン 於是始命有司議增上太祖尊諡 「增」原作「贈」,據文義改。
- 及御試 來御試賦題皆士人嘗擬作者」,「經義進士御試第二場」,「遂定御試同日各試本業」,屢見 「試」原誤作「題」。按本書卷五一選舉志,「海陵庶人天德二年,始增殿試之制」,又「自 「御

試」一詞。今據改。

- 29 皇統元年三月戊午上謁奠孔子廟 帝詣文宣王 |廟奠祭」。考本書卷三五禮志云、「歲春秋仲月上丁日釋奠于文宣王」。則作二月是。 按大金集禮卷三六宣聖廟配儀作「皇統元年二月戊子日,
- Ħ. 皇統三年璠卒 按本書卷四熙宗紀作皇統二年正月,「壬子,行聖公孔璠薨」。
- , . 大 山 以主簿半俸致仕 賜 有 司 孔端甫及第、命食主簿半俸致事」。 原脫「半」字、「俸」作「奉」。 **今據改。** 按本書卷一〇章宗紀, 明昌四年三月「丙子,特
- . . -U 劉豫鎭 東 東 西淮南安撫使,知東平府」。 東平 原脫「平」字。按本書卷七七劉豫傳,「撻懶攻濟南……豫遂殺關勝出降,遂爲京 又同卷撻懶傳,「劉豫以濟南府降,詔以豫爲安撫使,治東平」
- [八] 而推轂士 據文義疑「士」下當有「類」字。

今據

- 召爲簽書徽政院 且 本卷上文用直曾「爲宣徽判官」,故疑「徽政院」爲「宣徽院」之誤。 事 按金無「徽政院」。本書卷五六百官志」「宣徽院: 同簽宣徽院事,正五品」。
- 鞫治太 阿 虎 (傳 里 出 記 此 原 虎伏誅」。 事 尹 ·云、「起復爲太原尹 徒單 阿里出虎反狀 今 據 乙正。 • 阿 王乞以謂當 里出 虎」原作 有天命,阿里出虎喜,以王乞語告鼎,鼎上變, 「阿里虎出」。 按本書卷一三二徒單阿里出
- 列 後隨晉主 傳 第 四 北 + 遷 Ξ 遷 椌 原 勘 作「還 記 」,據文義改。

[1]] 因顧謂宰相曰 按「相」殿本作「臣」。

據乙

正

- 事有 可否 事 有」原作「有事」。 按本書卷六世宗紀,大定八年正月, 記此作「事有不可」。今
- 吏部令史張克忠譯解經書 按本書卷九九徒單鎰傅記此事作「吏部令史楊克忠譯解」。
- 二吾 遷武 勝 軍節度使 「軍」原作「州」。 按本書卷二五地理志、「鄧州、武勝軍節度使」。 今據改。
- 大安間平章政事獨吉思忠參知政事承裕行省戍邊 三承裕傳, 大安三年,「拜參知政事, 與平章政事獨吉思忠行省成邊,烏沙堡之役不爲備,失 原脫「戍邊」二字,文義不明。 按本書卷九
- 二七 太祖皆見禮 四 年殿本作「至金皆禮遇之」,文義爲優。 遇 按程宗、任熊祥入金在太祖時,孔璠、范拱入金在熙宗時。此處文欠周密。 道光

利。

今據:

補。

張用 太子方就學,宜善導之。 直 海陵父子並列舊學 朕父子並受卿學,亦儒者之榮也。」」今據補 原脫「海陵」二字,文義不明。 按本卷張用直傳、海陵嘗謂用直曰:

金史卷一百六

列傳第四十四

張暐 張行簡 賈益謙 劉炳 术虎高琪 塔不也

除,調山東東路轉運副使,入爲太常丞,兼左贊善大夫。章宗封原王,兼原王府文學。章宗 使,課增羨,遷昌樂令。改永淸令,補尚書省令史,除太常博士,兼國子助敎。 册爲皇太孫,復爲左贊善,轉左諭德,兼太常丞,充宋國報諭使。至盱眙,宋人請赴宴,暐 改禮部郞中,修起居注如故。遷右諫議大夫,兼禮部侍郞 曰:「大行在殯、未可。」及受賜,不舞蹈,宋人服其 張暐字明仲,莒州日照縣人。博學該通。登正隆五年進士。 、知禮。 使還, 遷太常少卿, 調陳留主簿、淄州酒稅副 兼修起居注。 丁父憂,服

惟 聖慈,追念勳臣,恩禮隆厚,孰不感勸。 明昌二年,太傅徒單克寧薨,〔〕章宗欲親爲燒飯,是時,孝懿皇后梓宮在殯,暐奏:「仰 列 太祖時享,尚且權停, 若爲大臣燒飯,禮有未安。 二三二七

今已降恩旨,聖意至厚,人皆知之,乞俯從典禮,則兩全矣。」章宗從之。

提刑之任,誠不可罷,擇其人而用之,生民之大利,國家之長策也。」因舉漢刺史六條以奏。 使,姚崇奏『十道採訪猶未盡得人,天下三百餘州,縣多數倍,安得守令皆稱其職』。 提刑之設,政之大者,若爲浮議所搖,則內外無所取信。唐開元中,或請選擇守令,停採訪 上曰:「卿言與朕意合。」 上封事者言提刑司可罷,暐上疏曰:「陛下卽位,因民所利更法立制,無慮數十百條。 然則,

法。」上因謂宰臣曰:「鎬王視永蹈爲輕。」 論 慶裔。〔三上使參知政事馬琪諭暐曰:「百官舉閱實鎬王事,要勿屈抑其人,亦不可 拜 禮部尙書。 孫卽康鞫治鎬王永中事,還奏,有詔覆訊,三羣臣舉暐及兵部侍郎烏古 馬琪曰:「人臣無將。」由是永中之獄 決矣。 虧損國

巾,旣葬止用素服終制,朝會從吉。」上從其奏。 齊衰三年,桐杖布 霍 王從彝母早死,溫妃石抹氏養之,明昌六年溫妃薨,上問從彝喪服。 冠,禮也。 從彝近親, 至尊 壓降與臣下不同,乞於未葬以前服白布衣絹 暐奏:「慈母服

如『對曰:「豈可逆度而妨大禮。 曰:「陛下卽位于今八年,大禮未舉,宜亟 **承安元年八月壬子,上召暐至內殿,問曰:「南郊大祀,今用度不給,俟他年** 今河平歲豐,正其時也。」上復問曰:「僧道三年一試,八十 一行之。」上曰:「北方未寧, 致齋之際有不 測奏報何 可乎』障

周世宗皆賢君,其壽不永,雖曰偶然,似亦有因也。」對曰:「三君矯枉太過。今不毀除、不崇 而 取一,不亦少乎?」對曰:「此輩浮食,無益有損,不宜滋益也。」上曰:「周武帝、唐武宗、後

奉,是爲得中矣。」是歲,郊見上帝焉。

起爲安武軍節度使。致仕,例給半俸,久之,障不復請,遂止。 「張暐父子必不如是也。」三年,爲御史大夫,懇辭,不許。明年,坐奏事不實,奪一官,解職 頃之,翰林修撰路鐸論[胥持國不可再用,因及|董師中趨走持國及丞相襄之門,上曰:

以爲常。 障自妻卒後不復娶,亦無姬侍,齋居與子行簡講論古今,諸孫課誦其側,至夜分乃罷, 歷太常、禮部二十餘年,最明古今禮學,家法爲士族儀表。子行簡、行信,行信自

有傳。

其言,深器重之。 賜高麗,「比遣使報哀,回強以細故邀阻,且出嫚言,俟移問還報,橫賜未晚」。 憂,歸葬益都,杜門讀書,人莫見其面。服除,復任。章宗卽位,轉修撰,進讀陳言文字,攝 太常博士。 行簡字敬甫。 夏國遣使陳慰,欲致祭大行靈殿。 轉翰 穎悟力學,淹貫經史。大定十九年進士第一,除應奉翰林文字。丁母 :林修撰,[m] 與路伯達俱進讀陳言文字,累遷禮部郞中。 行簡曰:「彼陳慰非專祭,不可。」廷議遣使横 徒單克寧韙

列

徒一年收贖,長行彭徽等四人各杖八十罷去。 十六日夜月食,時刻不同。 月爲三月,二年十二月十四日,金木星俱在危十三度,道用曆在十三日,差一日, 三年四 後賜名。 司 天 臺劉 詔翰林侍講學士党懷英等覆校。 道用改進新曆,詔學士院更定曆名,行簡奏乞覆校測驗,俟將來月食無差,然 道用不曾考驗古今所記,比證事迹,輒以上進,不可用。 懷英等校定道用新曆:明昌三年不置閏,即以閏 道用當 月

此施行。」上是其言,詔書中行之。「KJ 久之,兼同修國史。 改禮部侍郎、提點司天臺,直學 路,人不肯收養,肆爲捐瘠,餓死溝中。 士,同修史如故。 人,其後詔書官爲收贖,或其父母衣食稍充,卽識認,官亦斷與之。 羣臣屢請上尊號,章宗不從,將下詔以示 伏見近代禦災詔書,皆曰『以後不得復取』, 四方,行簡奏曰:「往年飢民棄子,或匄以與 自此以後,饑歲流 今乞依 離 道

別爲一班揖賀,宰執坐答揖,左右司郎中五品官廷揖,亦坐答之。 師、三公、宰執以下須羣官同班拜賀,皇太子立受再答拜。 令三品以下官同班賀,宰執起立,依見三品官儀式通答揖。」上曰:「此事何不早辨正之,如 坐受也。 |行簡言:「

唐制,僕射、宰相上日,百官通班致賀,降階答拜。 宰執受賀,其禮乃重於皇太子,恐於義未安。 別嫌明微,禮之大節,伏請宰執上日 今尚書省宰執上日,分六品以下 臣謂身坐舉手答揖,近於 國朝皇太子元正、生日,三

奏。」下尙書省議,遂用之。宰執上日,三品以下羣官通班賀,起立答拜,自此始。 都省擅行,卿論之是矣。」行簡對曰:「禮部蓋嘗參酌古今典禮,擬定儀式,省廷不從,輒改以

資乃遷博士。 行簡 .轉對,因論典故之學,乞於太常博士之下置檢閱官二員,通禮學資淺者使爲之,積 又曰:「今雖有國朝集禮,至於食貨、官職、兵刑沿革,未有成書,乞定會要,以

示 無窮。」承安五年,遷侍講學士,同修史、提點司天如故。

簡。」謂行簡曰:「宋人行禮,好事末節,苟有非是,皆須正之,舊例所有不可不至。」上復曰: 須令張行簡常在左右。」 兩國 頗聞 泰 前 和 和二年,爲宋主生日副使。上召生日使完顏瑭戒之曰:「卿過界勿飲酒,每事聽於行 :奉使者過濫,每至中流,卽以分界爭渡船,此殊非禮。 好久矣,不宜爭細故傷大體。』丁寧諭之,使悉此意也。」四年,詔曰:「每奏事之際, 卿自戒舟人, 且語|宋使曰:

卿 對曰:「司馬光亦嘗諫尊號事,不若祖禹之詞深至,以謂臣子生諡君父,頗似慘切。」上 五 用 年 一、羣臣 祖 禹意答之,仍曰太祖雖有尊號,太宗未嘗受也。」行簡乞不拘對偶,引祖禹以微 復請上尊號,上不許,詔行簡作批答,因問行簡宋范祖禹作唐鑑論尊號事。

改順 天 軍 節 度使。 上 謂 行簡曰:「卿未更治民,今至保州,民之情偽,卒難臆度,如何治

列

傳

從之。

其文深雅,甚得代言之體

之,何時可定。 害括官田給軍,旣一定矣,有告欲別給者,輒從其告,至今未已。名曰官田,實取之民以與 之則可。」對曰:「臣奉行法令,不敢違失,獄訟之事,以情察之,鈐制公吏,禁抑豪猾,以鎮靜 定。」制曰:「可。」 為務,庶幾萬分之一。」上曰:「在任半歲或一年,所得利害上之。」

「簡到保州,上書曰:「比 可耕種,本路及運司佐官按視,尙書省下按察司覆同,然後改撥。 之,奪彼與此,徒啓爭端。 臣謂當限以月日,不許再告爲便。」下尚書省議,奏請:「如實有水占河場不 臣所管已撥深澤縣地三百餘頃,復告水占沙鹹者三之二,若悉從 若沙鹹塉薄,當準已撥爲

英、唐隱太子建成、巢刺王元吉、譙王重福故事爲奏,幷進詔草,遂施行焉。 翰林學士承旨,尚書、修史如故。 以聞。」又曰:「欲使石古乃於威州擇地營葬,歲時祭奠,兼命衞王諸子中立一人爲鄭王後, 歷年 遣 謹 其祭祀。 中使馮賢童以實封御扎賜行簡曰:「朕念鎬、鄭二王誤干天常,自貽伊戚。 所,朕甚悼焉。 六年,召爲禮部尙書,兼侍講、同修國史。祕書監進太一新曆,詔行簡校之。七年,上 此事旣行,理須降詔,卿草詔文大意,一就封進。」行簡乃具漢淮南厲王長、楚王 欲追復前爵,備禮改葬,卿可詳閱唐貞觀追贈隱、巢,并前代故事,密封 累遷太子太保、 藁葬郊野,多

貞祐初,轉太子太傅,上書論議和事,其略曰:「東海郡侯嘗遣約和,較計細故,遷延不

青榮祿 修壞, 箭 買之,不足則令職輸所買之價,庶不擾而 簡,兼職如 議者,雖有異同,大概以和親爲主焉。 歲奉幣帛,或二三年以繼。 與弟行信 曾 <u>丞賈益謙皆曰:「丁憂致仕者可以免此。」權參政鳥古論德升曰:「職官久享爵祿,軍</u> 非通有之物,其清貧之家及中下監當,丁憂致仕,安有所謂如法軍器。 無寸補 今都城危急,豈可拒絕。 行 三年七月,朝廷備防秋兵械,令內外職官不以丁憂致仕,皆納弓箭。 以 簡 大夫,諡 求應命而已,與倉猝製造何以 端慤愼密,爲 同居數十年, `,況事已行而復改`,天下何所取信。」是議也`,丁憂致仕官竟得免。 文正 人主所知。 人 無間 選忠實辨捷之人,往與議之,庶幾有成,可以紓患。」是時,百官 言。 臣願更留聖慮,包荒含垢,以救生靈。 自初入翰林,至太常、 所著文章十 莊獻太子葬後,不置宮師官,升承旨爲二品,以寵 〉異哉。 事可辦。」左丞相僕散端、平章政事高琪、 若於隨州郡及猛安謀克人戶拘括,擇其佳 五卷, 禮例纂 禮部,典貢舉終身,縉紳以 百二十卷,會同、朝獻、禘祫、 或如遼、宋相爲敵國, 今繩以軍期,補 行簡上書曰:「弓 是歲,卒, 興以 盡忠、右 爲榮。 贈銀 來,

者

弊

行

列 傳 第 四 十 四 張 行 簡 葬

,皆有記錄,及淸臺、皇華、戒嚴、爲善、自公等記,藏于家。

無不中度。古者官有世掌,學有專門,金諸儒臣,唯張氏父子庶幾無愧於古乎。 贊曰:張暐、行簡世爲禮官,世習禮學。 其爲禮也,行於家庭,講於朝廷,施用於鄰國,

以能稱。明昌間,入爲尙書省令史,累遷左司郎中。章宗諭之曰:「汝自知除至居是職,左 犯之。」 十三月,行止尚如此失實,其如選法何?蓋是汝不用心致然爾。今姑杖知除掾,汝勿復 事判官召爲典輿副轄,[4] 在職才五月,降授門山縣簿尉。 脍比閱貼黃,行止乃俱書作一 司事不爲不練,凡百官行止、資歷固宜照勘,勿使差繆。 若武庫署直長移刺郝自平定州軍 賈益謙字彥亨,沃州人也,本名守謙,避哀宗諱改焉。大定十年詞賦進士,歷仕州郡,

閣、召守謙入對、稱旨。進兼尙書吏部侍郎。時鎬王以疑忌下獄,上怒甚,朝臣無敢言者。 察等,臣是故言之。」上嘉納焉。是年夏,上將幸景明宮淸暑,守謙連上疏,極諫之。上御後 升黜之。」上曰:「卿之言其有所見乎。」」守謙對曰:「提刑官若不稱職,衆所共知,且其職與監 守謙上章論其不可,言極懇切。上諭之曰:「汝言諸王皆有覬心,而游其門者不無橫議。此 五年,爲右諫議大夫,上言:「提刑司官不須遣監察體訪,宜據其任內行事,考其能否而

官二階。 何等語,固當罪汝。 泰和三年四月,召爲御史中丞。 承安元年七月,降爲寧化州刺史。 以汝前言事亦有當處,故免。」旣而以議鎬王事有違上意,公解職,削 四年三月,出爲定武軍節度使。 五年八月,改爲山東路按察使,轉河北西路轉

濟南府,移鎭河中。大安末,拜參知政事。貞祐二年二月,改河東南路安撫使,俄知彰德 等宜各用心。百姓應當賦役,十年之間,利害非細。苟不稱所委,治罪當不輕也。」尋出知 五十貫、猶有不能當。新强者勿添盡,量存氣力,如一戶添三百貫而止添二百貫之類。卿 外,其新强、銷乏戶,雖集衆推唱,然銷乏者勿銷不盡,如一戶元物力三百貫,今蠲減二百 本路按察司官一員同推排民戶物力。上召見於香閣,諭之曰:「朕選卿等隨路推排,除推 八年六月,復爲御史中丞。八月,改吏部尙書。九月,詔守謙等一十三員分詣諸路, 收 與

南者甚衆。侍御史劉元規上言:「僑戶宜與土民均應差役。」上留中,而自以其意問宰臣。 丞相端、平章盡忠以爲便。益謙曰:「僑戶應役,甚非計也。蓋河北人戶本避兵而來,兵稍 即歸矣。今旅寓倉皇之際,無以爲生,若又與地著者並應供億,必騷動不能安居矣。豈 三年,召爲尚書省右丞。會宣宗始遷汴梁, 益謙乃建言: 「汴之形勢,惟恃大河。今河

列

書左丞。四年正月,致仕,居鄭州。

|上矜恤流亡之意乎。」上甚嘉賞,曰:「此非朕意也。」因出|元規章示之。 三年八月,進拜尙

所附會。衞王爲人勤儉,愼惜名器,較其行事,中材不及者多矣。吾知此而已,設欲飾吾言 陵被弑而世宗立,大定三十年,[5]禁近能暴海陵蟄惡者,輒得美仕,故當時史官修實錄多 無罪,且有推戴之功,獨張行信抗章言之,不報,舉朝遂以爲諱。及是,史官謂益謙嘗事衞 書,以示後世。」制可。初,胡沙虎弒衞王,立宣宗,一時朝臣皆謂衞王失道,天命絕之,虎實 以門資入仕。 以實其罪,吾亦何惜餘年。」朝議偉之。正大三年,年八十,薨。三子:賢卿、頤卿、翔卿,皆 王,宜知其事,乃遣編修一人就鄭訪之。 益謙知其旨,謂之曰:「知衞王莫如我。 然我聞海 興定五年正月,尙書省奏:「章宗實錄已進呈,衞王事迹亦宜依海陵庶人實錄,纂集成

嘻,其甚矣。 暴其大者斯亦足矣。中毒之醜史不絕書,誠如益謙所言,則史亦可爲取富貴之道乎。 贊曰:賈益謙於衞紹王,可謂盡事君之義矣。海陵之事,君子不無憾焉。夫正隆之爲 傳曰:「不有廢者,其何以興。」

劉 「炳,葛城人。每讀書,見前古忠臣烈士爲國家畫策慮萬世安,輒歎息景慕。

年,中進士第,卽日上書條便宜十事:

擇驍 皆將 則 唑 輒 次 益 (失守 萬 爲 下擇諸王之英明者,總監天下之兵,北駐重鎭,移檄遠近,戒以軍 無 果以自隨,委疲懦以臨陣,陣勢稍動,望塵先奔,士卒從而大潰。 夫齊奮,此古人所以先身教 自奮,前死不避。 益 知兵,將帥 固 其一日, 志。 兵。 ,皇輿夜出,向非太子 是以法度日紊、倉庾日虚、閭井日凋、土地日蹙。 東任河北者以爲不幸,逡巡退避,莫之敢前。 任諸王以鎭社稷。 非才、旣無靖難之謀、又無效死之節、外託持重之名、而內爲自安之計, 折衝厭難,無大於此。 ,廻趨靈武,率先諸將,則西行之士當終老於劍南矣。 臣觀往歲, 王師屢戰屢衂, [10]率皆自敗。承平日久, 而後威令也 夫人情可以氣激不可以力使,一卒先登, 昔唐天寶之末,洛陽、潼關相 自大駕南巡,遠近相望, 政。 朝廷 則四 不加 方聞風者 が詰問り 臣 願

賦役 廉 艱 危之後 了信其 二日 黜貪 ら 結人 一,易於爲惠,因其欲安而 (殘, 拯 號令,凡事 心 **貧窮,卹孤獨,勞來還定,則效忠徇義,無有二志矣。** 以 固基本。 不便者 天子惠人,不在施予,在于除其同患,因所 切停罷。 慰撫之,則忠誠親上之心,當益加 時遣重臣按行郡縣 ,延見耆老, 於前 故日安民可與行 利而 問其 日。 利之。 臣 、疾苦, 願寬 今 選 其

列

傅

第

義,危民易與爲亂,惟陛下留神。

急可以備驅策。昭示新恩,易民觀聽,陰係天下之心也。 車駕臨幸,當有以大慰士民之心。其有操行爲民望者,稍擢用之,平居可以勵風俗,緩 三日,廣收人材以備國用。 備歲寒者必求貂狐,適長塗者必畜騏驥。 河南、陜西,

司略不加省,棄職者顧以恩貸,死事者反不見錄,天下何所慕憚,而不爲自安之計邪? 雖望隆資高,不可使爲長吏。 求,遠近囂囂,無所控告。自今非才器過人,政迹卓異者,不可使在此職。 衆庶已弊,官吏庸暗,無安利之才,貪暴昏亂,與姦爲市,公有斗栗之賦,私有萬錢之 五日,褒忠義以勵臣節。忠義之士,奮身效命,力盡城破而不少屈。 四日,選守令以安百姓。郡守、縣令,天子所恃以爲治,百姓所依以爲命者也。今 則賢者喜於殊用,益盡其能,不肖者愧慕而思自勵矣。 事定之後,有 親勳故舊,

使為臣者皆知殺身之無益,臨難可以苟免,甚非國家之利也。

六日,務農力本以廣蓄積。此最强兵富民之要術,當今之急務也。

七日,崇節儉以省財用。今海內虛耗,田疇荒蕪,廢奢從儉以紓生民之急,無先於

此者。

八曰,去冗食以助軍費。兵革之後,人物凋喪者十四五,郡縣官吏署置如故,甚非

審權救弊之道。

殆。 習,以其將與敵也。 將不知兵,以其主與敵也。 主不擇將,以其國與敵也。」可不慎哉。 孔子曰:「以不敎民戰,是謂棄之。」兵法曰:「器械不利,以其卒與敵也。卒不服 十曰,修城池以備守禦。保障國家,惟都城與附近數郡耳。 九曰,修軍政以習守戰。自古名將料敵制勝,訓練士卒,故可使赴湯蹈火,百戰不 北地不守,是無河朔

矣,黃河豈足恃哉。

法通,勸農薄賦則物價平。 丽 通?物價如何而平。」炳對大略以審擇守將則城邑固、兵不侵民則兵民和,斂散相權則鈔 書奏,宣宗異焉。 復試之曰:「河北城邑,何術可保。 兵民雜居,何道可和。 鈔法如何 宣宗雖異其言,而不能用,但補御史臺令史而已。

論 劉炳可謂能言之士矣。宣宗召試旣不失對,而以一臺令史賞之,足以倡士

氣乎?

管判官,召爲武 术虎高琪或作高乞,西北路猛安人。大定二十七年充護衞,轉十人長,出職河間都總 衛軍鈴轄,遷宿直將軍,除建州刺史,改同知臨洮府事。

列傳第四十四 术虎高琪

琪 可 合兵 奮 擊破 泰 〈進取。 和 六年 之, 、賜銀百兩、重綵十端。 ,伐宋,與彰化軍節度副使把回海備鞏州諸鎮,宋兵萬餘自鞏州轆轤嶺入,高 韶高琪曰:「汝年尙少, 青宜 近聞與宋人力戰奮勇, 可內附,詔知府事石抹仲溫 **股甚嘉之。** 與高琪俱出界,與青宜 今與仲溫 同行出

虎 賄 威 動 將 心 封吳曦爲蜀國王,高琪爲封册使。 軍 ,失大國 體。 如或隨去奉職有違禮生事,卿與喬字體察以聞。」使還,加都統,號平南 韶戒諭曰:「卿讀書解事,蜀人亦識威名,勿以財

界,如其成功,高爵厚祿,朕不吝也。」

還,還者復出以更。 兵 以 生擒數百人, 復 武 來。 車 宋 ·為左 安內遣李孝義率步騎三萬攻秦州,先以萬人圍皂角堡,高琪赴之。 凡五 右 李孝義乃解圍去。 一戰,宋兵益堅,不可以得志。 翼,伏弩其下來逆戰。 **外之**,遣蒲察桃 宋兵三千致馬連寨以窺湫池,遣夾谷福壽擊走之,斬七百 思剌潛 旣合,宋兵陽 兵上山,自山馳下合擊,大破宋兵,斬首四千級, 高琪分騎爲二,出者戰則止者俟,止者出則戰者 却。 高琪軍見宋兵伏不得前,退整陣,宋 宋兵列陣山谷,

防禦使,權元帥右都監,所部乣軍賞資有差。 大安三年,累官泰州刺史,以乣 軍三千屯通玄門外。 至寧元年八月,尚書左丞完顏綱將兵十萬行 未幾,升縉山縣爲鎭州,以高琪爲 餘級。

省於縉山,敗績。貞祐初,遷元帥右監軍。 閏月, 韶高琪曰:「聞軍事皆中覆, 得無失機會

乎?自今當卽行之,殷但責成功耳。」

肆降 胡 局 執 士 自 魯以告翰林待制訛出,訛出達於高琪,今月十五日將胡沙虎戮訖。惟茲臣庶將恐有疑, 慶山奴、近侍局使斜烈、直長撒合輦累曾陳奏、方慎圖之。斜烈漏此意於按察判官胡魯、 |遷賞有差。丙寅,詔曰:「胡沙虎畜無君之心,形迹露見,不可盡言。 武衞副使提點近侍 軍中入,遂以兵圍執中第,殺執中,持其首詣闕待罪。宣宗赦之,以爲左副元帥,一行將 中戒之曰:「汝連敗矣,若再不勝,當以軍法從事。」及出果敗,高琪懼誅。十月辛亥,高琪 札書,不匿厥旨。」論者謂高琪專殺,故降此詔。頃之,拜平章政事 是月,被詔自鎭州移軍守禦中都迤南,次良鄉不得前,乃還中都。 毎出戰輒敗,紇石烈

児事 司 括 令加 一十餘 ,高琪對曰:「賊方據險,臣令主將以石牆圍之,勢不得出,擒在旦夕矣。」宣宗曰:「可以 邊部落馬,亦不少矣。」宣宗曰:「盡括邊馬,緩急如之何?」閱三日,復奏曰:「河南鎭防 軍器美惡在兵部,材物則戶部,工匠則工部。」宣宗曰:「治之!且將敗事。」宣宗問楊安 宣宗論馬政,顧高琪曰:「往歲市馬西夏,今肯市否?」對曰:「木波畜馬甚多,市之可得, 意 軍 ·,計可得精騎二萬,緩急亦足用。」宣宗曰:「馬雖多,養之有法,習之有時,詳諭所 也。」貞祐二年十一月,宣宗問高琪曰:「所造軍器往往不可用,此誰之罪也。」對

急攻,或力戰突圍,我師必有傷者。」

以聞。 抑之。 嚮 溫即具言於帥府。 出 元帥 立。 密,召至近侍局,給筆札,使書所欲言。少頃,宣宗御便殿見之,惟留近侍局直長趙和和侍 自 左 書生樊知一詣高琪,言乣軍不可信,恐生亂。 公權重。 云,差人張希 1有體 以 平章高琪。」宣宗曰:「汝何以知此事出於高琪?」素蘭曰:「臣見文哥與永淸副提控劉溫牒 府方 畏死擅殺胡沙虎、計出於無聊耳。妬賢能、樹黨與、竊弄威權、自作威福。 素蘭奏曰:「日者, 元帥府議削伯德文哥兵權, 朝廷乃詔領義軍。改除之命拒而不受, 應奉翰林文字完顏素蘭自中都議軍事還,上書求見,乞屛左右。 宣宗曰:「旣委任之,權安得不重。」茂退不自安,復欲結高琪,詣其第上書曰:「宰相 先是,太府監丞游茂以高琪威權太重,中外畏之,常以爲憂,因入見,屏人密奏,請裁 游茂論死,韶免死,杖一百,除名。自是凡屛人奏事,必令近臣一人侍立。及素蘭請 ,豈可以此生人主之疑,招天下之議。」恐高琪不相信,復曰:「茂嘗問見主上,實惡相 、欲討捕,朝廷復赦之,且不令隸元帥府。不知誰爲陛下畫此計者,臣自外風聞皆 相公若能用茂,當使上不疑,而下無所議。」高琪聞茂嘗請問屛人奏事,疑之,乃具 韓至自南京,道副樞平章處分,已奏令文哥隸大名行省,毋遵中都帥府約束。 然則,文哥與高琪計結,明矣。」上額之。 高琪以刀杖決殺之,自是無復敢言軍國利害 素蘭復奏曰:「高琪本無勳望, 故事,有奏密事輒屏 去歲,都下

此賊 滅 使其黨移刺塔不也爲武寧軍節度使、招处軍、已而無功、復以爲武衞軍使。以臣觀之、 亂 紀 綱 , 戕害忠良, 實有不欲國家平治之意。 惟陛下斷然行之,社稷之福也。」宣宗

地, 自固 省,高琪奏曰:「臺官素不習兵, 朝廷 身也,願陛下察之。 之憂,此失機會二也。 勇敢之將十數人,各付精兵數千, 是亦困京 | | | | | | | | | | | ,此臣等所爲寒心也。 近抵 一,州 乞命平章政事高琪爲帥,以厭衆心。」不 不時出應,此失機會一 四 年 徐 郡 西郊。 十月,大元大兵取潼關 思之。」素蘭出,復戒曰:「愼無泄也。」 師之漸 殘破不復 彼知京師屯宿重兵, 也。 恤 請以陝西兵扼 若專以城守爲事,中都之危又將見於今日,況公私蓄積視 也。 旣退之後,不議追襲,此失機會三也。 不攻京城而 也。 宣宗惑之,計行言聽,終以 備禦方略, 及深入吾境,都城精兵無慮數十萬,若效命一戰,必無今日 ,次嵩、汝間,待闕臺院令史高嶷上書曰:「向者河朔敗績, 隨宜 拒潼 不復 一縱其別攻州縣,是猶火在腹心,撥置于手足之上,均一 一何察, 關 即 非所 與右副元帥 報。 城索戰,但以遊騎遮絕道路,而別兵攻擊州縣, 且戰且守,復諭 知 御史臺言:「兵踰潼關、 也。」遂寢。 自斃 蒲察阿 今已度關,不亟進禦,患益 河北,亦以此待之。」詔 高琪止欲以 里不 孫爲掎角之勢,選在京 脩、澠、二二深入重 重兵屯駐 中都百不及 南 付 京 尚 以

未幾,進拜尚書右 丞相,奏曰:「凡監察有失糾彈者從本法。 若人使入國,私通言語,說 二三四三

職 城雖完固,能獨安乎? 命 知 等論贖, ,轉運軍儲,而有 本國事 止從平常, 情,宿衞 餘 止坐專差者。 平常者從降罰。」制可。 、近侍官、承應人出入親王、公主、宰執之家,災傷闕食,體究不實,致傷人 私載,及考試舉人關防不嚴者,並的杖。 任滿日議定升降。 高琪請修南京裏城、宣宗曰:「此役一興、民滋病矣。 若任內有漏察之事應的決者, 在京犯至兩次者, 臺官減監察 依格雖爲稱

簽樞密院事完顏賽不經略南邊,尋復下詔罷兵,然自是與宋絕 期,皆聖德所致。 高琪請伐之以廣疆土。 未,宋賀正旦使朝辭,宣宗曰:「聞息州透漏宋人,此乃彼界饑民沿淮爲亂,宋人 往 淮 南, 初,陳言人王世安獻攻取盱眙、楚州策,樞密院奏乞以世安爲招撫使,選謀勇二三人同 招紅襖賊及淮南宋官。 而能 [包容小國,天下幸甚,臣言過矣。]四月, 上曰:「朕但能守祖宗所付足矣,安事外討。」 宣宗可其奏, 韶泗州元帥府遣人同往。 矣。 遣元帥左都監烏古論慶壽 高琪謝曰:「今雨雪應 興定元年正月癸 何敢 犯 我?

濤、泗沿邊居民逃亡殆盡,兵士亦多亡者,亦以人煙絕少故也。 獲布帛數千匹、銀數百兩,大計布帛數萬匹、銀數千兩,兵興以來俱失之矣。 哀 之意, 興定元年十月,右司諫許古勸宣宗與宋議和,宣宗命古草牒,以示宰臣,高琪曰:「辭有 自示微弱不足取。」遂寢。 集賢院諮議官呂鑑言:「南邊屯兵數十萬,自唐、鄧至 臣嘗比監息州権場,每場所 夫軍 民有逃亡

行省備 大便。 牧豎馭卒之智,伏望宸斷 之病,而國家失日獲之利,非計也。今隆冬冱寒,吾騎得騁,當重兵屯境上,馳書諭之,誠爲 行,趙王乃還。 若俟春 任使。」 制可。 和,則利在於彼,難與議矣。 孔子失馬,馭卒得之。 十二月, 。」詔問尙書省。 胥鼎諫伐宋, 人無貴賤,苟中事機,皆可以成功。臣雖不肖,願效 。昔燕人獲趙王,趙遣辯士說之,不許,一牧豎請 高琪曰:「鑑狂妄無稽,但其氣岸可尙,宜付陝西 語在 山鼎傳。 高琪曰:「大軍已進,無復可議。」

塗寢。

策。 使兵來,臣等愈得效力。」宣宗曰:「與其臨城、曷若不 問。 兵, 何 __? 陛 深以爲憂, 下法上天行 」高琪曰:「終當告成,但其濠未及浚耳。」宣宗曰:「無濠可乎。」高琪曰:「苟防城 高琪 陛下博采兼聽, 一年,胥鼎上書諫曰:「錢穀之冗,非九重所能兼,天子總大綱,責成功而已。」高琪曰 心忌之,不用一言。 右司諫呂造上章:「乞詔內外百官各上封事、直言無諱。或時召見、親爲 .健之義,憂勤庶務,夙夜不遑,乃太平之階也。 以盡羣下之情,天下幸甚。」宣宗嘉納,詔集百官議河北、陝西守禦之 是時,築汴京城裏城,宣宗問高琪曰:「人言此役恐不能就,如 令蚕此爲善。」高琪無以對。 高琪主機務,高汝 鼎言非是。」宣宗以南北用 礪掌利權, 有法,正

附 己者用,不附己者斥。 列 傳 第 + 四 术 凡言事忤意,及負材力或與己頡頑者,對宣宗陽稱其才,使幹當於 虎 高 琪

· 琪自爲宰相,專固權寵,

擅作威福,

與高

汝礪

相唱

和。

河北 意,凡精兵皆置河南,苟且歲月,不肯輒出一卒,以應方面之急。 ,陰置之死地。 。 自不兼樞密元帥之後,常欲得兵權,遂力勸宣宗伐宋。 置河北不復爲

魯謀之。 十,勒停 畏高琪, 與,遂不 二月也。 平章政事英王守純欲發其罪,密召右司員外郎王阿里、知案蒲鮮石魯剌、令史蒲察胡 · 敢發。 不敢發其實,賽不論死。 尚書省都事 石魯剌、胡魯以告尚書省都事僕散奴失不,僕散奴失不以告高琪。英王懼高 頃之,高琪使奴賽不殺其妻,乃歸罪於賽不,送開封府殺之以滅 ,僕散奴失不以英王謀告高琪, 事覺,宣宗久聞高琪姦惡,遂因此事誅之,時興定三年十 論死。 蒲鮮石魯刺、 蒲察胡魯各杖七 口。 開封 琪黨 府

軍數人,以至于敗。 初,宣宗將遷南,欲置乣軍于平州,高琪難之。 宣宗末年嘗曰:「壞天下者、高琪、彖多也。」終身以爲恨云。 及遷汴,戒彖多厚撫此軍,彖多輒殺礼

王傅。 宋,有功, 移刺 貞祐二年,遷武寧軍節度使,招徠中都乣軍,無功,平章高琪芘之,召爲武衞軍都指 遙 塔不也,東北路猛安人。 授同 知慶州 事,權迪列 明昌元年,累官西上閤門使。 穩。 丁父憂,起復西北路招討判官,改尙輦 二年,襲父謀克。 局使、曹 泰和 伐

揮使。 徙彰化軍節度使。 「河東地險人勇,步兵爲天下冠,可盡調以戍諸隘。」從之。 應奉翰林文字完顏素購嘗面奏高琪黨比,語在高琪傳。 上言:「盡籍山東、河間、大名猛安人爲兵, 自是河東郡縣屯兵少,不可守 老弱城守, 尋知河南府事, 壯者捍禦。」又言: 兼副統軍,

改知臨洮府事,兼陝西副統軍。

勸農使,兼知平凉府事,進階銀青榮祿大夫。 年,知慶陽府事。三年,遷元帥左都監,卒。 下威德所致。」宣宗曰:「自古興國皆賴忠賢,今茲立功,皆將率諸賢之力也。」乃以塔不 貞祐三年十一月,破夏兵于熟羊寨。 平章高琪率宰臣入賀曰:「塔不也以少敗衆、蓋陛 四年,伐西夏,攻威、靈、安、會等州。 興定元 也

日,卽 靜,沮 之以爲說,此可欺後世邪。。金至南渡,譬之尫羸病人,元氣無幾。」琪喜吏而惡儒,好兵而 誅大臣,而與近侍密謀于宮中,已非其道。謀之不密,又爲外臣所知,以告敗軍之將,因 論 能 .遷乣之議,破和宋之謀,正猶繆醫,投以烏喙、附子,祗速其亡耳。 使宣宗於擅殺之 日:高琪擅殺執中,宣宗不能正其罪,又曲爲之說,以詔臣下。 一伸大義而誅之,何至誤國如是邪。 就其事論之,人君欲

厭

勘

記

校勘記

- [1] 明昌二年太傅徒單克寧薨 「二」原作「元」。按本書卷九章宗紀,「明昌二年正月庚午,太師尙
- 書令淄王徒單克寧薨」。**今據改**。
- 拜禮部尚書孫卽康鞫治鎬王永中事還奏有詔覆訊 原脫「拜」字、「覆」原作「復」。按本書卷九九

孫卽康傳、「永中府傅尉奏冰中第四子阿离合懣語涉不軌,詔同簽大睦親府事臺與卽康鞫之」。

「靈、即康還奏、詔禮部尚書張暐覆訊」。今據補「拜」字、改「復」爲「覆」。

- 晚,歷官亦不合。卷八五永中傳,「韶遣官覆按狀同,再遣禮部尚書張暐、兵部侍郎烏古論慶裔 羣臣舉暐及兵部侍郎烏古論慶裔 「裔」原作「壽」。按本書卷一〇一爲古論慶壽傳,其年世較
- 覆之」。今據改。
- [四] 比遣使報哀 「比」上當脫「行簡曰」等字。
- JE U 轉翰林修撰 士、同修史如故」。 其「直學士」一官「如故」上無所承、疑「翰林修撰」當作「直學士」。 按上文有「章宗即位、轉修撰」、不應復出。下文「改禮部侍郎、提點司天臺、直學
- . ____ 尚書省」。 韶書中行之 則章宗時不得有「中書」之稱。疑此或爲「尚書省」之誤。 按「書中」殿本作「中書」。 本書卷五五百官志云了正隆元年罷中書門下省,止置

記

以右宣徽使移剌都護其喪葬」。「移剌都」與「移剌郝」殆是一人,疑「郝」字誤。

旣而以議鎬王事有違上意 「鎬」原作「衞」。 按本書卷一〇章宗紀,「明昌六年六月丙辰,右諫

一元 大定三十年 議大夫賈守謙、右拾遺僕散訛可坐鎬王永中事奏對不實,削官二階,罷之」。今據改。 「三十年」原作「三十餘年」。 按大定祗二十九年。 中州集卷九賈益謙小傳中記

此語作「知衞王莫如我, 然我聞海陵被弑而世宗皇帝立,大定三十年禁近能暴海陵蟄惡者得美

仕」。今據削「餘」字。

[10] 王師屢戰屢衂 「衂」原作「叔」,據殿本改。

兵踰潼關 崤澠 「澠」原作「沔」,今改,參見本書卷二五地理志校記こむ。

金史卷一百七

列傳第四十五

高汝礪 張行信

宗詔宰執,舉奏中外可爲刺史者,上親閱闕點注,蓋取兩員同舉者升用之。 皆廻避,上所御涼扇忽墮案下,汝礪以非職不敢取以進。 知絳陽軍節度事起爲石州刺史。承安元年七月,入爲左司郎中。 高汝礪字巖夫,應州金城人。 登大定十九年進士第, 蒞官有能聲。 奏事畢,上謂宰臣曰:「高汝礪不 一日奏事紫宸殿,時侍臣 明昌五年九月,章 於是,汝礪 自同

賂,深爲民害,建言「自今若因兵調發,有犯者乞權依『推排受財法』治之,庶使小人有所畏 未幾,擢爲左諫議大夫。 二年六月,定制,因軍前差發受財者,一貫以下徒二年,以上徒三年,十貫處死,從汝 以賦調軍須,郡縣有司或不得人,追胥走卒利其事急,規取貨

進扇,可謂知體矣。」

礪 也。

補。 材, 政 論 失,非徒使排行 事 事 擇 了。冀其 初 時 且修注之職,掌記 人可 、莫得聞,及其已行,又不詳其始末,逐事而諫,斯亦難矣。 遇奏事,臺臣亦令廻避, 有所 也, 豈可置之言責而疏遠若此。 開 就 說。 列 而 今省臺以下, 已。 言動,俱當 故唐制 汝礪乃上言:「國家置諫臣以備侍從、蓋欲周知時政以參得 一體。」上從之。 `,凡中書、門下及三品以上入閤, 必遣 遇朝奏事則一切廻避,與諸侍衞之臣旅進旅退。 乞自今以往,有司奏事諫官得以預聞, 庶望少 顧諫職爲何 |諫官隨之,俾預聞 如哉? 若 殿 日非 廷

寡授 按為 業低價質典,及將財物徙置他所,權止 以歲時定民之衆寡,辨物之多少,入其數于小司徒,以施 弊,莫若據實通檢,預令有司照勘大定四年條理,嚴立罪賞, 已行,人所通 小 者抑 定法。 民之語 又言::「年前十月嘗舉行推排之法, 屈 以爲 而 伏自大定四年通檢前後,迄今三十餘年,其間雖兩 知,恐新强之家預爲請囑狡獪之人,冀望至時 無訴。 增減, 况近年以來, 有司惟務速定,不復推究其實。 邊方屢有調發,貧戶 營 尋以踰時而止,誠知聖上愛民之深也。 運。 如 此姦弊百端,欲望物力 益多。 由是豪强有力者符 政教,以行徵令,三年則 同辭推 截日立限,關防禁約。 經推排,其浮 如 止循 唱。 例推 或虚 均一,難矣。 排, 同 作貧乏, 財 而 物 緣去歲 幸免,貧弱 力,惟 天下大比, 切聞周制 其間有 故 欲 革斯 條理 憑一 以 產

時

可 以 輕重者斟酌行之,去煩碎而就簡易,戒搔擾而事鎭靜,使富者不得以苟避,困者有望於

少 列則 賦 ,税易辦,人免不均之患矣。」 詔尚書省俟邊事息行之。

使。 河 兩 警巡院,令諸路所差官視以爲法焉。 北 泰 四 是歲十月, 路 和 轉運使。 元 年七 上諭 月,改西京路轉運使。 十一月,進中都路都轉運使。 尚書省,遣官詣各路通檢民力, 二年正月, 尋爲同知大興府事。 爲北京臨潢府路按察使。 命戶部尚書賈執剛與汝礪先推排在都 四年十二月,爲陝西東路轉運 四年二月、遷

食貨志。 其 司 諭 利害、汗漫陳說, 內外 六年六月,拜戶部尚書。 上嘉 百司 各究 其 議 利害舉明,若可舉 莫能 勅 尚書省曰:「內外百官所司 詳盡。 時鈔 近惟戶部尚書高汝礪, 法 而 不 能 不即 流轉,汝礪隨事上言,多所更定,民甚便之,語在 申聞,以致 不同,比應詔言事者不啻千數,俱不達各 上司 論本部數事,並切事情, 舉行者,量制 其罰

難 將 異, 慮 扈從 得 閉 然糴 者穀 而 貞 祐 不 人 多糶 也 出 至 商 年六月 則愈貴, 少則貴 多 旅 而 易致 轉 つ宣宗 販 問宰臣 者鈔 亦 蓋諸 南遷, 不 也, 路 復 何以處之。 入城 之人輻湊 自當先其所難,後其所易,多方開誘,務使 次邯鄲, 則糴 河南, 皆請· 拜汝 者益 命留守司 急 糴者旣多 礪 爲 而 貴益 参知 約 了,安得 甚矣。 政 束, 事。 不貴。 汝 事 次湯陰,上聞 礪獨曰:「物 有 難易 若禁 不 止 出 一之,有物 價 粟 山 **汴京穀價騰踴** 低昂 更鈔 不 知,今 朝)則穀價 之家皆 少而 夕或

自平矣。」[1]上從之。

諸道元帥府、宣撫司、總管府熟論可否,如無可疑,然後施行。」不報。 而神者也,雖告以衞護之意,亦將不信,徒令交亂,俱不得安,此其利害所繫至重。 此,其心安得不搖。況軍人已去其家,而令護衞他人,以情度之,其不肯盡心必矣。 老幼,驅馳道路,流離失所,豈不可憐。且所過百姓見軍戶盡遷,必將驚疑,謂國家分別彼 於豪强家耳,貧戶豈能徙。且安土重遷,人之情也。今使盡赴河南,彼一旦去其田園,扶攜 三年五月,朝廷議徙河北軍戶家屬於河南,留其軍守衞郡縣,汝礪言:「此事果行,但便 乞先令 民至愚

付貧戶。無益於軍,而民則有損,至於互相憎疾,今猶未已,前事不遠,足爲明戒。惟當倍 日之主今還爲客,能勿悔乎,悔則忿心生矣。如山東撥地時,腴田沃壤盡入勢家,瘠惡者乃 率皆貧民,一旦奪之,何以自活。夫小民易動難安,一時避賦,遂有此言。及其與人,卽前 官田、久遠之計也。河南民地、官田、計數相半。又多全佃官田之家、墳塋、莊井俱在其中。 更益之,力實不足,不敢復佃官田,願以給軍。」於是汝礪奏:「遷徙軍戶,一時之事也。 民佃 賦,或與之田,二者孰便。」又以諭汝礪。旣而所遣官言:「農民並稱,比年以來租賦已重,若 戶,共圖保守。今旣至矣,糧食所當必與,然未有以處之。可分遣官聚耆老問之,其將益 軍戶旣遷,將括地分授之,未有定論,上勅尚書省曰:「北兵將及河南,由是盡起諸路軍

益官租,以給軍糧之半,復以係官荒田、牧馬草地量數付之,令其自耕,則百姓免失業之艱, 而官司不必爲厲民之事矣。 且河南之田最宜麥,今雨澤霑足,正播種之時,誠恐民疑以誤

歲計,宜早決之。」上從其請。

均以與之,人得無幾,又僻遠處不免徙就之,軍人皆以爲不便。」汝礪遂言於上,詔有司罷 **曠廢。若候畢功而後撥,量收所得,以補軍儲,則公私俱便。乞盡九月然後遣官。」十月,汝** 之,但給軍糧之半,而半折以實直焉。 以給,仍以係官閑田及牧馬地可耕者畀之。」奏可。乃遣右司諫馮開等分詣諸郡就給之,人 礪言:「今河北軍戶徙河南者幾百萬口,人日給米一升,歲率三百六十萬石,半給其直猶支 牧馬地,民多私耕者。今正藝麥之時,彼知將以與人,必皆棄去,軍戶雖得,亦已逾時,徒成 三十畝,以汝礪總之。旣而,括地官還,皆曰:「頃畝之數甚少,且瘠惡不可耕。計其可耕者 粟三百萬石。 葬遷尙書右丞。 時上以軍戶地當撥付,使得及時耕墾,而汝礪復上奏曰:「在官荒田 河南租地計二十四萬頃,歲徵粟纔一百五十六萬有奇,更乞於經費之外倍徵

兵居其衝要,鎭遏土寇,仍許收逃戶之田,則軍民兩便。或有警急,軍士亦必盡心。」汝礪 而 |民間流言謂官將盡取之。上聞,以問宰職曰:[l]「爲之奈何。]|高琪等奏:「若令樞密院遣 四年正月,拜尙書左丞,連上表乞致仕,皆優詔不許。會朝廷議發兵河北,護民芟麥,

列傳

懼也 東抵 可也 曹 甚 乃詔 非 不 、單,麥苗苦亦無多,訊諸農民,往往自爲義軍。 若 計 也。 於是罷之。 遺戶部員外郎裴滿蒲剌都閱視田數,及訪民願發兵以否,還奏:「臣西由懷、孟, 聽其自便,令宣撫司禁戢無賴,不致侵擾足矣。 蓋河朔之民所恃以食者惟此麥耳。 今已有流言,而復以兵往,是益使之疑 臣卽宣布朝廷欲發兵之意,皆感戴 逃戶田令有司收之,以充軍儲

而

不願

也。

關隘 軍馬 將從之。 推物力,惟其貴簡靜而重勞民耳。 使胥鼎, 嚴立賞罰,許其自首,及聽人告捕,犯者以盜軍儲坐之,地付告者,自足使人知懼,而賦悉入 來,百姓湊集,凡有閑田及逃戶所棄,耕墾殆徧,各承元戶輸租,其所徵歛皆準通推之額,雖 檢,無乃駭 、 簡練兵士之時,須得通敏經綸之才預爲籌畫,俾濟中興。 汝礪 益 調 多,未嘗闕誤,詎宜 難 才擅衆長,身兼數器,乞召還朝省。」不從。 汝礪言:「臣聞治大國者若烹小鮮、最爲政之善喻也。 以數乞致仕不從,乃上言曰::「立非常之功,必待非常之人。今大兵旣退,正完葺 依元額,故爲此權宜之法,蓋軍儲不加多,且地 人視聽,使之不安乎。 概動擾。 今言者請 且河南、河北 若恐豪右蔽匿而 如河北歲括實種之田、計數徵歛、即是常時通 事體 時高琪欲從言事者歲閱民田徵租,朝廷 不同,河北累經劫掠,戶口亡匿,田 逋 少而易見也。 征賦,則有司 伏見尚書左丞兼行樞 國朝自大定通檢後,十年一 河南 檢括亦豈盡實。 自車駕巡幸以 密副 . 疇 荒 但

爲文具,轉失其眞,二不可也。 亦且隨時量之,一歲中略無休息,民將厭避,耕種失時, 官,何必爲是紛紛也。 有 而 司之籍,儻使臨時少於元額,則資儲闕誤必矣,三不可也。 所輸益少,一不可也。 抑又有大不可者三,如每歲檢括,則夏田春量,秋田夏量,中間雜 檢括之時,縣官不能家至戶到,里胥得以暗通貨賂,上下其手,虛 民田 與軍田犬牙相錯,彼或陰結軍人以相冒亂,而 或止耕膏腴而 夫朝廷舉事,務在必行, 棄其餘, 則 所 朝廷止 收仍舊 憑 種

而復中止焉,是豈善計哉。」議遂寢。

世宗謂宰臣曰:『昔宋人言遣使請和,乘吾無備遂攻宿州,今爲我軍大敗,殺戮過當,故不敢 順、原州,右丞相僕散忠義、右副元帥紇石烈志寧敗李世輔于宿州,斬首五萬,兵威大振。 密院與我帥府時通書問,而侵軼未嘗已也。 事異,難以例言。昔海陵師出無名,曲在於我,是以世宗卽位,首遣高忠建等報諭宋主,罷 實,雖與文移往來,而邊備未敢遽撤。 復通問。 淮甸所侵以修舊好。 例之外別有求索,言涉不遜,將若之何。或曰『大定間亦嘗先遣使,今何不可』。 興定元年十月,上疏曰:「言者請姑與宋人議和以息邊民,切以爲非計。 朕哀南北生靈久困于兵,本欲息民,何較細故,其令帥府移書宋人以議和好。』宋 彼隨遣使來,書辭慢易,不復奉表稱臣,願還故疆爲兄弟國。 備旣不撤,則議和與否蓋無以異。 旣而,征西元帥合喜敗宋將吳璘、姚良輔於德 或復蔓以浮辭,禮 |宋人 多 切謂時 雖其 詐 無

列

鄙,是曲 果遺使告和, 在彼也。 以當時堂堂之勢,又無邊患,竟免其奉表稱臣之禮。 彼若請和,於理爲順,豈當先發此議而自示弱耶?恐非徒無益,反招謗侮 今宋棄信背盟,侵我邊

而

不給 臣 爲哉。 者 河南 兵 難 足,而此令復出,彼不糶所當輸租,則必減其食以應之。 錢七千萬貫以補之。 (食何 .非 夫 得者芻糧也,出於民力,其來有限,可緩圖。 之害 於 鈔 爲重,所徵稅租 十一月,汝礪言:「臣聞國以民爲基,民以財爲本,是以王者必先愛養基本。 鈔 彼 自 滞更爲 悉 重耳。 法不爲意也 而 力以 得。 小鈔,小鈔弊改爲寶券,寶券不行易爲通寶,從權制 惟陛下外度事勢、俯察臣言、特命有司滅免、則羣心和悅、而未足之租有所 有司 奉軍儲已患不足,而又添徵通寶,苟不能給,則有逃亡。 率常三倍于舊。 近以通寶稍滯,又加),非與省部故 不究遠圖而貪近效,不固本原而較末節,誠恐軍儲、鈔法 相違也,但以鈔法稍滯物價稍增之害輕,民 今省部計歲收通寶不敷所支,乃于民間科歛桑皮故紙 病倍。 而易爲者鈔法也, 河南人戶,農民居三之二, 夫事 有難易,勢有緩急。 行于國家,其 變皆由于上,尙何以 民逃亡則農 今稅租 生不 變 兩 國家調發, 無窮。 **今急用** 有 安軍儲 猶 所妨。 事 煩民 多未 向 而

時朝廷以賈仝、苗道潤等相攻不和,〔三將分畀州縣、別署名號以處之。 汝礪上書曰:

安息。 置,民戶稅賦得擅徵收,則地廣者日益强,狹者日益弱。 若輩又何足患哉。」議遂寢。 今日大戒也。 禮 可復奪,是朝廷愈難制 「甚非計也。 義、識名分之人也。 彼互相攻劫則勢寖弱,勢力旣弱則朝廷易制。 蓋河北諸帥多本土義軍,一時權爲隊長,亦有先嘗叛亡者,非若素宦於朝,知 不若姑令行省覊縻和輯, 也。 貪暴不法,蓋無足怪。 昔唐分河朔地授諸叛將, 史臣謂其護養孽萌以成其 多方牽制使之不得逞。 朝廷以時方多故,姑牢籠用之,庶使遺民 今若分地而與之, 久之, 弱者皆併於强, 異時邊事稍息,氣力漸完, 州 縣 官 强者之地不 ,禍, 吏 ?得輒署 此可爲 少得

遇貴在誠實,小謹 上嘗謂汝礪曰:「朕每見卿侍朝、恐不任其勞,許坐殿下,而卿終不從何哉? 區區朕固不較也。」汝礪以君臣之分甚嚴,不敢奉命。 夫君臣相

德號 五 價低昂,權宜立式,凡內外四品以下雜正班散官及承廕人,免當儤使監官功酬,或僧道官師 而 千石以上遷官一階,萬石以上升職一等,並注見闕。庶幾人知勸慕,多所收獲。」上從之。 修築新城其費亦廣,若不及此豐年多方營辦,防秋之際或乏軍興。 乞於河南州府驗其物 度牒、寺觀院額等,並聽買之。 同 三年,河南頗豐稔,民間多積粟,汝礪乃奏曰:「國家之務莫重於食,今所在屯兵益衆, 提舉權貨司王三錫建議權油,高琪以用度方急,勸上行之。 司縣官有能勸誘輸粟至三千石者,將來注授升本牓首, 汝礪上言曰:「古無権

列

貴賤 胥隸 廢其 罪,其害四 相 不取 三錫 出 别 細 盡矣,然亦未聞権油也。 法,自漢以來始置鹽鐵酒權均輸官,以佐經費。 增 議于尙書省。 取 惟 侵 於民者,而更議権油,歲收銀數十萬兩。 而 所在 業 利 也。 議,是以舉世通行之貨爲權貨,私家常用之物爲禁物,自古不行之法爲良法,切爲聖朝 犯 司 工作之徒不與焉。費旣不貲,而又創構屋宇,奪買作具,公私俱擾,殆不勝言。至於提 重煩擾也。 油 者 有升降決罰之法,其課一虧必生抑配之弊,小民受病益不能堪,其害一也。 息,則價不得不貴,而用不得不難,其害三也。 而 不 差賦 有罪,是使貴處常貴而賤處常賤,其害二也。 不齊,惟其商旅轉販有無相易,所以其價常平,人易得之。今旣設官各有 若果行之,其害有五,臣請言之。 然,莫可辨記。 也。 戶部尚書高變、工部侍郎粘割荆山、知開封府事溫迪罕二十等二十六人議同 如前,何以自活,其害五 油戶所置屋宇、作具,用錢已多,有司按業推定物力,以給差賦。 國家自軍興,河南一路歲入稅租不啻加倍,又有額徵諸錢、橫泛雜役,無非 蓋油者世所共用,利歸於公則害及於民,故古今皆置不論,亦厭苛 今私 造 者有刑,捕告者有賞,則無賴輩因之得以誣搆良民枉陷於 也。 惟罷之便。」上是之,然重違高琪意,乃詔集百官 河南州縣當立務九百餘所,設官千八百餘員,而 夫國以民爲本,當此之際民可以重困乎。 末流至有算舟車、稅間架,其征利之術固已 鹽、鐵、酒、醋,公私所造不同,易於分 民家日用不能躬自沽之,而轉鬻者 今奪其具、 分地,輒 夫油之 若從

鄎 中姬 琪 禮部尙書楊雲翼、翰林侍讀學士趙秉文、南京路轉運使趙瑄、東部侍郎趙伯成、刑部 世英、右司 ·諫郭著、提舉倉場使時 段以爲不可。 上曰:「古所不行者而今行之,是

又生一事

也,其罷之。」

故特 樂祿 諭之曰:「丞相之禮盡矣,然今廷臣誰如丞相者,而必欲求去乎,姑留輔朕可也。」十月, 而 上 而 矣,不任久立,奏事畢,用寶之際,可先退坐,恐以勞致疾,反妨議政也。」是月,復乞致仕,上 得 命 卿 國公。 不闕乏者,蓋先朝有以遺之也。」汝礪因進言曰:「儉乃帝王 七月, 起曰:「卿大臣也、所言皆社稷計。 陞 違之,復侍立終朝,豈有司不 大夫,仍諭曰:「丞 十月,賜金鼎一、重幣三。四年三月,拜平章政事,俄而進拜尚書右丞相,監修國史,封 兩階。」十二月,上復諭 五年二月,上表乞致政,不許。 上謂宰臣曰:「昔有言世宗太儉者,或曰不爾則安得廣畜積。 一相數求去,朕以社稷事重,故堅留之。 曰:「向朕以卿年老,視朝之日侍立爲勞,令用寶 爲設榻 朕之責卿惟在盡誠,何事 耶,卿其勉從朕意。」元光 九月,上諭 汝礪曰:「昨日視朝,至午方罷。 丞相老矣,而 一大德,陛 小謹,自今勿 元 年四 一下言及此,天下福 章宗 月 , 官猶未 時用 復 汝礪 時退坐 爾 度甚 也。 跪奏事 至 ′) 躐遷 廊 三品, 卿 下, 老

也。

九月,上又謂宰臣曰:「有功者雖有微過亦當貸之,無功者豈可

貸耶。

然有

功者

人喜謗

凡有以功過言於朕者,朕必深求其實,雖近侍爲言不敢輕信,

議。

亦未嘗徇一己之愛憎

謂虎 木,顧今難得,方令計置。」上曰:「除宮中別殿有可用者卽用之。」汝礪對以不宜毁,上曰: 全,亦隨其所長取之耳。」上然之。五月,上問宰執以修完京城樓櫓事,汝礪奏:「所用皆大 實,斯爲難得。 羣臣曰:「人有才堪任事,而處心不正者,終不足貴。」汝礪對曰:「其心不正而濟之以才,所 年高,発朝拜,侍立久則憇于殿下,仍勅有司設楊焉。三月,又乞致仕,復優詔不許。上謂 毀譽者,由是羣臣恐懼,莫敢飾非,齊國大治。陛下言及此,治安可期也。」二月,上以汝礪 「朕每聞人有所毀譽,必求其實。」汝礪對曰:「昔齊威王封卽墨大夫,烹阿大夫及左右之嘗 但時方多故,而朕復不德,正賴舊人輔佐,故未能遂卿高志耳。」汝礪固辭,竟不許,因謂曰: 也。」汝礪因對曰:「公生明,偏生暗。 |而翼者也,雖古聖人亦未易知。」上以爲然,他日復謂宰臣曰:「凡人處心善良而行專忠 二年正月,復乞致政,上面諭曰:「今若從卿,始終之道俱盡,於卿甚安,在朕亦爲美事。 若言巧心偽,亦復何用。然善良者,人又多目爲平常。」汝礪對曰:「人材少 凡人多徇愛憎,不合公議。陛下聖明,故能如是耳。」

「高某不退當殺之。」汝礪因是告老,優韶不許。 我不如高帝,當守先帝法耳。汝礪乃先帝立以爲相者,又可黜歟。」又有投匿名書云: 哀宗初卽位,諫官言汝礪欺君固位,天下所共嫉,宜黜之以厲百官。哀宗曰:「昔惠帝 正大元年三月、薨、年七十一、配享宣宗廟。

「所居之外,毁亦何害,不愈於勞民遠致乎。」

爲人愼密廉潔,能結人主知,然規守格法,循嘿避事,故爲相十餘年未嘗有譴訶。

不去,當時士論頗以爲譏云。

徐、邳地下宜麥,稅粟許納麥以便民。上是其言,令尚書省議行之。 東路按察司事。四年四月,召見于泰和殿,行信因言二事,十依舊移轉吏目以除民害,一 第,累官銅山令。明昌元年,以廉擢授監察御史。泰和三年,同知山東西路轉運使,俄簽河 張行信字信甫,先名行忠,回避莊獻太子諱,改焉。 行簡弟也。登大定二十八年進士

者,行信乃上章曰:「胡沙虎殘忍凶悖,跋扈强梁,媚結近習,以圖稱譽。 不忻悅。今若復用,惟恐爲害更甚前日,況利害之機更有大於此者。」書再上,不報。 崇慶二年,爲左諫議大夫。時胡沙虎已除名爲民,賂遺權貴,將復進用。

自其廢黜,士庶莫

舉朝無敢言

沙虎弑逆,人甚危之,行信坦然不顧也。

子啓爲太子者,所以尊祖廟、重社稷也。願與大臣詳議,酌前代故事,早下明詔,以定其位, 墀,還列諸王班。 況已除侍臣,而今未定其禮,可謂名不正言不順矣。 昔漢文帝元年,首立 君卽位,必立太子以爲儲副,必下詔以告中外。竊見皇長子每遇趨朝,用東宮儀衞,及至丹 是歲九月,宣宗卽位,改元貞祐。行信以皇嗣未立,無以係天下之望,上疏曰:「自古人

列 傅

愼選宮僚,輔成德器,則天下幸甚。」上嘉納之。

王守信、 能。 小 文 下令重臣各舉所知,才果可用,卽賜召見,褒顯獎諭,令其自效,必有奮命報國者。 昔字牧 法 趙 (勿用』。)將,軍功爵賞皆得自專,出攻入守不從中覆,遂能北破大敵,西抑强凑。 拘 狂子庸流、猥蒙拔擢、參預機務、甚無謂也。」於是、上皆罷之。 胡沙虎誅,上封事言正刑賞,辭載胡沙虎傳。 ·繩、中旨牽制,委任責成,使得盡其智能,則克復之功可望矣。」上善其言。 時方擢任 、賈耐兒者爲將,皆鄙俗不材、不曉兵律,行信懼其誤國,上疏曰:「易稱『開國承家, 聖 人所以垂戒後世者,其嚴如此。 今大兵縱橫,人情恟懼,應敵興理非賢智莫 又言:「自兵興以來,將帥甚難其人,願陛 今命將若不以

賞罰 宜 |明正其罪,朝廷寬容,一切不問,臣恐御兵之道未盡也。」 詔報曰:「卿意具悉,訛可等已下 權元 ,使其臨敵有所慕而樂於進,有所畏而不敢退,然後將士用命而功可成。若訛可敗衄, 帥 右都監內族訛可率兵五千護糧通州,遇兵輒潰,行信上章曰:「御兵之道,無過

若我軍時肯進戰,稍挫其鋒,則和事成也久矣。頃北使旣來,然猶破東京,略河東。 本 不相干,奉使者自專議 時 中都受兵、方遣使請和、握兵者畏縮不敢戰、曰「恐壞和事」。 和,將兵者惟當主戰,豈得以和事爲辭。 自崇慶來,皆以和誤, 行信上言:「和與戰二 今我使

獄

閉 門坐守)將帥輒按兵不動,於和議卒無益也。 以待弊哉。宜及士馬尙壯,擇猛 將銳兵,防衞轉輸,往來拒戰,使之少沮,則附近 事勢益急,芻糧益艱,和之成否蓋未可知,豈當

積皆可

入京師,和議亦不日可成矣。」上心知其善而不能行。

不察 大臣 殿 命 其 爵 鼎 便 無事 見之。 與 數 可 級 因 自當 也。 、近臣 ,民甚苦之。 銀 [奏許 也。 時 鈔。 年 %循不容 三月, 四月, 往審 人納 以 奏曰:「臣伏見奧屯忠孝飾 大兵在邇,人方危懼,若復無聊,或生他變, 禮 時有 虚焉。 栗買官。 、遷山東東路按察使、兼轉運使、仍權本路宣 卿語 一相非才,況 以朝廷括糧恐失民心,上書言:「近日朝廷令知大興府胥鼎便宜計畫軍食, 粟者或先具數于鼎,未及入官。 今米價踴貴,無所從糴,民糧止 其 仍諭忠孝曰:「極 親 既又遺參知政事奧屯忠孝括官民糧,戶存 知, 一个多故,可使斯 諷 令求 **詐不忠**, 去可也。」 一知卿盡 人與政乎? 臨事 心于公,然 行信以告右司 忠孝復欲多得以明己功,凡鼎所籍者不除 兩月又奪之,將不獨歸咎有司, 慘 刻, 則 與胡 國家本 願 所 撫副 得不 卽 沙 龍 郎中把胡魯白忠孝, ·償所損 之。」上曰:「朕 虎 使。 欲得糧,今既得矣,姑從 爲 兩月,餘悉令輸官,酬以 黨。 將行,求入見, 矣。」上深善其言,即 歷數 始 災其罪, 即位 亦怨朝 忠孝不 上御 且曰: 一進退 便 人 廷

三年二月,改安武 軍 節度使、兼冀州管內觀察使。 始至,即上書言四事,其 日三楊安

列

傅

第

四

恤

也

禮部尙書、兼同修國史。 服,新者未必皆才,緩急之間,啓釁敗事。自今郡縣闕員,乞令尚書省選人擬注。其舊官, 郡縣官豪,多能糾集義徒,摧擊土寇,朝廷雖授以本處職任,未幾遣人代之。 夫舊者人所素 欲鬻爵,其誰信之。」朝廷多用其議。八月,召爲吏部尚書。 有司罪也,彼何責焉。況海岱重地,羣寇未平,田野無所收,倉廪無所積,一旦軍餉不給,復 其三曰:「掌軍官敢進戰者十無一二,其或有之,卽當責以立功,不宜更授他職。」其四曰, 民便安者宜就加任使,如資級未及,令攝其職,待有功則正授。庶幾人盡其才,事易以立。」 誅夷,劫其資產,掠其婦女,重使居民疑畏,逃聚山林。 今宜明勅有司,嚴爲約束,毋令劫掠 兒賊黨旦暮成擒,蓋不足慮。今日之急,惟在收人心而已。向者官軍討賊,不分善惡,一概 「山東軍儲皆鬻爵所獲,及或持勅牒求仕,選曹以等級有不當鬻者往往駁退。 如此則百姓無不安之心,姦人誑脅之計不行,其勢漸消矣。」其二曰:「自兵亂之後, 九月,改戶部尚書。十二月,轉 夫鬻所不當,

闕而不講,亦非禮經重祭祀之意。臣聞於濟者如此,乞朝廷議其事。」詔問有司,行信奏曰: 爲黃帝立廟,無乃愧於漢、唐乎。」又云:「本朝初興,旗幟尙赤,其爲火德明矣。主德之祀, 濟嘗言,本朝紹高辛,黃帝之後也。 昔漢祖陶唐,唐祖老子,皆爲立廟。 我朝迄今百年,不 四年二月,爲太子少保, 兼前職。時尚書省奏:「遼東宣撫副使完顏海奴言,參議官王

德,以告宗廟而詔天下焉。 乃以大金爲國號,未嘗議及德運。近章宗朝始集百僚議之,而以繼亡宋火行之絕,定爲土 之,當爲木德,今乃言火德,亦何謂也。況國初太祖有訓,因完顏部多尚白,又取金之不變, 「按始祖實錄止稱自高麗而來,未聞出於高辛。今所據欲立黃帝廟,黃帝高辛之祖,借曰紹 顧澮所言特狂妄者耳。」上是之。

賞,自今每事更宜盡心。」是年十二月,行信以父暐卒,去官。 初欲依世宗所行,卿進奏章,備述隨室讀祝,殊爲中理。向非卿言,股幾失之,故特以是旌 拜之禮,上嘉納焉,語在禮志。 八月,上將祔享太廟, 詔依世宗十六拜之禮。 行信與禮官參定儀注, 上言宜從四十四 祭畢,賜行信寶券二萬貫、重幣十端,諭之曰:「太廟拜禮,朕

自 邊臣 詳問,高琪等以爲失體,行信獨上疏曰:「今以遣使爲不當,臣切惑之。 事 則 在 爲 ,惡不附己者,衣冠之士動遭窘辱,惟行信屢引舊制力抵其非。 一解詰之,彼遂伏罪。 以兵却之復來,我大國不責以辭而敵以兵,茲非示弱乎。 先示弱,其或不報,報而不遜,則愈失國體。』臣獨以爲不然。彼幸吾釁隙,數 彼,何損 興定元年三月,起復舊職,權參知政事。六月,眞拜參知政事。時高琪爲相,專權用 於我。 昔大定之初,彼嘗犯順,世宗雖遣丞相烏者行省于汴,實令元帥 其後宋主奪取國書,朝廷復欲加兵,丞相婁室獨 至於問 會宋兵侵境,朝廷議遣使 而不報,報 議者不 以爲不可,及刑部 過曰:『遣使 而 肆 不遜,曲 撒合輦 ·侵掠,

列

固遵舊制,然今日之事與昔不同。」詔姑待之。 正國家故事,何失體之有。且國步多艱,戍兵滋久,不思所以休息之,如民力何。 尚書梁肅銜 在 甚高論 江汝礪傳。 ,然事當機會,不敢不罄其愚,惟陛下察之。」上復令尚書省議,高琪等奏:「行信所言 命以往,尋亦屈焉。 在章宗時,猖狂最甚,猶先理問而後 已而,高汝礪亦上言先遣使不便,議遂寢,語 用兵。然則遣使詳問 臣 l 書 生 無

故實、先朝明訓,過矣。」於是詔尚書省更定監察罪名制。 劾,而或看循者,非謂凡失察皆然也。 降而已,間有的決者皆有爲而然。 時監察御史多被的決,行信乃上言曰:「大定間,監察坐罪大抵收贖,或至奪俸,重則外 當時執政程輝已嘗面論其非是,又有勅旨,監察職主彈 近日無問事之大小、情之輕重,一概的決,以爲大定

<u></u> 崇慶中,旣以參知政事梁瑄兼之,復命翰林承旨張行簡同事,蓋行簡家學相傳, 今修章宗實錄,左丞汝礪已充兼修,宜令參知政事行信同修如行簡例。」制可 史館修章宗實錄,尚書省奏:「舊制,凡修史,宰相執政皆預焉。 然女直、漢人各一員。 多所考據。

爲意,豈欲求散地故耶。 乃令參決機務。而廷議之際,每不據正,妄爲異同,甚非爲相之道。 二年二月,出爲彰化軍節度使,兼涇州管內觀察使,諭之曰:「初, 股以朝臣多稱 今授此職,卿宜悉之。」初,內族合周避敵不擊,且詭言密奉朝旨, 復聞邇來殊不以幹當

但合周平昔忠孝,或可以免。」又以行信族弟行貞居山東,受紅襖賊偽命,樞密院得宋人書, 下獄當誅。諸皇族多抗表乞從末滅,高琪以爲自古犯法無告発者,行信獨曰:「事 無古今,

有干涉行信事,故出之。其子宮,時爲尙書省令史,亦命別加注授焉

宜各盡言,毋復畏忌。」 宰臣曰:「自張行信降黜,卿等遂緘默,此殊非是。 行信事,卿等具知,豈以言之故耶。 自今 違制旨者,其徒年、杖數論贖可也。 之。」行信旣出,上以其章付尙書省。至是,宰臣奏:「自今違奏條之所指揮、及諸條格,當坐 年、杖數並的決。然其後三十餘年,有司論罪,未嘗引用,蓋非經久爲例之事也。乞詳定 初,行信言:「今法,職官論罪,多從的決。 伏見大定問世宗勅旨,職官犯故違聖旨,徒 特奉詔旨違者,依大定例。! 制可。 行信去未久,上嘗諭

端者貿易之。 州,以銀百鋌幾得馬千疋,云生羌木波諸部蕃族人戶畜牧甚廣。蓋前所遣官或抑其直,或 栗。冬春之交必艱食,馬價甚低。乞令所司輦銀粟于洮、河等州,選委知蕃情、達時變如桓 以勢陵奪,遂失其和,且常患銀少,所以不能多得也。又聞蕃地今秋薄收,鬻馬得銀輒以易 |右豪民多市於河州,轉入內地,利蓋百倍。及見省差買馬官平涼府判官鳥古論桓端市于||洮 行信始至脛,即上書曰:「馬者甲兵之本,方軍旅未息,馬政不可緩也。臣自到脛,聞陝 若捐銀萬兩,可得良馬千疋,機會不可失,惟朝廷亟圖之。」

苦,是豈朝廷之意哉。。乞令有司依大定例,參以時務,明立等夷,使取予有限,無傷大體,則 得激勸之方也。 或莫能辦,則歛所部以應之,至有因而獲罪者。 品以上各有定數,後竟停罷。 上下兩得矣。」 叉曰:「比者沿邊戰士有功,朝廷遣使宣諭,賜以官賞,莫不處戴聖恩, 願出死力, 此誠 然贈遺使者或馬或金,習以爲常,臣所未諭也。 況今時務與昔不同,而六品以下及止遷散官者,亦不免饋獻 彼軍士效死立功,僅蒙恩賞,而反以饋獻爲 大定間,嘗立送宣禮,自五

費。 使天下均受其賜。 費,正在是耳。 贍者已數年,張頤待哺,以困農民。 其子弟,感悅士心,爲國盡力耳。 至於無男丁而其妻女猶給之,此何謂耶? 或謂國用 遠方之民不能 誠能裁滅冗食,不養無用之人,亦何患乎不足。今一軍充役,舉家廪給,軍旣物故,給 又曰:「近聞保舉縣令,特增其俸,此朝廷爲民之善意也。 方闕,不宜虛費,是大不然。夫重吏祿者,固使之不擾民也,民安則國定,豈爲虛 無望,豈舉者猶寡,而有所不敷耶。 如卽罷之,恐其失所,宜限以歲月,使自爲計,至期而罷,復將何辭。」上多採 且丞、簿、尉亦皆親民,而獨不增俸,彼旣不足以自給,安能禁其侵牟乎。 國家糧儲常患不及,顧乃久養此老幼數千萬口,冗食虛 乞詔內外職事官, 益廣選舉 然自關以西,尚未有到任者, 自大駕南巡,存 学,以補 共闘プ

納焉。

游詠 減。 管內觀察使 其 尋 元光元年正月、遷保大軍節度使,兼鄜州管內觀察使。 復致 間 正大 仕 家居,惟以抄書教子孫爲事,葺園池汴城東, 未幾, 八年二月乙丑,薨于嵩山崇福宫,年六十有九。 致仕。 哀宗卽位,徵用舊人,起爲尚書左丞,言事稍不及前, 二月,改靜難軍節度使,兼邠 築亭號「靜隱」, 時時與侯擊輩 初遊嵩山、嘗曰:「吾意欲 人 /望頗

官、當世未之有也。 **父暐以御史大夫致仕** 前,旁人爲動色,行信處之坦 爲 ·人純正眞率,不事修飾,雖兩登相位,殆若無官然。 **猶康健,兄行簡爲翰林學士承旨,行信爲禮部尚書,諸子姪多中第居** 如 也。 及薨之日, 雖平昔甚媢忌者, 遇事輒發, 亦曰正人亡矣。 無所畏避, 每奏事上 初至汴,

主此山」,果終于

此

行信 疏擊之。 可法 耶。 礪志謇諤、言無避忌、然一簉政塗、便多坎壈、 贊日 宣宗伐宋 :高汝礪禔身淸慎,練達事宜,久居相位,雖爲大夫士所鄙,而人主寵遇不衰。 汝礪與高琪共事,人疑其黨附。 本非萬全之策,行信諫,汝礪不諫,又沮 優劣可概見於斯矣。 及其再用、論事 和 議。 稍 胡沙虎之惡未著,行信 不及前,豈以 汝礪 爲 兩 阗

校勘記

則穀價自平矣 「則」原作「例」,據文義改。

「ニ」 以問字職日 「職」似當作「執」。

時朝廷以賈仝苗道潤等相攻不和 全、賈瑀互相攻擊,韶道潤、賈仝、王福、武仙、賈瑀分畫各路元帥府控制之」。 又同卷郭文振傳, 「仝」原作「全」。按本書卷一一八苗道潤傳、「旣而道潤與賈

「興定元年,韶文振接應苗道潤恢復中都,會道潤與賈仝相攻而止」。皆作「賈仝」。今據改。

四位 先名行忠 按「行忠」中州集壬集小傳作「行中」。

三三七二

金史卷一百八

列傳第四十六

胥鼎 侯摯 把胡魯 師安石

戶部尚書拜參知政事。 部侍郎。 宰臣奏曰:「爲人甚幹濟。」上曰:「著作職閑,緣今無他闕,姑授之。」未幾,遷右司郎中,轉工 承安二年,持國卒,去官。 **胥鼎字和之,尚書右丞持國之子也。**大定二十八年擢進士第, 泰和六年,鼎言急遞鋪轉送文檄之制,上從之,時以爲便。至寧初,中都受兵,由 四年,尚書省起復爲著作郎。上曰:「鼎故家子,其才如何。」 入官以能稱,累遷大理

能贍給貧人者,宜計所贍遷官升職,以勸獎之。」遂定權宜鬻恩例格,如進官升職、丁憂人許 都路兵馬都總管。二年正月,鼎以在京貧民闕食者衆,宜立法振救,乃奏曰:「京師官民有 貞祐元年十一月,出爲泰定軍節度使,兼兗州管內觀察使,未赴,改知大興府事,兼中

列傳

應舉 五月,宣宗將南 求 仕、官監 渡,留爲汾陽軍節度使,兼汾州管內觀察使。十一月,改知平陽府事, 戶從良之類,入粟草各有數,全活甚衆。 四月, 拜尚書右丞,仍兼 知府事 兼河

東南路兵馬都總管,權宣撫使。

聞北 速錯置,實關 食。 「鼎言是也,有司其 上頗 夏田 方劉伯林聚兵野狐嶺,將深入平陽、絳、解、河中,遂抵 採用焉。 三年四月,建言利害十三事,若積軍儲、備黃河、選官讞獄、簡將練卒、鈔法、版籍之類, 已爲 社稷生靈大計。 兵蹂,復不雨,秋種未下。 又言:「平陽歲再被兵,人戶散亡,樓櫓修繕未完,衣甲器械 如數亟給之。」 乞降空名宣刺一千、紫衣師德號度牒三千,以補軍儲。」上曰: 雖有復業殘 民, 皆老幼, 河南。 莫能耕種, 豈足徵求。 戰禦有期, 極 少,庾廩 儲積 未備,不 無兩月 比

路宣 無所 **|代爲邊要,正宜益兵保守,** 原 去。」尚書省奏宜如 則 掠 北 撫司矣,乞更詔諭之。」旣而大兵果出境,賜詔獎諭曰:「卿以文武之才,膺兵民之寄,往 七月,就拜本路宣撫使,兼前職。 路也,大兵若來,必始於北,故清野當先北而 則勢當 自止。 所請、詔從之。 不然,南路雖清,而穀草委積於北,是資兵而 今更損其力, 又言:「近聞朝廷令臣淸野, 朝廷欲起代州戍兵五千,鼎上言:「嶺外軍已皆南徙, 一朝兵至, 後南。 何以待之。平陽以代爲藩 况北路禾稼早熟, 切謂臣所部乃河 召之南也。 **其野旣淸**, 臣已移文北 籬, 東 (南路,太 豈可撤 兵

鎭方面,式固邊防,坐釋股憂,孰如卿力。 益懋忠勤之節,以收綏靜之功,仰副予心,嗣有後

寵。」尋以能設方略退兵,進官一階。

訓練 攝官以制之,則朋聚黨植,無所不 一員,不惟預爲防閑,使有畏忌,且令武藝精熟,人各爲用。」上從之。 十月, 鼎上言:「臣所將義軍,皆從來背本趨末、勇猛兇悍、盜竊亡命之徒,苟無訓練統 至。 乞許臣便宜置總領義軍使、副及彈壓,仍每五千人設

悉意。」 諭曰:「卿父子皆朕所知,向卿執政時,因有人言,遂以<u>河東事相委,果能勉力以保無虞。</u> 國家多難,非卿孰可倚者。 月,拜樞密副使,權尚書左丞,行省于平陽。 之,且上言:「臣以便宜立官賞,預張文牓,招還脅從人七千有奇,續至者又六千餘,俱令復 竊謂凡被俘未歸者,更宜多方招誘,已歸者所居從便,優加存恤,無致失所。」制 四 年正月,大兵略霍、吉、隰三州,已而步騎六萬圍平陽,急攻者十餘日,鼎遣 卿退易耳,能勿慮社稷之計乎。今特授卿是任,咫尺防秋,更宜 時鼎方抗表求退,上不許,因進拜焉,且遣近侍 兵屢却 可。

糧儲 陝西、河南通販 僅及一 時 河南 月。 栗麥不令興販渡河,鼎上言曰:「河東多山險,平時地利不遺,夏秋荐熟,猶常藉 物斛。 伏見陝州大陽渡、河中大慶渡皆邀阻粟麥,不令過河,臣恐軍民不安,或生 況今累值兵戎,農民寖少, 且無 雨雪,闕食爲甚。 又解州 屯兵數多,

列傳

內患。伏望朝廷聽其輸販,以紓解州之急。」從之。

千。今兵旣去而農事方興,臣乞量留偵候,餘悉遣歸,有警復徵。 勸督農事。 縣憚帥府,鞭箠械繫,所在騷然,甚可憐憫。今大兵旣去,惟宜汰冗兵,省浮費,招集流亡, 司宜奉朝廷德意,以謀安集,而潞州帥府遣官於遼、沁諸郡搜括餘粟,懸重賞誘人告訐,州 徵 經費果闕,以恩例勸民入粟,不猶愈於强括乎。」又言:「霍州回牛、鳳棲嶺諸阸,戍卒幾四 兵來,亦足禦遏。 科頗急,貧無依者俱已乏食,富戶宿藏亦爲盜發,蓋絕無而僅有焉,其憔悴亦已甚矣。有 又言:「河東兵革之餘,疲民稍復,然丁牛旣少,莫能耕稼,重以亢旱蝗螟,而餽餉所須, 彼不是務,而使瘡痍之民重罹茲苦,是兵未來而先自弊也。願朝廷亟止之,如 舉一事而獲二利,臣敢以爲請。」詔趨行之。 既休民力,且省縣官,萬

各路宣撫司俱得發賣、庶幾多獲貯儲,以濟不給。」於是尚書省更定制奏行焉。 雖設鬻爵恩例,然條目至少,未盡勸誘之術,故進獻者無幾。宜增益其條,如中都時,仍許 又言:「河東兩路農民寖少,而兵戍益多,是以每歲糧儲常苦不繼。 臣切見潞州元帥府

部 然,陝西若一體徵收,則彼中所有日湊于河東,其與不歛何異。又河北寶券以不許行于河 量民力徵歛,以裨軍用。 又言:「交鈔貴於通流,今諸路所造不敷所出,苟不以術收之,不無闕誤。 河中宣撫司亦以寶券所支已多,民不貴,乞驗民貧富徵之。雖 宜從行省行

,由是愈滯,將誤軍儲而啓釁端。」時以河北寶券商旅賷販南渡,致物價翔貴,權限路分行

用,因鼎有言,罷之。

率皆農民,已各散歸田畝,趨時力作。若徵集之,動經旬日,農事廢而歲計失矣。乞從本府 所定,無輕變易。』臣切是其言。」時阿魯帶奏亦至,詔遂許之。 事務方殷,而分別如此,彼居中下者皆將氣挫心懈而不可用,慮恐因得測吾虛實。且義軍 府時已按閱本軍,去其冗者。部分旣定,上下旣親,故能所向成功。 且又父子兄弟自相赴援,各顧其家,心一而力齊,勢不可離。今必析之,將互易而不相 又言::「比者朝廷命擇義軍爲三等,臣卽檄所司,而潞帥必蘭阿魯帶言:"『自去歲初置 國家糧儲常恐不繼、豈容僥冒,但本府兵不至是耳。況潞州北卽爲異境,日常備戰, 此皆血戰之餘,屢試 帥

當任之。今入河南,日期,及幾甸,豈可安據一方,坐視朝廷之急,而不思自奮以少寬陛下 掣其肘。」制可。旣而||用聞大兵已越||關,乃急上章曰:「臣叨蒙國恩擢列樞府,凡有戎事,皆 策。」上以示尚書省,宰臣奏:「兵已踰關,惟宜嚴責所遣帥臣趨迎擊之,及命鼎益兵渡河以 移文陝州行院及陝西鄰境,俱令設備,恐未卽遵行。乞詔河南行院統軍司,議所以禦備之 軍赴援。今兵勢將叩關矣,前此臣嘗奏聞,北兵非止欲攻河東、陝西,必將進取河南。雖已 又言::「近偵知北兵駐同、耀,竊慮梗吾東西往來之路,遂委河中經略使陀滿胡土門領

列

其機耶。 合。」又奏曰:「京師去平陽千五百餘里,儻俟朝廷之命方圖入援,須三旬而後能至,得無失 經 兵奔赴, 略使徒單百家領兵五千,由便道濟河以趨關、陝,臣將親率平陽精兵直抵京師,與王師相 其或不至自有常刑。 臣以身先士卒倍道兼行矣。」上嘉其意,詔樞府督軍應之。 去歲頒降聖訓,以向者都城被圍四方無援爲恨,明勅將帥, 臣已奉韶,先遣潞州元帥左監軍必蘭阿魯帶領軍一萬,孟州 若京師有警, 即各提

奴權 中 自 · 吉、隰、孟州 |關 入援,又遣遙授河中府判官僕散掃吾出領軍趨陝西,併力禦之。 右 以 初,鼎以將率兵赴援京師,奏乞委知平陽府事王質權元帥左監軍,同知府事完顏僧家 西皆列營棚,連亙數十里。 監軍,以鎭守河東,從之。 經略司,相與會兵以爲夾攻之勢。 至是、鼎拜尚書左丞、兼樞密副使。 鼎慮近薄京畿,遂以河東南路懷、孟諸兵合萬五千,由河 已而 北兵果由三門、集津北渡而去。 且慮北兵扼河、移檄絳、 是時,大兵已過陝州,

將 大兵還至平陽,鼎遺兵拒戰,不利乃去。 令 在 及畿 處 所 僑 司 鼎 嚴 甸 居 復 ,儻復誘此失職之衆使爲鄕導,或驅之攻城,豈不益資其力。 ,各無本業,易至動搖。 上言:「自兵興以來,河北潰散軍兵、流亡人戶,及山西、河東老幼,俱徙河南。「三 爲 防閑,庶幾不至生釁。」上從其計,遣監察御史陳規等充安撫捕盜官,巡行郡邑。 竊慮有司妄分彼此,或加 迫遣,以致不安。 乞朝廷遣官撫慰,及 今兵日益盛,

便,略曰:「自北兵經過之後,民食不給,兵力未完。 若又出師,非獨饋運爲勞,而民將流亡, 興定元年正月,上命鼎選兵三萬五千,付陀滿胡土門統之西征。 至是,鼎馳奏以爲非

西征 愈至失所。或宋人乘隙而動,復何以制之,此繫國家社稷大計。 軍以備西征,而太原路元帥左監軍烏古論德升以狀白臣,甚言其失計。臣愚以爲德升所言 可取,敢具以聞。」詔付尙書省議之,語在德升傳。〔三三月,鼎以祖父名章,乞避職,詔不從。 [未可議也。] 遂止。是月,進拜平章政事,封華國公。又上奏曰:「臣近遣太原、汾、嵐官 方今事勢,止當禦備南邊,

乘隙 和再修舊好,練兵峙糧,繕修營壘,十年于茲矣。又車駕至汴益近宋境,彼必朝夕憂懼,委 所 師 年 可二也。 馬蕃軍 惲 旅 曰:「竊懷愚懇,不敢自默,謹條利害以聞。昔泰和間,蓋嘗南伐,時太平日久,百姓富庶, 併至,雖有潼關、大河之險,殆不足恃,則三面受敵者首尾莫救,得無貽後悔乎。其不 而 ,遠近動搖,是未獲一敵而自害者衆,其不可一也。

今歲西北二兵無入境之報,此非有 朝 軍馬氣勢視舊纔十一耳。至于器械之屬亦多損弊,民間差役重繁,寖以疲乏,而日勤 銳,所謂萬全之舉也,然猶亟和,以偃兵爲務。大安之後,北兵大舉,天下騷然者累 廷詔鼎舉兵伐宋,且令勿復有言以沮成算。鼎已分兵由秦、躍、鳳翔三路並進,乃上 敢也,意者以去年北還,姑自息養,不然則別部相攻,未暇及我。如聞王師南征, 凡兵雄于天下者,必其士馬精强,器械犀利,且出其不備而後能取勝也。宋自泰

列傳

以廣儲蓄。 兵進討,欲因敵糧,此事不可必者。 烏合之衆,素非練習,而遽使從戎,豈能保其決勝哉。雖得其城,內無儲蓄,亦何以守。 不能 何足平乎。」詔付尚書省,宰臣以爲諸軍旣進,無復可議,遂寢。 已哉,其不可六也。 五. 招募,誘以厚利,使爲鄕導,伺我不虞突而入寇,則內有叛民,外有勍 役繁重,不勝困憊。 不練烏合之軍,深入敵境,進不得食,退無所掠,將復遁逃嘯聚爲腹心患, 費,果何 曲 也。 爲 窺其虛實,故未敢輕舉。 防。 今春事將興,若進兵不還,必違農時,以誤防秋之用, 益哉? 至于士氣益强,民心益固,國用豐饒,自可恢廓先業,成中興之功, 其不可三也。 臣愚以爲止當遴選材武將士,分布近邊州郡, 又凡失業寓河南者,類皆衣食不給。 今我軍皆山西、河北無依之人,或招還逃軍,脅從歸國,大抵 宋我世讎,比年非無恢復舊疆、洗雪前耻之志,特畏吾威力, 隨軍轉輸,則又非民力所及。 貧窮之迫, 盜所由 此社稷大計,豈特疆場利害而 沿邊人戶雖 敵至則追擊, 敵,未易圖 其不可 生,如宋人陰爲 有恒產,而賦 之,其不可 去則 區區之宋 四也。 徒自勞 力田, 以

於是 非萬人不可。 、鼎奏:「臣近遣官問諸帥臣,皆曰散關至臺關諸隘,其地遠甚,中間 旣 而元帥 承裔等取宋大散關,上論鼎曰:「所得大散關,可保則保, 而又有恒州、號縣所直數關,宋兵皆固守如舊,緩急有事當復分散關之兵。 堡 不可 壘 相望,如欲 則焚毀而還。」 分屯

春農事已急,恐妨耕墾,不若焚毁此關,但屯邊隘以張其勢,彼或來侵,互相應援易爲力 餘衆數少必不能支,而鳳翔、恒、隴亦無應援,恐兩失之。且比年以來,民力困於調度,今方

也。」制可。

務哉?惟陛下委任大臣,坐收成算,則恢復之期不遠矣。」上覽其奏不悅,謂宰臣曰:「朕惟 恐有怠,而鼎言如此何耶。」高琪奏曰:「聖主以宗廟社稷爲心,法上天行健之義,憂勤庶政, 錢穀之冗,非九重所能兼,則必付之有司,天子操大綱、責成功而已,況今多故,豈可躬親細 夙夜不遑,乃太平之階也。 鼎言非是。」上喜之。 人也,姑宜勉力以終之。」鼎以宣宗多親細務,非帝王體,乃上奏曰:「天下之大,萬機之衆, 二年四月,鼎乞致仕,上遣近侍諭曰:「卿年旣耄, 朕非不知, 然天下事方有次第,卿舊

得施行,則下 省、行院、帥府不得輒行誅賞。 暴露,備歷艱險,宜一體減免,以示激勸。」從之。二月,上言:「近制,軍前立功犯罪之人,行 四品以下皆得裁決。 三年正月,上言:「沿邊州府官旣有減定資歷月日之格,至于掌兵及守禦邊隘者,征行 無所畏而令莫得行矣。」宰臣難之,上以問樞密院官,對如鼎言,乃下詔,自今 夫賞由中出則恩有所歸,茲固至當。至于部分犯罪,主將不

時元帥內族承裔、移刺粘何伐宋,所下城邑多所焚掠,於是鼎上言:「承裔等奉詔宣揚

列

甚,欲以自代。胡魯固佳,至于駕馭人材,處決機務,不及鼎多矣。」俄以伐宋有功,遷官 宰臣曰:「胥鼎以老求退,朕觀其精力未衰,已遣人往慰諭之。 鼎嘗薦把胡魯,以爲過已遠 自下矣。若拒王師,乃宜有戮。」上甚是其言,遂詔諭承裔。鼎以年老屢上表求致仕,上謂 諭帥臣,所得城邑姑無焚掠,務慰撫之。 誠使一郡帖然,秋毫不犯,則其餘三十軍,將不攻 國威,所謂『弔民伐罪』者也。今大軍已克武休,將至興元。 興元乃漢中、西蜀喉衿之地,乞

顏閭山乃言嘗奉旨淸野,臣不知其可。」詔從鼎便宜規畫。是時,大元兵大舉入陝西,鼎多 尋又遣諭曰:「卿專制方面,凡事得以從宜規畫,又何必一一中覆,徒爲逗遛也。」 料敵之策,朝臣或中沮之,上諭樞密院官曰:「胥鼎規畫必無謬誤,自今卿等不須指授也。」 去,使不資敵乎。他木雖伐,桑棗舍屋獨非木乎,此殆徒勞。臣已下帥府止之,而左都監完 今秋收,乃爲此舉以奪其事,旣不能禦敵而又害民,非計也。且一朝警急,其所伐木豈能盡 八月,上言:「臣奉詔兼節制河東,近晉安帥府令百里內止留桑棗果木,餘皆伐之。 方

「自去冬至今,雨雪殊少,民心不安,軍用或闕,爲害甚重。卿等皆名臣故老,今當何以處 卿請,仍可來居京師,或有大事得就諮決也。」五年三月,上遣近侍論鼎及左丞賈益謙曰: 四年,進封溫國公,致仕,詔諭曰:「卿屢求退,朕初不許者,俟其安好,復爲朕用爾。今

迭,皆致政 隱。 元 欲 召 光 赴尚 元 老臣,經 年五 書省會議, 月,上 練 或 刺 事 宰 恐 當 相 與時相不合, 邀赴省與 曰:「前平章 議 香鼎 利 難於 害。」 面折, 左丞 仍遣侍官分詣四人者諭 賈益謙 故令就第延問, 其悉意以 、工部 尙 書札 意焉。 里吉、翰林 毋 有

章政 兵, 殺、恣民耕 不 相 使總制 事 統 六月, 香鼎. 攝 稼,此 公 方自保不 晉陽 府, 才 兼將相 公郭文振 殆 同 力戰 不 哦,朝 可 ,威望甚 測 禦,庶幾 奏:「 廷不 也。 河朔受兵 隆 即遣 樞 人皆響應 府 ,向行省 兵爲援,臣恐人心 毎 機臣 有年矣, 河東, 易爲 會合府兵進戰,蓋 恢復,惟陛 人樂 向皆秋來 爲 以謂 用。 春 下 舉 今雖 ·圖之。」 一公府 去, 棄 河 致 北,甚: 今已盛暑不 雖 政, 號 分封, 北計 精 力未衰, 也。 廻, 實 且. 伏 單 乞付 見 嗜戕 前 重 且 平

州 知, 朕 破 申 朝 大 孤 前 但 危 請 臣 下 鼎 明 國家 必必 以衰 年,宣宗 亦 殆不 優 濟吾事 百 詔 病辭 一自殊, ·易保, 年積 不 許。 崩,哀宗 上諭 自外 , 累之基,河朔億萬生靈之命 大河 卿 三年,復 之語 日 至 以 卽 二卵 北, 位。 而 殆爲 上章 定。 卿皆節制。」 向 正大二 在 過 迄卿 一請老, 河 東, 年, 移 況餘 且 鎭, 朝 舉 鼎 起復, 廷倚 乃力 朝 敵 人 才 賢 卿當勉出 不 重。 疾 拜 力 復 練 孰 赴 平章 侵。 軍 今河 政 鎭 可 者 壯圖,同濟大事。」 政 副 何 朔 來 自 事 卿 乃 州 歸 , 者。 過爲 代。 進封 者 郡 多 益 嫌 卿 詔 英國 衆 歸 避 答 年 附, ? 百 三 高 鼎 公,行尚書省于衞 久 且. 鼎 須 病 勞 君 卿 奉 卿 不 於 臣 往 詔 圖 能 均 在 外,朕豈不 惶懼 自 爲 河東 不敢 卿 體, 殘 先 復

列

傳

退。是年七月,薨。

鼎通達吏事,有度量,爲政鎭靜,所在無賢不肖皆得其歡心。 南渡以來,書生鎭方面

者,惟鼎一人而已。

間, 路財用不實,至是降除焉。貞祐初,大兵圍燕都,時擊爲中都麴使,請出募軍,已而嬰城有 部事,往來應給之。 募兵轉糧,事無不克,可升爲尙書,以總制永錫、慶壽兩軍」。於是以擊爲太常卿,行尙書六 駐南京,河南兵不可易動,且兵不在多,以將爲本。 使,提控紫荆等關。俄遷行六部侍郎。三年四月,同簽樞密院阿勒根訛論等以謂「今車駕 功,擢爲右補闕。二年正月,詔擊與少府監丞李逈秀分詣西山招撫。 階,降授長武縣令。 積遷山東路鹽使司判官。泰和元年,以課增四分,特命遷官二階。八年七月,追官一 侯摯初名師尹,避諱改今名,字莘卿,東阿人。 初,擊爲戶部主事,與王謙規措西北路軍儲以代張煒,至擊上章論本 侯摯有過人之才,儻假以便宜之權,使 明昌二年進士,入官慷慨有爲。 宣宗南渡,轉勸農副

條格,輒劄付六部及三品以下官,其於紀綱豈不紊亂,宜革其弊。」其二曰:「近置四帥府,所 擊遂上章言九事,其一曰:「省部所以總天下之紀綱,今隨路宣差便宜、從宜,往往不遵

平民 惰 行 也。 則 曰 H 實 來 宜沿流 固,今多闕 不 有 統 棄戈 李 負 敵 改覆轍,臣雖素不知兵,妄謂率由此失。」其四曰:「雄、保、安肅諸郡據白溝、易水、西山之 所 不 兵校不爲不衆,然而弗克取勝者,蓋一處受敵,餘徒傍觀,未嘗發一卒以爲援,稍見小却, 大河 英 夫前 愈不 中 任勞苦, 其 職 遁去,此 爲 失 ,本不可以兼行,而帥府每令雜進,累遇寇至,軍未戰而丁夫已遁,行伍錯亂,敗之由 人。 設備,以固 之北 (身者多,兼轉輸頻併,民力困弊,應給不前復遭責罰,秩滿乃與他處一體 聊 陣雖勝,而後必更者,恐爲敵所料耳,況不勝哉。 帥,臨陣之際酒猶未醒,是以 員,又所 乞詔 生。 且 ,民失稼穑,官無俸給,上下不安, 師老將怯故也。 心膽懦怯何足倚辨。 宜 有 山東,使力穡之民安服田畝。」其六曰:「近都州縣官吏往往逋逃,蓋以往 優加 任者皆柔懦不武,宜亟選勇猛才幹者分典之。」其五曰:「漳水自衞至海, 司優定等級,以別異之。」其七曰:「兵威不振, 罪在將帥輕敵妄舉, **矜恤**,亟招撫 將將之道,惟陛下察之。」其三曰:「率兵禦寇,督民運糧,各 之。」其九曰:「從來掌兵者多用世襲之官,此屬自 宜選驍 取 敗。 勇過人、衆所推服者, 不考其素用 臣謂英旣無功,其濫注官爵並宜削奪。」其八 皆欲逃竄。 用兵尚變,本無定形,今乃因 加 以潰散軍卒還相 之。」上略施 剽掠,以致 計資考, 如近 幼 循

時 元 帥 蒲察七斤以通州叛,累遣諜者間擊,擊恐爲所陷,上章自辯。 詔 諭 之曰:「卿朕

危懼。 知 ,豈容間 河北 今防秋在邇, 耶。 先是、擊言:「河北東、西兩路最為要地、而眞定守帥胡 壬申 其 ,遺祭河神于宜村。 甚爲可憂,臣願募兵與舊部西山忠義軍往安撫之。」制可,故有是命。 意於職,無以猜嫌自沮也。」八月,權參知政事。 十二月,復行省于河 北 論出 俄拜參知政事,行尚 「輒棄城 南奔、州縣

列國 北 十一月,入見。 息而 河上下許販粟北渡,然每石官糴其八,彼商人非有濟物之心也,所以涉河往來者特利 民皆陛下赤子,而遭罹兵革,尤爲可哀,其忍坐視其死 徒,得以藉口而 大飢,擊上言曰:「今河朔饑甚, 已,利旣無有,誰復爲之。 各列疆界,然晉饑則秦輸之粟,及秦饑,晉閉 四年正月,進拜尙書右丞。 起也。 願止其糴,縱民輸 是雖有濟物之名,而實無所渡之物,其 **嘗上言**,宜開 人至相食, 版爲便。」 詔尚書省行之。 觀、滄等州斗米銀十餘兩,殍殣相屬。 沁水以便饋運,至是,詔有司開之。 之糴,千古譏之。 而不救歟。 況今天下一 人心惟危,臣恐弄兵之 與不渡何 異。 家, 是時,河 河朔之 昔春秋 伏見沿 其厚

皆楊安兒、劉二祖散亡之餘,今復聚及六萬,賊首郝定者兗州 造人北構南連皆成約,行將跨河爲亂。 皇帝,已攻泰安、滕、克、單諸州,及萊蕪、新泰等十餘縣,又破邳州 時紅襖賊數萬人入臨沂、費縣之境,官軍敗之,生擒偽宣徽使李壽甫。 擊以其言聞于上,且曰:「今邳、滕之路不通,恐實有 泗水 碙子 人,署置百官, 堌 得船 訊之,則云其衆 數百艘,近 僭稱大漢

討之,前 年 此 四月 。」遂詔 , 齊南、泰安、滕、克 後斬 擊行省事于東平,權本路兵馬都總管,以招誘之,若不 首千餘,招降 等州 偽 元 帥 土 石花五 賊 並 起,肆行 、夏全餘黨 剽掠 : 壯士二萬人,老 ,擊遣提控遙授 從卽 幼五 棣 州 萬 率兵捕討。 防 禦使完顏 口 興定

死 遷 使疲 實 事 而 一一 往,安 以避, 可 旣行 瘵 哀 是年冬,陞資德 尙 邺 者 所容姦,乞令 爲 今欲 得以 近近 ,又上言曰:「臣近 次第 朝廷遣 復 少蘇,是 何耶。 婦本 官 大夫, 土及春 有司 其令 亦 分 圖 往 驗實 兼三司 報 速放之。」 撫 耕 歷黃陵 輯, 之一 種 《放渡。」詔付尙書省,宰臣奏「宜令樞府講究」,上曰:「民饑 其惠 使。 也。 崗 而 南岸, 河禁邀阻 大矣。 二年二月,擊 字臣 多有貧乏老幼自陳本 難之,無何, 然臣 臣 忝 謂 上言:山 預 河禁本以 執 韶遣 政, 擊行省于 東 敢 防閑自 請 河 河 繼行, 北 北 數 農民, 北來 河 罹 北 以宣布 兵亂 者耳, 、兼行 因 敵 遺民 或 三司 驚擾 此 家德 乃 嗷 安 故 由 嗷, 且 南

所爲。 琛 督 率 兵 兵 討 匹 之。 月, 阿 五. 魯苔 白 招 赴 會高密 撫 馳 之。 俘 副 抵 百 使 時李全 城 賊 餘 黃摑 陳全 下 , 阿 鼓躁 所獲軍 等四 暨其黨于忙兒 魯荅破李全於密州。 逼之, 人默白招 實甚衆, 賊守; 撫副 者皆在 陴者 遂復其城。 使 八百人皆 城 黄 初,賊首李全據密州及膠 中, 摑 加 是夜, 聞官 魯荅 下乞降, 軍 琛又用 願 且. 爲內應,阿魯荅乃遣提控朱 西 餘 一來, 賊 陳 四 全計 全潛逸去,忙兒 千 西、高密諸縣 出走, .., 拔 高密焉。 進軍 邀 不 知

列

傅

第

移邳 且連接泰安之天勝寨,介於東平、益都之間,萬一兵來,足相應援。」上恐分其兵糧,乃詔權 曰:「臣蒙大恩,死莫能報,然承聖訓敢不奉行。 麥,忠恪之意脵所具知。 ,上遣諭擊曰:「卿勤勞王家,不避患難,身居相職而往來山堌水寨之間,保庇農民收穫二 州行省。 雖然,大臣也,防秋之際亦須擇安地而處,不可墮其計中。」擊對 擬駐兵于長淸縣之靈巖寺,有屋三百餘間,

見邳、海之間,貧民失業者甚衆,日食野菜,無所依倚,恐因 於道路之歎。 |邳戶僅及八百,軍以萬計。 夫古之取兵以八家為率,一家充軍七家給之,猶有傷生廢業、疲 自十月給糧,使充戍役,至二月罷之,人授地三十畝,貸之種粒而驗所收穫,量數取之,逮秋 復隸兵伍。 九月、擊上言:「東平以東累經殘毁,至于邳、海尤甚,海之民戶曾不滿百而屯軍五千, 且戰且耕,公私俱利,亦望被俘之民易于招集也。」 今兵多而民不足,使蕭何、劉晏復生亦無所施其術,況於臣者何能爲哉。 而 嘯聚以益敵勢。 韶施行之。 乞募選爲兵,

阻海, 徙,則直抵|東平無非敵境,地大氣增,後難圖矣,臣未見其可。 儲不給耳。 是時,樞密院以海州軍食不足,艱于轉輸,奏乞遷于內地。 與浙、莒、邳、密皆邊隅衝要之地,比年以來爲賊淵藪者,宋人資給之故。 臣請盡力規畫,勸喻農民趨時耕種,且令煑鹽易糧,或置場宿遷,以通商旅,可 且朝廷所以欲遷者,止慮 韶問擊,擊奏曰:「海州 若棄而 連山 糧 他

不勞民力而辨。 仍擇沭陽之地可以爲營屯者,分兵護邏,雖不遷無患也。」上是其言,乃止。

榮祿大夫,致仕。 伏,汝霖及| 戬幷其黨彈壓|崔榮、副統|韓松、萬戶|戚| 誼等皆就誅,至是以聞。 三年七月,設汴 知沂州防禦使程戩懼禍及已,遂與同謀,因結宋兵以爲外應。 十月,先是,邳州副提控王汝霖以州廩將乏,扇其軍爲□。□□東東路轉運副使兼同 十月,以裏城畢工,遷官一階。四年七月,遷 擊聞,即遣兵捕之,訊竟具

還,聞者壯之。十一月,復致仕。居汴中,有園亭蘇水濱,日與耆舊讌飲,及崔立以汴城降, 封蕭國公,行京東路尚書省事。 曹不思持重,吾寧死於汝曹之手,不忍爲亂兵所蹂,以辱君父之命。」諸將諾而止,得全師以 將卒謀倒戈南奔,留數騎衞擊。 天興元年正月,起復爲大司農。 以軍三千護送就舟張家渡,行至封丘,敵兵覺,不能進。諸 擊知其謀,遂下馬,坐語諸將曰:「敵兵環視,進退在我。 四月、歸大司農印,復致仕。八月,復起爲平章政事, 汝

由擊進用。南渡後宰執中,人望最重。 在朝遇事敢言,又喜薦士,如張文舉、雷淵、麻九疇輩皆 爲大兵所殺。

諭 使,兼涇州管內觀察使。四年五月,改知京兆府事,兼本路兵馬都總管,充行省參議官。 之曰:「此行,軍馬朕自總之,事有利害可因近侍局以聞。」三年十一月,出爲彰化軍節度 把胡魯,不詳其初起。貞祐二年五月,宣宗南遷,由左諫議大夫擢爲御前經歷官,上面

道也。 知 家 諫 言:「皇天不言,以象告人,災害之生必有其故,乞明諭有司,敬畏天戒。」上嘉納之,遣右司 郭 政 取人,惟進士之選爲重,不求備數,務在得賢。竊見今場會試,考官取人泛濫,非求賢之 事。 著往閱其迹,撫諭軍民焉。 興定元年三月,授陝西路統軍使,兼前職。 宜革其弊,依大定舊制。」詔付尚書省集文資官雜議,卒依泰和例行之。 六月, 詔權左副元帥, 與平章胥鼎同事防秋。 三年六月, 平凉等處地震, 胡魯因上 二年正月,召爲御史中丞。 三月,上言:「國 是月,拜參

東, 民· 四 力寖困,胡魯上言:「若以舟楫自渭入河,順流而下,庶可少紓民力。」從之。 年四 月,權尚書右丞、左副元帥,行尚書省、元帥府于京兆。時陝西歲運糧以助關 時以

便。

復,所須芻糧決不可辦,雖復取之慶陽、平涼、鳳翔及邠、涇、寧、原、恒、隴等州,亦恐未能無 夫不下十餘萬人。 五. 年 正 月,朝議欲復取會州,胡魯上言:「臣竊計之,月當費米三萬石、草九萬稱,轉運 使此城一月可拔,其費已如此,況未 必耶。 臨洮路新遭叔掠,瘡 演未

闕。 西、鞏州之地,護民耕稼,俟敵意怠,然後取之。」詔付省院曰:「其言甚當,從之可也。」 種 盡廢矣。 今農事將興,沿邊常費已不暇給,豈可更調十餘萬人以餉此軍。 政使此城必得, 不冤留兵戍守,是飛 輓之役無時而已也。止宜令承裔軍于定 果欲行之,則數郡春

府者九,其部衆率不過三四千,而長校猥多,虛糜廩給,甚無謂也。 隅 重地固當仍舊,德順、平涼等處宜皆罷去。 三月,上言:「禦敵在乎强兵,强兵在乎足食,此當今急務也。 河南行院、帥府存沿邊並河者、餘亦宜罷之。」 竊見自陝以西、州郡置 臣謂延安、鳳翔、鞏 州邊 帥

禦延安,以藩衞河南,則內外安矣。」不報。 謀略之臣不獲展力,緩急或失事機。 城賴以完,不爲無功。今合達、買住各授世封,而胡魯改知河中府。 事,以 知河 把胡魯廉直忠孝,公家之利知無不爲,實朝廷之良臣也。 先是, 胡魯以西北兵勢甚大, 屢請兵於朝, 上由是惡之。 元光元年正月, 是年十月,四西北兵三萬攻延安,胡魯遣元帥完顏合達、元帥納合買住禦之,遂保延 中府事權安撫使。「公於是陝西西路轉運使夾谷德新上言曰:「臣伏見知河中府 誠宜復行省之任,使與承裔共守京兆,令合達、買住捍 去歲、兵入延安、胡魯遣將調兵、 切謂方今用 **遂**罷 人之時,使 參知 政

六月,召爲大司農,旣至汴,遂上言曰:「邇來羣盜擾攘,侵及內地,陳、潁去京不及四百

傳第

四十六

把胡

則徒形跡而已。 恣行剽掠,田穀雖熟莫敢穫者。 里,民居稀闊,農事半廢,蔡、息之間十去八九。 甫經大赦,賊起益多,動計數百,驅牛焚舍, 「朕固省之矣。」]胡魯曰:「如行院、帥府擾之何。」 上曰:「司 農 官 旣 兼 採 訪,自 今 其 令禁 司農,巡行郡縣,盜賊如何可息。」對曰:「盜賊之多,以賦役多也。 今向秋成,奈何不爲處置也。」八月,復拜參知政事,上謂之曰:「卿頃爲大 所在屯兵率無騎士,比報至而賊已遁,叢薄深惡復難追襲, 賦役省則盜賊息。」上曰:

行,非臣下可專,人苟有言,其罪豈特除名。 股為卿地,因而肆赦,以弭衆口,卿知之乎。 今 門,胡魯亦不當受其賀,請倂案之。」於是詔諭曰:「卿昔行省陝西,擅出繫囚,此自人主當 九斤有職守,且握兵柄,而縱至門下,法當責降,朕重卿素有直氣,故復曲留。 |而行,要取人情何必爾也,卿其戒之。」是年十二月,進拜尙書右丞。 初,胡魯拜命日,巡護衞紹王宅都將把九斤來賀,御史粘割阿里言:「九斤不當遊執政 公家事但當

忠實、憂國奉公。及亡、朝廷公宰、下迨吏民、皆嗟惜之。 深悉彼中利害,其與共議之。」尋遣胡魯往陝西,與行省賽不、合達從宜規畫焉。哀宗卽位, 以有册立功,進拜平章政事。 元光二年正月,上諭宰臣曰:「陝右之兵將退,當審後圖,不然今秋又至矣。 正大元年四月,薨。〔云〕詔加贈右丞相、東平郡王。 胡魯爲人 右丞胡魯

在,安石間道走汴以聞。 初補尚書省令史,適宣宗南遷,留平章完顏承暉守燕都,承暉將就死,以遺表託安石使赴行 師安石字子安,清州人,本姓尹氏,避國諱更焉。承安五年詞賦進士。 上嘉之,擢爲樞密院經歷官。時哀宗在春宮,領密院事,遂見 爲人輕財尙義。

知遇

漢、唐之君固嘗用此策矣,豈獨今日不可用乎。 亂,不過戰、守、避、和四者而已。爲今之計,守、和爲上。所謂守者,必求智謀之士,使內足 來者旣衆,彼必轉相猜貳,然後徐起而圖之,則中興之功不遠矣。」上嘉納之。 者頗多,宜豐其糧餉,厚其接遇,度彼果肯爲我用,則擇有心力者數十人,潛往以誘致其餘。 以得戍卒之心,外足以挫敵人之銳,不惟彼不能攻,又可以伺其隙而敗之。 元光二年,累遷御史中丞。 其七月,上章言備禦二事,其一曰:「自古所以安國家、息禍 乞令有司詳議而行。」其二曰:「今敵中來歸 其所謂 和 ", 則

昏主,止矣。」 如是數百言。 安石縣蒙任用,遽遭摧折,疽發腦而死,上甚悼惜之。 文壽、張仁壽、李麟之,安石亦論列三人不已,上怒甚,有旨謂安石曰:「汝 一年,復御史中丞。三年,工部尚書、權左參政。 九月,坐劾英王守純附奏不實,決杖追官。 及哀宗卽位,正大元年擢爲同簽樞密院事 四年,進尙書右丞。 五年,臺諫劾近侍張 便承取賢相,股爲

傳第四十六 師安石

列

信拯救于內,胥鼎、侯擊守禦于外,訖使宣宗得免亡國,而哀宗復有十年之久,人才有益于 人國也若是哉。 贊曰:宣宗南遷,天命去矣,當是時雖有忠良之佐、謀勇之將,亦難爲也。 然而汝礪、行 胡魯養兵惜穀之論,善矣。安石不負承暉之託,遂見知遇,以論列近侍觸

校勘記

怒而死,悲夫。

- 【1】今入河南 據文義「今」下疑脫「北兵」二字。
- 及山西河東老幼俱徙河南 兵已過陝州,自關以西皆列營棚,連亙數十里」。 按山西與河東意複。 疑「山西」當作「陝西」。 上文「北兵非止欲攻河東、陝西」,又「是時,大
- 語在德升傳 按本書卷一二二島古論德升傳並無西征失計事
- 仍遣侍官分詣四人者諭意焉 按本書卷五六百官志、「近侍局、掌侍從、承勅令、轉進奏帖」。 此
- 「侍」上當脫「近」字。
- フェノ 措者,處舉中都轉運戶籍判官王謙。 與王謙規措西北路軍儲以代張煒 「謙」原作「說」。按本書卷一〇〇張煒傳,「上問誰可代卿規 謙至西北路盡發煒前後散失錢物以鉅萬計,對獄者積年」。

列傳第四十六 校勘

記

又卷一〇四王擴傳,「張煒職辦西北路糧草者數年,失亡多,尚書省奏擴考按,會煒亦舉王謙自

代,王謙發其姦蠹,擴按之無所假借」。今據改。

- ハベン 扇其軍爲□ 「爲」字下當闕一「變」字或「亂」字,今以□誌缺。
- 「中」 是年十月 按本書卷一六宣宗紀,興定五年「十一月,大元兵攻延安」。卷一一二完顏合達傳,

與定五年十一月,「與元帥買住又戰延安,皆被重創,十二月以保延安功賜金帶一」。此「十」下

疑脫「一」字。

ハヘン 以知河中府事權安撫使 原脫「知」字。按下文有「臣伏見知河中府把胡魯廉直忠孝」句, 知此

處脫「知」字。道光四年殿本已補、今從之。

بر اسا 正大元年四月薨 按本書卷一七哀宗紀,正大元年「五月戊戌, 平章政事把胡魯薨」。 作「五

月」,與此異。

金史卷一百九

列傳第四十七

完顏素蘭 陳規 許古

此,太子宜從。且汝能保都城必完否。」素蘭曰:「完固不敢必,但太子在彼則聲勢俱重,邊 御史。二年,宣宗遷汴,留皇太子於燕都,旣而召之,素蘭以爲不可,平章高琪曰:「主上居 隘有守則都城可無虞。 太子從。 完顏素蘭一名翼,字伯揚,至寧元年策論進士也。貞祐初,累遷應奉翰林文字,權監察 昔唐明皇幸蜀,太子實在靈武,蓋將以繫天下之心也。」不從,竟召

也。 進、君子日退、紀綱紊亂、法度益隳。 言者勸其親君子、遠小人、恐懼修省以答天變,東海不從,遂至亡滅。 七月,車駕至汴,素蘭上書言事,略曰:「昔東海在位,信用讒諂,疏斥忠直,以致小人日 風折城門之關,火焚市里之舍,蓋上天垂象以儆懼之 夫善救亂者必迹

其亂之所由生,善革弊者必究其弊之所自起,誠能大明黜陟以革東海之政,則治安之劾可 不時、橋梁數壞,人心天意亦可見矣。此事旣往,豈容復追,但自今尤宜戒愼,覆車之轍不 日而待也。 陛下龍興,不思出此,輒議南遷,詔下之日士民相率上章請留,啓行之日風雨

可引轅而復蹈也。」

不加精選而徒務其多,緩急臨敵其可用乎。且中都惟其糧乏,故使車駕至此。稍獲安地, 而 有司復多置軍官,不恤妄費,甚無謂也。 或謂軍官之衆所以張大威聲,臣竊以爲不然。 叉曰:「國家不可一日無兵, 兵不可一日無食。陛下為社稷之計, 宮中用度皆從貶損,

侍局直長趙和和在焉。素蘭奏曰:「臣聞興衰治亂有國之常,在所用之人如何耳。 用得其 遂忘其危而不之備,萬一再如前日,未知有司復請陛下何之也。」 叛,帥府方議削其權,而朝廷傳旨俾領義軍,文哥由是益肆,改除之令輒拒不受,不臣之狀 乃令移刺塔不也等招誘之,使帥府不敢盡其力,旣不能招,愈不可制矣。至於伯德文哥之 人、雖衰亂尚可扶持,一或非才,則治安亦亂矣。向者乣軍之變,中都帥府自足剿滅,朝廷 不密也。」尋召至近侍局,給紙劄令書所欲言,書未及半,上出御便殿見之,悉去左右,惟近 朕固常爾。近以游茂因緣生疑問之語,故凡有所引見,必令一近臣立侍,汝有封章亦無患 三年正月、素蘭自中都計議軍事廻、上書求見、乞屛左右。上遣人諭之曰:「屛人奏事、

『乣軍不可信,恐終作亂』,遂以刀杖決殺之,自是無復敢言軍國利害者。宸聰之不通,下情 當言責,迫於兇威,噤不敢忤。然內外臣庶見其恣橫,莫不扼腕切齒,欲一剚刃,陛下何惜 古論德升、張行信彈劾其惡,東海不察,卒被其禍。今高琪之姦過於胡沙虎遠矣。臺諫 良,實有不欲國家平治之意。昔東海時,胡沙虎跋扈無上,天下知之,而不敢言,獨臺官鳥 以爲武衞軍使。塔不也何人,且有何功,而重用如此。以臣觀之,此賊變亂紀綱,戕害忠 之不達、皆此人罪也。及乣軍爲變,以黨人塔不也爲武寧軍節度使往招之,已而無成,則復 蘭曰:「臣見文哥牒永淸副提控劉溫云『所差人張希韓至自南京, 道副樞平章處分, 已奏令 然行之,社稷之福也。」上曰:「此乃大事,汝敢及之,甚善。」素蘭復奏:「丞相福興,國之勳 而 耳。一旦得志,妬賢能,樹姦黨,竊弄國權,自作威福。 矣。」上頷之。素蘭續奏曰:「高琪本無勳勞,亦無公望,向以畏死故擅誅胡沙虎,蓋出 文哥隸大名行省,勿復遵中都帥府約束』。 養叛賊之姦,不知誰爲陛下畫此計者。 亦顯矣。 「汝言皆是。 不去之耶。臣非不知言出而患至,顧臣父子迭仕聖朝,久食厚祿,不敢偸安。惟陛下斷 帥府方且收捕、而朝廷復赦之、且不令隸帥府。 文哥之事,朕所未悉,誠如所言,朕肯赦之乎。且汝何以知此事出於高琪。」素 臣自外風聞、皆平章高琪之意、惟陛下裁察。」上曰: 溫即具言於帥府。 去歲,都下書生樊知一者詣高琪言, 國家付方面於重臣,乃不信任,顧 然則,罪人與高琪計結明 [無聊

耶。」素蘭曰:「福興、象多同心同德,無不協者。」上曰:「都下事殷,恐丞相不可輟。」素蘭曰: 舊,乞召還京,以鎭雅俗,付左丞彖多以留後事,足矣。」上曰:「如卿所言,二人得無相惡 「今日與朕對者止汝二人,愼無泄也。」厥後,上以素蘭屢進直言,命再任監察御史。 「臣聞朝廷正則天下正,不若令福興還,以正根本。」上曰:「朕徐思之。」素蘭出,上復戒曰:

議者或以閡選法、紊資品爲言,是不知方今之事與平昔不同,豈可拘一定之法,坐視斯民之 六品以上官,各舉堪充司縣長官者,仍明著舉官姓名,他日察其能否,同定賞罰,庶幾其可。 今若後官更劣,則爲患滋甚,豈朝廷恤民之意哉。夫守令,治之本也。乞令隨朝七品、外路 或反不及前官,蓋徒有選人之虛名,而無得人之實跡。古語曰『縣令非其人,百姓受其殃』。 廷,別議擬注。臣伏念彼懦弱不公之人雖令罷去,不過止以待闕者代之,其能否又未可知, 而 不權宜更定乎。」詔有司議行之。 四年三月,言:「臣近被命體問外路官,廉幹者擬不差遣,若懦弱不公者罷之,具申朝

其逸豫之心,告以持守之道,終之功光文、武,垂休無窮。欽惟陛下順天人之心,預建春宮。 能楚語,未習之故也。人之性亦在夫習之而已。昔成王在襁褓中,卽命周、召以爲師保,戒 時 ·也,欲治天下先正其本,正本之要無他,在選人輔翼之耳。夫生于齊者能齊言而不 哀宗爲皇太子,春宮所設師保贊諭之官多非其人,於是素蘭上章言:「臣聞太子者天

成 周 一太子仁孝聰明出于天資,總制樞務固已綽然有餘,儻更選賢如周、召之儔者使之夾輔,則 之治 不足侔矣。」上 一稱善。 未幾,擢 爲 內侍局直長,尋遷諫議大夫,進侍御史。

「萬 諭 可 有 如 也。 遣 高 所 奴事竟 信 不 麗 興定二年四 Ŀ 使 通 復 股 一,使 是 明 開 以 不知果何 持恩 互市 訛 其言,於是遣 聖 可性頗率易,故特命卿偕行,每事當詳議之。」<u></u>素蘭將行, 恩不 事,聞 月,以蒲鮮萬奴叛,遣素蘭與近 詔諭之,貸糧 如,卿等到彼當得其詳,然宜 達於高 以詔 典客署書 麗 書付行省必蘭出。 開 高 麗 市二者必 表劉 亦 無由 丙 從行。 有 知 朝廷本 若令行省就遣諭之, 不過鄰境領受, 恐中間 濟。 及還,授翰 止居鐵 侍局副 荷俱不 ·意也。 山, 使內族訛可同赴遼東, 林 從,則其曲在彼,然後 況彼世爲藩輔、未嘗闕 若復遠去, 待 制 則脫難得其 上言曰:「臣近請宣 詔諭 別議圖之 臣子 (耗也。」 之日

刑 事,行省於京兆。 分 天 別 子 部 方務 當 郎 正 月, 死 中。 大 寬 元 當 授 年 大, 時 京 免者,素蘭 Ē 南 他日 西 陽 月,詔集羣臣 未幾, 司 人布 農卿 必再韶推 陳謀反,坐繫者數百 遷 以 饿 聞,止 金安軍 改 議 問, 司 修 坐首惡 農 節度使, 此 復 大 得 河 卿, 昭 中 及 雪, 擬 府 兼同、華安撫使。 轉 素蘭 偽將 人, 御 死於 史中 司 相 榜答之下 與 直白華言於素蘭 者數 丞 陳規等奏其 人, 七 年七 旣 餘 者多矣。」素蘭 而 悉釋之。 月, 石還 未可,語在 日 權 朝 元 八 此 帥 (月,權) 命華及 行 獄 说,想, 右 註 至 都 誤 陝被圍, 監 戶 檢 者多,新 是月. 部 、参知 法 侍 邊 郎 政

之,亡奔行在,道中遇害。

進言多有補益。其居父喪,不飮酒,廬墓三年,時論以爲難。 素蘭莅官以修謹得名,然苛細不能任大事,較之輩流頗可稱。 自擢爲近侍局直長,每

諭規曰:「卿知臣子之分,敢言如此,朕甚嘉之。」 他才能,第以慘刻督責爲事。由是升職,恐長殘虐之風,乞黜退以勵餘者。」詔卽罷鮮職,且 特賜省察、量其才分別加任使、無令負天下之謗。」不報。又言:「警巡使馮祥進由刀筆、無 流亡,盜賊滋起,災變不息,則當日夜講求其故,啓告陛下者也,而擊未嘗及之。 伏願陛下 規畫権酤,豈大臣所宜親。方今疆土日蹙,將帥乏人,士不選練,冗食猥多,守令貪殘,百姓 責其報効也。旣而盤桓西山,不能進退,及召還闕,自當辭避,乃恬然安居,至於按閱倉庫, 上章言:「參政侯擊初以都西立功,獲不次之用,遂自請鎭撫河北。陛下遽授以執政,蓋欲 陳規字正叔,絳州稷山人。明昌五年詞賦進士,南渡爲監察御史。貞祐三年十一月,

遇年饑則互輸之粟。今聖主在上,一視同仁,豈可以一家之民自限南北,坐視困餒而不 四年正月,上言:「伏見沿河悉禁物斛北渡,遂使河北艱食,人心不安。昔秦、晉爲讎,

救哉。 。 足。」宰執以河南軍儲爲重、詔兩渡委官取其八、二以與民、至春澤足、大兵北還、乃依規請。 等渡委官閱視,過河之物每石官收不過其半,則富有之家利其厚息,輻湊而往,庶幾公私俱 況軍民効死禦敵,使復乏食,生亦何聊,人心一搖,爲害不細。 臣謂宜於大陽、孟津

亦賞之。 歸德行院拘括放之,有隱匿者坐掠人爲奴婢法,仍許諸人告捕,依令給賞,被虜人自訴者 本國人爲驅者,亦乞一體施行,庶幾河朔有所係望,上恩無有極已。」事下尚書省,命徐州、 之,而乃大掠良民家屬爲驅,甚不可也。乞明勅有司,凡鶴壽所虜俱放発之,餘路軍人有掠 三月,上言:「臣因巡按至徐州。 去歲河北紅襖盜起,州遣節度副使紀石烈鶴壽將兵討

宣差從宜爲名。其人大抵皆閑官,義軍之長、偏裨之屬尤多無賴輩,徵逐宴飲取給于下,日 以爲常。及敵至則伏匿不出,敵去騷擾如初。此輩小人假以重柄,朝廷號令威權無乃太輕 臣謂宜皆罷之,第委宣撫司從宜措畫足矣。」制可。 四月,上言:「河北瀕河州縣,率距一舍爲一寨,籍居民爲兵。數寨置總領官一人,並以

七月,上章言:

陛下以上聖寬仁之姿,當天地否極之運,廣開言路以求至論,雖狂妄失實者亦不

微而 坐罪。 廢之,卽無可採,乞放歸山林以懲尸祿之罪。 臣忝耳目之官,居可言之地,苟爲緘默,何以仰酬洪造。 謹條陳八事,願不以人

親其細 神都覆沒,翠華南狩,中原之民肝腦塗地,大河以北莽爲盜區,臣每念及此,驚怛不已。 戰守大計 利害,泛然不問,以爲責不在己,其於避嫌周身之計則得矣,社稷生靈將何所賴。 條,特以碎末,互生異同,俱非救時之急者。 况宰相大臣皆社稷生靈所繫以安危者,豈得不爲陛下憂慮哉。 云:「疑則勿任,任則勿疑。」又曰:「謀之欲衆,斷之欲獨。」 陛下旣以宰相任之,豈可使 曰: 責大臣以身任安危。今北兵起自邊陲, 深入吾境, 大小之戰無不勝捷, 以致 而 、征討密謀皆須省院同議可否,則爲大臣者知有所責,而天下可爲矣。 不圖其大者乎。 **伏願特出睿斷,若軍伍器械、常程文牘卽聽樞府專行,至于** 況近詔軍旅之務, 專委樞府, 尚書省坐視 每朝奏議不過目前數 古語

皆令諫官隨之,有失輒諫。 或爲省部所差,有終任不覿天顏、不出一言而去者。 御史、與天子辨曲直、正是非者也。 和陰陽,遂萬物,鎭撫四夷,親附百姓,與天子經綸於廟堂之上者也。 二曰:任臺諫以廣耳目。人主有政事之臣, 國朝雖設諫官,徒備員耳,每遇奏事皆令廻避。 二者豈可偏廢哉。 有議論之臣。 雖有御史,不過責以糾察官吏、照 昔唐文皇制中書門下入閤 政事 之臣者宰相 議論 之臣者諫官 或兼 他職, 執政 議事

刷案牘、巡視倉庫而已,其事關利害或政令更革,則皆以爲機密而不聞。萬一政事之 博、El通曉世務、骨鯁敢言者以爲臺諫,凡事關利害皆冷預議,其或不當,悉聽論列, 臣專任 胸臆、威福自由,或掌兵者以私見敗事機,陛下安得而知之。 伏 願 遴 選 學 術 談

不許兼職及充省部委差,苟畏徇不言則從而黜之。

安,四夷咸服。國家自兵興以來,州縣殘毀,存者復爲土寇所擾,獨河南稍完,然大駕 浮費,戒豪侈,禁戢明金服飾,庶皇天悔禍,太平可致。 俱非克己消厄之道。願陛下以衞文公、漢文帝爲法,凡所奉之物痛自撙節,罷冗員,減 官莫不以奢侈相尚、服食車馬惟事紛華。今京師鬻明金衣服及珠玉犀象者日增於舊、 東宮奉養與平時無異,隨朝官吏、諸局承應人亦未嘗有所裁省。至於貴臣、豪族、掌兵 所在,其費不貲,舉天下所奉責之一路,顧不難哉。 爭之後,四海困窮,天子不能具鈞駟,乃示以敦朴,身衣弋綈,足履革舄,未幾天下富 躬行儉約、冠大帛之冠、衣大布之衣、季年致騋牝三千、遂爲富庶。漢文帝承秦、項戰 而去歲秋禾、今年夏麥稍得支持。夫應天者要在以實,行儉者天必降福,切見宮中及 三曰:崇節儉以答天意。昔衞文公乘狄人滅國之餘,徙居楚丘,纔革車三十兩,乃 賴陛下慈仁,上天眷佑,蝗災之餘

四曰:選守令以結民心。方今舉天下官吏軍兵之費、轉輸營造之勞、皆仰給河南、

其桀點 官。 民、惟 時巡按 贓 非 或 陜 並 選擇,所 乖 西 從 謬 仍清縣 得賢守令而已。 者乘 う有 坐。 有不勝其害者。 加之連年蝗旱,百姓荐饑,行賑濟則倉廪懸乏,免征調則用度不足,欲其實惠及 不法及不任職者究治之,則實惠及民而民心固矣。 謂除狼得虎也。 令之選, 、時貪縱、庸懦者權歸猾吏。 其資歷已係正 及責隨朝七品、外任六品以上官各保堪任縣令者一員,如他 當賦役繁殷、期會促迫之際,若措畫有方則百姓力省而易辦,一 況縣令之弊無甚于今,由軍衞監當進納勞効而得者十居八九, 一七品,及見任縣令者,皆聽寄理,俟秩滿升遷。 伏乞明勅尚書省,公選廉潔無私、才堪牧民者,以補 近雖遣官廉察,治其姦濫,易其疲軟,然代者亦 復令監察以 洲府 日 犯

人。 假官廪,其留者必有避難之所,不必强造,當不至今日措畫之難。 初 給 惰 猶 緩 之人 四 雖 十二萬有奇,歲支粟三百八十餘萬斛, 五. 之 不 無 曰:博謀羣臣 則 其 漫事 知 後, 用 耕稼、羣飲賭博習以成風、是徒煩有司徵索課租 闕,急之則民疲,朝廷惟 ,亦將坐 致此誤 以定大計。 也。 困、況兵事 使初遷時 比者徙河北軍戶百萬餘口于河南,雖革去冗濫而所存 方興、未見息期耶。 去留從其所願,三 此一 事 致竭一路終歲之歛,不能贈此不耕不 · 已不 知所處,又何 近欲分布沿河, 則欲來者是足以自贈 而 以待 E 古昔人君將舉大事, 敵哉。 舉 數 使 白 自 萬 是蓋 種 衆 殖, 之家,何 不審 坐 戦之 然游 灰 於 廪

則 謀 及乃心,謀及卿士、庶人、卜筮,乞自今凡有大事必令省院臺諫及隨朝五品以上官

同議爲便。

倖所 鬻爵 天下 庶幾歷官者不至于太驟,而國家恩權不失之太輕矣。 而 有 不慕矣。 未滿 乘。 之人極意趨慕者,以朝廷愛重耳。若不計勳勞,朝授一官,暮升一職,人亦將輕之 進獻之門,然則被堅執銳効死行陣者何所勸哉。官本虛名,特出於人主之口 六曰:重官賞以勸有功。陛下卽位以來,屢沛覃恩以均大慶,不吝官爵以激人心, 又今之散官動至三品,有司艱於遷授,宜於減罷八資內量增階數,易以美名, 一任而倂進十級,承應未出職而已帶驃騎榮祿者,冗濫之極至于如此,復開 已然之事旣不可咎,伏願陛下重惜將來,無使公器爲尋常之具,功賞爲僥 ·; 而

軌, 前。 郡被屠,豈皆士卒單弱、守備不嚴哉,特以庸將不知用兵之道而已。 或親故假託 人,呼吸之間以決生死,其任顧不重歟?自北兵入境,野戰則全軍俱殃,城守則闔 又居常裒刻, 取 七 土 曰:選將帥以明軍法。 一爲相。 之流,平居則意氣自高,遇敵則首尾退縮,將帥旣自畏怯,士卒夫誰肯 四夷交侵,拔卒爲將。」今之將帥大抵先論出身官品,或門閥膏粱之 納其饋獻,士卒因之以擾良民而莫可制。 夫將者國之司命,天下所賴以安危者也。 舉萬衆之命付 及率之應敵,在途則前後 古語云:「三辰不

列

傳

第

四

+

七

陳規

矢鎧仗須令自負,習於勞苦。若有所犯,必刑無赦。則將帥得人,士氣日振,可以待 申明軍法、居常教閱、必使將帥明於奇正虛實之數、士卒熟于坐作進退之節。至于弓 省。仍勅省院大臣及內外五品以上,各舉方略優長、武勇出衆、材堪將帥者一二人,不 謂之大將,總之帥府。數不足者皆併之,其副統、副提控及無軍虛設都統、萬戶者悉罷 官旣有俸廪,又有券糧,一日之給兼數十人之用。將帥則豐飽有餘,士卒則飢寒不足, 哉,多則難擇,少則易精。今之軍法,每二十五人爲一謀克,四謀克爲一千戶,謀克之 限官品,以充萬戶以上都統、元帥之職。千戶以下,選軍中有謀略武藝爲衆所服者充。 曷若裁省冗食而加之軍士哉。伏乞明勅大臣,精選通曉軍政者,分詣諸路,編列隊伍, 使令`則是一千戶所統不及百人,不足成其隊伍矣。 古之良將常與士卒同甘苦,今軍 要必五十人爲一謀克,四謀克爲一千戶,五千戶爲一萬戶,謂之散將。萬人設一都統, 下有蒲輦一人、旗鼓司火頭五人,其任戰者纔十有八人而已。又爲頭目選其壯健以給 軍官數多,自千戶而上有萬戶、有副統、有都統、有副提控,十羊九牧,號令不一,動相 亂行,頓次則排門擇屋,<a>「三」
<a>思過小民,
<a>念其求索,以此責其畏法死事,
<a>豈不難哉。況今 切聞國初取天下,元帥而下惟有萬戶,所統軍士不下數萬人,專制一路豈在多

所乘,儒者先奔,健者不能 已籍軍人隨其所長而類試之。 天下,何取細 取三關,兵不血刃,選練之力也。 不 分 而 入 其 軍 爲 賞之。 過奔逐數 奈何脧民 |預爲分別,不使混淆耳。 八曰:練士卒以振兵威。 上 如 多步, 中下 、此,則人人激厲,爭効所長,而衰懦者亦有可用之漸矣。 弱 脂膏養此無用之卒。 而上 以增虚數。」比者凡戰多敗,非由兵少,正以其多而不分健懦,故爲敵 · ,凡臨敵則觀其强弱,使下當其上,而上當其中,中 軍 中軍已勝其二軍,用是常勝。 獨戰 其武藝出衆者別作一軍,量 昔周世宗常曰:「兵貴精而不貴多,百農夫不能養一戰 而 遂潰,此所以取敗也。 唐魏徵曰:「兵在以道御之而已。御壯健足以無敵于 苟健懦不分,衆何以勸。」因大蒐軍卒,遂下淮南 蓋古之將帥亦有以懦兵委敵者, 今莫若選差習兵公正之官,將 |增口糧,時加訓練,視等第 當其下。 昔唐文皇出征,常 敵乘下軍

初無意 上覽書不悅,詔付尙書省詰之。 諭 曰:「朕始 加罪,其令御史臺諭之。」尋出 以規有放歸山林之語,故令詰之, 宰執惡其紛更諸事,謂所言多不當。 「爲徐州 帥府經 乃辭以不識忌諱, 歷官 意謂股惡其言而怒也。 於是,規惶懼待罪,詔 股

要在

雲翼等言:「河中今爲無人之境,陝西民力疲乏,修之亦不能守,不若以見屯軍士量力補治, 正 大元年,召爲右司 ·諫,數上章言事,尋權 吏部 郎 中。 時詔羣臣議修復河中府,規與楊

京與進士王著塡開封警巡判官見闕,爲京所訟発官,規亦坐之。是年十一月,改充補闕。 待其可守卽修之未晚也。」從之。未幾,坐事解職。 初,吏部尚書趙伯成坐銓選吏員出身王

十二月,言將相非材,且薦數人可用者。

親衞軍。三,沙汰冗軍,滅行樞密院、帥府。四,選大臣爲宣撫使,招集流亡以實邊防。五, 選官置所,議一切省減。略施行之。 二年正月,規及臺諫同奏五事:一,乞尙書省提控樞密院,如大定、明昌故事。 二,簡留

陝西行尚書省二、帥府五,皆得以便宜殺人,寃獄在此不在州縣。」又曰:「雨水不時則責審 理,然則職變理者當何如。」上善其言而不能有爲也。 四月,以大旱詔規審理寃滯,臨發上奏:「今河南一路便宜、行院、帥府、從宜凡二十處,

可中輟乎。」餘皆無言,規獨進曰:「兵難遙度,百聞不如一見。臣嘗任陝西官,近年又屢到 達盡力決一戰矣,卿等以爲如何。」又言和事無益,撒合陸力破和議,賽不言:「今已遣和使, 月,四上召羣臣喻以陝西事曰:「方春北方馬漸羸瘠,秋高大勢併來,何以支持。 朕已喻合
 世光武中興,所征必克,猶言『每一出兵,頭須爲白』。兵不妄動如此。」上善之。四年三
 和,以息吾民耳。宋果行成,尚欲用兵乎。卿等當識此意。」規進曰:「帝王之兵貴於萬全, 十一月,上召完顏素蘭及規入見,面諭曰:「宋人輕犯邊界,我以輕騎襲之,冀其懲創告

西,軍士勇銳,皆思一戰。」監察御史完顏習顯從而和之,上首肯,又泛言和事。 陝西,兵將冗懦,恐不可用,未如聖料。」言未終,烏古論四和曰:「陳規之言非是,臣近至陝 上不以爲然。明日,又令集議省中,欲罷和事,羣臣多以和爲便,乃詔行省斟酌發遣,而事 事固非上策,又不可必成,然方今事勢不得不然。 使彼難從,猶可以激厲將士,以待其變。」 規對曰:「和

牽制,不得專輒。二,近侍送宣傳旨,公受賂遺,失朝廷體,可一切禁絕。三,罪同罰異,何 以使人。 是撒合輦竟出爲中京留守,朝廷快之。五年二月,又與大節言三事:一,將帥出兵每爲近臣 十月,規與右拾遺李大節上章,劾同判大睦親事撒合輦諂佞,招權納賄及不公事。 上嘉納焉。 由

宮中舉事,上必曰:「恐陳規有言。」一時近臣切議,惟畏陳正叔耳,挺然一時直士也。後出 訓乎。」上因嘆曰:「陳規若知,必以華飾諫我,我實畏其言。」蓋規言事不假借,朝望甚重,凡 爲中京副留守,未赴,卒,士論惜之。 曰:「曾令陳規輩知否。」壽孫頓首言:「臣侍禁庭,凡宮省大小事不敢爲外人言,況親被聖 初,宣宗嘗召文繡署令王壽孫作大紅半身繡衣,且戒以勿令陳規知。及成,進,召壽孫

其博學能文,詩亦有律度。爲人剛毅質實,有古人風,爲於學問,至老不廢。 海源劉從

規

後,諫官稱許古、陳規,而規不以訐直自名,尤見重云。死之日,家無一金,知友爲葬之。子 |益見其所上八事,歎曰:「宰相材也。」 每與人論及時事輒憤惋,蓋傷其言之不行也。 南渡

許古字道眞,汾陽軍節度使致仕安仁子也。登明昌五年詞賦進士第。貞祐初,自左拾

遺拜監察御史。時宣宗遷汴,信任丞相高琪,無恢復之謀,怙上章曰:

責,其能無愧乎。且閭閻細民猶顒望朝廷整訓師徒,爲恢復計。而今纔聞拒河自保, 主痛悼之心至爲深切,夙夜思懼所以建中興之功者,未嘗少置也。爲臣子者食祿受 又盡徙諸路軍戶河南,彼旣棄其恒產無以自生,土居之民復被其擾,臣不知誰爲此謀 然業已如是,但當議所以處之,使軍無妄費,民不至困窮則善矣。 自中都失守,廟社、陵寢、宮室、府庫,至于圖籍、重器,百年積累,一朝棄之。惟聖

工部尚書孫德淵,忠諒明敏,可以大用,近皆許告老,願復起而任之,必能有所建立以 執 政者每對天顏,何以仰答清問也。今之所急,莫若得人,如前御史大夫裴滿德仁、 臣 .聞安危所繫在於一相,孔子稱「危而不持,顚而不扶,則將焉用」。"事勢至此,不

以塞賢路也。 利國家。 於理,得無益、失無損者,縱其尙壯,亦安所用。方時多難,固不容碌碌之徒備員尸素, 難,凡知治體者皆當重惜,況此者舊,豈宜輕棄哉。 太子太師致仕孫鐸,雖頗衰疾,如有大議猶可賜召,或就問之。人才自古所 惟陛下宸衷剛斷,黜陟一新,以幸天下。臣前爲拾遺時,已嘗備論擇相 若乃臨事不盡其心,雖盡心而 不明

之道,乞取臣前奏幷今所言,加審思焉。

爲己任。夫將者貴謀而賤戰,必也賞罰使人信之而不疑,權謀使人由之而不知,三軍 爾、涿州刺史內族從坦、昭義節度使必蘭阿魯帶,或忠勤勇幹,或重厚有謀,皆可任之 各舉所知,果得眞才,優加寵任,則戰功可期矣。如河東宣撫使胥鼎、山東宣撫使完顏 由是兵輕其將,將畏其兵,尚能使之出死力以禦敵乎。願令腹心之臣及閑於兵事者, 才故也。私於所暱,賞罰不公,至於衆怨,而懼其生變則撫摩慰籍,一切爲姑息之事。 奔走號令以取勝,然後中心誠服而樂爲之用。邇來城守不堅,臨戰輒北,皆以將之不 臣又聞將者民之司命,國家安危所繫,故古之人君必重其選,爲將者亦必以天下

叉曰:

以扞方面

河北諸路以都城旣失,軍戶盡遷,將謂國家舉而棄之,州縣官往往逃奔河南。

古

令所 遣 目,或加爵命以收其心,能取一府者卽授以府長官,州縣亦如之,使人懷復土之心。 陳請,仍先賞之,減其日月。 不 ·知出此,而但爲清野計,事無緩急惟期速辦,今晚禾十損七八,遠近危懼,所謀可謂 足實幹濟者,以文檄官賞招諸脅從人,彼旣苦於敵役,來者必多,敵勢當自削。有司 在根括,立期遣還,違者勿復錄用。未嘗離任者議加恩賚, 州縣長貳官並令兼領軍職,許擇軍中有才略膽勇者爲頭 如願自効河北者亦聽 別

叉曰:

大

戾

所蓄積,雖在私室猶公家也。 臣 京師諸夏根本,況今常宿重兵,緩急征討必由于此,平時尙宜優於外路,使百姓有 |頃看 讀陳言,見其盡心竭誠以吐正論者率皆草澤疏賤之人,況在百僚,豈無爲 今有司搜括餘糧,致轉販者無復敢入,宜卽止之。

國 深 憂進章 疏者乎? 誠宜明勅中外,使得盡言不諱,則太平之長策出矣。

韶付尙書省,略施行焉。

論也。 決,古及左司諫抹燃胡魯刺 尋遷尙書左司員外 近者朝廷急於求治,有司奏請從權立法:職官有犯應贖者亦多的決。 郎,兼起居注,無何,轉右司諫。 上言曰:「禮義廉耻以治君子,刑罰 時丞相高琪立法,職官有犯皆的 威 獄 以治小人,此萬世 夫爵祿所以馭 一不易

耻,回則陵犯之心益肆。其弊豈勝言哉。伏願依元年赦恩『刑不上大夫』之文,削此一切 費也,

貴不免辱,

則卑賤者又何加焉。

車駕所駐非同征行,

而凡科徵小過皆以軍期罪之,

不 慮者,爲上者將曰官猶不免,民復何辭,則苛暴之政日行。 廷遴選,多由文行、武功、閥閱而進,乃與凡庶等,則享爵祿者亦不足爲榮矣。 已甚乎。陛下仁恕,決非本心,殆有司不思寬靜可以措安,而專事督責故耳。 爲下者將曰彼旣亦然,吾復何 且百官皆朝 抑叉有大可

之,其破必矣。」上以示尚書省,高琪沮其議,遂不行。是月,始置招賢所,令古等領其事 望未遽進也。此時正宜選募銳卒併力擊之,且開其歸路,彼旣疑惑,遇敵必走,我衆從而襲 諸前,陝西之衆議其後,或欲先令覘者同趨向之便,或以深入人境非其地利而自危,所以觀 關 之法,幸甚。」上初欲行之,而高琪固執以爲不可,遂寢。 而朝廷甫知,此蓋諸將欺蔽罪也。雖然,大兵駐閿鄉境數日不動,意者恐吾河南之軍逆 四年,以右司諫兼侍御史。時大兵越潼關而東,詔尚書省集百官議,古上言曰:「兵踰

跳梁,計必不敢深入,其侮嫚之語,特市井屠沽兒所爲,鳥足較之。 議。」於是集衆議于都堂,古曰:「宋人孱弱,畏我素深,且知北兵方强,將恃我爲屛蔽, 人構禍久矣,朕姑含容者,衆慮開兵端以勞吾民耳。今數見侵,將何以處,卿等其與百官 興定元年七月,上聞宋兵連陷贛楡、漣水諸縣,且獲偽檄,辭多詆斥,因諭宰臣曰:「宋 止當命有司移文,諭以 雖時

討之,顧亦未晚也。」時預議者十餘人,雖或小異而 本朝累有大造,及聖主兼愛生靈意。 彼若有知,復尋舊好,則又何求。 大略則一,旣而丞相高琪等奏:「百官之 其或怙惡不悛,舉衆

時朝廷以諸路把軍官時有不和不聽,更相訴訟,古上言曰:「臣以爲善者有勸,惡者有 苟善惡不聞,則上下相蒙,懲勸無所施矣。」上嘉納之。

議,咸請嚴兵設備以逸待勞,此上策也。」上然之。

散揆討之。 肩,然後經略朔方,則陛下享中興之福,天下賴涵養之慶矣。 願陛下隱忍包容,速行此策,果通和,則大兵聞之亦將歛跡,以吾無掣肘故 彼見吾勢大,必堅守不出,我軍倉猝無得,須還以就糧,彼復乘而襲之,使我欲戰不得、欲退 不遠矣。或謂專用威武可使宋人屈服,此殆虚言,不究實用。借令時獲小捷,亦不足多賀。 功,告之祖廟,書之史册,爲萬世美談,今其可不務乎。今大兵少息,若復南邊無事,則太平功,告之祖廟,書之史册,爲萬世美談,今其可不務乎。今大兵少息,若復南邊無事,則太平 懲,國之大法也。 不能,則休兵之期殆未見也。 丘崇,因之繼好,振旅而還。 , 乃 勅元帥府遣人議之, 自是太平幾三十年。 古以朝廷欲舉兵伐宋,上疏諫曰:「昔大定初,宋人犯宿州,已而屢敗,世宗料其不敢遽 揆慮兵興費重不能久支,陰遣侂胄族人賚乃祖琦畫像及家牒,僞爲歸附,以見 夫以世宗、章宗之隆,府庫充實,天下富庶,猶先俯屈 況彼有江南蓄積之餘,我止河南 泰和中,韓侂胄妄開邊釁,章宗遣駙馬僕 惟陛下略近功、慮後患,不勝 一路征歛之弊,可爲寒心。 也。 河南 旣得息 以即成

幸甚。」上是其言,卽命古草議和牒文,旣成以示宰臣,宰臣言其有哀祈之意,自示微弱,遂

不用。

州民重遷,遮道控訴,百家奴諭以天子恐傷百姓之意,且令召晉安兵將護老幼以行。 職。 漏,梭失以聞,削官一階,解職,特免殿年。三年正月,尚書省奏諫官闕員, 古等頗寬縱之,胡撒合自縊死,有司以故出論罪,遂有是罰。 之死皆胡撒合所賣也,其閱實以聞。」奧屯胡撒合旣下獄,上怒甚,亟欲得其情以正典刑 兵至則必見强也,廼譟入州署,索百家奴殺之。胡撒合畏禍,矯徇衆情, 日,衆肩昇導擁、讙呼拜謝而去。旣還,詔古與監察御史紇石烈鐵論鞫之,諭旨曰:「百家奴 曰:「朕昨暮方思古,而卿等及之,正合朕意,其趨召之。」復拜左補闕。 八月,削官四階,解 初,朝廷遣近侍局直長溫敦百家奴暨刑部侍郎奧屯胡撒合徙吉州之民於丹以避兵鋒, 監察御史粘割梭失劾権貨司同提舉毛端卿貪汚不法,古以詞理繁雜輒爲删定,頗有 與之會飲歌樂盡 因以古爲請, 脫

伊 不爲士大夫所重,時論但稱其直云。 爲挽舟,數十里不絕,其爲時人愛慕如此。正大七年卒,年七十四。古平生好爲詩及書,然 川亭。 哀宗初卽位,召爲補闕,俄遷左司諫,言事稍不及昔時。 古性嗜酒、老而未衰、每乘舟出村落間、留飲或十數日不歸、 未幾,致仕,居伊陽,郡守爲起 及泝流而上, 老稚爭

失,請戰一書尤爲剴切,其略云:「今日之事,皆出陛下不斷,將相怯懦,若因循不決,一旦無 如之何,恐君臣相對涕泣而已。」可謂切中時病,而時相赤盞合喜等沮之,策爲不行,識者惜 尚字和之,滄州人,大安元年進士。 天興間,有右司諫陳尚者,遇事輒言無少隱,上嘗面獎。 及汴京被兵, 屢上封事言得

貞祐用兵,生民塗炭。石琚爲相,君臣之間務行寬厚。 隆世宗,難矣。 忠愛。三人所言皆切中時病,有古諍臣之風焉。 顏素蘭首攻琪惡,謂琪必亂紀綱。 贊曰:宣宗卽位,孜孜焉以繼述世宗爲志,而其所爲一切反之。 大定講和,南北稱治, 陳規力言刀筆吏殘虐,恐壞風俗。許古請與宋和,辭極 宣宗知其爲直, 高琪秉政、惡儒喜吏、上下苛察。完 而不用其言, 如是而欲比

校勘記

[一] 伏願遴選學術詼博 按「詼」殿本作「該」。 疑當作「浹」。 記

[1] 使初遷時去留從其所願 「時」原作「將」,據殿本改。

頓次則排門擇屋 「頓」字筆畫原有殘缺,類「頃」,殿本卽誤作「頃」。道光四年殿本補足原缺,

作「頓」,今從之。

29 _/ 四年三月 按本書卷一一一 撒合輦傳,正大「四年,大元旣滅西夏,進軍陝西。 四月丙申,召尙

書溫迪罕壽孫、中丞烏古孫卜吉、祭酒裴滿阿虎帶、直學士蕭察世達、右司諫陳規、監察烏古論

四 和 完顏習顯、同 .判睦親府事撒合輦同議西事」。疑「三月」當作「四月」。

[五] 吾復何耻 「吾」下原係一空格、今據殿本補「復」字。

金史卷一百十

列傳第四十八

楊雲翼 趙秉文 韓玉 馮壁 李獻甫 雷淵 程震

宗閱之,記其姓名,起授前職,兼吏部郎中。 提點司天臺,無翰林修撰,俄兼禮部郎中。 事,因召見,章宗咨以當世之務,稱旨。 官。 考恒皆贈官于朝。 ,詞賦亦中乙科,特授承務郎、應奉翰林文字**。** 泰和元年,召爲太學博士,遷太常寺丞,兼翰林修撰。 楊雲翼字之美,其先贊皇檀山人,六代祖忠客平定之樂平縣,遂家焉。 雲翼天資穎悟,初學語輒畫地作字,日誦數千言。 登明昌五年進士第 大安元年,翰林承旨張行簡薦其材,且精術數,召授 崇慶元年,以病歸。 三年,轉禮部侍郞,兼提點司天臺。 承安四年,出爲陝西東路兵馬都總管判 七年,簽上京、東京等路按察司 貞祐二年,有司上官簿,宣 會祖靑、祖郁、

列傳第四十八 楊雲翼

四年,大元及西夏兵入鄜延,

潼關失守,朝議以兵部尚書蕭察阿里不孫爲副元帥以禦

之。雲翼言其人言浮於實,必誤大事。不聽,後果敗。

年,改吏部尚書。凡軍興以來,入粟補官及以戰功遷授者,事定之後,有司苛爲程式,或小 年,築京師子城,役兵民數萬,夏秋之交病者相籍,雲翼提舉醫藥,躬自調護,多所全濟。四 數人以爲不可,議遂格。 高琪後以事譴之,雲翼不卹也。 二年,拜禮部尚書,兼職如故。 主之甚力、詔集百官議、戶部尚書高變等二十六人同聲曰:「可。」雲翼獨與趙秉文、時戩等 者例外除,以卿遇事敢言,議論忠讜,故特留之。」時右丞相高琪當國,人有請權油者,高琪 有不合輒罷去,雲翼奏曰:「賞罰國之大信,此輩宜從寬錄,以勸將來。」 興定元年六月,遷翰林侍講學士,兼修國史,知集賢院事,兼前職,詔曰:「官制入三品

息肩、則社稷之福也。」上色乃和。 以力戰爲言,上俯首不樂,雲翼徐以孟子事大、事小之說解之,且曰:「今日奚計哉,使生靈 是年九月,上召雲翼及戶部尚書變、翰林學士秉文於內殿,皆賜坐,問以講和之策,或

擁强兵,瞻望不進。鄜延帥臣完顏合達以孤城當兵衝,屢立戰績。 其功如此,而承立之罪 翼就鞫之,獄成,廷奏曰:「承立所坐皆細事,不足問。向大兵掠平涼以西,數州皆破,承立坐 如彼,願陛下明其功罪以誅賞之,則天下知所勸懲矣。 自餘小失,何足追咎。」承立由是免 十一月,改御史中丞。宗室承立權參知政事,行尙書省事於京兆,大臣言其不法,詔雲

官,合達遂掌機務。

書。尙書出政之地,政無大小皆當總領。今軍旅大事,社稷繫焉,宰相乃不得預聞,欲使利 哀宗卽位、首命雲翼攝太常卿、尋拜翰林學士。 正大二年二月、[1] 復爲禮部尚書、兼 韶集百官議省費,雲翼曰:「省費事小,戶部司農足以辦之。樞密專制軍政,蔑視尙

病兩不相蔽得乎。」上嘉納之。

萬年錄、聖學、聖孝之類凡二十篇。 逆於汝心」「有言遜於汝志」等數條,一皆本於正心誠意,敷釋詳明。 上聽忘倦。尋進鑑鑑 如經生分章析句,但知爲國大綱足矣。因舉「任賢」「去邪」、「與治同道」「與亂同事」、「有言 明年,設益政院,雲翼爲選首,每召見賜坐而不名。時講尚書,雲翼爲言帝王之學不必

獻其可。言有不從,雖引裾、折檻、斷鞅、軔輪有不恤焉者。當是時也,姑徇事君之虛禮,而 之休戚,一一陳之,則向所謂禮者特虛器耳。君曰可,而有否者獻其否。君曰否,而有可者 不知事君之大義,國家何賴焉。」上變色曰:「非卿,朕不聞此言。」 君命召不俟駕而行,受命不宿於家,是皆事君之禮,人臣所當盡者也。然國家之利害,生民 君之禮,有事君之義。禮,不敢齒君之路馬,蹴其芻者有罰,入君門則趨,見君之几杖則起, 當時朝士,廷議之際多不盡言,顧望依違,寖以成俗。一日,經筵畢,因言:「人臣有事

亦然,人君先正其心,則朝廷百官莫不一於正矣。」上矍然,知其爲醫諫也。 雲翼嘗患風痺,至是稍愈,上親問愈之之方,對曰:「但治心耳。 心和則邪氣不干,治國

夏人旣通好,遣其徽猷閣學士李弁來議互市,往返不能決,朝廷以雲翼往議乃定。 五.

年卒,年五十有九,諡文獻。

宋爲地,則疑與之有謀。 至於宰執,他事無不言者,獨南伐則一語不敢及。 雲翼乃建言曰: 事,知無不言。貞祐中,主兵者不能外禦而欲取償於宋,故頻歲南伐。有言之者,不謂之與 衆,伺我有警而出師耶。戰而勝且如此,如不勝害將若何。且我以騎當彼之步,理宜萬全, 又綴之,則我三面受敵矣,故欲我師乘勢先動,以阻其進。 借使宋人失准,且不敢來,此戰 負,此議論所以偏也。臣請兩言之。夫將有事於宋者,非貪其土地也,第恐西北有警而南 率皆諛辭,天下有治有亂,國勢有弱有强,今但言治而不言亂,言强而不言弱,言勝而不言 水以瀦淮南之地,則我軍何以善其後乎。」及時全倡議南伐,宣宗以問朝臣,雲翼曰:「朝臣 而爭利於舟楫之間,恐勁弓良馬有不得騁者矣。彼若扼江爲屯,潛師於淮以斷饟道,或決 「國家之慮,不在於未得淮南之前,而在於旣得淮南之後。蓋淮南平則江之北盡爲戰地,進 雲翼天性雅重,自律甚嚴,其待人則寬,與人交分一定,死生禍福不少變。 就如所料,其利猶未可必然。 彼江之南其地尚廣,雖無淮南豈不能集數萬之 其於國家之

獨 守臣,敗吾軍而禽主將。 前鋒,今能之乎,此人事之不同也。 也。 臣猶恐其有不敢恃者。 全 向日弓箭手之在西邊者 [三] 一遇敵則搏而戰、袒而 果 如 大敗 冬則 前 日 水 於淮上,一軍全沒。宣宗責諸將曰:「當使我何面目見楊雲翼 涸 願陛下思其勝之之利,又思敗之之害, 而 陸多 一夏則水潦而 蓋今之事勢與泰和不同,泰和以冬征,今我以夏往,此天時之不 囊則畏我如彼, 塗淖, 此地 議者徒見泰和之易,而不知今日之難。 今則侮我如 利之不同 射, 無悅甘言,無貽後悔。」章奏不報。 此 彼已奔北之不暇。 也。 夫以夏人既非前日,奈何 泰和 舉天下全力,驅 郭。 今乃陷吾城 請以夏人觀之, **処軍以** 以宋人 而 虜 司 時

體,今人一支受病則四體爲之不寧,豈可專治受病之處而置其餘哉。」朝廷是之。 已。」宣宗悟,盡釋之。 哀宗以河南旱,詔遣官理寃獄,而不及陝西,雲翼言:「天地 偽 也。 河 朔民十有一人為游騎所迫,泅河而南,有司論罪當死,雲翼曰:「法所重私渡者,防姦 今平民爲兵所迫,奔入於河,爲逭死之計耳。 今使不死於敵而 死於法,後惟從 人通為 敵 而

著文集若干卷,校大金禮儀若干卷,續通鑑若干卷,周禮辨一篇,左氏、莊、列賦各一篇,五 星聚井辨一篇,縣象賦一篇,勾股機要、象數雜說等著藏于家。 司天有以太乙新歷上進者,尚書省檄雲翼參訂,摘其不合者二十餘條, 曆家稱焉。

塞簿,以課最遷邯鄲令,再遷唐山。 趙秉文字周臣,磁州滏陽人也。 。丁父憂,用薦者起復南京路轉運司都勾判官 幼頴悟,讀書若夙習。登大定二十五年進士第,調安

後起爲同知岢嵐軍州事,轉北京路轉運司支度判官。「三承安五年冬十月,陰晦連日,宰相 者,秉文乃曰:「初欲上言,嘗與修撰王庭筠、御史周昂、省令史潘豹、鄭贊道、高坦等私議。」 章宗召問、言頗差異、於是命知大興府事內族膏等鞫之。、秉文初不肯言、詰其僕、歷數交游 飢,出祿栗倡豪民以賑,全活者甚衆。[四] 於用刑,每聞赦將至,先掊賊死乃拜赦,而盜愈繁。 |秉|文爲政一從寬簡,旬月盜悉屏跡。 歲 泰和二年,召爲戶部主事,遷翰林修撰。十月,出爲寧邊州刺史。三年,改平定州。前政苛 以言事降授,聞其人有才藻、工書翰,又且敢言,朕非棄不用,以北邊軍事方興,姑試之耳。 張萬公入對,上顧謂萬公曰:「卿言天日晦冥,亦猶人君用人邪正不分,極有理。若趙秉文囊 當時爲之語曰:「古有朱雲,今有秉文,朱雲攀檻,秉文攀人。」士大夫莫不恥之。坐是久廢, 庭筠等皆下獄,決罰有差。有司論、東文上書狂妄,法當追解,上不欲以言罪人,遂特줲焉。 明昌六年,入爲應奉翰林文字,同知制誥。上書論宰相胥持國當罷,宗室守貞可大用。

列營其外,涉暑雨器械弛敗,人且病,俟秋敵至將不利矣。可遣臨潢一軍擣其虚,則山西之 大安初,北兵南嚮,召秉文與待制趙資道論備邊策,秉文言:「今我軍聚於宣德,城小,

部郎中、兼翰林修撰、俄轉翰林直學士。 圍可解,兵法所謂『出其不意、攻其必救』者也。」衞王不能用,其秋宣德果以敗聞。 尋爲兵

「秉文志固可尙,然方今翰苑尤難其人,卿宿儒當在左右。」不許。 遠輩以身許國,亦書生也。」又曰:「使臣死而有益於國,猶勝坐縻廩祿爲無用之人。」上曰: 爲國家守殘破一州,以宣布朝廷恤民之意,且曰:「陛下勿謂書生不知兵,顏眞卿、張巡、許 貞祐初,建言時事可行者三:一遷都,二導河,三封建。朝廷略施行之。 明年,上書願

遏,漸至廢絕。臣愚以爲宜立回易務,令近上職官通市道者掌之,給以銀鈔粟麥縑帛之類, 權其低昂而出納。」詔有司議行之。 四年,拜翰林侍講學士,言:「寶劵滯塞,蓋朝廷初議更張,市肆已妄傳其不用,因之抑

喧噪,愬於臺省,以爲趙公大壞文格,且作詩謗之,久之方息。俄而獻能復中宏詞,入翰林, 益甚。蓋有司惟守格法,所取之文卑陋陳腐,苟合程度而已,稍涉奇峭,卽遭絀落,於是文 風大衰。貞祐初,秉文爲省試,得李獻能賦,雖格律稍疏而詞藻頗麗,擢爲第一。舉人遂大 知貢舉,坐取進士盧亞重用韻,至削兩階,因請致仕。。金自泰和、大安以來,科舉之文其弊 秉文竟以是得罪。 興定元年,轉侍讀學士。拜禮部尚書,兼侍讀學士,同修國史,知集賢院事。又明年,

而

德在初,當日親經史以自裨益,進無逸直解、貞觀政要、申鑒各一通。 上嘉納焉。 無以自效,願開忠言、廣聖慮,每進見從容爲上言,人主當儉勤、愼兵刑,所以祈天永命者, 五 年,復爲禮部尚書,入謝,上曰:「卿春秋高,以文章故須復用卿。」秉文以身受厚恩, |哀宗卽位,再乞致仕,不許。 改翰林學士,同修國史,兼益政院說書官。 以上嗣

官至資善大夫、上護軍、天水郡侯。 閭巷閒皆能傳誦,洛陽人拜詔畢,舉城痛哭,其處人如此。 是年五月壬辰,卒,年七十四,積 民,一士可擢用,大則拜章,小則爲當路者言,殷勤鄭重,不能自已。 三月, 草開興改元詔, 情俱盡。及兵退,大臣欲稱賀,且命爲表,秉文曰:「春秋『新宮火,三日哭』。今園陵如此,酌 之以禮,當慰不當賀。」遂已。時年已老,日以時事爲憂,雖食息頃不能忘。每聞一事可便 正大九年正月,汴京戒嚴,上命秉文爲赦文,以布宣悔悟哀痛之意。秉文指事陳義,辭

太玄箋贊六卷,文中子類說一卷,南華略釋一卷,列子補注一卷,删集論語、孟子解各一十 爲一編以進焉。」秉文自幼至老未嘗一日廢書,著易叢說十卷,中庸說一卷,揚子發微一卷, 卷,資暇錄一十五卷,所著文章號遙水集者三十卷。 正大問,同楊雲翼作龜鑑萬年錄上之。又因進講,與雲翼共集自古治術,號君臣政要

|東文之文長於辨析,極所欲言而止,不以繩墨自拘。 七言長詩筆勢縱放不拘一律,律

詩壯麗,小詩精絕多以近體爲之,至五言古詩則沉鬱頓挫。 河、湟者,多言夏人問,秉文及王庭筠起居狀,其爲四方所重 如此。 字畫則草書尤遒勁。 朝使至自

楊雲翼嘗與秉文代掌文柄,時人號楊趙。 爲人至誠樂易,與人交不立崖岸,未嘗以大名自居。仕五朝,官六卿,自奉養如寒士。 然晚年頗以禪語自汚,人亦以爲秉文之恨云。

宣宗雖不見聽,此心何愧景略。庭筠之累,秉文所爲,茲事大愧高允。 贊曰:楊雲翼、趙秉文,金士巨擘,其文墨論議以及政事皆有足傳。 雲翼諫伐宋一

此家作傳耶。」泰和中,建言開通州潞水漕渠,船運至都。 士,入翰林爲應奉,應制一日百篇,文不加點。 又作元勳傳,稱旨,章宗嘆曰:「勳臣何幸,得 韓玉字溫甫,其先相人,會祖錫仕金,以濟南尹致仕。 陞兩階,授同 知陝西東路轉運 玉明昌五年經義、辭賦兩科進

軍,旬日得萬人,與夏人戰,敗之,獲牛馬千餘。時夏兵五萬方圍平涼,又戰于北原,夏 大軍至,是夜解去。當路者忌其功,驛奏玉與夏寇有謀,朝廷疑之,使使者授玉河平軍節度 大安三年,都城受圍。夏人連陷邪、涇,陝西安撫司檄玉以鳳翔總管判官爲都統府募

列

副使,且覘其軍。

M,被囚死於郡學,臨終書二詩壁間,士論**寃之**。 玉,玉不預知,其書乃爲安撫所得,及使者覘|玉軍,且疑預公直之謀,即實其罪。 只如今日目前,何顏以居人世。」公直一軍行有日矣,將有違約、「Ki國朝人有不從者,輒以 云:「人誰無死,有臣子之當然。事至于今,忍君親之弗顧。勿謂百年身後,虛名一聽史臣。 坐費、盡膏血於生民。棄甲復來、竭資儲於國計。要權力而望形勢、連歲月而守妻孥。」又 傳檄州郡云:「事推其本,禍有所基,始自賊臣貪容姦賂,繼緣二帥貪固威權。」又云:「裹糧 軍法從事。 先是,華州李公直以都城隔絕,謀舉兵入援,而」玉恃其軍爲可用,亦欲爲勤王之舉,乃 京兆統軍便謂公直據華州反,遣都統楊珪襲取之,遂置極刑。公直曾爲書約 |玉道出華

然,剛直之氣,必不下沉。 子不疑,字居之。以父死非罪,誓不祿仕。 見可無慮。 世亂時艱,努力自護,幽明雖異,寧不見爾。」讀者 藏其父臨終時手書云:「此去冥路、吾心皓

惻然。

等,調莒州軍事判官,宰相奏留校祕書。未幾,調遼濱主簿。縣有和糴粟未給價者餘十萬 馮璧字叔獻,真定縣人。幼頴悟不凡,弱冠補太學生。 承安二年經義進士,制策復優

斛 ,散貯 民居,以富 人掌之,有腐敗則責償於民,民殊苦之。 壁白 漕 司,即 日罷之,民 大悅。

自東阿 博 |岡| 招降吳曦 到 而 幷 兩當 、李果偕行。 禍 至 丞召補尚書省令史,用宗室承暉薦授應奉翰林文字,兼韓王府記 其 和 軍民三萬餘衆 寧初 一部先 民,無乃 匹 年 忽沙虎弑逆,遂去官。 道逢 以 調 與 文告曉之,然後用兵。 廊 軍 詔 州 旨相 錄 鼓舞迎勞 士 所 事。行明年,伐蜀,行部 得子 **戾乎**?」主帥 女金帛牛馬皆奪付 ,壁以朝旨慰遣之。 **憾之**, 蜀人守散關 以壁招 檄充軍前 .剛,使歸其家,軍士則 及還, 不下,金兵殺獲甚衆,壁言:「彼 兩當潰卒,壁即日率鳳州 檢察,帥 主 帥嘉其能, 府 以 室參 書檄委之。 奏遷一 以違 軍 制 0 已降官屬 官。 決遣之。比 俄轉太學 章宗 軍 五年, 拒 淡 守 欲

官。 撰。 衞 軍沈思忠以下 之。 ,召四將喻 宣宗 六月 時山 初,監察御史本溫被命汰宗室從坦 總領撒 東 南 改 合問冒券四百餘口 遷 大理 以 河朔軍六十餘萬),壁時避兵東方, 四將屯 上意,思忠等挾叛者請還奏之,壁責 丞, 衞 與臺官行 州 餘衆果叛入太行。 ц, . , 劾案 關中,劾奏姦贓之尤者商州防禦使宗室 由單父渡河詣 仰給縣官, 以 軍 聞,詔杖殺 於孟州, 率不逞輩竄 **汴梁,時相奏復前** 於是, 之,故所至爭自首,減幾及於半。 軍士欲謀變,本溫 以 大義,將 密院奏以壁代本溫 名其 士慚服 間 職。 ō 詔 懼 不不 壁 貞祐 重 不知所為 攝 日 福 一
竟
其
事 三年, 監 就 等十數 察御 汰 者 一) 尋 遷翰 史, 人,自是 三千人。 壁馳 有旨 復 進 汰 林 修 北 逐

權貴側目。

抗制使耶,待罪之禮恐不如此,使者還奏,獄能竟乎。」牙吾塔伏地請死,壁曰:「兵法,進退 符,易以他帥攝。牙吾塔入獄,兵士譁譟,以吾帥無罪爲言,璧怒責牙吾塔曰:「元帥欲以兵 自專,有失機會以致覆敗者斬。」即擬以聞,時議壯之。 不戰,乃無功而歸。行省奏牙吾塔故違節制,詔壁佩金符鞫之。 吾塔不從命,乃率精騎由滁州略宣化,縱兵大掠。故兵所至原野蕭條,絕無所資,宋人堅壁 興定四年,以宋人拒使者於淮上,遣兵南伐,公詔京東總帥紇石烈牙吾塔攻盱眙,牙 壁馳入牙吾塔軍, 奪其金

減冗食,備選鋒,緩疑似以愼刑,擇公廉以檢吏,屯戍革朘削之弊,權貴嚴請託之科。 自治之策四,謂別賢佞,信賞罰,聽覽以通下情,貶損以謹天戒。 十月、改禮部員外郎、權右司諫、治書侍御史。 韶問時務所當先者,壁上六事,大略言 叉條

發永城令簿姦贓,伯嘉與令有違,付令有司,釋簿不問,燕語之際又許參佐克忠等臺職,壁 韶以東方飢饉,盜賊並起,以御史中丞完顏伯嘉爲宣慰使,監察御史道遠從行。 道遠

皆劾之,伯嘉竟得罪去。

易其人,不爲備。一日,紅衲數百聯筏南渡,殘下邑而去。命璧鞫之。壁以二將託疾營私, 初,諜者告歸德行樞密院言,河朔叛軍有竊謀南渡者,行院事胡士門、都水監使毛花輦

若求援禁近,必從輕典,君徒結怨權貴,果何益耶。」壁嘆曰:「睢陽行闕,東藩重兵所宿,門 聞寇弛備,且來不戰、去不追,在法皆當斬。 或以爲言:「二將皆寵臣,而都水者貲累巨萬,

廷之寇且不能禦,有大於此者復何望乎。」卽具所擬聞。

冤上之。 平居無事竭民膏血爲浚築計,一旦有警乃遽焚蕩而去,此而不誅,三尺法無用矣。」竟以無 今日重地,朝議擬爲駐蹕之所,若失此則河南、陝西有唇亡之憂。以彼宗室勳貴故使鎭之, 十數人皆以棄城罪當死,繫同州獄待報。同州官僚承望風旨,問壁何以處之,壁曰:「河中 四年,遷刑部郎中。關中旱,詔壁與吏部侍郎畏忻審理寃獄。 時河中帥阿虎帶及僚屬

上章乞骸骨,進一官致仕。正大九年,河南破,北歸,又數年卒,年七十有九。 冬十月,出爲歸德治中。 未幾,改同知保靜軍節度使,又改同知集慶軍節度使,到官即

絕人遠甚,故時人稱其精神滿腹。 李獻甫字欽用,獻能從弟也。博通書傳,尤精左氏及地理學。爲人有幹局,心所到則 興定五年登進士第,歷咸陽簿,辟行臺令史。

辯,延登不能折,往復數日不定,至以歲幣爲言,獻甫不能平,從旁進曰:「夏國與我和好百 正大初,夏使來請和,朝廷以翰林待制馮延登往議,時獻甫爲書表官,從行。夏使有口

傳

當以爲諱,乃今公言之。使者果能主此議,以從賜姓之例,弊邑雖歲捐五十萬,獻甫請以身 幣二十五萬疋、典故具在、君獨不知耶。 年,今雖易君臣之名爲兄弟之國,使兄輸幣寧有據耶。」使者曰:「兄弟且不論。 任之。」夏使語塞,和議乃定。 者尚忍言耶。 宋以歲幣餌君家而賜之姓, 岸然以君父自居, 夏國君臣無一悟者, 誠謂使者 後朝廷錄其功,授慶陽總帥府經歷官。 金朝必欲修舊好,非此例不可。」獻甫作色曰:「 宋歲輸吾國 使

兼右警巡使,死於察州之難,年四十。 書省令史。 尋辟長安令。 天興元年, 充行六部員外 京兆行臺所在,供億甚繁,獻甫處之常若有餘,縣民賴之以安。入爲尚 郎,守備之策時相倚任之。 以功遷鎮南軍節度副使,

所著文章號天倪集,留汴京。 獻甫死,其家亦破,同年華陰王元禮購得之,傳于世。

以跳 純游、遂知名。 世。 淵庶出,年最幼,諸兄不齒,父歿不能安於家,乃發憤入太學, 露恒兀 雷淵字希顏,一字季默,應州渾源人。父思,名進士,仕至同知北京轉運使,註易行于 坐讀書,不迎送賓客,人皆以爲倨。 登至寧元年詞賦進士甲科,調涇州錄事,坐高庭玉 其友商衡每爲辯之, 獄幾死。 衣弊履穿, 且 賙 卹焉。 坐楊無席,自 後從李之

後改東平,河朔重兵所在,驕將悍卒倚外敵爲重,自行臺以下皆摩撫之,淵出入軍中偃

然不爲屈。 不數月,閭巷間多畫淵像,雖大將不敢以新進書生遇之。 尋遷東阿令,轉徐州

觀察判官。

彈劾不避權貴,出巡郡邑所至有威譽,奸豪不法者立箠殺之。 「雷半千」,坐此爲人所訟,罷去。久之,用宰相侯擊薦,起爲太學博士、南京轉運司戶籍判 興定末,召爲英王府文學兼記室參軍,轉應奉翰林文字。 至蔡州,杖殺五百人,時號 拜監察御史,言五事稱旨,又

正大庚寅倒廻谷之役,淵嘗上書破朝臣孤注之論,引援深切,灼然易見,主兵者沮之,

策竟不行。

官、遷翰林修撰。

一夕暴卒,年四十八。

應,罷去。 攝遂平縣事,年少氣銳,擊豪右,發姦伏,一邑大震,稱爲神明。 無不 駡不休,雖痛自懲創,然亦不能變也。 往來。 爲 人軀幹雄偉,髯張口哆,顏渥丹,眼如望洋,遇不平則疾惡之氣見於顏間,或嚼齒大 後凡居一職輒震耀,亦坐此不達。 居京師,賓客踵門未嘗去舍,家無餘貲,及待賓客甚豐腆。莅官喜立名, 爲文章詩喜新奇。 善結交,凡當塗貴要與布 **嘗擅笞州魁吏,州檄召之不** 初登第 衣 名

程震字威卿,東勝人。 與其兄鼎俱擢第。 震入仕有能聲。 興定初,詔百官舉縣令, **元**

恃權勢、蔑棄典禮、開納貨賂、進退官吏。縱令奴隸侵漁細民,名爲和市,其實脅取。 民、震以法劾之、奏曰:「荆王以陛下之子,任天下之重。 杖大奴尤不法者數人。未幾,坐為故吏所訟,罷官。歲餘,嘔血卒。 不法不可枚舉。陛下不能正家,而欲正天下,難矣。」於是,上責荆王,出內府銀以償物直, 得陳留,治爲河南第一,召拜監察御史,彈劾無所撓。 不能上贊君父,同濟艱難。 時皇子荆王爲宰相,家僮輩席 顧 諸所 乃專 勢侵

不能久留於朝,士論惜之。 **震爲人剛直有材幹,忘身徇國,不少私與。及爲御史,臺綱大振,以故小人側目者衆,**

事折之,夏使語塞而和議定。淵爲御史,權貴歛避,古之國士何加焉。 疾惡太甚,議者以酷譏之,瑕豈可以掩瑜哉。 而死,直士之不容於世也久矣。 吁。 人。牙吾塔之凶暴,壁以王度繩之,卒不敢動。夏人援宋例以邀歲幣,獻甫以宋賜夏姓一 贊曰:韓玉、馮璧、李獻甫、雷淵皆金季豪傑之士也。 邠、涇之變,玉募兵旬日而得萬 程震劾荆抵罪,比蹤馮、雷,然亦以羣小齟齬 玉以疑見冤,璧、淵

- 正大二年二月 三年八月,「詔設益政院于內廷,以禮部尚書楊雲翼等爲益政院說書官」。又卷五六百官志所記 「二年」原作「三年」。按下文有「明年設益政院」云云、本書卷一七哀宗紀、正大
- 同。 今據改。
- \subseteq 向 日 弓箭手之在西邊者 「手之」原作「之手」,據文義乙正。
- = 支度 判官 原作「度支判官」。 今據本書卷五七百官志乙正。
- 四 |德 十 修撰,考滿留再任。 敗聞」之下,「三年」當作「二年」。 月出為寧邊州刺史三年改平定州至全活者甚衆 、敗聞。 十月,出 衞紹王大安初,北兵入邊,召公與待制趙資道論邊備……王不能用 為寧邊州刺史。 元遺山集卷一七閑閑公墓銘,「泰和二年改戶部主事,遷翰 二年,改平定州。……入爲兵部郞中兼翰林修撰」。 按以上六十六字當在下文「其秋宣德果以 一,其秋宣 考之澄 林
- 五五 五 又明年知貢舉 試,進上盧元謬誤, 盧亞以下進士第」, 年」、「盧亞」當作「盧元」。 坐取進士盧亞重用韻 濫放及第,讀卷官禮部尚書趙秉文……當奪三官降職」。 與此年代不合。 又卷一〇〇李復亭傳,「興定五年三月, 按本書卷一七哀宗紀,正大四年六月「丙辰,賜詞賦經義 廷試進士, 則「又明年」當 復亨監

爲

水文集詩文皆合,此誤。

ハベム 將有違約 按中州集卷八韓玉小傳記此事作「將佐違約」。 記

卷九八完顏綱傳記其事亦在泰和六年,知此「四年」當是泰和四年。今據補。 泰和六年十二月辛酉,「完顏綱遣京兆錄事張仔會吳曦于興州之置口,曦具言所以歸朝之意」。 年」決非承安四年。又本卷下文云:「明年伐蜀……,章宗欲招降吳曦」。考本書卷一一章宗紀, 泰和四年調鄜州錄事 年中乙科,調莒州軍事判官。 原脫「泰和」二字。按元遺山集卷一九內翰馮公神道碑銘,「壁以承安二 丁母憂、服闋、調遼濱主簿。丁父憂、服闋、調鄜州錄事」。則此「四 又下文「明年」亦

當作「六年」。

興定四年以宋人拒使者於淮上遣兵南伐 補「興定」二字。又下文「四年」亦是興定四年。王鶚汝南遺事卷二,宣宗朝,阿虎帶「帥河中, 其事實在前一年。此處云「以宋人拒使者……」義尤明顯,蓋馮璧鞫牙吾塔在興定四年。 宋人不納而還。韶伐宋」。是伐宋事在興定三年。本書列傳中,紀年之下或偶述已發生之事,而 至淮中流、宋人拒之,自此和好遂絕」。又卷一五宣宗紀、「興定三年春正月庚午,呂子羽至淮, 十二月甲寅,朝議乘勝與宋議和,以開封治中呂子羽、南京路轉運副使馮璧爲詳問宋國使,行 以棄城應死,議親獲줲」。卽本卷所記之事,可爲佐證。 原脫「興定」二字。按本書卷六二交聘表,「興定二年

<u>〜</u> が ∪

韶百官舉縣令

「韶」原作「召」,據文義改。

金史卷一百十

列傳第四十九

古里甲石倫 内族訛可 撒合輦 强伸 烏林荅胡土

内族思烈 紇 石 烈 牙 吾 塔

戰,每任用之。貞祐二年,累遷副提控、太原府判官,與從宜都提控、振武軍節度使完顏蕭 刺都議拒守不合,措置乖方,敵因大入,幾不可禦。旣乃交章論列以自辨其無罪,上惡其不 古里甲石倫,隆安人。以武舉登第。 爲人剛悍頗自用,所在與人不合,宣宗以其勇善

正八品,萬戶正九品,千戶正班任使,謀克雜班。仍三十人爲一謀克,五謀克爲一千戶,四 未幾,遷同知太原府事。 列 傅 第四 + 九 古 里 甲 奏請招集義軍,設置長校,各立等差。都統授正七品職,副統 石 倫

和,部分統其兵。

千戶爲一萬戶,四萬戶爲一副統,兩副統爲一都統,外設一總領提控。 制可。

罷職,石倫遷絳陽軍節度使,權經略使,尋知延安府事、兼鄜延路兵馬都總管。 大元兵圍 四年,遷河東宣撫副使,上章言宣撫使烏古論禮不肯分兵禦敵,且所行多不法。 詔禮

忻州,石倫率兵往援,以兵護其民入太原,所保軍民甚衆。

鎭西軍節度使、兼嵐州管內觀察使、行元帥府事。 若不救汾州,豈細事哉。有司議罪如此,汝其悉之,益當戮力,以掩前過。」是年十一月,遷 力,故倚以濟事。尋聞汝嗜酒不法,而太原知府烏古論德升亦屢嘗爲朕言之,然皆瑣屑,乃 興定元年七月,改河平軍節度、兼衞州管內觀察使,詔諭曰:「朕初謂汝勇果,爲國盡

易以鎮守。」詔有功者各遷官一級,仍給降空名宣勅,令樞密院遣授之。 制,則隩、管保德、岢嵐、寧化皆不可知矣。今防秋不遠,乞朝廷量加旌賞,務令益盡心力, 兵寡而食不足,惟其上下協同,表裏相應,遂獲安帖。當大軍初入,郡縣倉皇,非此帥府控 守無虞。向者河東內郡皆駐以精甲,實以資儲,視邊城尤爲完富,然兵一至相繼淪沒。嵐 二年四月,石倫言:「去歲北兵破太原,游兵時入嵐州境,而官民將士悉力扞禦,卒能保

其還當由龍州谷以入太原。故臣嘗請兵欲扼其歸路,朝廷不以爲然,旣而皆如臣所料。始 三年二月,石倫奏:「向者幷、汾旣破,兵入內地,臣謂必攻平陽,平陽不守,將及潞州

其情 其糧 復擾 以 南 盞 尋 憂之,故復請 河 敵 東 分其勢,如此 吾 得胡剌 、陝西量 入 五千石, 本欲 吾郡 之 軍復 河 里忻等領軍以往矣。)要郡 東時,郡 報 縣 視 至 分精兵, 平陽, 朝 也。 日『嘗問 未殘者,則邊城 兵以圖 會汾州權元 廷以己有兵糧,冀或見用,以取重職,不可指爲實 庶幾太原可復也。」 縣民皆携老幼徙居 今敵 陝西 以增臣力, [戰守。 軍 居半歲,遺步 一數於 一河南 帥右都監抹然 但敵 指 而 適祖,但稱天祿等言之,未嘗親 之藩 樞府檄 日皆下 仍令陝西州郡近 .勢頗重,而往者皆新集白徒, 詔 騎 山險,後雖太原失守,而衆卒不從,其意謂敵不 籬 矣。 擾 陝西、河東行省 臣,幷將權 也。 一諸保聚,而官軍 胡剌 北路不 若敵兵久不去,居民盡從,屯兵 復太原。 河東者給之資糧,更令南路諸軍 太原治 守, 分糧與之,請兵之事 則南 臣召 中 竟無至者 郭遹 路 閱。 遹 爲 絕無 祖 祖 邊,去陝西 用 問糧 , ,民其能 、精銳, 、義軍李天祿等萬餘 也。 欲號 , 雖 恐不 則 令 〈積糧 以 然 人抗 其衆, 日 河南 方伐 散 能 臣 以固 乎。 在 已遣 勝。 益 宋 遹 綴 數處 人 留, 近, 夫太原. 祖 基 不 敵之南 乞於河 提控 本,而 人,就 不 臣 且

得 必爭,遣提控石盞吾里忻引官兵義兵共 返不 注 一授九品之職,以是請于朝,而 三月,石倫復上言曰:「頃者大 暇數十日,官軍皆敗亡之餘,鋒銳略盡,而義兵亦不習行陣, 執 兵破太原,招民耕稼、為 政以爲賞 圖收復。 功罰罪皆 叉以軍 須 士有功者宜速賞之,故擬 中覆。 人 駐 之基。 夫河 無異鳥 東去京 臣 以 太原 師 以重賞誘之 甚 要鎭,所 令吾 遠, 移 里

列

傳

第

四

+

九

古

里

甲

之弊,其與失太原之害孰重。」於是詔從其請,自太原治中及他州從七品以下職、四品以下 不可復則平陽之勢日危,而境土日蹙矣。今朝廷抑而不許,不過慮其濫賞耳。 猶恐不爲用,況有功而久不見報乎。 夫衆不可用則不能退敵, 敵不退則太原不可復, 借使有濫賞

散官,並聽石倫遷調焉。 州,而同知蕭察桓端拒而不發。又召同知寧邊軍節度使姚里鴉鶻與之議兵,竟不聽命。近 國,今所爲如此,豈報國之道哉!意謂河南之衆必不可分,但圖他日得以藉 |州防備之事非不素知,乃屢以步騎爲請何耶。 比授卿三品,且數免罪譴卿,嘗自誓以死報 乘之,孰與守禦。萬家等不從,未爲過也。」上以爲然,因遣諭石倫曰:「卿嘗行院于歸德,衞 自規畫,而使萬家往來應給,石州無人恐亦有失。武州邊郡正當兵衝,使憲率軍離城,敵或 職分,易以責辦。」宰臣惡之,乃奏曰:「桓端、鴉鶻已經奏改,無復可議。 石倫身兼行部,不 率所領併進,憲亦不至。臣猥當方面之任,而所統官屬並不禀從,乞朝廷嚴爲懲誡,庶人知 領兵將取太原,委石州刺史納合萬家權行六部,而辭以他故,幾誤軍糧。約武州刺史郭憲 心爲國,盡力經畫,亦足自效。萬家等若必懲戒,彼中誰復可使者,姑爲容忍可也。」 是月,石倫復言:「日者遣軍潛擣敵壘,欲分石州兵五百權屯方山,剿殺土寇,且備嵐 口耳。 卿果赤

閏三月,石倫駐兵太原之西,俟諸道兵至進戰,聞脅從人頗有革心,上言于朝,乞降空

勅、金銀符,許便宜 遷注 L",以招F 誘之。 上從 其請,並給付之,仍聽注 五品以下 官

蒲 刺 軍 都 民 六月,保 圖 同 之,蒲 狀 德 嵐 刺都 州 州帥府、言銀 振威軍萬戶 事,撫安其 乃與兵 更置 、王章 术 酒 哥 專恣慘酷, 、弩軍萬戶 召章等飲, 齊鎭 擒 私 造 而 殺 甲仗, 族誅之。 其刺 將 史孛术魯銀术哥, 謀 至是, 不 軌。 朝廷 石 倫 命行省 密令同 仍滅 胥 其 鼎 知 量 州 育 宜 事 官 遷 把

仍令蒲

刺

都

攝

州

衆焉

絞,旣 軍 償 買 前 住 直 以兵 六月 里 得 大元 而 皆 一,敵 無 遇 除 駐葭 用 兵梗 赦 遷 兵 名。 之乎。 功 金 韋 州 道 靑 安 三月, 止除名。 不 龍 軍 石 此 節 得 堡, 倫 人 度使, 進, Ŀ 輒 頗 詔 諭 分留買住 會青 善戰、果可 以 元光元年 元帥 石 行 龍 倫 帥 監軍 權 堡 府 兵千八百人, 地起 破 左 事 用 內 於葭州 都監,將 召還。 便當 族 爲 鄭 訛 州 遺 可 兵 旣 去 日 同 時鄜州元帥內族承立 會 而 知 令以餘 古亦 上黨 防 復 石 倫 禦使, 以 兵屯 罪 今 公、晉陽公往 有 以罪 白 免 與防禦使裴滿羊 綏德 衣 廢, 領 而 職 欲 者 援 再 後 慮 渠 之。 奏之。 起之,恐生 夏 雖 人人入 除名 哥部 兵 次彈 寇, 有 内 何 司 物 遣 平 害 論 酤 議,汝 納 寨東 也。 酒 罪 合 不

軍 石 倫 曉兵 代之。 事 石倫 今在 初 昌 赴 武 昌 武 宜 與 詔 諭 同 議 日 : 勿 卿 復 先朝 不 睦失計 宿 將 甚 也。」時北兵已至許, 有 威 望, 故 起 拜 是 職 石倫 0 元 赴鎮幾為游 帥 蘇 椿 武 監

正

大

八

年,

大兵

入

/河南

州

郡

無

不

下者,朝

議

以

權

昌

武

軍

節

度使

粘葛

仝周

不

知

兵

事

地起

列

傳

第

四

+

九

古

里

甲

石

偷

軍,口. 所獲。 官,何謂反耶。」大將怒其不屈,卽殺之。石倫投解後井中,仝周自縊州廨。武監軍者初不 亦殺之。 預開門之謀,何魏輩欲保全之,故言於大將曰:「監軍令我輩獻門。」然亦怒其不迎軍而降, 門,大元軍入城,擒蘇椿,問以大名南奔之事,椿曰:「我本金朝人,無力故降,我歸國得爲大 蘇椿不詰問卽斬之市中。 憂怖不知所出。 仍告以城池深淺。 數日,知兩省軍敗,潰軍踵來,有忠孝軍完顏副統入城,兩手皆折,血汚滿身,州人 石倫遣歸順軍提控嵐州人高珪往斥候,珪因持在州軍馬糧草數目奔大元 旣而武監軍偏裨何魏輩開東門,內族按春開南門,夾谷太守開西 俄大兵至城下,以鳳翔府韓壽孫持檄招降,言三峰敗狀。石倫、

假人,自古帝王靡不爲重。今之金銀牌,卽古符節也,其上有太祖御畫,往年得佩者甚難, 兵興以來授予頗濫,市井道路黃白相望,恐非所以示信於下也。乞寶惜之,有所甄別。」上 以語宰臣,而丞相高琪等奏:「時方多難,急於用人,駕馭之方,此其一也,如故爲便。」 仝周名暉,字子陽,策論進士,興定間爲徐州行樞密院參議官,上章言:「惟名與器不可

蘇椿,大名人,初守大名,歸順于大元,正大二年九月,三自大名奔汴,詔置許州,至是

一曰「板子訛可」,嘗誤以宮中牙牌報班齊者爲板子,故時人各以是目之。 完顏 訛可, 內族也。 時有兩訛可,皆護衞出身,一曰「草火」配可」,每得賊好以草火燎

入。應三鎭郡縣之民皆聚之山寨,敵至則爲晝攻夜叝之計。 屯重軍中條,則行在有萬全之 士馬全盛,南阻大河,可建行臺以爲右翼。前有絳陽、平陽、太原三大鎮,敵兵不敢輕 正大八年九月,大兵攻河中。 初,宣宗議遷都,朝臣謂可遷河中:「河中背負關陝五

家基本 竭 固矣。」主議者以河中在河朔,又無宮室,不及汴梁,議遂寢。 同 可守則 州 民膏血爲浚築之計。 獄,累命完復之,隨守隨破。 宣宗旣遷河南, 所在,棄之爲失策,設爲敵人所據,則大河之險我不得專恃矣。 棄之,無至資敵。 三二年之後,詔元帥都監內族阿祿帶行帥府事。 未幾,絳州破,阿祿帶益懼,馳奏河中孤城不可守,有旨親視,果不 阿祿帶遂棄河中,燒民戶官府,一二日而盡。 至是,以內族兩訛可將兵三萬守之。 宣宗悔悟,繫阿祿帶 尋有言河中重鎮,國 阿祿帶惟怯不能軍,

大兵謀 列 傳 取 第 四 宋武休關。 + 九 完 顏 未幾,鳳翔破,睿宗分騎兵三萬入散關,攻破鳳州,徑過華陽,屠 訛 可

洋州, 並江 兵乃得入。 趨葭萌、略地至西水縣 攻武休關。 分軍 而 西,西軍由別路入沔州,取大安軍路開魚鼈山,撤 開 生山、截焦崖、出武休東南、遂圍 而還。 東軍止屯興元、洋州之間,遂趨饒峰。 興元。 興元軍民散走,死於沙窩者數 屋爲筏, 渡嘉陵江入關堡, 宋人棄關 不守,大

入陝州 無幾 里之 自 之。 數 率步兵一萬救之。 主 十合始被擒,尋殺之。 敢救 一分有戰船橫截之,敗軍不得過,船中 人,力斫橫船開,得至潼關,遂入閿鄉。 及被攻,行帳 初,大兵期以明年正月合南北軍攻汴梁,故自將攻河中。 決杖二百。 軍 至、軍士殊死鬭、日夜不休、西北樓櫓俱盡、 命築松樓高二百尺,下瞰城 十二月,河中破。 識者以爲河中城守不下,德順力竭而陷,非戰之罪,故訛可之死人有冤 板訛 可提敗卒三千奪船走,北兵追及,鼓噪北岸上,矢石 初,河中主將知大兵將至,懼軍力不足,截故城之半守 有賷火砲名「震天雷」者連發之,砲火明,見北船 尋有詔赦將佐以下, [5] 貴訛可 中,土山地穴百道並進。 白戰又半月,力盡乃陷。 河中告急,合打蒲阿遣王敢 至十一月,攻愈急 以不 能 草訛 如 证, 車 酮 可戰 數 軍

児監戰,於

|| 於

|| 所

|| 所

|| 前

|| 前

|| 前

|| 前

|| 前

|| 前

|| 前

| 初, 訛 可 以元帥右 監軍 、邠涇總帥、權參知 政事、奉旨於邠、涇、 七年九月、召赴京師、改河 鳳翔 往來防秋, 奉 御六

違,上意頗罪訛可。及河中陷,苦戰力盡,而北兵百倍臨之,人謂雖至不守猶可以自贖,竟 中總帥,受京兆節制。 此時六兒同赴召,謂訛可奉旨往來防秋,而乃畏怯避遠,正與朝旨相

杖而死,蓋六兒先入之言主之也。

奔,故師多喪敗。」哀宗因之不改,終至亡國。 又方面之柄雖委將帥,又差一奉御在軍中,號曰『監戰』,每臨機制變多爲所牽制,遇敵輒先 奉御輩採訪民間,號『行路御史』,或得一二事卽入奏之,上因以責臺官漏泄,曰皆抵罪。 劉祁曰:四「金人南渡之後,近侍之權尤重。蓋宣宗喜用其人以爲耳目,伺察百官,故

以爲有近侍先入之言。夫以暬御治軍,旣掣之肘,又信其讒以殺人,金失政刑矣。唐之亡, 數奇之一李廣,其乏絕不亦宜乎。草訛可力戰而死,板訛可亦力戰,不死於陣而死於刑,論者 坐以近侍監軍,金蹈其轍,哀哉。 論曰:古里甲石倫善戰而好犯法,故見廢者屢,晚起爲將,卒死於難。 金運將終,又用

領移 病篤 同 判大睦親 功數 命撒合輦解合住 刺蕭阿勒兵東華門,都點檢駙馬都尉徒單合住奏中宮,得旨,領符鑰啓門。 ,英王盤都先入侍,哀宗後至,東華門已閉,聞英王在宮,遣樞密院官及東宮親衞軍總 撒合輦字安之,內族也。 人亦有不次之望,故胡魯之命中輟,釐猶升二品云。 府 事,兼前 刀佩之,哀宗遂入,明日卽位,由是見親信。正大元年正月庚申,以釐同 職。 刑部完顏素蘭言:「把胡魯策功第一,非超拜右丞相無以酬之。」然 宣宗朝,累遷同簽樞密院事。 元光二年十二月庚寅夜, 合住見上, 宣宗

合輦 酒裴滿 司 四 議 年, 阿虎帶、直學士蒲察世達、右司 西事, 大元旣滅西夏,進軍陝西。 上曰:「已諭合達盡力決一戰矣。」羣臣多主和事,獨懂力破和 諫陳規、監察烏古論四和完顏習顯、同判 四月丙申,召尚書溫迪罕壽孫、中丞烏古孫 議,語在 睦 親 卜吉、 府事 {[陳 撒

規傳。

中丞 爲避 兵自 欲我一戰,汝獨言當靜以待之,與朕意合,今日有太平之望,皆汝謀也。 遷計。 鳳翔 下 八 、月,朝廷得<u>清水之報,令有司罷防城及修城丁壯,凡軍需租調不急者權停</u>。 兼司農簽軍督稅, 入京兆,關中大震,以中丞 當時議者以謂大兵未至而 臺政可知矣。」至是,上謂撒合輦曰:「諺云,水深見長 卜吉、祭酒阿忽帶兼司農卿,簽民兵,督秋稅,令民入保 河南先亂,且曰:「御史監察城洛陽, 先帝嘗言汝可用, 治書供帳北使, 人。 初,聞大 朝臣或

可謂知人矣。」

皇后嘗傳旨戒曰:「汝諂事上,上之騎鞠皆汝所敎。」尉忻亦極言之,上頗悟,出爲中京留守、 兼行樞密院事。 未幾,右拾遺李大節、右司諫陳規言,撒合輦諂佞納賄及不公事,奏帖留中不報。 初,宣宗改河南府爲金昌府,號中京,又擬少室山頂爲御營,命移剌粘合

縛出奔之黨,欲殺之,已斬三人,釐親爲乞命,得免。 傷。「輦知不能出,仰呼求救,軍士知出奔非[輦意,以繩引而上,送入其宅,不敢出。 之, 弁以官屬及其子自隨, 才出南襄城門, 城上軍覺, 閉之甕城中, 云 矢石亂下, 人馬多死 羅主軍務,有大事則就懂禀之。三月甲申,忠孝軍百餘騎入使宅,强擁懂出奔,懂不得已從 築之,至是撒合輦爲留守。 無軍,得三峰潰卒三四千人,與忠孝軍百餘守禦。時聲疽發于背,不能軍,同知溫迪罕斡朶 九年正月,北兵從河淸徑渡,分兵至洛,出沒四十餘日。二月乙亥,立砲攻城。 洛中初 鎭撫官

而,大兵退,强伸復立帥府。 再下城者斬。」凡斬三四人,乃定。丙戌夜,城東北角破,釐奪南門出不得,投濠水死。 人呼曰:「同知講和去矣。」軍士及將領隨而下者三四百人。少之,輦傳令云:「同知叛降,有 乙酉,斡朶羅賷金帛出北門,如前日巡城犒軍之狀,旣出卽沿城而西,直出外壕,城上

列

關,以勞任使,嘗監郃陽醋。後客洛下,選充官軍,戍陝鐵嶺,軍潰被虜,從都尉兀林荅胡土 **竄歸中京。時中京已破,留守兼行樞密院使內族撒合輦死之,元帥任守眞復立府事,以便** 宜署伸警巡使。後守眞率部曲軍從行省思烈入援,鄭州之敗守眞死。 强伸,本河中射糧軍子弟,貌極寢陋,而膂力過人。興定初,從華州副都統安寧復潼

諭,以||伸爲||中京留守、元帥左都監、世襲謀克、行元帥府事。 賜。九月,大兵退百里外。閏月,復攻,兵數倍於前。又一月,不能拔。事聞,哀宗降詔褒 奔走四應,所至必捷。得二駞及所乘馬皆殺之,以犒軍士,人不過一啗,而得者如百金之 北兵圍之,東西北三面多樹大砲,伸括衣帛爲幟,立之城上,率士卒赤身而戰,以壯士五十 人 [刊] 往來救應,大叫,以「憨子軍」爲號,其聲勢與萬衆無異。 兵器已盡,以錢爲鏃,得大兵 箭截而爲四,以筒鞭發之。又創遏砲,用不過數人,能發大石於百步外,所擊無不中。伸 天興元年八月,中京人推伸爲府簽事,領所有軍二千五百人,傷殘老幼半之。甫三日,

洛川驛之東,名曰「報恩」,刻韶文於石,願以死自効。三月,中使至,以伸便宜從事。是月, 十月,參知政事內族思烈自南山領軍民十餘萬入洛,行省事。二年二月,伸建一堂於

語 大 兵自汴驅思烈之子於東門下,誘思烈降。 而 死。 總帥忽林荅胡土代行省事 丁,伸行總位 帥府事,月餘糧盡,軍民稍 思烈即命左右射之,旣而知崔立之變, 稍散去。 病不能

數 屛 爲 獨 謂謂 留 非 守 我 五. 之迷魂 |伸 家臣子耶? 月、大兵復來、陣於洛南、伸陣水北。 誓以 沙 手 牆。 死報國耳。」遂躍而 解 都統 大兵以 銀 日勤 符與之佩, 五 王,猶遺令名于世,君旣 百騎迫之,伸率卒二百鼓噪而出,大兵退。 射之。 士卒氣 帥 復振。 奔陣,率步卒數百 有韓帥者匹馬立 初, 不能,乃欲誘我降耶? 築戰壘於城 奪橋,伸軍一 一水濱, 外四 招伸 隅, 降, 旗 我本一軍卒、今貴 至五 手獨 伸謂帥曰:「 門內外皆有 出 拒之,殺 君

之。 南向 東 河出 六 **元** 因 月,行 及中京 好語誘之日 逐殺之。 轉戰 省胡 七 至 里河 偃 土 率衆 師 一力盡就 伸語不遜,兵卒 汝能北 走南山,鷹揚 執。 面一屈膝,吾貸汝命。」 載 相謂 都尉 以 一馬,擁迫 3 曰:「此 獻西門以 人 而 乖 行,伸宛轉不肯進,强掖之,將 伸不從, 角 、降,伸. 如 此,若見大帥其能降乎,不 知城不 左右 力持 ·能守,率死 使北 面 士數 見 |伸 若殺 千人 拗 大 帥 頭

烏林荅胡 列 傅 第 士。 四 + ル 正大九年正 强 伸 月戊子,北 鳥 林 荅 胡 土 兵 以河中一 軍由洛陽東四十里白坡渡河。 二四五 白坡

故河淸縣,河有石底,歲旱水不能尋丈。 民,甚於盜賊,旁近一二百里無不被害。胡土畏變,知而不禁,又所劫牛畜糧糗亦分有之。 山,使之前導,一軍隨之而上。 寨。明日,胡土使人紿縣官云:「吾軍中家屬輜重欲留此山,即率兵赴汴京。」 因攝縣 官下 被旨入援,至偃師,聞白坡徑渡之耗,直趨少室,夜至少林寺。時登封縣官民已遷太平頂御 已而果然。北兵旣渡,奪河陰官舟以濟諸軍。 遷,河防上下千里,常以此路爲憂,每冬日命洛陽一軍戍之。 河中破,有言此路可徒涉者, 山旣險固,糧亦充足,遂有久住之意。尋縱軍下山劫掠居 國初以三千騎由此路趨汁,是後縣廢爲鎮,宣宗南 時胡土爲破虜都尉,戍潼關,以去冬十二月

往中京,留其半山上以爲巢穴。天興二年三月,思烈病卒,留語胡土代行省事。六月,敵勢 益重,强伸方盡力戰禦,而胡土卽領輕騎、挈妻子棄城南奔,遂失中京。 山,殘卒三二十人外偏裨無一人至者。十二月,思烈自留山行省於中京,徵兵同保洛陽,又 不肯下,不得已,乃分其軍四千,與思烈俱東。八月三日,兩行省軍潰於中牟,胡土狼狽上 七月,恒山公武仙、參政思烈兩行省軍,屯登封城南大林下,遣人約之入京。 思烈以檄來,言:「若依前逗遛,自有典憲,吾不汝容矣。」胡土懼,乃挈妻子及軍 胡土百計

興復國家,諸人有能奮發許國捐軀者,豈不濟大事乎」於是,不逞之徒隨募而出,得澤人緝 初,胡土在太平頂旣顧望不進,又懼人議己,乃出榜募人爲救駕軍,云:「一旅之衆可以

麻 觜、武錄事等二十餘人,促令赴京,行及盧店卽行劫,械至,杖之二百,人無不竊笑。

卽 **歛避,縱其半入城,夾擊之,胡土大敗,僅存三十騎以還,換住死焉。** 命胡土領忠孝軍百人,就徵西山招撫烏古論換住、黃八兒等軍赴之。 旣 而 ,走蔡州,上召見慰問,而心薄之。 會宋人攻唐州, 元帥烏古論黑漢屢遺人告急, 胡土率兵至唐,宋

乞解 耳,卿 胡土之奴竊其金牌,夜縋城降,朝士喧播謂胡土縱之往,將有異志。 令守西城 即降,而千里遠來降於饜,豈人情也哉。 軍 旣 何 職。 而 慊焉。 」 因賜 · , 尤怏怏不樂, 至是始感恩無他慮矣。 ,以胡土爲殿前都點檢,罷權參政。 上慰之曰:「卿父子昆弟皆爲帥臣,受恩不爲不厚,顧肯降耶。 饌以安其心。 初,胡土罷機政,頗有怨言,左右勸上誅之,上不聽。 聞卿遇奴太察,且其衣食不常給之,此蓋往 大兵圍察,分軍防守,胡土守西面。十一月, 胡土聞之,內不自安, 且卿向在洛陽不 求溫 飽 及

有是命。 室東 砲擊 尉 承 城 麟 面 尋 樓幾仆,右丞仲德率軍救援,乃罷攻。 爲 以 而乞與婁室 蔡城破 總 東 帥孛术魯婁室 面 元 ,投汝 帥權 同救 總帥。 水 死。 應。 與胡土皆權參政,婁室與右丞仲德同事,胡土防守如故,復以都 先是,攻東城,婁室隨機備禦。 初,胡土失外城,頗慚恨,聲言力小不能令衆,仲德亦薦之,故 俄而 四面受敵,仲德艱於獨援,遂薦承麟代婁 二日移攻南城,烏古論鎬易之,

乎。 古人有言:「四郊多壘、拔士爲將。」使|金運未去、伸足以建功名矣夫。 强伸一射糧卒耳,及授以兵,乃能應變制勝,遠過二人,力盡乃斃,猶有烈丈夫之風焉。 贊曰:撒合輦本以佞進,烏林荅胡土戰陣不武,付以孤城,望其捍禦大難, 豈得爲知人

說曰:「願早誅權臣,以靖王室。」帝急顧左右掩其口。 自是,帝甚器重之。 後由提點近侍局 幸,世號曰「自在奉御」。當宣宗入承大統,胡沙虎跋扈,思烈尚在髫龀,嘗涕泣跪抱帝膝致 內族思烈,南陽郡王襄之子也。資性詳雅,頗知書史。自五六歲入宮充奉御,甚見寵

遷都點檢。

思烈率諸軍發自汝州,過密縣,遇大元兵,不用武仙阻澗之策,遂敗績于京水,語在武仙傳。 未能下,崔立遣人監思烈子於中京城下,招之使降。思烈不顧,令軍士射之,旣而知崔立已 中京留守、元帥左監軍任守眞死之。上聞,罷思烈行省之職,以守中京。無何,大兵圍中京 天興元年,汴京被圍,哀宗以思烈權參知政事,行省事于鄧州。會武仙引兵入援,於是

以汴京歸順、病數日而死。

急於入京,不 無入援意, 了兵事當共議。」

思烈疑其與仙有謀,幾斬之,

渥自以無愧於內,不懼也。 初 思烈 特 聽仙策,於是左右司員外郎王渥 會武仙等軍入援,即與仙論議不同,仙以思烈方得君,每假借之。 以朝廷遣一參政召兵,迫於不得已乃行耳。 乃勸思烈曰:「武仙大小數 然仙知兵,頗以持重 、百戰、 已而,思烈果敗, 經涉 一爲事。 思烈謂 不爲不 思烈 仙

渥

一歿於陣。

外 爲 間。 風。 郎 太學助 、從行。 少游 後辟寧陵 渥字仲澤,後名仲澤,太原人。 敎 太學,長於 轉樞 令,有治迹,入爲尚書省令史。 密院經歷官,俄遷右司 (詞賦 ,登興定二年進士第。 性明俊不覊、博學善談論、工尺牘、字畫清美、有晉人 都事 了,稍見信用。 因使宋至揚州,應對敏給,宋人重之。 爲時帥奧屯邦獻、完顏斜烈所知,故多在兵 及思烈往鄧州 ,以渥爲左右司員 及還,

中京之圍 贊曰 一、崔立 ...思烈夙惠,請誅權奸以 脅其子使招之降,不顧而趣射之,何愧乎橋玄。 立主威,有甘羅、 辟疆之風, 所謂「茂良不必父祖」者也 至如 不從武仙之言,以至於

列

敗,此蓋時人因惜王仲澤之死而有是言,仙無入援之意則非誣也。

兵馬都總管府事,兼武寧軍節度使、徐州管內觀察使。 人。貞祐四年六月,積功累遷欄通渡經略使。十月,爲元帥左都監。十二月,行山東西路 殺劉二祖賊黨四千餘人,降賊八千,虜其僞宣差程寬、招軍大使程福,又降脅從民三萬餘 以牙吾塔爲軍中提控。是時,山東羣盜蜂起,安貞遣牙吾塔破巨蒙等四堌,又破馬耳山砦, 統石烈牙吾塔一名志。本出親軍,性剛悍喜戰。貞祐間,僕散安貞爲山東路宣撫使,

獲馬牛數百、甲仗以千計。師還、遇宋兵三千於連塘村、斬首千餘級,俘五十人,獲馬三十 出,兵少却,旋以輕騎扼其後,初逗遛不與戰,縱之走東南,薄諸河,斬首千餘,溺死者無算, 盱眙, 宋人閉門堅守不敢出。以騎兵分掠境內, 而時遣嬴卒薄城誘之。宋人出騎數百來 州,宋兵八千圍甚急,督衆進戰,大破之,溺水死者甚衆,獲馬三百餘匹,俘五十餘人。 興定二年正月、宋兵萬餘攻泗州、牙吾塔赴援、至臨淮、遇宋人三百,掩殺殆盡。 尋獲覘者,稱_青平宋兵甚衆,將救盱眙。 牙吾塔移兵赴之,宋兵步騎七千人突 叉圍 及泗

五疋。宣宗以其有功,賜金帶一。

百,糧萬斛。三月,提控奧敦吾里不大敗宋人于上津縣,兵還至濠州,宋人以軍八千拒戰, 殺統制王大篷等,斬三萬,俘萬餘人。又拔輔嘉平山寨,斬首數千,俘五百餘人,獲馬牛數 三年正月,敗宋人於濠州之香山村。二月,又敗之於滁州、[10]斬首千級。 拔小江寨,

牙吾塔迎擊敗之,獲馬百餘疋。

相奉。 氣,女子有志者猶不爾也,切爲彼國羞之。」 鉞總戎,而臨敵則望風遠遁,被攻則閉壘深藏,逮吾師還,然後現形耀影以示武。 夫小民尙 民不得休息。彼國若以此曹爲足恃,請悉衆而來,一決勝負,果能當我之鋒,沿邊城邑當以 國 通好,百年於此,頃歲以來,納我叛亡,絕我貢幣,又遣紅襖戝乘間竊出,跳梁邊疆,使吾 五年正月,上以紅襖賊助宋爲害,邊兵久勞苦,詔牙吾塔遺宋人書求戰,略曰:「宋與我 度不能,即宜安分保境,何必狐號鼠竊、乘陰伺夜以為此態耶?且彼之將帥亦自受

慮州人出拒,躬率勁兵逆之,遇邏騎二百于城東,擊殺過半。會偵者言前路芻糧甚艱,乃西 潰,遂復 進,大敗宋兵。 先是,宋將時青襲破泗州西城。二月,牙吾塔將兵取之,宋兵拒守甚力,乃募死士以梯 泗州 西城。 時靑乘城指麾,射中其目,遂拔衆南奔。乃陳兵横絕走路擊之,宋兵大 三月,復出兵朱境,以報其役,破團山、賈家等諸寨,進逼濠州。 牙吾塔

列

傳

十九

総石烈

牙吾

塔

掠定遠,由渦口 而還。九月,又率兵渡淮,大破宋兵於團山,韶遷官升職有差。

之,委之行部,無不辦者。至於御下亦頗有術,提控有胡論出者,渠厚待之,常同器而食,其 者七百人,汴流由是復通。 三千潛渡淮,至聊林,盡伐隄柳,塞汴水以斷吾糧道。牙吾塔遣精甲千餘破之,獲其舟及渡 人感奮,遂以戰死。」英王守純曰:「凡爲將帥,駕馭人材皆當如此。」上曰:「然。」未幾,宋人 元光元年五月,以京東便宜總帥兼行戶、工部事,上因謂宰臣曰:「牙吾塔性剛,人皆畏

有司 殆 戰歿者皆廩給其家,恩至厚也。臣近抵宿州,乃知例以楮幣折支,往往不給,至于失所。此 有司出納之吝,不能奉行朝廷德意之過也。自今願支本色,令得贍濟。」以糧儲方艱,詔 、給其半。 二年四月,上言:「賞罰國之大信,帝王所以勸善而懲惡,其令一出不可中變。 向官軍

百,分兵攻之,連破兩栅,及焚其村塢數十。還遇|宋兵數百,陣|淮南岸,擊殺其半,尋有兵千 紅襖賊寇壽、潁,剽掠數日而去。牙吾塔聞之,率兵渡淮,偵知朱村、孝義村有賊各數

餘自東南來追,復大敗之。

於是、宋鈴轄高顯、統制侯進、正將陳榮等知不能守、共誅六哥、持其首縋城降。 先是,納合六哥殺元帥蒙古綱,據邳州以叛。十月,牙吾塔圍之,焚其樓櫓,斬首百餘。 六哥旣誅,

徐琦 Щ 衆 五人,將官訓練百三十有九人。 猶拒守,方督兵進攻,宋總領劉斌、提控黃溫等縛首亂顏俊、戚誼、完顏乞哥,及梟提控<u>金</u> 納欸。 打首 ,遣其校馬俊、吳珪 劉斌等遂率軍民出降,牙吾塔入城,撫慰其衆,各使安集,又招獲紅襖統制 來獻 十一月,遣人來報,仍函六哥首以獻。 旣而 紅襖監軍徐福 統制 王喜等亦遺其總領孫成、總押 宣宗大喜,進牙吾塔

可、牙吾塔議兵。 不同,隨機應變,若逐旋申奏,恐失事機,並從行省從宜規畫。」 正大三年十一月,北兵猝入西夏,攻中興府甚急。 叉詔 諭 兩省曰:「儻邊方有警,內地可 憂,若不早圖,恐成噬臍。 召陝西行省及陝州、 靈寶二總帥訛 旦夕事

階、賜金三百兩、內府重幣十端,將

士遷賞有差。

骨欒以此言上聞,太宗皇帝大怒,至應州,以九日拜天,卽親統大兵入陝西。 旣解慶陽之圍 陽 韶以牙吾塔與副樞蒲 陽搞北帥,爲緩師計。北中亦遣唐慶等往來議和,尋遣斡骨變爲小使,徑來行省。十二月, 城,遂自鳳翔入京兆,關中大震。 圍 解。 兀 ·年,牙吾塔復取平陽,獲馬三千。 韶以牙吾塔爲左副元帥,屯京兆。 了。志氣驕滿,乃遣還,謂使者曰:「我已準備軍馬,可戰 阿權簽樞密院事,內族訛 五年, 圍慶陽。 是歲、大兵旣滅夏國、進攻陝西德順、秦州、清水等 初,斡骨變來,行省恐泄 可將兵救慶陽。 []]六年十月,上命陝省以羊酒及幣赴慶 七年正 鬭 事 來。」 機,因留之。 月, 語甚不遜 戰于大昌原,慶 八年,遷居民 浦阿 |斡

於河南,棄京兆東還。五月,至閿鄉,得寒疾,汗不出,死。

使還,始知牙吾塔不遜激怒之語,且言慶等在旁心魄震蕩,殆不忍聞。當時以帥臣不知書, 「塔」亦作「太」,亦曰「牙忽帶」,蓋女直語,無正字也。 是歲九月,國信使內族乘慶自北

悞國乃爾。[三]

敗宋兵,威震淮、泗,好用鼓椎擊人,世呼曰「盧鼓椎」,其名可以怖兒啼,大概 十。又以銀符佩妓,屢往州郡取賕,州將之妻皆遠迎迓,號「省差行首」,厚賄之。 凡朝廷遣使來,必以酒食困之,或辭以不飲,因倂食不給,使餓而去。 言,而上倚其鎭東方,亦優容之。尤不喜文士,僚屬有長裾者輒以刀截去。又喜凌侮使者, 上章劾之,且曰:「朝廷容之,適所以害之。欲保全其人,宜加裁制。」朝廷竟不治其罪。以屢 戶部過宿,塔飲以酒,張辭以寒疾,塔笑曰:「此易治耳。」 趨左右持艾來,臥張於牀,灸之數 **塔爲人鷙狠狼戾,好結小人,不聽朝廷節制。嘗入朝,詣省堂,詆毁宰執,宰執亦不敢** 司農少卿張用章以行 御史康錫 如呼「麻

胡」云。 有子名阿里合,世目曰「小鼓椎」,嘗爲元帥,從哀宗至歸德, 與蒲察官奴作亂,

之事 路司農丞,爲河中路治中。 材,近侍局宗室撒合輦聲勢熏灼,請托公行,不可使在禁近,時論韙之。 ·知無不爲,與雷淵、冀禹錫齊名。 康錫字伯祿,趙州人。 河中破,從時帥率兵南奔,濟河,船敗死。 至寧元年進士。 正大初,由省掾拜御史,劾侯摯、師安石非相 爲 轉右司都事、 人氣質重厚,公家

淮、而矜暴不法、肆侮王人、此豈可制者乎。 陷大僇,君子乃知康錫之言不爲過也。 成姑息。 贊曰:金自胡沙虎、高琪用事,風俗一 將帥鄙儒雅之風,好爲粗豪,然用非其宜,終至跋扈。 變,朝廷矯寬厚之政,好爲苛察,然爲之不果,反 棄陝而歸,死於道途,殆其幸歟。 牙吾塔戰勝攻取, 威行江、 其子效尤,竟

校勘記

- 珪因持在州軍馬糧草數目奔大元軍 「目」原作「日」、據殿本 改。
- 正大二年九月 按本書卷一七哀宗紀記此事在正大二年五月。
- C川〕尋有韶赦將佐以下 「韶赦」原作「赦韶」、據文義乙正。

- 劉祁日 「祁」原作「耐」。按此文見劉祁歸潛志卷七,今據改。
- 万五山 上因以責臺官漏泄 「以」原作「所」,文義不通。據歸潛志卷七改。
- 八六山 閉之甕城中 「甕」原作「壅」,據文義改。
- 以壯士五十人「十」原作「千」。按上文「領所有軍二千五百人、傷殘老幼半之」、則所謂「壯士」

必不至「五千」、蓋「十」與「干」形近致誤、今改正。

- 鷹揚都尉 按下闕人名。
- 八九山 伸拗頭南向 「拗」原作「物」,據殿本改。
- (10) 二月叉敗之於滁州 原脫「之」字。按本書卷一五宣宗紀,興定三年二月庚子,「紇石烈牙吾塔

敗宋人于滁」。今據補。

- 五年圍慶陽 師」事則與下文同。疑此「五年」或誤。 按本書卷一七哀宗紀不載正大五年元兵圍慶陽事, 而記六年十月「犒北帥」「緩
- 語甚不遜 「遜」原作「孫」、據殿本改。下同。
- 惧國 乃爾 「爾」原作「耳」、據文義改。

金史卷一百十二

列傳第五十

完顏合達 移刺蒲阿

平州。 主,充護衞。[1]三年,授臨潢府推官,權元帥右監軍。時臨潢避遷,與全、慶兩州 帥,統乞住軍。 燕南諸帥將兵復中都城,行至平州遷安縣,臨潢、全慶兩軍變,殺乞住,擁合達還平州 蒲察胡里安、右三部檢法蒲察蒲女涉海來報。 合達北上、留半歲、令還守平州。 下,以州人黃裳 完顏合達名瞻,字景山。少長兵閒,習弓馬,能得人死力。 合達隸共經略使烏林荅乞住,乞住以便宜授軍中都統,累遷提控,佩金符。 入城招降,父老不從,合達引兵逆戰,知事勢不敵,以本軍降於陣。 合達以計誅首亂者數人。其年六月,北兵大將喊得不遣監戰提軍至平州城 已而,謀自拔歸,乃遣奉先縣令紇石烈布里哥、北京教授 貞祐初,以親衛軍送岐 之民 未幾,會 監戦 國 共 以 壁

兵馬都總管。 內觀察使。 州之境、蒙古綱遣合達率兵屢戰於壽光、臨淄。興定元年正月,轉通遠軍節度使、兼鞏州管 **|盆都,與元帥蒙古綱相應接,充宣差都提控。十二月,大元兵徇地博興、樂安、壽光,東涉灘** 四年十一月,合達果率所部及州民並海西南歸國。詔進官三階,升與南軍節度使,駐 七月,改平西軍節度使、兼河州管內觀察使。二年正月,知延安府事、無鄜延路

宋兵於馬嶺堡、獲馬百匹。又拔麻城縣、獲其令張倜、幹辦官郭守紀。 三年正月,詔伐宋,以合達爲元帥右都監。三月,破宋兵於梅林關,擒統領張時。 叉敗

等各率所部分三道以進,畢會于山顚,見夏人數萬餘傅山而陣,卽縱兵分擊,澤先登,擢其 右都監,屯延安。十月,夏人攻綏德州,駐兵于拄天山,合達將兵擊之,別遣先鋒提控樊澤 唐、鄧,上遣諭曰:「以卿才幹故委卿,無使敵人侵軼,第固吾圉可也。」四年正月,復爲元帥 擊之,斬首數十級,俘十人,遂攻隆州,陷其西南隅,至會日暮乃還。六月,行元帥府事於 左軍,諸將繼攻其右,敗之。 四月,夏人犯通秦寨,后合達出兵安塞堡,抵隆州,夏人自城中出步騎二千逆戰,進兵

易,緩急之際恐至敗事,自今乞勿徙。」又言:「河南、陝西鎭防軍皆分屯諸路,在營惟老稚而 五年五月,知延安府事,兼前職。上言:「諸軍官以屢徙,故往往不知所居地形迂直險

乞選老成人爲各路統軍以鎭撫之,且督其子弟習騎射,將來可用。」皆從之。

河南帥臣。是月,與元帥買住又戰延安,皆被重創。 功,朕聞之良喜。 十里, 墜崖谷死者不可勝計。 北方兵至,先破夏人則後易爲力。」於是潛軍裹糧倍道兼進,夜襲其營,夏人果大潰,追殺四 十一月,夏人攻安塞堡,其軍先至,合達與征行元帥納合買住禦之。合達策之曰:「此 經畫如此,彼當知畏,期之數年,卿等可以休息矣。」仍詔以合達之功徧諭 上聞之,賜金各五十兩、重幣十端,且詔諭曰:「卿等克成大 十二月,以保延安功賜金帶一、玉吐鶻

|州, 寖及榮、解之境, 今時已暑, 猶無回意, 蓋將蹂吾禾麥。 「今方敵兵迫境,不厚以分人,孰肯冒險而取之。 禦之閒或失事機。乞從舊法,凡司縣官使兼軍民,庶幾上下相得,易以集事。」 又河南、陜西調度仰給解鹽,今正漉鹽之時,而敵擾之,將失其利。 於京兆。 二萬,與平陽、上黨、晉陽三公府兵同力禦之。 元光元年正月, 遷元帥左監軍, 授山東西路吾改必剌世襲謀克。權參知政事, 行省事 未幾,眞拜。[2] 是年五月,上言:「頃河中安撫司報,北將按察兒率兵入隰、 吉、翼 竊見河中、榮、解司縣官與軍民多不相語,守 若自輸運者十與其八,則人爭赴以濟國 儻如此,則河東之土非吾有也。 乞速濟師,臣已擬分兵 又言鹽利,

列

用。」從之。

屠矣。」合達乃上言:「臣願馳至延安,與元帥買住議,以兵護公佐軍民來屯吳堡, 葭州之民迫於敵境,皆有動搖之心。 若是秋敵騎復來,則公佐力屈死於敵手,而遺民亦俱 於帥府,將焚其浮橋,以取葭州,帥府不聽。又請兵援護老幼稍徙內地,而帥府亦 石山子,至招集餘衆得二千餘人,欲復州城。 韶省院議之,於是命合達率兵取葭州。 行至鄜州,千戶張子政等殺萬戶陳紋,將掠城 合達已勒兵爲備,子政等乃出城走,合達追及之,衆復來歸,斬首惡數十人,軍乃定。 葭州提控王公佐言於合達曰:「去歲十月,北兵旣破葭州,構浮梁河上。 公佐寓州治北 以士卒皆自北逃歸者,且無鎧仗,故嘗請兵 不 伺隙 應。 而

合達提兵 分司 通,是自孤 宜預爲計。 爲 六月, 便。」詔許之。 復 也。 取之。 今陝西重兵兩行省分制之,然京兆抵平涼六百餘里,萬一敵梗其閒,使不得 宜令平涼行省內族白撒領軍東下,與臣協力禦敵,以屛潼、陝,敵退後復議 二年二月,以保鳳翔之功進官,賜金幣及通犀帶一。是時,河中已破, 防秋在

合達令於西路買牛付主者,招集散亡,助其耕墾,自是延安之民稍復耕稼之利。 田瑞反,合達討之,諸軍進攻,合達移文諭之曰:「罪止田瑞一身,餘無所問。」不數日,瑞弟 正大二年七月,陝西旱甚,合達齋戒請雨,雨澍,是歲大稔,民立石頌德。延安旣殘毀, 八月,鞏州

平章 軍 濟 $\dot{\dagger}$ 殺 **次**, 政 瑞以降,合達如約撫定一州,民賴以寧。 事 、芮 今日多 國公。 事之際乃在於省, 七年七月庚寅朔, 用違其長。 以平章政事妨職樞密副使。 三年,詔遷平涼行省。 臣等欲與樞密協力軍務, 初,蒲阿面奏:「合達 四年二月,公徵還 擢之相位似亦未 在

晚。」

|故有

此授。

馬玉 旣 不 至,先 ,欲合而一之。 帶 十月己未朔,詔合達及樞密副使蒲阿救衞州。 全 以親 給 衞兵三千嘗之,北兵小退,翼日圍解。 月俸本色、蓋異恩也。 至是, 河朔諸軍圍衞,內外不通已連月,但見塔上時舉火而已。 初, 上登承天門犒軍,皆授世襲謀克,賜良 朝廷以恒山公仙屯衞州, 公府節制 合達 等

守,河 官集議,上 未 南 幾,以蒲 亦不可 策 親 保。 阿權參知政 征 中策幸陝,下策棄秦保潼關。 至是,自陝以西亦不守矣。 事,同合達行省事於関鄉,以備潼關、 議者謂止可助陝西軍以決一戰,使陝西不 先是,陝省言備禦策,朝

應,包 夾谷移 十 单, 八 與渭 北軍 年正月,北帥 迪 烈、都尉 北 退,追至 軍 交, 高 谷口 至 速不解攻破 英拒 晚 之,求 復收兵 而 還。 入關 救於 小關 兩省 二省。 輒 ,殘盧氏、朱陽,散漫百餘里間。 鳳翔遂破。 稱 大捷, 省 以 以 陳和尚忠孝軍一千,都尉 聞。 二省遂棄京兆, 旣而 北 軍 攻 與牙古塔起遷 鳳翔, **潼關總帥納合買住** 夾谷澤 二省提 兵出 軍 居民於河 萬往 關二

南,留慶山奴守之。 九月,北兵入河中,時二相防秋還陝,量以軍馬出冷水谷以爲聲援。

陳和尚於関鄉南十五 付下襄陽制置司,約同禦北兵,且索軍食。 尋被旨取洛南路入商州,屯豐陽川備上津,與恒山公仙相掎角。 至是亦由荆子口、順陽來會。十二月朔,俱至鄧下,屯順陽。 三百里入桃花堡,知北兵由豐陽而東,亦東還,會大軍於鎭平。 十一月,鄧州報,北兵道饒峯關,由金州 一里,乃行。 陳和尚亦隨而往。 而東。 兩省以前月癸卯行,留楊沃衍軍守関鄉 沃衍軍八千及商州之木瓜平,一日夜馳 於是,兩省軍入鄧,遣提控劉天山以劄 乃遣天山入宋。 恒山公仙萬人元駐胡陵關 合達復留禦侮中郎將完顏 沃衍

欲而 勅 位,羣臣 何。」又指興元云:「我不從商州,則取興元路入汝界矣。」阿虎還奏,宣宗甚憂之。 諭 下省院議之,而當國者有仰而不能俯之疾,皆以朝廷先遣人則於國體有虧爲辭。 南 邊將不妄侵掠,彼我稍得休息,宋人始信之,遂有繼好之意。 鄙 故宣宗南伐,士馬折耗十不一存,雖攻陷淮上數州,徒使驕將悍卒恣其殺虜、飽其私 初,宋人於國朝君之、伯之、叔之,納歲幣將百年。 諸 [建言可因國喪遣使報哀,副以遺留物,因與之講解,盡撤邊備,共守武休之險。 又宣徽使奧敦阿虎使北方, 帥,遣人往滁州 與宋通好,宋人每以奏禀爲辭,和事遂不講。 北中大臣有以輿地圖指示之曰:「商州到此中軍馬幾 南渡以後,宋以我爲不足慮,絕不往 及天山以劄付至宋、劄付者 然十年之間,朝廷屢 元年,上 哀宗卽 遂

指揮之別名,宋制使陳該怒辱天山,且以惡語復之。 報至,識者皆爲竊嘆

蹊 峰,百姓往往入城壁、保險固,及聞敵已退,至有晏然不動者,不二三日游騎至,人無所逃, 悉為捷書 Щ 且喜且泣曰「非今日之捷,生靈之禍 之前,北兵 戊 辰、北 兵渡漢江 小却,營於三十里之外。 而 北,諸將以 爲可 二相以大捷驛報,百官表賀, 可勝言哉。」蓋以 乘 其 半渡擊之,蒲阿 爲實然也。 不從。 丙子, 先是,河南聞北兵出 諸相置酒省中,左 兵畢渡, 戦於 丞 李

所

發 兵人馬滿中矣。 走,追奔之際,忽大霧四塞,兩省命收軍。 行,北兵卽襲之,且行且戰,北兵傷折 襄、姚至京諸縣皆破,公 金 家 已失所在。 軍懼: 所恃,惟 而 殺之。 九 年正 其 乘 黄河 合達 月丁 時朝 虚襲京城,乃謀 與合達耳。 廷不 以數百騎走鈞州,北兵塹其城外攻之,走門不 明日,至三峯山,遂潰, 酉,兩省軍潰於陽翟之三峯山。 知其死,或云已走京兆,賜 所有積 今合達爲我殺,黃河爲我有,不降何待。」 入援。 聚焚燬無餘。 時北兵遣三千騎 亦多。 事載蒲 少之,霧散乃前,前一 恒山 金 阿傳。 以手詔 初,禹山之戰, 軍 軍爲突騎三千所衝, 趨河上,已二十餘日 由)鄧 合達知· 募 而東無所仰給, 人 訪之。 大事已去,欲下馬戰 大澗長闊 得出,匿窟室中 兩軍相拒, 及攻汴,乃揚言曰:「汝 泌陽 軍殊 乃並 數 北軍散漫而 里,非此 死鬭, 南陽 山 ,城破, 入陽翟,旣 一而 方城 霧 北騎 北兵 浦 則 北, 退 北 阳

不避,衆亦樂爲之用,其爲人亦可知矣。左丞張行信嘗薦之曰:「完顏合達今之良將也。」 合達熟知敵情,習於行陣,且重義輕財,與下同甘苦,有俘獲卽分給,遇敵則身先之而

言:「向非庸阿,何至於此。」遂自遙授同知惟州軍州事,權樞密院判官,自是軍國大計多從 充親衞軍總領,佩金符。

元光二年冬十二月庚寅,宣宗疾大漸,皇太子異母兄英王守純先 入侍疾,太子自東宮扣門求見,令瀟阿衷甲聚兵屯於艮嶽,以備非常。哀宗卽位,嘗謂近臣 移刺蒲阿本契丹人,少從軍,以勞自千戶遷都統。初,哀宗爲皇太子,控制樞密院,選

言,東部郎中楊居仁以微言取怒。 餘,日遊一人,餘卽退,瀟阿輒以捷聞。賞世襲謀克,仍厚賜之。人共知其罔上,而無敢 正大四年十二月,河朔軍突入商州,殘朱陽、盧氏,蕭阿逆戰至靈寶東,遇游騎十

者久之。 十萬,未嘗對壘,亦未嘗得一折箭,何用行省。」院官亦俱奏將來須用密院軍馬勾當,上不語 陽糧道。 六年二月丙辰,以蒲阿權樞密副使。 自去年夏,北軍之在陝西者駸駸至涇州,且阻慶 蒲阿奏:「陝西設兩行省,本以藩衞河南,今北軍之來三年於茲,行省統軍馬二三 是後,以丞相賽不行尚書省事於關中,召平章政事合達還朝,白撒亦召至闕,蒲阿

率完顏陳和尚忠孝軍一千駐邠州,且令觀北勢。 八月丙申,蒲阿再復潞州。 十月乙未朔,

蒲阿東還。

大昌原,[10]北軍還,慶陽 事與合達行省于閺鄉。 河中事 十二月乙未,詔蕭阿與總帥牙吾塔、權簽樞密院事訛可救慶陽。 · ,語在沿華傳 八年正月,北軍入陝西, 圍解。 韶以訛可屯邠州,蒲阿、牙吾塔還京兆。 鳳翔破,兩行省棄京兆 七年正月, 戰北兵於 而東,至洛陽驛,被 未幾,以權 參 知政

於 大昌原、舊衞州、扇車回縱出之。」定住、高、樊皆謂蒲阿此言爲然。 戰爲便?張惠以「截江爲便,縱之渡,我腹空虛能不爲所潰乎。」蒲阿麾之曰:「汝但知南事 爲不然。軍中以木北 北 事 十二月,北兵濟自漢江,兩省軍入鄧州,議敵所從出,謂由光化截江戰爲便、放之渡而 何 知。 我向於裕州得制旨云,『使彼在沙磧且當往求之』,況今自來乎。 人,知其軍情,此言爲有理,然不能奪瀟阿之議 合達乃問按得木,木以 汝等更勿似

甲戌、日未出、北兵至、大帥以兩小旗前導來觀、觀竟不前、 分三隊而進,輜重外餘二萬人。 「北騎已盡濟」。 順 陽留二十日,光化探騎至,云「千騎已北渡」, 癸酉,北軍將近,兩省立軍高山, 合達令諸軍,「觀今日事勢不當戰, 各分據地勢, 兩省是夜進軍,比曉至禹山,探者續云 散如 雁翅, 步迎於山前,騎屯於山後。 且待之。」 轉山麓 出騎兵之後, 俄而北騎突

英軍方北顧,而北兵出其背擁之,英軍動,合達幾斬英,英復督軍力戰。 軍定,復擁樊澤軍,合達斬一千夫長,軍殊死關,乃却之。 突之,至於三,爲蕭察定住力拒而退。大帥以旗聚諸將,議良久。合達知北兵意向。 前,金兵不得不戰,至以短兵相接,戰三交,北騎少退。北兵之在西者望蕭阿親繞甲騎後而 北兵稍却觀變,英 時高

棗林中, 畫作食, 夜不下馬, 望林中往來, 不五六十步而不聞音響, 其有謀可知矣。 見營,鄧州津送及路人不絕,而亦無見者,豈南渡而歸乎。己卯,邏騎乃知北軍在光化對岸 以速爲。」不從。乙亥,北兵忽不知所在,營火寂無一耗。兩省及諸將議,四日不見軍,又不 食,乘其却退當擁之。」張惠主此議,蒲阿言:「江路已絕,黃河不冰,彼入重地,將安歸乎,何 北兵回陣,南向來路。兩省復議,「彼雖號三萬,而輜重三之一焉。又相持二三日不得

衣贏馬泣訴艱苦,兩省信之,易以肥馬,飲之酒,及煖衣食而置之陣後,十人者皆鞭馬而去, 初,禹山戰罷,有二騎迷入營,問之,知北兵凡七頭項,大將統之。復有詐降者十人,弊

始悟其爲覘騎也。

城東。 騎邀輜重而去,一金兵幾不成列,逮夜乃入城,懼軍士迷路,鳴鍾招之。一變澤屯城西,高英屯 庚辰,兩省議入鄧就糧,辰巳間到林後,北兵忽來突,兩省軍迎擊,交綏之際,北兵以百 九年正月壬午朔、耀兵於鄧城下、北兵不與戰、大將使來索酒、兩省與之二十叛。

尉完顏阿排、高英、樊澤,中軍陳和尚,與恒山公武仙、楊沃衍軍合。 木,忠孝軍總領夾谷愛荅、內族達魯歡,總領夾谷移特刺,提控步軍臨淄郡王張惠,殄寇都 癸未,大軍發鄧州,趨京師,騎二萬,步十三萬,騎帥蕭察定住、蕭察荅吉卜,郎將按忒 是日,次五朶山下,取

鴉路,北兵以三千騎尾之,遂駐營待楊武。

獻申、裕,擁老幼牛羊取鴉路,金軍適值之,奪其牛羊餉軍。 弱,將爲所輕,當與之戰。乃伏騎五十於鄧州道。明日軍行,北騎襲之如故,金以萬人擁之 而東,伏發,北兵南避。是日雨,宿竹林中。庚寅,頓安臯。辛卯,宿鴉路、魯山。 楊武至,知申、裕兩州已降。七日至夜,議北騎明日當復襲我,彼止騎三千,而我示以 河西軍已

門犒軍,換易御馬,然後出戰未晚。」復有密旨云:「近知張家灣透漏二三百騎,已遷衞、孟 進,盤營三日。丙申,一近侍入軍中傳旨,集諸帥聽處分,制旨云:「兩省軍悉赴京師,我御 合昏,雨作,明旦變雪。北兵增及萬人,且行且戰,至黃楡店,望鈞州二十五里,雨雪不能 擊,北軍不戰,復南渡沙河。。金軍欲盤營,北軍復渡河來襲。。金軍不能得食,又不得休息。 兩 州 。」蓋已奪魄矣。 `,兩省當常切防備。」領旨訖,<u>蒲阿拂袖而起,合達欲再議,蒲阿言:「止此而已,</u>復何所 癸巳,望鈞州,至沙河,北騎五千待於河北,金軍奪橋以過,北軍卽西首歛避。金軍縱 軍卽

北、西南。 兵萬餘乘上而下擁之,北兵却。 立 Щ Щ 上大勢, 北軍自: 上望北兵二三十萬,約厚二十里。 武、高前鋒擁其西南,楊、樊擁其東北,北兵俱却,止有三峯之東。 比 北 再整頓,金軍已接竹林,去鈞州止十餘里矣。 .渡者畢集,前後以大樹塞其軍路,沃衍軍奪路,得之。 按得木與張惠謀曰:「此地不戰欲何爲耶。」乃率騎 金軍逐進, 合達叉議陳和尚先擁 北軍果却三峯之東 張惠、按得木

踐泥淖沒脛。 合,四外圍之,熾薪燔牛羊肉,更遞休息,乘)金困憊,乃開,釣州路縱之走,而以生軍夾擊之。 須 與雪大作,白霧蔽空,人不相觀。 軍士被甲胄僵立雪中,槍槊結凍如椽,軍士有不食至三日者。 時雪已三日,戰地多麻田,往往耕四五過,人馬所 北兵與河北軍

金軍遂潰,聲如崩山,忽天氣開霽,日光皎然,金軍無一人得逃

村南 月,械至官山,召問降否,往復數百言,但曰:「我金國大臣,惟當金國境內死耳。」遂見殺。 ,沃衍、澤、英皆死,自己惟張惠步持大槍奮戰而歿。 武 [仙率三十騎入竹林中,楊、樊、張三軍爭路,北兵圍之數重,及高英殘兵共戰於柿林 蒲阿走京師,未至,追及,擒之。

伐朱,唐州之役喪師七百,主將訛論匿之,而以捷聞。 贊曰: 金自南渡,用兵克捷之功史不絕書,然而地不加闢,殺傷相當,君子疑之。 御史納蘭糾之,宣宗獎御史,而不罪

耶。 機權若神,又獲天助,用能犯兵家之所忌,以建萬世之儁功,合達雖良將,何足以當之。 訛論,是君臣相率而爲虛聲也。 至於三峯山之敗,不可收拾,上下腭胎,而金事已去十九。 禹山之捷,兩省爲欺,遂致誤國,豈非宣宗前事有以啓之 天朝取道襄、漢、懸軍深入,

阿無謀,獨以一死無愧,猶足取焉爾。

校勘記

[1] 充護衞 「衞」原訛作「尉」,今改正。

四月夏人犯通秦寨 元帥完顏合達出兵安塞堡以擣其巢」。又卷一三四西夏傳,「興定三年閏月,夏人破通秦寨 原脫「寨」字。 按本書卷一五宣宗紀,興定三年四月「辛卯,夏人犯通秦砦,

華州元帥完顏合達出安塞堡至隆州,敗其兵二千」。今據補。

四西夏傳記此事亦云「進攻隆州,克其西南」。今據改。 遂攻隆州陷其西南隅 「南」原作「北」。按本書卷一五宣宗紀記此事作「陷其西南隅」。卷一三

權參知政事行省事於京兆未幾眞拜 完顏合達戰禦有功,授金虎符,權參知政事,行尚書省事于京兆,兼統河東兩路」。 按本書卷一七哀宗紀,正大元年三月「甲寅、以延安帥臣 考之各傳皆

列傳第五十 校勘記

此在元光元年,誤。

- 五五 公佐寓州治北石山子 「州治」原作「治州」,據文義乙正。
- ハベン 四年二月 按本書卷一七哀宗紀作正大六年二月「丙辰、召平章政事完顏合達還朝」。
- てもし 是「許州折衝夾谷澤」,原注「本姓獎」。 都尉夾谷澤軍一萬往應 「澤」原作「渾」。 樊澤在本書中屢見,如本卷移剌蒲阿傳,有「北兵稍却觀 按本書卷四四兵志,「天興初元,有十五都尉」,其一

陳和尚」、「澤、英皆死」等文。又卷一一四行華傳、「遂私問樊澤、定住、陳和尚以爲何如」。 變,英軍定,復擁樊澤軍」、「樊澤屯城西,高英屯城東」、「殄寇都尉完顏阿排、高英、樊澤, 中軍

英、樊澤、陳和尚相偕,知此都尉「夾谷渾」必「夾谷澤」之誤,今據改。

- 泌陽南陽方城襄郟至京諸縣皆破 誤以爲「陜」。 城,許州有襄城,蓋以二縣名接方城之後,皆有「城」字,遂省稱「襄、郟」。「郟」字不常見, 襄、郟與京皆近,陝州 「郟」 則遠,今改正。 原作「陝」。按本書卷二五地理志,南京路,汝州 有郟 寫刻
- [ガ] 週游騎十餘 「遇」原作「至」、據殿本改。
- ·傳,「正大五年,北兵入大昌原,以四百騎破八千衆,蓋自軍興二十年始有此捷」。 原,慶陽圍解」。 戰北兵於大昌原 之勝者我也」。 皆作「大昌原」。今據改。 卷一一三赤盞合喜傳、「故頻年有大昌原、倒回谷之捷」。 「大」原作「太」。按本書卷一一一統石烈牙吾塔傳,「正大七年正月戰于大昌 下同。 卷一二三完顏陳和尚 又曰「大昌原

記

峯山之敗,沃衍走鈞州」。此處衍「沃衍」二字。

金史卷一百十三

列傳第五十一

完顏賽不 白撒一名承裔 赤蓋合喜

護衞。 完顏賽不,始祖弟保活里之後也。狀貌魁偉,沉厚有大略。 明昌元年八月,由宿直將軍爲寧化州刺史。未幾,遷武衞軍副都指揮使。 初補親衞軍,章宗時,選充 泰和二

年,轉胡里改路節度使。四年,升武衞軍都指揮使,尋爲殿前左副都點檢。 及平章僕散揆伐宋,爲右翼都統。六年六月,宋將皇甫斌遣率步騎數萬由確山、褒信

奴、深州刺史完顏達吉不等以騎七千往擊之。會溱水漲,朱兵扼橋以拒,賽不等謀潛師夜 橋,宋兵不能遏,比明大潰,萬奴以兵斷眞陽路,諸軍追擊至陳澤,斬首二萬級,獲戰馬雜竒 出,達吉不以騎涉水出其右,萬奴等出其左,賽不度其軍畢渡,乃率副統阿魯帶以精兵直趨 分路侵察,自聞郭倬、李爽之敗,阻溱水不敢進。於是,揆遣賽不及副統尙廐局使蒲鮮萬

傳第五十一 完顏賽不

列

千餘。兵還,進爵一級,賜金幣甚厚。

月,夏人寇結耶觜川,遣兵擊走之,尋又破其衆于庫兒堡。 四月,調兵拔宋木陡關。五月,夏人於來羌城界河修折橋,以兵守護,賽不遣兵焚之。八 其或不然,復當別議行之。」八月,知鳳翔府事,兼本路兵馬都總管,俄爲元帥右都監。四年 烏古論兗州不遵安撫使達吉不節制,多致敗事。今已責罰兗州,命卿副之。 向在西京盡心爲國,及治華州亦嘗宣力,今始及三品。特升授汝此職者,以陝西安撫副使 貞祐初,拜同簽樞密院事。三年,遷知臨洮府事,兼陝西路副統軍。 上召見諭曰:「卿 宜益務盡心,

等處,前後六戰,斬獲甚衆。尋遣兵渡淮,略中渡店,拔光山、羅山、定城等縣,破光州兩關, 宋人戰於信陽,斬首八千,生擒統制周光,獲馬數千、牛羊五百。又遇宋人於隴山、七里山 斬首萬餘,獲馬牛及布,分給將士。詔賜玉兎鶻一、內府重幣十端。 興定元年二月,轉簽樞密院事。時上以宋歲幣不至,且復侵盜,詔賽不討之。 四月,與

陝西州府,皆乞量修。」從之。 有警難於拒守。竊見城中有子城故基,宜於農隙築而新之,爲國家久長之利。及凡河南、 七月,上章言:「京都天下之根本,其城池宜極高深,今外城雖堅,然周六十餘里,倉猝

二年正月,破宋人於鐵山及上石店、唐縣。四月,進兼西南等路招討使、西安軍節度

三月,破宋兵於七口倉,又奪宋小鶻倉,獲糧九千石、兵仗三十餘萬。是月,復敗宋兵三千 路兵馬都總管,兼武寧軍節度使。三年二月,奪宋白石關,殺其守者千餘人,獲鎧仗千計。 溺 使、陝州管內觀察使。 死者三千餘人,遂進兵圍之。宋騎兵千、步卒萬來援,逆戰復大敗之。七月,遷行山東西 奉韶攻棗陽,宋出兵三萬拒戰,稍誘擊之,宋兵敗走城,薄諸濠,殺及

得糧 官 于石鶻崖。 若不旌酬 令有司 日:「朕與 萬石。 四 `遷賞之。」是年四月,遷樞密副使。 年三月、奉韶出兵河北招降、晉安權府事皇甫珪、正平縣令席永堅率五千餘人來歸, 無以激人心。 時河北所在義軍官民堅守堡寨,力戰破敵者衆。賽不上章言:「此類忠赤可嘉, ,卿等亦嘗有此議,以不見彼中事勢,故一聽帥臣規畫。 今觀此奏,甚稱朕意,其 乞朝廷量加官賞,萬一敵兵復來,將爭先効用矣。」上覽奏,召樞密

矣。 衆,縱之虜略,請正 樞 密副 卿等宜知之。」 五 年五 使賽不本皇族,先世偶然脫遺。 |月,奉韶引兵救河康,戰屢捷,復晉安、

下陽二城。 其罪。 上以有功、韶勿問。元光二年五月、復河中。 股 重 一其舊人,且久勞王家,已命睦親府附于屬籍 監察御史言其不能檢束士 六月,韶渝宰臣曰:

正大元· 年 五月,拜平章 一政事。 未幾,轉尚書右丞相。雅與參知政事李蹊相得,及蹊以

二四八一

列

公罪出尹京洛,賽不數薦蹊比唐魏徵,以故蹊得復相。三年,宣宗廟成,將禘祭,議配享功 論者紛紜。 賽不爲大禮使,因言「丞相福興死王事,七斤謹守河南以迎大駕, 功宜配

議遂定。

河死。 言,彼吏曹何與于此。」尚書左丞顏盞世魯素嫉居仁,亦以爲僭,蹇不徐進曰:「天下有道,庶 不必示臣下也。」上是之。 人猶得獻言,況在郞官。 四年,吏部郎中楊居仁上封事,言宰相宜擇人,上語大臣曰:「相府非其人,御史諫官當 陛下有寬弘之德,故不應言者猶言。 居仁字行之,大興人。 泰和三年進士。天興末時北渡、舉家投黃 使其言可用則行之,不可用

不何所知,使居此位,吾恐他日史官書之,某時以某爲相而 五 年,行尚書省于京兆,三謂都事商衡曰:「古來宰相必用文人,以其知爲相之道。 國乃亡。」卽促衡草表乞致仕 賽

平章政事侯擊朴直無蘊藉,朝廷鄙之,天興元年兵事急, [三]自致仕起爲大司農,

未幾

曰:「只是更無擘劃。」白撒怒曰:「平章出此言,國家何望耶。」意在置之不測。 復致仕,徐州行尚書省無敢行者,復拜擊平章政事。 都堂會議,擊以國勢不支, 賽不顧謂白 因論 數事,

撒曰:「侯相言甚當。」白撒遂含憤而罷。

時大元兵薄汴,白撒策後日講和或出質必首相當行,力請賽不領省事,拜爲左丞相,尋

復致仕。 是年冬,哀宗遷歸德,起復爲右丞相、樞密使,兼左副元帥,封壽國公,扈從以行。

河北兵潰,從至歸德,又請致仕。

爲賊黨所制,束手聽命而已。 仁、員外郎常忠。自是,防城與守門者皆河北義軍,出入自恣。賽不先病疽,久不視事,重 郭恩以敗爲恥,託疾不行,乃密與河北諸叛將郭野驢輩謀歸國用安,執元帥商瑀父子、元帥 左都監統石烈善住,併殺之。又逐都尉斡轉留奴、泥厖古桓端、蒲察世謀、元帥右都監李居 兵取源州,令元帥郭恩統之。 二年七月,復詔行尚書省事於徐州。四旣至,以州乏糧,遣郎中王萬慶會徐、宿、靈璧 九月、恩至源州城下、敗績而還。再命卓翼攻豐縣、破之。初、

流三十餘步不沒,軍士援出之。又五日,自縊于州第。臟琮乃遣人以州降大元。 覊之也。 時蔡已被圍,徐州將士以朝命阻絕,且逼大兵,議出降。蹇不弗從,恐被執,至是投河求死, 初,源、徐交攻,郭野驢者每辭疾不行,賽不遂授野驢徐州節度副使、兼防城都總領,實 野驢旣見徐州空虛,乃約源州叛將麻琮內外相應。十月甲申,詰旦,襲破徐州。

以降。 子 從攻京師,曹王出質,朝臣及近衞有從出者,按春極口大罵,以至指斥。 按春,正大中充護衞,坐與宗室女姦,杖一百收係。居許州,大兵至許,按春開南門 是冬,復自

賽

不

來,丞相好與問彼中息耗。」賽不附奏曰:「老臣不幸生此賊,事至今日,恨不手刃之,忍與對 北 面語乎。」至一十二月,車駕東狩,留後二相下開封,擒捕斬之獄 中逃 廻 韶令押入省,問事情,按春隨近侍登階作揮涕之狀。 中。 韶問丞相云…「按春自北中

所能支也、悲夫。 之事尤有古人之風焉。 贊曰:賽不臨陣對壘旣有將略,洎秉鈞衡,觀其救解楊居仁、侯擊等言,殊有相度,按春 晚以老病受制叛臣,致修匹夫匹婦之節,此猶大厦將傾,非一 木之

|洮府事、兼本路兵馬都總管。 內族白撒名承裔,末帝承麟之兄也,系出世祖諸孫。 自幼爲奉御。 貞祐間, 累官知臨

<u>廖政、統制李大亨焚廬舍棄城遁,留千餘人城守,督兵赴之,遂克焉,獲糧七萬斛、錢數千</u> 川,日遇宋兵于皂郊堡,敗之。 兵,至雞公山,遂拔西和州,毀其諸隘營屯。 興定元年,爲元帥左都監,行帥府事於鳳翔。 又遇宋兵于天水軍,掩擊,宋兵大潰。 遣合扎都統完顏習湼阿不 是年,韶陝西行省伐宋,白撒出 率軍趨成州 二年四月, |宋 |宋 復敗宋 鞏州鹽 帥

去,獲糧二萬斛,器栊稱是,因夷其險而還。 河池縣守將楊九鼎亦焚縣舍走保淸野原。 統制高千據黑谷關甚固, 遺兵襲之,千遁

從之。 經涉險阻數千里,士馬疲弊,未得少休,而欲重爲是舉,甚非計也,不若息兵養士以備。」 爲敵據,將遣白撒復之,白撒奏曰:「臣近入宋境,略河池,下鳳州,破興元,抵洋州而還。 括移失不擊走之。行省以捷聞,宣宗大悅,進白撒官一階。時朝議以蘭州當西夏之衝,久 華馳視洋州, 府提刑兼知府事趙希昔聞兵將至,率官民遁,於是白撒遂取興元,以駐兵焉。 三年,破虎頭關,敗宋兵于七盤子、雞冠關。 官民亦遁,又取其城。尋聞漢江之南三十里,宋兵二千據山而陣,遣提控唐 褒城縣官民自焚城宇遁,因取其城。 命提控張秀 興元

者皆當甄獎、請預定賞格以待之。」上是其言。 軍節度副使溫敦永昌皆本蕃屬,且久鎭邊鄙,深得彼心,已命遣人招之。其所遣及諸來歸 歸附,分處德順、鎭戎之間。其後,有司不能存撫,相繼亡去。近聞復有歸心,然不招之亦 無由自至。誠得其衆,可以助兵,寧謐一方。臣以同知通遠軍節度使事鳥古論長壽及通遠 未幾、權參知政事、行省事于平涼。四年,上言:「宋境山州宕昌東上拶一帶蕃族、昔嘗

是年,夏兵三萬由高峯嶺入寇定西州,環城為栅,白撒遣刺史愛申阿失剌與行軍提控

鳥古 前之職。蕃僧納林心波亦招誘有功,乞遷官授職以獎勵之。」上皆從其請。 諸族,與先降族共願助兵七萬八千餘人,本國蕃族願助兵九千,若更以官軍繼爲聲援,勝夏 必矣。臣已令古里間將鞏州兵三萬,宜更擇勇略之臣副之。悔、貞等旣悉事勢,當假以軍 又別遣權左右司都事趙梅委差官遙授合河縣尉劉貞同往撫諭。未幾,梅、貞報溪哥城等處 遣官諭 諸蕃族以討西夏,臣卽令臨洮路總管女奚烈古里間計約喬家丙令族首領以諭餘族。 長壽、溫敦永昌出戰,大敗之,斬首千餘,獲馬仗甚衆。 五年五月,白撒言:「近詔臣

陝西、河南亦經抄掠。 家基業萬全之計。」詔樞密議之。 援,儻關中諸鎭不支,則河南亦不安矣。 復至,必長驅而深 元光元年二月,行省上言:「近與延安元帥完顏合達、納合買住議:河北郡縣俱已殘毀, 入,雖京兆、鳳翔、慶陽、平涼已各益軍,而率皆步卒,且相去闊遠,卒難應 比者西北二敵併攻鄜延,城邑隨陷,惟延安孤墉僅得保全。 今二敵遠去,西北少休,宜乘此隙徑取燭、漢,實國 若今秋

塗趨 役。 兵千餘於踏南寺,擊走之。夏人據大通城,因圍之,分兵奪其橋,與守兵七千人戰,大敗之, 白撒 西涼。 先是,夏兵數十萬分寇龕谷、鄜延、大通諸城,上召白撒等授以方略,命發兵襲其浮橋, 馳至 別遣將取大通城,出溪哥路,略夏地。 臨洮,遺總管女奚烈古里間、積石州刺史徒單牙武各攝帥職,率兵西入,遇夏 白撒徐出鎭戎,合達出環州,以報三道之

寺族被脅僧俗人,皆按堵如故。以河梁旣焚,塞外地寒少草,師遂還。 幾殺其半,入河死者不可計,餘兵焚其橋西遁。乃還軍攻大通,克之,斬首三千,因招來諸

更乞發河南步騎以備潼關。」詔付尚書省樞密院議之。 騁之地,未可與之爭鋒。 已遣提控羅桓將兵二千,循南山而進, 同隙攻其栅壘,以紓城圍。 乃圖京兆,京兆卒不可得,留兵守之,至春蹂踐二麥以困我。未幾,大兵果圍鳳翔,帥府遣 人告急。臣以爲二鎭脣齒也,鳳翔蹉跌則京兆必危,而陝右大震矣。然平川廣野實騎兵馳 十二月,行省言:「近有人自北來者,稱國王木華里悉兵沿渭而西,謀攻鳳翔,鳳翔旣下

政事。白撒居西垂幾十年,當宋、夏之交,雖頗立微效,皆出諸將之力。然本恇怯無能,徒 以儀體爲事,性愎貪鄙,印及入爲相,專愎尤甚。嘗惡堂食不適口,每以家膳自隨,國家顚 二年冬,哀宗卽位,邊事益急。正大五年八月,召白撒還朝,拜尙書右丞,未幾,拜平章

京城。功未畢而騎兵奄至,麻斤出等皆被害,「丸」丁壯無二三百人得反者。 至擊之,白撒不從,且陰怒之。遂遣完顏麻斤出、邵公茂等部民萬人,開短堤,決河水,以固 九年正月,諸軍敗績於三峯山。至大兵與白坡兵合,長驅趨汴。令史楊居仁請乘其遠

壬辰、棄衞州、運守具入京。初、大兵破衞州、宣宗南遷、移州治於宜村渡、築新城於河

五十一

之,隨爲大兵所據。

北岸,去河 不數步,惟北 面受敵,而以石包之,歲屯重兵於此,大兵屢至不能近。 至是,棄

都尉及 乳 出。 虎、大和兒、劉伯綱等皆隨召而出,截長補短假借而用,得百餘人。又集京東西沿河 是,議所守。 [軍」,以專救應,然亦不能軍矣。 尚不能徧,故議避遷之民充軍。又召在京軍官於上淸宮,平日防城得功者如內族按出 裏城或不測可用,於是決計守外城。時在城諸軍不滿四萬,京城周百二十里,人守一 甲午,修京城樓櫓。 衛州已起義軍,通建威得四萬人,益以丁壯六萬,分置四城。每面別選一千,名「飛 朝臣有言裏城決不可守,外城決不可棄。 初,宣宗以京城闊遠難守,詔高琪築裏城,公私力盡僅乃得成。 大兵先得外城,糧盡救絕,走一人不 舊屯兩 至

矣,胡不卽平章府求之。」所司懷金三百兩徑往,賂其家僮,果得之。 護簾,所司 三月,京城被攻,大臣分守四面。 馳入城大索,竟無所得,白撒怒欲斬之。員外郞張袞附所司耳語曰:「金 白撒主西南,受攻最急,樓櫓垂就輒摧,傳令取竹爲 一多則濟

言欲殺之。 幸,爲我撰乞致仕表。」頃之,上已遣使持詔至其第,令致仕。 m 兵退, 白撒懼,一夕數遷,上以親軍二百陰爲之衞。 朝 廷議罷白撒, 白撒不自安, 乃謂令史元好問曰:「我妨賢路久矣, 得退是 軍士無以泄其憤,遂相率毁其別 旣廢,軍士恨其不戰 誤國,揚

墅而去。 其黨元帥完顏斜捻阿不領本部軍戍汴, 聞之徑詣其所, 斬經其垣下者一人以鎮

之。

郡王王義深馬軍一百五十,郡王范成進、總領蘇元孫圭軍三千,隸總帥百家。 室親衞軍一千,右翼元帥完顏按出虎親衞軍一千,總領完顏長樂、副帥溫敦昌孫馬軍三百, 完顏猪兒,副以建威都尉完顏斡論出兵五千。西面元帥劉益、上黨公張開,副以安平都尉 左副 合里合總領术虎只魯歡、[10]總領夾谷得伯、北軍田衆家奴等百人及諸臣下,發京 總帥百家。 紀綱軍五千。 百家元帥左監軍 平章政事、權樞密使、兼右副元帥。於是,羣臣爲上畫出京計,以內養不爲右丞相、樞密使、兼 元帥、內族訛出右副元帥、兼樞密副使、權參知政事、李蹊兵部尚書、權尚書左丞、徒單 是時,速不靜等兵散屯河南,汴城糧且盡,累召援兵復無至者。冬十月,乃復起白撒 都尉內族久住、副都尉王簡、總領王福胤神臂軍三千五百,左翼元帥內族小婁 北面元帥內族婁室,副以振威都尉張閏軍五千。 、行總帥府事。 東面元帥高顯,副以果毅都尉粘合咬住兵五千。 中翼都尉賀都喜軍四千,隸 飛騎都尉兼 南面 元 帥

溫敦昌孫曰:「太后、中宮皆在南京,北行萬一不如意,聖主孤身欲何所爲。 羣臣議以河朔諸將前導,鼓行入開州,取大名、東平,豪傑當有響應者,破竹之勢成矣。 十二月甲辰,車駕至黃陵岡,白撒先降大兵兩寨,得河朔降將,上赦之,授以印及金虎 若往歸德,更五

列

之軍。」上以爲然。 六月不能還京。 衛州欲何爲耶。 事決東平之策。 所在,今可駐歸德。臣等率降將往東平,俟諸軍到,可一鼓而下,因而經略河朔,且空河南 官奴還奏衞州有糧可取,江江上召白撒問之,白撒曰:「京師且不能守,就得 以臣觀之,東平之策爲便。」上主官奴之議。 不如先取衞州、還京爲便。」白撒奏曰:「聖體不便鞍馬,且不可令大兵知上 時上已遣官奴將三百騎探漚麻岡未還,上將御船,賜白撒劍,得便宜從

孝軍一千,郡王范成進、王義深、上黨公張開、元帥劉益等軍總帥百家總之,各費十日糧,聽 擊之,溺死者近千人,元帥猪兒、都尉紇石烈訛論等死之。建威都尉完顏訛論出降於大元 鬭,得卒十餘人,大兵少却。 上遣送酒百壺勞之。 須臾,北風大作,舟皆吹著南岸,諸兵復 濟者萬人,大元將回古乃率四千騎追擊之,賀都喜揮一黃旗督戰,身中十六七箭,軍殊死 上於北岸望之震懼,率從官爲猪兒等設祭,哭之,皆贈官,錄用其子姪,斬訛論出二弟以徇。 遂命<u>白撒攻衞州。上駐兵河上,留親衞軍三千護從,都尉高顯步軍一萬,</u>元帥官奴忠 明年正月朔,次黃陵岡。是日,歸德守臣以糧糗三百餘船來餉,遂就其舟以濟南岸,未

德持御馬銜苦諫曰:「存亡在此一舉,衞州決不可攻。」上麾之曰:「參政不知。」白撒遂攻衞 令我將馬軍。」賽不謂上曰:「北行議已決,不可中變。」上曰:「丞相當與平章和同。」 完顏仲

承裔節制。發自蒲城,上時已遣賽不將馬軍北向矣,白撒以三十騎追及,謂賽不曰:「有旨,

「正當 攻, 撒 戰 戰 州 歸 德 使 於 守益 北 上 白 人 決 密奏劉 公廟 戦 城下,御旗黃傘招之不下。 嚴。 一遂登 何 敗績, 凡攻三日不 舟 遽 益 一,侍衞 退乎。」少頃,白撒至,倉皇言於上曰:「今軍已潰,大兵近在堤外,請聖主幸 ___ 軍叛去。 白撒 然自發蒲城遷 皆不知,巡警如故。 等棄軍遁 克。 點檢抹然 及聞 劉 河南大兵濟自張家渡至衞西南,遂班 延八日始至衞, 其夜、北騎三千奄至、官奴、和速嘉兀地不 兀 益、張開皆爲民家所殺。 一典、總 時夜已四 領 溫 而 敦昌孫時侍行帳中,請上 更矣,遂狼狽 孫無攻具,縛槍爲雲梯,州 車駕還次蒲城東三十里,白 入歸德。 師。 大兵踵 、按出虎與之 一登舟, 入 知 工其後, 不能

潰、北 餓死, 後。 即奏 退 百 311 餘 里 發憤 里, 宜 合、護衞二人以舟往迎之。 白 今白撒 兵勢大不 發其弟 撒 渡 白撒 出怨言。 收潰 河 取 已下獄 承鱗 遷延八 衛州 兵大橋,得二萬餘 可當,信 上乃 子 不 日 可 狗兒徐州安置。 復錄用 暴其罪曰:「 方 得 從登 至 糧 十萬石, 舟 叉不 **第**其家 幾 人,懼 旣至, 預 死于 惟 備 乘 汝將 當 產 不聽入見, 不 水。 攻 勝 時議者,衞州之舉本自官奴 敢入。 以 具, 恢復 士, 賜 若當 汝 以 明 河 、衆、其 上聞, 致 北 時 聽股言。 ,
弁
其
子 敗 知 衄。 盡 諸 我從其計 遣近 軍 力 · 下獄。 白撒 未嘗 我初 或 侍局提點移刺 家, 棄軍 提大軍 潰 無效 諸都尉司 令率諸 只 **竄還蒲城** 河 歸 此 次黃陵岡 人。」 北戰 之白 軍攻衞。 軍以白撒 粘古、二三統 撒 ()便言 囚 死 白撒 則 亦 得捷,白 可 去蒲 亦 過矣。 諸 七 垂 不 戰 石 日而 名 軍 城 烈 於 已 撒

靡所不至。哭聲相接,屍骸盈野。 過無絲髮之犯,老幼婦子坦然相視,無復畏避。 過官吏殘虐不勝,一飯之費有數十金不能給者,公私皇皇,日皆徯大兵至矣。 初,瀕河居民聞官軍北渡,築垣塞戶,潛伏洞穴,及見官奴一軍號令明肅,撫勞周悉,所 都尉高祿謙、苗用秀輩仍掠人食之,而白撒誅斬在口,所 俄白撒輩縱軍四出,剽掠俘虜,挑掘焚炙,

意耶。」白撒終不悛,以及於禍。 衣金縷,奴隸月廩與列將等,猶以爲未足也。 上嘗遣中使責之曰:「卿汲汲於此,將無北歸 能捭闔中人主心,遂浸漬以取將相。旣富貴,起第於汴之西城,規模擬宮掖,婢妾百數,皆 白撒目不知書,姦黠有餘,簿書政事聞之卽解,善談議,多知,接人則煦煦然,好貨殖,

自逸,此猶大厦將焚而燕雀不悟者歟。 贊曰:白撒本非將才,惟怯誤國,徒能阿合以取富貴,性愎貪鄙,當此危亡,方謀封殖以

貞祐四年十一月,夏人四萬餘騎圍定西,輦致攻具,將取其城。 赤盞合喜,性剛愎,好自用,朝廷以其有才幹任之。宣宗時,累遷蘭州刺史、提控軍 合喜及楊斡烈等口意率

| 來遠寨以張聲勢,旣而獲捷。 二年四月,宋兵數千侵臨洮,合喜擊走之,斬獲甚衆。 三年四 以屢敗夏人,遙授同知臨洮府事,兼前職。 兵鏖戰走之,斬首二千級,俘數十人,獲馬八百餘匹,器械稱是,餘悉遁去。興定元年正月, 是冬,陝西行省奉詔伐宋,合喜權行元帥府,駐

月,遷元帥左都監,行元帥府事于鞏州。

喜已先伏甲要地邀之,復率衆躡其後,斬首甚衆。 十月,以功遙授平西軍節度使。 戰,却之,殺數千人。攻益急,將士殊死戰,殺傷者以萬計。夏人焚其攻具,拔栅而去。合 及鞏,且構宋統制程信等將兵四萬來攻。合喜聞之,飭兵嚴備。俄而兵果至,合喜督兵搏 將你思丁、兀名二人謀,以爲鞏帥府所在,鞏旣下則臨洮、積石、河、洮諸城不攻自破,故先 日十餘戰,夏人退據南岡,遣精兵三萬傅城,又擊走之,生擒夏將劉打、甲玉等。 訊知夏大 師 敗之,口巴都統王定亦破其衆一千五百于新泉城。九月,夏人攻鞏州,合喜遣兵擊之, 四 年四月,夏人犯邊,合喜討之,師次鹿兒原,遇夏兵千人,遣提控烏古論世顯率偏

連汧 顏盞蝦 二年二月,木華黎國王、斜里吉不花等及夏人步騎數十萬圍鳳翔,東自扶風、岐山,西 元 隴 蘇戰尤 光 數 元年,大將萌古不花攻鳳翔,朝廷以主將完顏仲元孤軍不足守禦,命合喜將兵援 百 里 力,遂以便宜升爲通遠軍節度使,上嘉其功,許之。 間皆其營栅,攻城甚急,合喜盡力,僅能禦之。於是,合喜以同知 是歲,升簽樞密院事。 臨洮府事 哀

列傳

第

五.

+

赤盞

宗即位,拜參知政事、權樞密副使。

且諸軍無慮二十餘萬,今敵至不能迎戰,徒以自保,京城雖存,何以爲國,天下其謂我何。」 得,師老食盡,不擊自歸矣。」上太息曰:「南渡二十年, 所在之民破田宅、鬻妻子以養軍士。 屯睢、鄭、昌武、歸德及京畿諸縣,以大將守洛陽、潼關、懷、孟等處,嚴兵備之。京師積糧數 衞、護衞、選外諸軍又二十餘萬。故頻年有大昌原、倒回谷之捷、士氣旣振、遂有一戰之資。 强壯趫捷,極爲 精練。步卒負擔器甲糧糗重至六七斗,一日夜行二百里。忠孝軍萬八千 奏,上曰:「事至於此奈何。」上卽位至是八年,從在東宮日立十三都尉,[1三每尉不下萬人, 又曰:「存亡有天命、惟不負民可也。」乃詔合達、蒲阿等屯軍襄、鄧。 百萬斛,令河南州郡堅壁清野,百姓不能入城者聚保山砦。彼深入之師,欲攻不能,欲戰不 至是,院官同奏:「北軍冒萬里之險,歷二年之久,方入武休,其勞苦已極。爲吾計者,以兵 人,皆回紇、河西及中州人被掠而逃歸者,人有從馬,以騎射選之乃得補。 正大八年十一月,鄧州馳報大元兵破嶢峯關,由金州東下。報至時日已暮,省院官入 親衞、騎兵、武

速不肣攻城,攻具已辨,旣有納質之請,卽又云:「我受命攻城,但曹王出則退,不 然不罷 也。」壬寅,曹王入辭,自己宴於宮中。癸卯,北兵立攻具,沿壕列木栅,以薪草填壕,頃刻平 九年正月,兩省軍潰于三峯山,北兵進薄京師。三月庚子,議曹王出質。大兵北行,留

十餘步。 主兵者以議和之故不敢與戰,但於城上坐視而已。

值被創者,親傅以藥,手酌卮酒以賜,且出內府金帛以待有功者。 皆太學生,令執砲夫之役,恐非國家百年以來待士之意。」刺記姓名,即免其役。 者曰:「事急矣, 聖主毋望和事。」乃傳旨城上放箭。 西水門千戶劉壽控御馬仰視曰:「聖主 鏃,恐壞和事,想豈有計耶。」上顧謂其中長者云:「朕爲生靈,稱臣進奉無不從順,止有 暴露,我何用此爲。」所過慰勞軍士,皆踴躍稱萬歲,臣等戰死無所恨,至有感泣者。 西南軍 於道傍,亦有望而拜者,上自麾之曰:「勿拜,恐泥汚汝衣。」倉皇中,市肆米豆狼藉於 老幼負薪草塡壕塹,城上箭鏃四下如雨,頃刻壕爲之平。 大兵併力進攻。 甲辰,上復出撫東門將士,太學生楊奐等前白事,上問何所欲言,曰:「臣等 無信賊臣,賊臣盡,大兵退矣。」衞士欲擊之,上止之曰:「醉矣,勿問。」是日,曹王出詣軍前 子,養來成長,今往作質子矣。汝等略忍,待曹王出,大兵不退,汝等死戰未晚。」復有拜泣 士五六十輩聚而若有言者,上就問之,跪曰:「大兵芻土塡壕,功已過半,平章傳令勿放 勅衞士令各歸其家,老幼遮擁至有悞觸御衣者。 少頃,宰相從官皆至,進笠不受,曰:「軍士 城中喧鬨,上聞之,從六七騎出端門至舟橋。 時新雨淖,車駕忽出,人驚愕失措,但跪 是日,大兵驅漢俘及婦女 過南薫門, 地,

龍德宮造砲石,取宋太湖、靈璧假山爲之,小大各有斤重,其圓如燈毬之狀,有不如度

皆故宮及芳華、玉谿所拆大木爲之,合抱之木,隨擊而碎,以馬糞麥秸布其上,網索旃褥固 者杖其工人。大兵用砲則不然,破大磑或碌碡爲二三,皆用之。攢竹砲有至十三稍者,餘 護之。其懸風板之外皆以牛皮爲障,遂謂不可近。大兵以火砲擊之,隨卽延爇不可撲救。 百五十里,城有乳口樓櫓,壕深丈許,闊亦如之,約三四十步置一鋪,鋪置百許人守之。 父老所傳周世宗築京城,取虎牢土爲之,堅密如鐵,受砲所擊唯凹而已。大兵壕外築城圍 砲稱是。每城一角置砲百餘枝,更遞下上,晝夜不息,不數日石幾與裏城平。 而城上樓櫓

城上之人靜夜唱之,蓋河朔先有此曲以寄謳吟之思,其謬計如此。 以誘被俘者。識者謂前日紙燈、今日紙鳶,宰相以此退敵難矣。右丞世魯命作江水曲,使 城上懸紅紙燈爲應,約燈起渡壕,又爲圍者所覺。又放紙鳶,置文書其上,至北營則斷之, 斫營,軍乃不能猝出,比出已爲北兵所覺。後又夜募死士千人,穴城由壕徑渡,燒其砲坐。 初,白撒命築門外短牆,委曲陿隘容二三人得過,以防大兵奪門。及被攻,諸將請乘夜

透。大兵又爲牛皮洞,直至城下,掘城爲龕,間可容人,則城上不可奈何矣。人有獻策者, 者,鐵礶盛藥,以火點之,砲起火發,其聲如雷,聞百里外,所爇圍半畝之上,火點著甲鐵皆 色,軍士特以車駕數出慰勞,人自激昂,爭爲效命耳。其守城之具口也有火砲名「震天雷」 合喜先以守鳳翔自誇,及令守西北隅,其地受攻最急,而合喜當之,語言失措,面無人

以 |鐵繩懸「震天雷」者,順城而下,至掘處火發,人與牛皮皆碎迸無迹。 又飛火槍,注藥以火

發之,輒前燒十餘步,人亦不敢近。 大兵惟畏此二物云。

國已講和,更相攻耶。」朝廷亦就應之。 四月罷攻。 至是十六晝夜矣,內外死者以百萬計,大兵知不可下,乃謾爲好語云…「兩 明日,遣戶部侍郎楊居仁出宜秋門以酒炙犒師,於

是營幕稍稍外遷,遂退兵。

若是耶。」因謂諸相曰:「京城受兵、上深以爲辱。 等不以爲喜耶。」明日,近侍局直長張天任至省,好問私以賀議告之,天任曰:「人不知恥乃 史元好問曰:「罷攻已三日而不入賀,何也。 速召翰苑官作表。」好問以白諸相,權參政內族 不肯撰表,議遂寢。 思烈曰:「城下之盟,諸侯以爲恥,況以罷攻爲可賀歟。」合喜怒曰:「社稷不亡,帝后発難,汝 壬戌,合喜以大兵退,日召議入賀,諸相皆不欲,獨合喜以守城爲己功,持論甚力,呼令 聞百官欲入賀,誠有此否。」會學士趙秉文

訛出稱疾不出,惟合喜坦然若無事者,上亦無所問,由是軍國之事盡決于合喜矣。 帥撒合、參政訛出皆國賊、朝廷不殺,衆軍亦須殺之,爲國除害。」衞士以聞。 謂院事仍在,印有用時,不宜毀。一合喜怒,欲笞其掾。 是月,以尚書省兼樞密院事,合喜罷樞密。合喜旣失兵柄,意殊不樂,欲銷院印,諸相 有投匿名書於御路云:「副樞合喜、總 撒合飲藥死,

列傳

「岢」字,至分爲兩耳。 曰:「子爲『陳山可』耶,果如子言能退大敵,我當世世與若爲奴。」聞者無不竊笑。 蓋不識 初,大兵圍汴,司諫陳岢屢上封事言得失,切中時病。合喜大怒,召入省,呼其名責之

出,中則逗遛不進,終則棄軍先遁,委棄軍資不可勝計,不斬之無以謝天下。」上貸其死,免 京城軍萬五千應之,且命賽不爲之助。八月己酉朔,駐於近郊,候益兵乃進屯中牟古城。 爲庶人,既而籍其家以賜軍士。 凡三日,聞思烈軍潰,卽夜棄輜重馳還,黎明至鄭門,聚軍乃人。言者謂:「合喜始則抗命不 天興元年七月,權參知政事思烈、恒山公武仙合軍自汝州入援,韶以合喜爲樞密使,統

之,乃行省傳哀宗語以諭合喜者,其言曰:「卿朕老臣,中間雖廢出,未嘗忘卿。今崔立已 變,卿處舊人尚多,若能反正,與卿世襲公相。」」立怒,叱左右繫之獄,是日斬之。 酒餞送,且以白金二百兩爲贐。 既廢,居汴中,常鞅鞅不樂。會大將速不靜遣人招之,合喜卽治裝欲行,崔立邀至省酌 明日,復詣省别立,方對語,適一人自歸德持文書至,發視

伐, 汴城之役舉措煩擾, [110] 質出兵退卽圖稱賀, 此豈有體國之誠心者乎。 中牟之潰, 衆怒 論曰:合喜初年用兵西夏,屢著勞效,要亦諸將顔盞蝦螂等功也。曰己既當大任,遂自矜

校勘記

- 宋將皇甫斌遣率步騎數萬由確山褒信分路侵蔡 按本書卷一二章宗紀, 泰和六年五月「甲辰」
- 皇甫斌攻唐州」。 六月「庚申、右翼都統完顏賽不敗宋曹統制于溱水」。此處「遣」字下當脫「曹
- 統制」三字。
- 五年行尚書省于京兆 按本書卷一七哀宗紀作正大六年春二月「丙辰, 以丞相完顏賽不行尚
- 書省事于關中」。與此不同

天興元年兵事急

「元」原作「九」。

- 侯擊爲平章政事,行京東路尚書省事」。今據改。 按本書卷一七哀宗紀,天興元年八月戊辰,「起復前大司農
- 徐州行省抹燃兀典赴蔡州、起復右丞相致仕賽不代行省事」。 二年七月復詔行尚書省事於徐州 按本書卷一八哀宗紀作天興二年六月「己亥,上入於州,

詔

- 万五 忍與對面語乎 「忍」原作「恐」,據文義改。
- でネロ 白撒出鞏州鹽川 「川」原作「井」。按本書卷二六地理志,臨洮路鞏州定西縣「鎭一,鹽川」。今

據改

列 傳 第 五. + 校 勘

記

- [P] 性愎貪鄙 按「愎」疑當作「復」。下同。
- 諸軍敗績於三峯山 城走汴」。甲午,「大元兵薄鄭州,與白坡兵合。乙未,大元游騎至汴城。丁酉,大雪,大元兵及兩 按本書卷一七哀宗紀,正大九年正月「壬辰,衞州節度使完顏斜捻阿不棄
- 省軍戰鈞州之三峯山,兩省軍大潰」。此處敍述失次。
- 「カ」麻斤出等皆被害 「遣完顏麻斤出等部民丁萬人决河水衞京城」。亦有「出」字。今據補。 原脫「出」字。按上文作「完顏麻斤出」。又本書卷一七哀宗紀,天興元年,
- (10) 飛騎都尉兼合里合總領术虎只魯歡 合里合軍也」。卷一七、一八哀宗紀,亦皆作「合里合」。今據改。 乃係於忠孝籍中別爲一軍,減忠孝所給之半,不能射者令閱習一再月然後試補忠孝軍,是所謂 「里」原作「剌」。按本書卷四四兵志,「又以歸正人過多,
- 官奴還奏衞州有糧可取 「還」原作「遂」。按上文「已遣官奴將三百騎探漚麻岡未還」,此「遂」
- 〔三〕遣近侍局提點移刺粘古 「粘」原作「粘」"據殿本改。

顯爲「還」之誤。 今改。

- 合喜及楊斡烈等 陆 四年十一月記此事皆作「楊斡烈」。 「斡」原作「幹」。按本書卷一四宣宗紀貞祐四年十一月及卷一三四西夏傳貞 今據改。
- 遣提控烏古論世顯率偏師敗之 「顯」原作「鮮」。按本書卷一三四西夏傳」「興定四年四月,夏

三鳥古論長壽傳亦皆作「世顯」。同音異譯,今統一作「世顯」。

- 從在東宫日立十三都尉 按本書卷四四兵志,「天興初元,有十五都尉」。
- (1次) 壬寅曹王入辭 「寅」原作「辰」。按本書卷一七哀宗紀,正大九年三月「庚子,封荆王子訛可爲

曹王,議以爲質」。「壬寅,尚書左丞李蹊送曹王出質」。「壬辰」在「庚子」前,顯然不合,作「壬

寅」是。今據改。

- □+□ 其守城之具 「守」原作「攻」,據文義改。
- [15] 壬戌合喜以大兵退 「戌」原作「午」。按本書卷一一六石蓋女魯歡傳,正大九年「三月壬午朔」,

四月無壬午。卷一七哀宗紀,正大九年「四月丁巳,遣户部侍郎楊居仁奉金帛詣大元兵乞和。

戊午,又以珍異往謝許和」。本卷下文合喜云,「罷攻已三日而不入賀」,依日數計之,「壬午」當

是「壬戌」之誤,今據改。

- 顏盞蝦嫲等功也 射應募……賜姓顧盞」。今據改。 「顔盞」原作「石盞」。按本書卷一二四郭蝦蠏傳、「興定初,與兄禄大俱以善
- [110] 舉措煩擾 「措」原作「捪」,據殿本改。

金史卷一百十四

列傳第五十二

白華 斜卯愛實 合周附 石抹世勣

納,城下索妻孥,又不從,計無所出,乃狼狽而北,止求自免,無他慮也。」華因是爲上所知。 訛言劉大帥來,欲屠城中北人耳。 月庚申,〔三集百官議和宋。 及於眞定,宜及此大舉,以除後患。」時院官不欲行,卽遣華相視彰德,實擠之也,事竟不行。 取邢、洛、磁等州。華上奏曰:「北兵有事河西,故我得少寬。今彭義斌招降河朔郡縣,駸駸 院經歷官。二年九月,自武仙以真定來歸,朝廷方經理河北,宋將彭義斌乘之,遂由 三年五月,宋人掠壽州,永州桃園軍失利,死者四百餘人。時夏全自楚州來奔。十一 白華字文舉,隩州人。〔1〕貞祐三年進士。初爲應奉翰林文字。 上問全所以來,華奏:「全初在盱眙,從宋帥劉卓往楚州。州人 衆軍怒,殺卓以城來歸。全終不自安,跳走盱眙,盱眙不 正大元年,累遷爲樞密 山東

全至後. ,盱眙、楚州,王義深、張惠、范成進相繼以城降。 韶改楚州爲平淮府,以全爲金源郡

王、平淮府都總管,張惠臨淄郡王,義深東平郡王,成進膠西郡王。 和宋議寢

四年,李全據楚州,衆皆謂盱眙不可守,上不從,乃以淮南王招全,全曰:「王義深、范成

進皆我部曲而受王封,何以處我。」竟不至。

是歲,慶山奴敗績于龜山。 。五年秋,增築歸德城,擬工數百萬,宰相奏遣譁往相役,華

見行院溫撒辛、語以民勞、朝廷愛養之意、減工三之一。溫撒、李辛賜姓也。

華諭之曰:「李全據有楚州,睥睨山東,久必爲患。今北事稍緩,合乘此隙令定住權監軍,率 望,天下之人寧不知逆順,其肯去順 狐穴塚待夜而出,何足介懷。我所慮者北方之强耳。今北方有事,未暇南圖,一旦事定,必 事,卿等以爲何如?」華對曰:「臣以爲李全借大兵之勢,要宋人供給餽餉,特一猾寇耳。 老 所統軍一千,別遣都尉司步軍萬人,以壁、仲澤爲參謀,同往沂、海界招之,不從則以軍馬從 不軌之謀,亦當 來攻矣。 六年,以華權樞密院判官。上召忠孝軍總領蕭察定住、經歷王仲澤、戶部郞中刁璧及 與我爭天下者此也,全何預焉。 |發於北朝息兵之日,當此則我易與矣。| 上沉思良久曰::「卿等且退,容我更 而從逆乎。 若北方事定,全將聽命不暇,設不自量,更有非 爲今計者,姑養士馬,以備北方。使全果有

思。」明日,遺定住還屯尉氏

屢承 公府 爲齟齬,害事 並立、慮一旦有警、節制不一、欲合二府爲一、又恐其不和、命華往經畫之。 面 時陝西兵大勢已去,留脫或欒駐慶陽以擾河朔,且有攻河中之耗,而衞州帥府與恒山 諭云:「汝爲院官,不以軍馬責汝。 ,非細,今以汝調停之,或有乖忤,罪及汝矣。院中事當一一奏我,汝之職也。 汝辭辯,特以合喜、蕭阿皆武夫,一語不相入,便 初,華在院

今衞州之委,亦前

日

調停之意。」

軍馬糧草器械、軍帥部曲名數、與夫屯駐地里阨塞遠近之類,凡省院一切事務,顧問之際一 省左右司官同立奏草,圓覆諸相無異同,則右司奏上。 定 院議事,皆以一人主之。承受聖旨者,凡院官奏事,或上處分,獨召奏事官付之,多至一二 不能應,輒以不用 每嫌辭費,必欲言簡而意明,退而奉行,卽立文字謂之檢目。 百言,或直傳上旨,辭多者卽與近侍局官批寫。 歸院亦立檢目,呈覆。 國 制,凡樞密院上下所倚任者名奏事官,其目有三,一曰承受聖旨,二曰奏事,三曰省 心被譴,其職爲甚難,故以華處之。 有疑則復禀,無則付掾史施行。 奏事者,謂事有區處當取奏裁者殿奏,其奏 此三者之外又有難者,曰備顧問,如 其赴省議者,議既定,留奏事官與 省院官殿上議事則默記之,議

觀北勢。 五 月,以丞相賽不行尚書省事於關中,四蕭阿率完顏陳和尚忠孝軍一千駐邠州,且令 如是兩月,上謂白華曰:「汝往邠州六日可往復否。」華自量日 可馳三百,應之

列

戰於近邊之險隘。」上亦以爲然。 入界已三百餘里,若縱之令下秦川則何以救,終當一戰摧之。與其戰於近裏之平川,不若 之事梗之,不能專意北方,故以北向爲難。今日異於平時,況事至於此,不得不一舉。 來凡語及征進,必有難色,今此一舉特銳於平時,何也。」華曰:「向日用兵,以南征及討李全 曰:「可。」上令密諭蒲阿纔侯春首,當事慶陽。華如期而還。 上一日顧謂華言:「我見汝從

講武之義,各令防本州府城,以今見在九十七萬,無致他日爲資敵之用。」 及馬軍都尉司步軍足爲一戰之資,此外應河南府州亦須簽揀防城軍,秋聚春放,依古務農 七年正月,慶陽圍解,大軍還。白華上奏:「凡今之計,兵食爲急。除密院已定忠孝軍 五月,華眞授樞密判官,上遣近侍局副使七斤傳旨云:「朕用汝爲院官,非責汝將兵對

壘,第欲汝立軍中綱紀、發遣文移、和睦將帥、究察非違,至於軍伍之閱習、器仗之修整,皆 汝所職。其悉力國家,以稱股意。」

勉强,恐無益而反害也。」因遣白華與右司郎中夾谷八里門道宰相百官所言,幷問以「目今 蜂起,以至諸相力奏上前。上曰:「合達、蒲阿必相度機會,可進而進耳。若督之使戰,終出 金軍自閺鄉屯至澠池,兩行省晏然不動。宰相臺諫皆以樞院瞻望逗遛爲言,京兆士庶橫議 八年,大軍自去歲入陝西,翱翔京兆、同、華之間,破南山砦栅六十餘所。 已而攻鳳翔, 列 傳 第 五 十 二 一 白 華

塔起 陳和 軍出 是眞 二相 意。合達言:「不見機會,見則動耳。」蕭阿曰:「彼軍絕無糧餉,使欲戰不得,欲留不能,將自 諭二相云:「鳳翔圍久,恐守者力不能支。行省當領軍出關宿華陰界,次日及華陰,次日及 方得君,不敢與抗,而亦言不可動。 **敝矣。」合達對蒲阿及諸帥則言不可動,見士大夫則言可動,人謂合達近嘗得罪,又畏蒲阿** 如 二月過半,有怠歸之形,諸軍何故不動」。且詔華等往復六日。 之何 尙 關二十里至華陰界,與渭北軍交,是晚收軍入關」,華爲之仰天浩嘆曰:「事至於此,無 不 遷居民 廻奏領旨。 矣。」 敢動。」華等還,以二相及諸將意奏之,上曰:「我故知其怯不敢動矣。」即復遣華傳旨 以爲 與渭北 華至 於河南、留慶山奴守之。 何如,三人者皆曰:「他人言北兵疲困故可攻,此言非也。 軍交手。 |京,奏章已達,知所奏爲徒然,不二三日鳳翔陷,兩行省遂棄京兆,與牙古 華東還及中牟,已有兩行省納奏人追及,華取報密院副本讀之,言「領旨提 計大兵聞之必當奔赴,且以少紓鳳翔之急,我亦得爲掣肘計耳。」 華等觀二相見北兵勢大皆有懼心,遂私問樊澤、定住、 華等旣到同,諭兩行省以上 大兵所在豈可輕料,

廷覘 兩行省乃約宋 夏五 知之,以 月 楊妙眞 謂 帥 北軍果能渡 趙范、趙葵爲夾攻之計。 以 夫李全死於宋, 構浮橋於楚州之北, 就北帥梭魯胡吐乞師復讎。 淮,淮與河南跬步間耳,遣合達、蒲阿駐軍桃源界激河口備之。 二趙亦遣人報聘,俱以議和爲名,以張聲勢。二

蒲阿遣水軍虹縣所

屯王提

耳。 歸路。 淮與河合流處,纔及八里莊城門相直,城守者以白鷂大船五十泝流而 控者以小船二十四隻令華順河而下,必到八里莊城門爲期,且曰:「此中望八里莊 將還即閉門不納,渠已奔去楚州,乞發軍馬接應。」二相卽發兵騎、 慰,又知楚州大軍已還河朔,宋將燒浮橋,二相附華納奏,上大喜。 天上,省院端坐徒事口吻,今樞判親來可以相視可否,歸而 可否。」奏上,上遣白華以此傳諭二相,兼領王銳行。二相不悅。 是夜二更後,八里莊次將遣人送款云:「早者主將出城開船,截大金歸路,某等商議,主 華幾不得還,昏黑得徑先歸,乃悟兩省怒朝省不益軍,謂皆華輩主之,故擠之險地 奏之。」華力辭不獲, 開船赴約,明旦入城安 上,占其 上流以截華 遂登舟, 如在雲間 及

而 之,郭恩爲元帥右都監。 官郭恩送款于金,胡還不納,慟哭而去。合達遂入淮陰,詔改歸州,以行省烏古論葉里哥守 取之,或報之于盱眙帥府,卽以軍至,恩不果發。明日,宋將劉虎、湯孝信以船三十艘燒 初,合達謀取宋淮陰。五月渡淮。 旣而,宋人以銀絹五萬兩匹來贖盱眙龜山,宋使留館中,郭恩謀劫 淮陰主者胡路鈴往楚州計事於楊妙眞, **比還,提正**

單塔刺 梁,因遣其將夏友諒來攻盱眙,未下。泗州總領完顏矢哥利舘中銀絹,遂反。防禦使徒 聞變,扼罘山亭甬路,好謂之曰:「容我拜辭朝廷然後死。」遂取朝服望闕拜,慟良久,

投亭下水死。 矢哥遂以州歸楊妙眞,總帥納合買住亦以盱眙降宋。

必當遲疑不進。 人。」華曰:「臣愚見如此。」上平日銳於武事,聞華言若欣快者,然竟不行。 日,白華奏,偵候得睿宗所領軍馬四萬,行營軍一萬,布置如此,「爲今計者與其就漢禦 諸軍比到可行半月,不若徑往河中。目今沿河屯守一日可渡,如此中得利,襄、漢軍馬 九月,陝西行省防秋,時大兵在河中,睿宗已領兵入界,慶山奴報糧盡,將棄京兆而東。 在北爲投機,在南爲掣肘,臣以爲如此便」。上曰:「此策汝畫之,爲得之他

外,放我師 此 上 大兵軍少而精,無非選鋒。 未幾,合達自陝州進奏帖,亦爲此事,上得奏甚喜。 蒲阿時在洛陽,驛召之,蓋有意於 曰:「朕不問此,只欲問河中可擣否。」蒲阿不獲已,始言睿宗所領兵騎雖多,計皆冗 蒲阿至,奏對之間不及此,止言大兵前鋒成木陽統之,將出冷水谷口,且當先禦此 渡,然後斷我歸路與我決戰,恐不得利。」上曰:「朕料汝如此,果然。 金軍北渡,大兵必遣輜重屯於平陽之北,匿其選鋒百里之 更不須再

論,且還陝州。

一浦

阿曰:「合達樞密使所言,此間一面革撥恐亦未盡,乞召至同議可否。」上

|此而已,往復遲滯,轉致誤事。」|華奏合達必見機會,召至同議爲便。

「見得合達

亦止

見。 事 何如。」合達曰:「是矣。」遂入見。 樞赤盞合喜亦奏瀟阿、白華之言爲是。 與前 旣議 日上奏時勢不同,所奏亦不敢自主,議遂寢。 十二月,河中府破 ,華執合達奏帖舉似再三,竟無一先發言者。移時,蕭阿言:「且勾當冷水谷一軍 上問卿等所議若何,合達敷奏,其言甚多,大概言河中之 上乃從之。 召合達至, 上令先與密院議定, 然後入 二相還陝,量以軍馬出冷水谷,奉行故

院官獨任專見,往往敗事。 罷。 忽魯刺有口辯,至上愛幸之。 官,左右司首領官兼經歷官,惟平章白撒、副樞合喜、院判白華、權院判完顏忽魯刺退罷。 金制,樞密院雖主兵,而節制在尚書省。 九 (年,京城被攻,四月兵退,改元天興。 是月十六日, 併樞密院歸尚書省, 以宰相兼院 言者多以爲將相權不當分,至是始倂之。 朝議罪忽魯剌,而書生輩妬華得君, 兵興以來,茲制漸改,凡在軍事,省官不得預, 先嘗以語揻之, 用是而

斷絕, 附庸之事,聖主亦得少寬矣。」於是起華爲右司郎中。 任其裁處。 「今耕稼已廢,糧斛將盡,四外援兵皆不可指擬,車駕當出就 十二月朔,上遣近侍局提點曳剌粘古卽白華所居,問事勢至於此,計將安出。 京師今付之荆王,乞我一二州以老耳。 聖主旣出,遣使告語北朝,我出非他處收整軍馬,止以 如 此則 太后皇族可存,正 初, 親巡之計決,諸將皆預其議,將 外兵,可留皇兄荆王使之監國 軍 卒擅誅唐慶,和議從此 如春秋紀季入齊爲 華附奏:

退, 首領官張衮、聶天驥奏:「尚有舊人諳練軍務者,乃置而不用,今所用者皆不見軍中事

體,此爲未盡。」上問 、未用者何人,皆曰院判白華,上頜之,故有是命

矣。 地不、元帥 避遷之計, 戰,所以然者何,我軍食力猶在,馬則豆力猶在。 直 욝 以 或言可沿 爲 赴汝州, 斷 若我 如 明 不能 何?」華曰:「歸德城雖堅,久而食盡,坐以待斃,決不可往。 日,召華諭之曰:「親巡之計已決,但所往羣議未定,有言歸德四面皆水可以自保者, 軍 西山入鄧。或言設欲入鄧,大將速不解今在汝州,不如取陳、蔡路轉往鄧下。 往。 猪兒、高顯、王義深俱主歸德之議,丞相賽不主鄧,議竟不能 人心 與之一決,有楚則無漢,有漢則無楚。 ·便得戰,存亡決此一舉,外則可 以今日事勢,博徒所謂孤注者也。 顧戀家業,未必毅然從行。 以激三軍之氣,內則可以慰都人之心。或止 可詳審之。」遂召諸相及首領官同議,不速嘉 若出京益遠,軍食日滅,馬食野草,事益 汝州戰不如半塗戰,半塗戰又不如出 孤注云者,止有背城之戰。爲今之計當 欲往鄧下,旣汝州有速 決。 卿 難 城 不 兀

奏 軍 云:「汝輩把 帥 明 高 聖 日,制旨京城食盡,今擬 顯 主 爲 鋤 不 步 ·可親 不 軍 知 帥, 高 出,至 下,國家大事,敢易承邪。」衆默然,惟官奴曰:「 劉益 止可命將, [六] 三軍欣然願爲 副之, 親出,聚集軍士於大慶殿「台」諭以此意,諭訖,諸帥將佐 蓋採輿議也,而三 人者亦欲 國家效死。」 奉 命。 上猶豫,欲以 若將相可了, 權 參政 內族 官奴 何至使我 訛 出 一合辭 大 属

列

傳

第

輩。」事亦中止。

車駕至黃陵岡,復有北幸之議,語在白撒傳。 華都改却,今往汝州就軍馬索戰去矣。遂擇日祭太廟誓師,擬以二十五日啓行。是月晦, 卜吉、完顏正夫議,餘人不預。移時方出,見首領官、丞相言,前日巡守之議已定,止爲一白 倶餓死矣。 明日,民間鬨傳車駕欲奉皇太后及妃后往歸德,軍士家屬留後。 目今食盡,坐視城中 縱能至歸德,軍馬所費支吾復得幾許日。上聞之,召賽不、合周、訛出、鳥古孫

可當發詔時不爲後慮,皆量決之。 北,恐生他變,可下詔安撫之。是時,在所父老僧道獻食,及牛酒犒軍者相屬,上親爲拊慰, 河南詔書,儻落大軍中,奈泄事機何。」上怒,委近侍局官傳旨,謂首領官張袞、白華、內族訛 人人爲之感泣。乃赦河朔,招集兵糧,赦文條畫十餘款,分道傳送。 二日,或有云:「昨所發 天興二年正月朔,上次黃陵岡,就歸德餫船北渡,諸相共奏,京師及河南諸州聞上幸河

不知之耶。」華遂問其由,訛可云:「我昨日已知上欲與李左丞、完顏郎中先下歸德,令諸軍 顏胡魯刺秉筆書,某軍前鋒,某軍殿後,餘事皆有條畫。書畢,惟不言所往,華私問胡魯刺, 以不知。是晚,平章及諸帥還蒲城軍中。夜半,訛可、滚就華帳中呼華云:「上已登舟,君 是時,衞州軍兩日至蒲城,而大軍徐躡其後。十五日,宰相諸帥共議上前,日郎中完

國 幹,又改均州提督,後范用吉殺均之長吏送款于北朝,遂因而北歸。 古之兄瑗爲鄧州節度使、兼行樞密院事,其子與粘古之子並從駕爲衞 叛,爲同列 所言動 至鄧,以事久不濟,淹留于舘,遂若無意於世者。 入援,粘古因與華謀同之鄧,且拉其二子以往, 敢。」是夜,總帥百家領諸軍舟往鳳池,大軍覺之,兵遂潰。 里 並 |矣。」|華又問:「公何不從往。」」云:「昨日擬定首領官止令||胡魯刺登舟,餘悉隨軍,用 危不能以義自處爲貶云。 一北岸行,至鳳池渡河。今夜,平章及禾速嘉、元帥官奴等來,言大軍在蒲城曾與金軍接 勢莫能支,遂擁主上登舟,軍資一切委棄, 趙怒其 用 上 略 吉者,本姓孛术魯,名久住。 |在歸德。三月,崔立以汴京降,右宣徽提點近侍局移剌粘古謀之鄧,上不聽。 不 所 加疑,遂易其姓曰花,使爲太尉,改鎭均州。 觸諱,斥之,用吉猶應對 害。 如故。 初歸 入宋,謁制置趙范,將以計動其心,故更姓名范用 趙良久方悟,且利其事 **,止令忠孝軍上船,馬悉留營中。** 上覺之,獨命華行,而粘古改之徐州。 會暖以鄧 未幾,納款于北。 入宋,華亦從至襄陽,宋署爲制 與 、己符, 士大夫以華夙儒貴顯, 士。 適朝廷將召 後以家 **逐**權置 計舟已行數 人誣以欲 左右, |野兵 時粘 華旣

凡

氣不作, 其言果可行乎。從暖歸宋,聲名掃地,而猶得列於。金臣之傳者,援獨譙周等 白華以儒者習吏事,以經生知兵,其所論建,屢中事機,然三軍敗衄之餘,士

爲命,初不敢俾之出戰,特以外議鬨然,故暫出以應之云。 爲我作主人。」蓋世俗酬謝之意也。明日,大兵遂合,朝廷置而不問。[10]於是愛實上言曰: 局使,監其軍。行至封丘而還。入自梁門,樞密副使合喜遇之,笑語撒合曰:「吾言信矣,當 月,聞大兵將至,以點檢夾谷撒合爲總帥,率步騎三萬巡河渡,命宿直將軍內族長樂權近侍 不敢進。設遇大兵,其肯用命乎。乞斬二人以肅軍政。」不報。蓋合喜輩以京師倚此一軍 「撒合統兵三萬,本欲乘大兵遠至,喘息未定而擊之。出京纔數十里,不逢一人騎,已畏縮 斜卯愛實字正之,策論進士也。正大間,累官翰林直學士,兼左司郎中。天興元年正

十年,鎬厲宅四十年。(三)正大間,朝臣屢有言及者,不報。 愛實乃上言曰:「二族衰微,無異 **衞紹、鎬厲二王家屬,皆以兵防護,且設官提控,巡警之嚴過於獄犴。 至是,衞紹宅二**

兵,姑老不能爲養,故雜蓬粃以自食耳,非敢以爲軍儲也。且三升,六斗之餘。」不從,竟死 第五十二 斜 卯 愛 質

尙且不忍,況骨肉乎。」哀宗感其言,始聽自便。 未幾,有靑城之難。 匹庶,假欲爲不善,孰與同惡。男女婚嫁,人之大欲,豈有幽囚終世,永無伉儷之望,在他人

兼將相之權。 右丞顏盞世魯居相位已七八年,碌碌無補,備員而已。 患難之際,倚注此類, 不分,更謂乏材,亦不至此人爲相。參政無樞密副使亦盞合喜粗暴,一馬軍之材止矣,乃令 愛實憤時相非其人,嘗歷數曰:「平章白撒固權市恩,擊丸外百無一能。丞相賽不菽麥

備。八月、括京城栗、以轉運使完顏珠顆、張俊民、曳刺克忠等置局,以推舉爲名、珠顆論民 曰:「汝等當從實推唱,果如一旦糧盡,令汝妻子作軍食,復能吝否。」旣而,罷括粟令,復以 欲冀中興難矣。」於是,世魯罷相,賽不乞致仕,而白撒、合喜不恤也。 是年四月,京城罷攻,大兵退。旣而,以害唐慶事,和議遂絕。於是,再簽民兵爲守禦

進獻取之。

匿者以升斗論罪。京城三十六坊,各選深刻者主之,內族完顏久住尤酷暴。有寡婦二口, 實豆六斗,內有蓬子約三升,久住笑曰:「吾得之矣。」執而以令于衆。婦泣訴曰:「妾夫死於 事,與左丞李蹊總其事。先令各家自實,壯者存石有三斗,幼者半之,仍書其數門首,敢有 前御史大夫內族合周復冀進用,建言京城括粟可得百餘萬石。朝廷信之,命權參知政

爲和氣。」不報。 稷耶,存百姓耶。」當時皆莫敢言,愛實遂上奏,大概言:「罷括粟,則改虐政爲仁政,散怨氣 合周,周曰:「人云『花又不損,蜜又得成』。予謂花不損,何由成蜜。 且京師危急,今欲存社 京師聞之股栗,盡投其餘于糞溷中。或白於李蹊,蹊顰蹙曰:「白之參政。」其人卽白

留守,後不知所終。 爲奴隸,置至尊何地耶。」上益怒,送有司。近侍局副使李大節從容開釋,乃赦之,出爲中京 使令之材,使預社稷大計,此輩果何所知乎。」章旣上,近侍數人泣訴上前曰:「愛實以臣等 聞之,命出太倉米作粥以食餓者,愛實聞之歎曰:「與其食之,寧如勿奪。」爲奉御把奴所告。 不過供給指使而已,雖名僕臣,亦必選擇正人。今不論賢否,惟以世胄或吏員爲之。夫給 又近侍干預朝政,愛實上章諫曰:「今近侍權太重,將相大臣不敢與之相抗。自古僕御之臣 時所括不能三萬斛,而京城益蕭然矣。自是之後,死者相枕,貧富束手待斃而已。上

已至,合周竟不出兵,遂失潼關。有司以敵至不出兵當斬,諸皇族百餘人上章救之,上曰: 復用。四年,以御史大夫權尚書右丞,總兵陝西。合周留澠池數日,日司進及京兆,而大兵 合周者一名永錫。貞祐中,爲元帥左監軍,失援中都,宣宗削除官爵,杖之八十。已而

詩詞,語鄙俚,人采其語以爲戲笑。 語,以「而」作「兒」,掾史知之不敢易也。 向向 陝西,所犯乃爾,國家大法豈敢私耶。」遂再奪爵,免死除名。至是,爲參知政事。 合周救中都,未至而軍潰,使宗廟山陵失守,罪當誅,朕特寬貸以全其命。尋復重職,今 因自草括栗榜文、有「雀無翅兒不飛、蛇無頭兒不行」等 京城目之曰「雀兒參政」。 哀宗用而不悟,竟致 性好作

年,登詞賦、經義兩科進士第。貞祐三年,累官爲太常丞,預講議所事。 幾,遷同知金安軍節度使。 本業,收其晚禾,至春復還爲固守計。」會侍御史劉元規亦言給田不便,上大悟,乃罷之。未 未敢遽減。彼旣南來,所捐田宅爲人所有,一旦北歸,能無爭奪。 河南,宰職議給以田,世勣上言曰:「荒閑之田及牧馬地,其始耕墾,費力當倍,一歲斷不能 若奪民素蒔者與之,則民將失所,且啓不和之端。況軍戶率無耕牛,雖或有之,而廪給 石抹世勣字景略。幼勤學,爲文有體裁。承安二年,以父元毅死王事,收充擎執。五 切謂宜令軍戶分人歸守 時朝廷徙河北軍戶

興定二年,選爲華州元帥府參議官。 傅 第 五. + = 石抹世 勣 初,右都監完顏合達行帥府于楨州, 嘗以前同知

事。」遂獨用世勣焉。

平涼府事卓魯回蒲乃速爲參議,及移駐華州,陝西行省請復用蒲乃速,令世勣副之。上曰: 「蒲乃速但能承奉人耳,餘無所長,非如世勣可任以事。 |華爲要鎭,而輕 用 其 人,或致敗

者,覆察不如所舉,未籍行止中。後主者舉覺,平章英王以世勣避都司之繁,私屬治籍吏冀 書,兼翰林侍講學士。 改他職,奏下有司,故有是責。 久之,起爲禮部侍郎,轉司農,改太常卿。 正大中,爲禮部尙 尋入爲尙書省左司郎中。 元光元年,奪一官,解職。 初,世勣任華州,有薦其深通錢穀

知 出爲愈也。」上曰:「卿等不知,我若得完顏仲德、恒山公武仙付之兵事,何勞我出。我豈不 惹、完顏長樂皆小人也。 曰:「我此行豈復有還期,但恨我無罪亡國耳。我未嘗奢侈,未嘗信任小人。」世勣應聲曰: 軍出戰。 何言`世勣曰:「臣等聞陛下欲親出`切謂此行不便。」上曰:「我不出、軍分爲二,一軍守,一 「陛下用小人則亦有之。」上曰:「小人謂誰。」」世勣歷數曰:「移刺粘古、〔〕己溫敦昌孫、兀撒 今日將兵者,官奴統馬兵三百止矣,劉益將步兵五千止矣,欲不自將得乎。」上又指御楊 天興元年冬,哀宗將北渡,世勣率朝官劉肅、田芝等二十人求見仁安殿。上問卿等欲 我出則軍合爲一。」世勣曰:「陛下出則軍分爲三,一守、一戰、一中軍護從,不若不 陛下不知爲小人,所以用之。」肅與世勣復多有言,良久,君臣涕泣

而別。 初,肅等求見,本欲數此四人。至是,世勣獨言之,於是哀宗以世勣從行。 自蒲城至

歸德。明年六月,走蔡州,次新蔡縣之姜寨。

以便養親。 世勣子嵩,時爲縣令,拜上於馬前,兵亂後父子始相見。上嘉之,授嵩應奉翰林文字,

爲忠讜,則不可廢也。 田之不便,親出渡河之非計,皆藥石之言也。 贊曰:愛實言衞、鎬家屬禁錮之虐,京城括粟之暴,近侍干政之橫; 世勣言河北軍戶給 然金至斯時,病在膏肓間矣,倉扁何施焉。 其

校勘記

隩州 人 「隩」原作「渙」。按本書卷二六地理志,河東北路有隩州,今據改。

二年九月 按本書卷一七哀宗紀作正大二年「夏四月辛卯朔,恒山公武仙自眞定府來奔」。

正大三年「十一月庚申、議與宋修好」。 月庚申 「十一月」原作「十月」。 按正大三年十月癸未朔,無庚申。 今據改。 本書卷一七哀宗紀作

列傳第五十二 校勘記

- 五月以丞相賽不行尚書省事於關中 按本書卷一七哀宗紀作正大六年二月丙辰,「以丞相完
- 顏賽不行尚書省事于關中」。
- [五] 忽魯刺有口辯 原脫「剌」字,據上下文補。
- C*】聚集軍士於大慶殿 「大」原作「木」、據殿本改。
- 〔4〕 聖主不可親出 「主」原作「旨」,據殿本改。
- [八] 止可命將 「止」原作「正」、據殿本改。一
- 十五日宰相諸帥共議上前 撒引兵攻衞州不克。乙卯十日,聞大元兵自河南渡河至衞之西南,遂退師。 蒲城,復還魏樓村。己未十四日,上以白撒謀,夜藥六軍渡河,與副元帥、合里合六七人走歸德。庚 申十五日,諸軍始知上已往,遂潰」。所謂「宰相諸帥共議上前」當在十三日戊午進次滿城之時。 按本書卷一八哀宗紀,天興二年「正月丙午朔,濟河。辛亥六日,白 戊午十三日,上進次
- 明日大兵遂合朝廷置而不問 年正月記此事作「甲午、大元兵薄鄭州、與白坡兵合」。今據改。 「大」原作「金」、與上下文義不貫。按本書卷一七哀宗紀,天興元

「五」似爲「三」之誤。

至是衞紹宅二十年鎬厲宅四十年 永中傳了永中子孫禁錮,自明昌至于正大末,幾四十年」。卷九三從恪傳贊云:「衞紹歷年不永, 原作「衞紹宅四十年,鎬厲宅二十年」。按本書卷八五鎬王 記

據改。

合周留澠池數日 「澠」原作「沔」、今改。參見本書卷二五地理志校記[12]。

移剌粘古 「粘」原作「粘」,據殿本改。

